

Роберт Луис Стивенсон

МЕРОСХҮР

«ЧУЛПОН»  
Тошкент  
1991

Таржимон Набижон БОҚИЙ

Муҳаррир Шойим БЎТАЕВ

C 4804010100 — 57  
M 360 [04] — 90      доп — 90

ISBN 5-8250-0226-X

© Р. Стивенсон, 1991 йил.

М Е Р О С Х У Р  
Е к и  
Д э в и д Б э л ф у р н и н г  
с а р г у з а ш т л а р и

Шул ҳақдаким, йигитча ўғирланади, денгизда кема ҳалокатига учрайди, кимсасиз оролда мисли кўрилмаган азоб-уқубатларни бошидан кечиради, одамзод оёғи етмаган тоғу тошларда сарсон-саргардон бўлади; тақдир тақозоси билан Алан Брек Стюарт ва бошқа фидокор шотланд якобинчи<sup>1</sup>ларига йўлиқади. Қолаверса, ҳеч қандай ҳақ-ҳуқуқи бўлмаса-да, ўзини Шос кўргонининг хўжайини деб эълон қилган манфур амакиси Эбенезер Бэлфурнинг адолатсиз ғазабига учрайди — жабрланади. Ушбу воқеалар қаҳрамонларнинг ўз қўллари билан ёзиб қолдирилган, эндиликда Роберт Луис Стивенсон уни сизнинг ҳукминингизга ҳавола этади.

---

<sup>1</sup>Якобинчилик — XVIII аср ўрталарида Фарбий Оврупо мамлакатларида бошланган инқилобий ҳалқ ҳаракати. Якобинчилар инсонхурлиги учун курашганлар.

## БАФИШЛОВ

Азизим Чарлз Бакстер!

Агар вакти-соати келиб, ушбу қиссани ўқиб қолсангиз, кўнглиңгизда бирталай саволлар туғилиши турган гап. Афсуски, Сизга қониқарли жавоб беролмайман — бу менинг қўлимдан келмайди. Масалан: «Ие, наҳотки, Эпиндаги қотиллик айнан 1751 йили рўй берган бўлса; қандай мўъжиза туфайли Торренскп қоялари нақ Иррейд пойига сурилиб қолди экан?» ёки «Матбуотда эълон қилинган мақолаларда Дэвид Бэлфор тўғрисида лом-мим дейилмаганини қандай тушуниш мумкин?» деб сўрашингиз мумкин. Мен бундай ёнғоқларни чақолмайман — тишим ўтмайди. Аммо: «Алан айборми ёки айбдор эмасми?» деб қайта-қайта сўрайдиган бўлсангиз, мен китобда баён этган тахминий фикрларим учун бошим билан жавоб беришга тайёрман. Эпинда тарқалган ривоятлар ҳозир ҳам Аланнынг бегуноҳ эканини тасдиқлайди. Ишонмасангиз, ўзингиз, «ўша» ўз қўли билан ўқ узган кишини сўраб-суриширинг, эҳтимол, унинг авлодларини ҳозир ҳам излаб топиш мумкин, деган жавобни эшитсангиз ажаб эмас. Ростини айтсам, қанчалик жон куйдирманг, бари бир «ўша» одамнинг номини аниқлай олмайсиз: Шотландия тоғликлари сир сақлашни қойил қиласидилар, ташаббуси уларнинг жисму жонига қўшиб сингдирилади. Мен мана шу йўсинда эрталабгача муайян ҳолатнинг аслига тўғри эканини зўр бериб ҳимоя қилишим ва айни чоқда бошқа ҳар қандай ҳолатни шубҳа остида қолдиришим мумкин. Лекин аниқликка итоат этишга унчалик ҳушим ҳам, ишим ҳам йўқлигини бирйўла бўйнимга олиб қўя қолсам тузук бўлмайдими? Бу қисса олимлар фойдаланадиган дастурамал эмас; унинг жойи — уй вазифаларини бажариб бўлиб, узун қиши кечаларини қандай ўтказишни билмай, ноилож ўринга кираётган ўқувчининг ётоқхонаси дир. Аслида, хийла оғир-вазмин, жангари шахс — ҳалол Алан ўзининг янги ҳаётида фақат жанговарликни тарғиб этиш билан

шүғулланмайди: Овидий асарларига мүккасидан кетиб қолган баъзи ёш дўстларимни маълум муддат ўтган асрларга ошно этмоқчиман, уларни Шотландия тоғлари бўйлаб саёҳатга чорлайман ва ўринга киргандаридан кейин ширин-ширин, жозибадор тушлар кўриб ухлашларини истайман.


Қадрдоним Чарлз, бу китоб кўнглингизга йўл топа олишига кўзим етмайди. Аммо ўғлингиз вояга етгач, қисса унга ёкиб қолиши мумкин; балки у ўз отасининг исмини китоб бошламасидан кўриб хурсанд бўлар. Ҳозир эса кўпгина баҳтли кунларимизу баъзан бошимизга ёғилган кулфатлар хотираси сифатида Сизнинг номингизни яна бир бор эслаетганимдан, уни шу ўринда муҳр этаётганимдан бағоят хурсандман.

Шутобда ёшлигимизда рўй берган ғаройиб саргузаштларни хаёлимга келтирсам, беихтиёр юрагим ҳаприқади — ўзимни қўярга жой тополмай қоламан. Сиз ҳам ёқангизни ушласангиз керак-а?! Қанча ийллар, қанча замонлар ўтиб кетди-я! Кишини ғалат кайфият чулғаб олиши тайин. Чунки Сиз ҳар куни ўша кўчалардан ўтасиз; эртагаёқ кўхна мунозара клубининг эшикларини очишингиз мумкин — у ерда бизни ҳозирданоқ Скотт, Роберт Эммет ва унчалик машҳур бўлмаса-да, лекин кизғин муҳаббатга сазовор Макбин билан бир каторга кўйишмоқда. Шунингдек, Сиз шавкатли *L. J. R.*<sup>1</sup> жамиятининг аъзолари йиғилишадиган ибодатхона ҳовлиси ёнидан ўтишингиз мумкин: эсингиздами, қачонлардир шоири замон Бёрнс ошна-оғайнилари билан ўтирадиган ўша ўриндиқларга ястаниб олиб пиво ичардик.

Мен яққол тасаввур этяпман: дўстингиз фақат тушларида кўрадиган жойларни, ана, Сиз куппа-кундузи томоша қилиб, сарсари кезиб юрибсиз. Кундалик турмуш ташвишларидан фориғ бўлган дамларда ўтмишдан келаётган садолар қулоқларингиз остида тинимсиз жаранглаб турса не тонг! Илло, у дўстингиз ҳақидаги эзгу хотираларни тез-тез уйғотиб турсин.

Р. Л. С.  
Скерривор,  
Борнмут.

<sup>1</sup>Стівенсон аъзо бўлган талабаларнинг маҳфий жамияти, «*L. J. R.*» ҳарфлари тахминан инглизча «Liberty, Justice, Reverence» сўзлари-нинг қисқартма шакли бўлиб, «ОЗОДЛИК, ҲАҚКОНИЯТ, ҲАҚ-ХУҶУҚ» маъноларини англатади.



## Биринчи боб

### МЕН УЗОҚ САФАРГА — ШОС ҚҮРҒОНИГА ЖҮНАЯПМАН

Ўз саргузаштларим ҳақидағи ҳикояни 1751 йилнинг унтутилмас жавзо тонгидан бошлашни истардим. Ўша куни киндиқ қоним түкілган хонадон эшигини охирги марта қулфладим-да, калитни чұнтагимга солиб, йўлга чиқдим. Қуёш нурлари эндигина тоғ чўққиларида жилвалиана бошлаган эди. Ана-мана деб, руҳонийнинг уйига яқинлашган пайтим сирензорда қораялоқлар сайрашарди; субҳидамдан буён водийни қоплаб ётган туман пардаси кўтарилимоқда эди.

Эссендиннинг кўнгилчан руҳонийси мистер Кемпбелл каминани чорбоғ эшиги ёнида кутиб турган экан. У мендан, нонушта қилдингми, деб сўради. Қорним тўқ эканини билгач, қўшқўллаб сўрашди-да, қўлтиғимдан олди ва елкамга дўстона шапатилаб қўйди.

— Шунақа гаплар, қадрдоним Дэви,— деди у.— Мен сени дарёгача кузатиб бораману йўлни кўрсатиб қўйиб, изимга қайтаман.— Биз индамай қўзғалдик. Бирпасдан кейин у:— Эссендиндан бош олиб кетаётганинга ачинмаяпсанми? — деб сўради.

— Нима дейишга ҳайронман, сэр,— деб минғирладим.— Агар қаёққа кетаётганимни, пешонамга нималар ёзилганини билганимда борми, ҳеч иккиланмай жавоб қайтарардим. Эссендин — табаррук маскан, бу ерда

кўнгилдагидай яшадим, аммо умримда мусофиричилек бошимга тушмаган ахир. Отам ҳам, онам ҳам оламдан ўтдилар — энди мен Эссендинда яшайманми, Можористон қироллигидами бари бир, уларнинг дийдорини кўролмайман. Шунинг учун, ростини айтсам, агар хорижий юртларда муроди мақсадимга етажагимни билганимда, ўз уйимни тарқ этаётганимга сира ҳам ачинмасдим.

— Шунақами ҳали? — деди мистер Кемпбелл.— Начора, Дэви, тақдир экан-да. Хулласи калом, эрта-индин бошингга тушадиган воқеалардан огоҳ этиб қўймасам бўлмайди шекилли. Волидаи мукарраманг бандаликни бажо келтирган, отанг (у инсон номига муносиб зот ва мўмин христиан эди) тез-тез касал бўла бошлади: куни битиб бораётганини сезди, асраб қўйиш учун менга битта хат топшириди; унда сенга аталган мерос рақам этилганини таъкидлади. «Улганимдан кейин, қўлга илинадиган буюмлар сотилиб, хонадонимиз тартибга келтирилгач, мана шу хатни шахсан ўғлимга топширасиз ва уни Кремонд яқинидаги Шос қўрғонига кузатиб қўясим», деди. Дэви, марҳумнинг барча васиятлари адо этилди. «Мен ўша ерда туғилганман, ўғлим ота юртига қайтиши лозим. У азамат йигит, қўрқоқ одамлар тоифасидан эмас — жуда абжир, шубҳасизки, қўрғонга омон-эсон этиб олади ва ҳамманинг меҳрини қозонади», деган эди раҳматли отанг.

— Шос қўрғони?! — деб юбордим беихтиёр.— Шўрлик отамнинг Шос қўрғонига қандай алоқаси бор экан?

— Шошмай тур,— деди мистер Кемпбелл.— Худо билади. Мен сенга айтсам, азизим, қўрғон эгалари сизларга фамилиядош — уларни шосслик Бэлфурлар деб аташади: сўнгги пайтлари обрў-эътибори бир оз тўкилган бўлса-да, лекин кўхна шажара; ҳалоллиги учун ҳамма уларни ҳурмат қиласади. Қолаверса, отанг раҳматли ўқимишли киши эди. Аслида, бамаъни муаллим шунақа бўлиши лозим. Унинг мактаби намунали эди, гап-сўзларию муомаласи хашаки ўқитувчиларникига асло ўхшамасди. Эсингдами, мен обрўли кишиларни меҳмон қилган чоқларда отангни албатта уйимизнинг тўрига ўтқазиб қўярдим; килреннетлик Кемпбелл, дансвирилик Кемпбелл, минчлик Кемпбелл сингари қариндош-уруғларим ва бошка асилзода жентельменлар билан сухбатлашиб ўтиришни яхши кўришарди. Хўп майли, мана сенга васият қилинганд ҳат: марҳум

Биродаримиз ўз қўли билан адресни ёзиб қўйган.

У менга хатни берди, конвертга қўйидаги сўзлар битилган эди: «Шос қўрғони. Эсквайр Эбенезер Бэзифурнинг ўз қўлига топширилсин. Хатни менинг ўғлим — Давид Бэлфур элтиб беради».

Юрагим ҳаприқиб кетди: овлоқ Этрикс ўрмонидаги бечораҳол қишлоқ ўқитувчисининг ўн олти яшар ўғлига бирдан омад ёр бўлса-я! Ахир бу ҳазил гап эмас!

— Мистер Кемпбелл... агар менинг ўрнимда сиз бўлганингизда нима қиласдингиз? — деб сўрадим, ҳаяжондан тутилиб-тутилиб.

— Ўйлаб ўтирмасдан йўлга отланардим,— деб жавоб берди руҳоний.— Сенга ўхшаган тиқмачоқдай йигит Кремондга икки кундаёқ етиб боради. Айтмоқчи, у ёрдан Эдинбурггача бир қадам қолади, холос. Агар ишлар чаппасига кетсаю асилзода қариндошинг (тахминча, сизлар ҳарҳолда бегона эмассизлар) кетингга бир тепиб, кўчага чиқариб ташласа, бунинг қўрқадиган жойи йўқ: яна икки кунлик йўлдан сўнг эшигимни тақиллатишинг мумкин. Лекин, умид қиласанки, сени қучоқ очиб кутиб олишади, отангнинг ниятлари рўёбга чиқади. Насиб этса, вақти келиб катта одам бўлиб кетасан. Азизим Дэви, шу тобда — сен билан хайрлашишдан аввал, фурсатдан фойдаланиб оз-моз насиҳат қилиб қўймасам кўнглим жойига тушмайди. У нигоҳи билан ўтиргани жой қидирди ва йўл четидаги оқ қайин остида турган катта юмалоқ тошга кўзи тушдию унинг устига ўрнашиб ўтириб олди: офтобдан сақланиш учун дастрўмолини учбурчак шляпасининг тепасига ташлаб қўйди — икки қоя орасидан кўриниб турган куёш тўпла-тўғри бизнинг манглайимизга олов пуркарди. У кўрсаткич бармоғини фалакка ўқталганча ер юзи-даги кўпдан-кўп гуноҳлардан мени огоҳ эта бошлади, жумладан, каминани узлуксиз равишда Тавротни мутолаа қилишга унадади. Лекин руҳонийнинг маслаҳатлари мени қизиқтирмасди. Шундан сўнг у бадавлат хонадондаги ҳаёт манзарасини тасвирлаб берди ва хонадон соҳиблари билан қандай муомала қилишим тўғрисида йўл-йўриқлар кўрсатди.

— Дэви, майдада-чуйда нарсалар учун тортишиб ўтирмагин,— деди у.— Эсингда бўлсан: сен дворян оиласида дунёга келган бўлсанг ҳам, қишлоқда тарбиялангансан. Юзимизни ерга қаратиб қўймагин, Дэви, бизни иснодга қолдирма! Қарол-чўриларнинг ҳар қандай тоифасида

учрайдиган ўша тўкин-сочин, машҳур хонадонда бошқалардан орқада қолмагин; эҳтиёт бўлиб, ўйлаб қадам ташлагин, кўп гапирмагин. Энди хонадон бошлиғи масаласига келсак, ёдингда тутгин: у хўжайин. Изоҳга ҳожат бўлмаса керак — оғзи қийшиқ бўлса ҳам бой гапирсин, деган мақол бежиз айтилмаган, ахир. Шажара бошлиғига итоат этиш ҳам фарз, ҳам қарз. Ҳеч бўлмаса, киши ёшлигида шундай деб ўйлаши лозим.

— Гапларингизда жон бор, сэр,— дедим.— Чизган чизиғингиздан чиқмасликка ваъда бераман.

— Бинойидексан-ку! — деди мистер Кемпбелл хурсанд бўлиб.— Хўш, энди ашёвий далиллар хусусида гаплашсакми-а? Албатта, тажнис<sup>1</sup> учун худонинг ўзи кечирсин-у, балки бу ҳеч қандай ашё эмасдир. Ёнимда бўғча бор,— деди-да, ички чўнтағидан бир нарса олди.— Бўғчага тўртта нарсани солиб қўйганман. Шулардан биринчиси қонун бўйича сенга тегишили: боя айтганимдек, бу отангдан қолган китоблар ва бошқа буюмларнинг пули — уларни ўзим сотиб олдим; кейинчалик отангнинг ўрнига бирорта ўқитувчи келса, ўшанга пуллайман, мўлжалимча, ўч-тўрт танга чойчақа қолади шекилли. Яна учта нарса эса мен билан миссис Кемпбеллдан совға; қўлимизни қайтарма — чол-кампирни хурсанд қилгин, болам. Бири — юм-юмалоқ, дастлабки пайтлари шуниси кўпроқ ёқса керак. Лекин Дэви, жигарим, бу дарёдан томчи, холос. Ҳаш-паш дегунча тамом бўлади — унинг изи ҳам қолмайди. Япалоқ, тўртбурчак тумор эса бир умр сенга мададкор бўлади: узоқ сафарларда ҳорибтолсанг унга ҳассадай суянасан, тобинг қочган пайтларда юмшоқ ёстиқдай бosh қўйиб ётасан. Хўш, охиргиси — ҳамма томони тенг ашё — мен чин дилдан ишонаманки, бу нарса мушкулингни осон қиласди, сени боқий дунё сари етаклайди.

У сўзларини тугатдию ўрнидан турди, шляпасини ечиб ҳаётга илк бора мустақил қадам қўяётган ўсмир ҳақига қизғин дуо ўқиди. Кейин мени илкис бағрига босди-да, ўзидан нари суриб, дийдоримга тўйиб-тўйиб тикилиб олди — унинг юzlари чўғдай қизариб кетган эди; сўнгра шартта орқасига бурилдию: «Алвидо!» деб қичқирган қўйи биз келган йўл бўйлаб шитоб изига қайtdi. Назаримда, бегона одамга

<sup>1</sup>Тажнис — сўз ўйини. Бу ерда «шаккоклик» маъносида қўлланяпти (терж. изоҳи).

бу ҳолат кулгили кўринса керак, аммо ўзим ҳозир куладиган аҳволда эмасдим. У кўзга кўринмай кетгунча орқасидан термилиб турдим; у қадамини секинлатмади, бир марта ҳам орқасига қайрилиб қарамади. Шундагина айрилиқ нақадар оғир эканини англаб етдим ва бирдан ўзимдан ўзим уялиб кетдим — қани энди ер ёрилсаю кириб кетсам! Ахир, овлоқ қишлоқни тарқ этаётганимдан бениҳоя шод эдим, босар-тусаримни билмай қолган эдим: данғиллама, гавжум хонадонга — қондош, жондош бўлган бадавлат, савлат тўкиб юришадиган жаноблар ҳузурига кетяпман-ку!

«Эҳ, Дэви, Дэви! — дедим ичимда.— Ахир бу кўрна-маклик эмасми! Наҳотки донгдор кишиларнинг номларини эшитишинг билан дарҳол кўзларингни чирт юмиб, барча яхшиликларни, дўстларингни эсдан чиқариб юборишга тайёр бўлсанг-а? Уялгин-э, уят!»

Мен боягина кўнгилchan руҳоний қўним топган юмaloқ тош устига ўтирудим-да, совғаларни кўздан кечириш учун бўғчани очдим. «Ҳамма томони teng ашё» дейилгандаёқ нима назарда тутилаётганини англаған эдим: албатта, бу чўнтакбоп мўъжаз Таврот эди — муқаддас диний китоб. «Юм-юмaloқ»— танга экан, бир шиллинг<sup>1</sup>. Узоқ сафарларда ҳориб-толсам, тобим қочса ва умуман, менга бир умр мададкор бўладиган «тумор» эса сарғайиб кетган бир парча дағал қоғоз экан — унга қизил сиёҳ билан қуйидаги сўзлар битилган эди:

«Марваридгулдан томчи дори тайёрлаш усули. Марваридгул олинади-да, рангсиз винога ташлаб, қўйилади, кейин ҳар куни бир ёки икки чой қошиқдан ичилади, эҳтиёжга қараб истеъмол қилинади. Натижада дудуқларнинг нутқи изгатушиб кетади, офтоб урган кишилар шифо топадилар, юрак ўйноғини тўхтатади ва хотирани мустаҳкамлайди. Гул шиша идишга солинади ѿ қопқоғи маҳкам беркитилади ва чумоли уясига тиқиб қўйилади, ўша жойда бир ой тургандан сўнг қайтариб олинади: гуллардан шарбат ажралиб чиққанини кўрасан, уни кичик идишларда асраш лозим — бу бемору соғ кишиларга ҳам, эркак ва аёлларга ҳам бирдай фойдалидир».

Битик остига руҳоний ўз қўли билан ушбу сўзларни қўшимча қилган эди.

<sup>1</sup>Шиллинг — пул бирлиги, фунт стерлингнинг йигирмадан бир бўллагига teng (таржимон изоҳи).

«Айни чоқда сүяк чиққанда (суртиш керәк) ва санчиқ бошланганда (хар соатда бир · чой қошиқ дори ичилади) ҳам фойдаси тегади».

Тұғрисини айтсам, бу қоғозга қараб туриб күлгим қистади ва айни пайтда күзларимдан ёш тирқираб кетди. Мен зудлик билан түгунчани қайқи таёқ учига илдим-да, кечувдан дарёning нариги соҳилига ўтиб олдим. Қияликтан адир тепасига күтарилендим ва икки сўқмоққа қадам қўйдиму Эссендин ибодатхонасига, руҳоний хонадони теварагида чайқалаётган дараҳтлар-нинг учларига ва ота-онам дағн этилган қабристоннинг баланд-баланд четан деворларига бир қўр назар ташладиму унсиз хайрлашдим.

## Иккинчи боб

### МАНЗИЛГА ЕТДИМ

Иккинчи куни эрталаб яна адир чўққисига кўтарилендим: кўз ўнгимда денгиз соҳилига туташган манзара яққол намоён бўлди, чеки-чегараси кўринмайдиган тоғ тизмаси ёнбағрида — нишаблик ўртасида гўё қиздирилган пеҷдай Эдинбург шаҳри тутаб ётарди. Кўрғон тепасида байроқ ҳилпирарди, кўрфаз узра кемалар юзиб юради ёки бандаргоҳга лангар ташлашган эди: масофа хийла йироқ бўлишига қарамай, уларни аниқ кўриб турардим ва камининг — Қишлоқи йигитчанинг қалби бирдан тўлқинланаб кетди.

Тез орада битта чўпон кулбасига рўпара келдим, Кремондга бориш учун қайси йўналиш бўйича кетиш лозимлигини билиб олдим. Шундай қилиб, дуч келган йўловчидан сўрай-сўрай пойтахтнинг ёнидан ўтиб, ғарб томонга кетавердим — Колингтон ҳам ортда қолиб кетди ва охири Глазгога олиб борадиган йўлга чиқдим. Кўча бўйлаб ўтиб бораётган полк аскарларини учратдим; улар мусиқа садолари остида бир маромда қадам ташлашарди: олдинда кулранг отга минган, ғиштга ўхшаш дағал юзли кекса генерал борарди, норғул йигитлардан саралаб олинган гренадерлар ротаси эса сафнинг охирига тизиб қўйилган эди — уларнинг бош кийимлари Рим папасининг тожини эслатарди. Мен негадир ич-ичимдан суюниб, оғзим очилганча аскарларни кузатиб турардим жангчилар-

нинг қизил мундирларию тантанавор мусиқа садолари аъзойи баданимни жимирилатиб юборди.

Бир оздан кейин мен Кремонд вилоятига қадам қўйдим; энди одамлардан, Шос қўрғонини сўрай бошладим. Ажаб ҳол: кимга мурожаат этсам, у менга ҳайратланиб тикилиб қоларди. Дастреб, қишлоқи турқу авторим, сафар мобайнода обдан чангга беланган қопга ўхшаш уст-бошим ўзим йўқлаб бораётган ғаройиб масканга сира ҳам муносиб бўлмаса керак, деб ўйладим. Лекин икки ёки уч марта бир хил жавоб қайтаришгач, турли қиёфаларда ҳайрат аломатларини кўрдиму кўнглимда шубҳа пайдо бўлди: «Балки Шос қўрғонида ишлар пачавадир? Ҳархолда, у ерда бир сир бўлса керак».

Кўнглимда ўйғонган шубҳага чек қўйиш мақсадида бошқача тарзда савол беришга қарор қилдим: дала-йўлда фойтун кўринди, ўриндиқда олижаноб зот ўтиради; мен ундан «Шос қўрғони» деб аталадиган уйнинг ҳўжайини ҳақида бирор гап эшитган-эшитмаганини сўрадим. У аравани тўхтатди-да, бошқа йўловчилар сингари бошимдан-оёғимгacha синчиклаб разм солди. Сўнг:

— Эшитганман,— деди.— Нимайди?

— Ростдан ҳам бадавлат ҳўжаликми? — деб сўрадим.

— Бўлмасам-чи,— деди.— Данғиллама иморати бор.

— Тушунарли,—дедим.— Ҳўп майли, одамлари қанақа?

— Одамлари?! — деб қичқириб юборди.— Эс-ҳушинг жойидами ўзи? Ахир у ерда одам йўқ-ку!

— Нималар деяпсиз? — дедим.— Мистер Эбенезер одам эмасми?

— Ҳа-я, у ростдан ҳам одам,— деди.— Агар сенга қўрғоннинг эгаси керак бўлса, шак-шубҳасиз, у мавжуд. Аммо бунинг нима ҳожати бор-а?

— Мени ишга ёллармикан деб ўйлаган эдим,— дедим ўзимни гўлликка солиб.

— Нима?! — деб бақириб юборди аравакаш. Товушидан ҳатто от ҳуркиб кетди.— Менга қара, ўғлим,— деб давом этди,— албатта, бу менинг ишим эмас, аммо хушмуомала йигитчага ўхшаяпсан, шунинг учун битта маслаҳат бермоқчиман: эсинг бўлса, Шос қўрғонидан узоқроқ юргин!

Сўнгра бошига дабдабали ясама соч қўндириб олган ҳаракатчан киши дуч келди; фаҳмлашимча, у мижози ҳузурига ошиқиб кетаётган сартарош эди: аввалдан билардимки, сартарошлар гап ташишга ниҳоятда ўч бўли-

шади — шунинг учун ундан тўппа-тўғри Шосда яшайдиган мистер Бэлфур қанақа одам деб сўраб қўя қолдим.

— Дийдори қурсин! — деб пишқирди сартарош.— Одам эмиш, топган гапингни қараю! Ахир унинг одамлик сиёки йўқ-ку! — Кейин тилёғламалик билан менинг асл ниятимни билиб олишга уринди, лекин мен айёрлик қилдим — унинг қўйинини пуч ёнғоққа тўлдириб юбордим.

Қулоқ-чаккамга бирор тарсаки тортиб юборгандай бўлди, эсанкираб қолдим. Мен галварс, чучварани хом санаб юрган эканман-да!. Мавҳум имо-ишоралар жонимга тегди, хомхаёллардан миям ғовлаб кетди. Бу қандай жанобнинг ўйи бўлдики, ўшა томонга элтадиган йўлни сўраб-суриштирсанг — бас, тўсатдан бутун вилоят бир сапчиб тушади, одамлар эса кузларини пирпиришишганча сенга қараб бақрайиб қолишади? У қанақа одам эканки, катта кўчада учраган йўловчи отнинг қашқасидай таниса? Агар пиёда юриб Эссендинга бир соатда етиб бориш мумкин бўлганда, саргузаштларим аллақачон поёнига етган бўларди — мен мистер Кемпбелл ҳузурига қайтардим. Лекин узоқ йўлнинг асосий қисмини босиб ўтдим, энди ортга қайтишга ғурурим изн бермасди: ҳеч бўлмаса иззатнафсимни қондириш учун ҳам гап нимада эканини аниқлашим, манзилга етиб боришим лозим. Ғалати гапларни эшитавериб довдираб қолган, оёғимга тош боғлангандай судраб қадам ташлаётган эсам-да, ўжарлик билан йўлни сўраб-суриштиришда давом этардим, олға борардим.

Кун ботаётган пайтда битта аёлга дуч келдим; у миқтигина эди, қора соч, афтидан хийла вайсақи кўринарди — ҳарсиллаб-ҳарсиллаб нишабликдан пастига тушарди. Унга ҳам одатдаги савол билан мурожаат этдим у орқасига терс бурилиб, ўзи ҳозиргина тарк этган адир чўққисига мени эргаштириб чиқди ва қўли билан водий тубини кўрсатди — ям-яшил ўтлоқзорда улуғвор тошқўрғон савлат тўкиб турарди. Чор атроф ниҳоятда гўзал эди: тепаликни дов-дараҳтлар қоплаган эди, ирмоқда шилдир-шилдир сув оқарди, серҳосил экинзор кўриниб турарди, лекин иморат одам яшайдиган масканга ўхшамасди; у томонга олиб борадиган бирорта ҳам сўқмоқ кўринмасди, мўрилардан тутиш чиқмасди, бое эса ҳувиллаб ётарди. Бирдан юрагим товонимга тушиб кетгандай бўлди.

— Аナンими? — деб юбордим беихтиёр.

Аёлнинг кўзларида ғазаб учқуни ёлқинланди.

— Худди ўзи! — Бирдан унинг жазаваси тутиб вайсай бошлади:— Инсон жонидан бунёд этилган, қонсираб ётибди, бегуноҳ тўкилган қонлар уни ер билан якеон қиласди.

Қараб тур: мен унга туфураман! Туф-туф! Абадул абад ириб-чириб кетсин! Уй эгасини кўрсанг, эшитган гапларингнинг ҳаммасини айтгин, хўпми? Женнет Клустон сени бир минг икки юзу ўн тўққизинчи марта қарғади, лаънатлади деб айтгин! Худоё худовандо, унинг уйини, молхонасинию отхонасини, ошхонасию ошпазларини, барча қавму қариндошлариниу хизматкорларини, меҳҳмонларию етти пуштини ер ютсин!

Аёл шартта орқасига бурилиб ғойиб бўлди. Мен худди тиззамгача ерга ботиб кетгандай турган жойимда қаққайиб қолдим, қўрқувдан соchlарим тикка бўлиб кетди. Ўша замонларда қали ялмоғиз кампир борлигига ишонардик, қарғиш одамларни бирпасда даҳшатга солиб қўярди; ҳуллас, манзил остонасида бундай гапларнинг янграши яхшилик аломати эмасди, балки йўлимдаги тўсиқлар низоны эди. Оёқларимда мажол қолмади. Аста ерга ўтиредим-да, Шос қўрғонини кўздан кечира бошладим. Қанчалик узоқ тикилганим сари бу ўлкага нисбатан тобора меҳрим ортиб борарди: чаман-чаман гуллаб ётган қалин дўлана ҳам, ям-яшил ўтлоқ, алоҳида пайкалларда оқаршиб кўринаётган сулизорлару тўп-тўп бўлишиб осмонда парвоз этаётган гўнгўрғонлар — буларнинг ҳаммаси бу ер ниҳоятда унумдор ва об-ҳавоси оромбахш эканини билдирарди, фақат майдон ўртасидаги рутубатли тошқути кўнглумга кўланка ташлаб турарди, холос.

Дала-туздан қайтаётган деҳқонлар ён-веримдан ўта бошладилар, мен бўлсам, ҳамон йўл четида ҳафсалам пир бўлиб ўтирадим, ҳатто уларга: «Ҳорманглар!» дейишга ҳам ярамасдим. Ниҳоят, куёш уфққа бош қўйди ва шунда мен сарғиши осмонга ўрлаётган ҳилолдай тутунни кўриб қолдим, у худди шамдан чиқаётганга ўхшарди — ингичка. Лекин бари бир бу бошпанадан таралаётган тутун эди; демак ўчоққа ўт ёқилган, уй иситиляпти, косага қайнатма овқат қўйилади — хонадонда тирик жон бор, у гулхан ёқяпти, шунинг ўзидаёқ кишига таскин берарди.

Мен майса қоплаган торгина сўқмоқ бўйлаб ўша томонга жўнадим. Сўқмоқни аранг илғаб олиш мумкин эди, холос. Инсон боласи истиқомат қилаётган масканга элтадиган ягона йўлнинг бундай кўриниши ғалати туюларди, лекин бошқа йўл кўринмасди. Тез орада тошдан ясалган иккита устун рўпарасидан чиқиб қолдим; уларнинг устига герб ўрнатилган эди. Ёнгинасида эса тошдан қурилган, томсиз қоровулхона турарди. Кўриниб турибдики, бу ерда қурилиш охирига етказилмаган эди: ҳашаматли — қўйма дарвоза ўрнида устунларга сомон бовлиқ билан

Боғлаб қўйилган икки қанотли боғэшик турарди. Сўқмоқ на боғ четига тортилган тўсиқقا, на бўсағадаги мўъжаз хиёбонга дуч келарди — устунларни ўнг томондан айланниб ўтардию илонизи мисоли иморат сари йўналарди. Манзилга қанчалик яқинлашсам, иморат менга тобора ҳувиллаб ётгандай туюла бошлади. Гўё у чала-ярим қурилишнинг чўлтоқ қанотига ўхшарди: дастлаб режалаштирилган ўрта қисми маълум қаватгача тикланган эди, холос. Погона-погона ғишт деворлар шундоқ қўриниб турибди. Кўлгина деразаларга ойна солинмаган эди; кўршапалаклар пир этиб учиб чиқишардию яна ортларига қайтишарди — бамисоли болаҳонада истиқомат қилаётган кантарларга ўхшарди.

Иморат томон борардим. Оқшом чўкди. Одатдагидан юқори биринчи қаватнинг учта деразасидан ғирашира шуъла кўрина бошлади. Деразаларга қалин-қалин панжара қопланган эди. Ўҳ-ҳў, мен узоқ йўл босиб, истиқболига интилаётган сарой шунаقا экан-да! Наҳотки мана шу деворлар қуршовида каминани янги дўстлару порлоқ келажак кутиб турган бўлса? Ҳа, жонажон Эссен-Уотерсайдимда ҳам киндик қоним тўкилган уйнинг деразаларидан шунаقا ёғду тараларди, мўрилардан шунаقا тутун чиқарди — бир чақирим наридан кўриниб турарди. Қолаверса, эшигимизни ҳатто тиланчи тақиллатса ҳам дарров очар эдик!

Уйга оёқ учида яқинлашдиму ичкарига қулоқ солдим: бирор ликопчаларни тарақлатди, кимдир қув-қув йўталди, лекин кошкийди инсон зотининг товуши эшитилса, жилла қурса, ит ҳурса ҳам гўргайди — юрагим сиқилиб кетди.

Ғира-ширада илғашимча, эшик улкан дарахтнинг бир бўлаги шекилли, зил-зам билдай туюларди, мих қоқилмаган жойи йўқ. Зўрғатдан юрагим бетлаб қўлимни кўтардим ва эшикни бир марта тақиллатдим. Сўнг кутиб турдим. Жимжитлик — худди ўлик чиқсан уйга келиб қолгандай бўлдим ; абадиятдай чўзилган дақиқалар ўтиб борарди, аммо тиқ этган товуш эшитилмасди, фақат бошим узра кўршапалаклар чарх уради, холос. Яна бир бора эшикни тақиллатдиму ичкарига қулоқ тутдим. Энди қулоқларим жимжитликка шу қадар кўнишиб қолған эдик, беихтиёр ичкарида чиқиллаётган соат товушини пайқаб қолдим — сониялар бир маромда ҳисоб-китоб қилинарди; лекин уйнинг номаълум эгалари ҳамон сукут сақларди, ҳатто нафас олмасдилар.

Кўнглимда шубҳа уйғонди, яхшиликча жуфтакни ростласаммикан деб ўйладим. Лекин бирдан жаҳлим чиқиб

котди ва эшикни муштлай бошладим, гумбурлатиб тепиб-тепиб юбордим, товушимнинг борича мистер Бэлфурни чақирдим. Умуман, ўзимни идора қилолмай қолдим. Бирдан айнан менинг тепамда бирор йўталди; зудлик билан орқага чекиниб, бошимни кўтардим; пастки қаватнинг деразасидан тунги қалпоқ кийиб олган эркак кишининг боши ва пилтамилтиқнинг қувури кўринди.

— Ўқланган,— деди товуш эгаси.

— Мен Шос кўрғонининг соҳиби бўлмиш мистер Эбенезер Бэлфурга хат олиб келдим,— дедим.— Бу ерда ўша киши яшайдими?

— Хатни ким ёзган? — деб сўради пилтамилтиқли киши.

— Бунинг ишга алоқаси йўқ,— дедим, чунки ғазабим бениҳоя жўшиб кетган эди.

— Майли,— деган товуш эшитилди юқоридан.— Хатни эшик остига тиқиб қўйгину туёғингни шиқиллат!

— Нима-нима? — деб қичқириб юбордим.— Бу хат кимга аталган бўлса, ўша кишига берилади: мистер Белфурнинг ўз қўлига топширилади. Бу оддий хат эмас, тавсиянома.

— Қанақа нома? — деб сўради кимса тараддулданиб. Мен гапимни такрорладим.

— Хўш, ўзинг ким бўласан? — деб сўради у хийла вақт ўтгач.

— Мен ўз номимдан уялмайман,— дедим зарда ара-лаш.— Менинг номим Дэвид Бэлфур.

Қасам ичишим мумкинки, бу сўзларни эшитиши биланоқ номаълум кимса титраб кетди: пилтамилтиқ дераза рафиги тарақ этиб урилди. Навбатдаги савол анча-мунчага фурсатдан кейин берилди ва ажабки, у кишининг товуши мулоийимлашиб қолган эди.

— Отанг вафот этдими?

Мен ҳайратдан донг қотиб қолдим, тилим калимага келмасди: кўзларимни пирпиратганимча серрайиб туравердим.

— Афсус, вафот этибди, афсус,— деб бош чайқаб қўйди у киши.— Шунинг учун менинг эшигимни дўмбира қилиб чалаётган экансан-да.— Яна сукунат бошланди. Сўнг у бир оз дадиллашиб сўзларини якунлади:— Начора, дўсти азиз, мен сени меҳмон қиласман.

У дераза ортида ғойиб бўлди.

## Учинчи боб

### АМАКИМ БИЛАН ТАНИШУВ

Тез орада қатор-қатор зулфинлару занжирларнинг жаранг-жаранг товуши эшитилдию эшик салгина қия очилди ва мен остона ҳатлаб ичкарига кирган заҳотим яна ёпилди.

— Ошхонага кир, бирор нарсага тега кўрма,— деб буюрди менга таниш товуш эгаси.

Кўргон соҳиби зўр ҳафсала билан эшикни қулфлай бошлади. Мен таваккал қилиб олдинга юрдиму бирдан ошхонага кириб қолдим. Ўчақда гуркураб олов ёнар, хонага ёғду тарааларди; умримда бу даражадаги шип-шийдам ошхонани кўрмаган эдим. Жавонда беш-олтита ликопча турибди, стол устига овқат қўйилган эди: сули бўтқа сузилган косаю сүяқ қошиқ, бир кружка пиво. Тош гумбазли ушбу кенг-мўл хона яроқсиз буюмлар маконига айлантирилган бўлиб, девор ёнларида қулфланган сандиқлару бурчакда каттагина қулф осилган идиш-товоқ жавончаси турарди.

Анави кимса эшикка охирги занжирни илдию орқамдан ошхонага кирди. У заҳил юзли, нимжонгина киши эди: буқчайиб қолибди, елкалари пучмайган — афтидан ёшини билиб олиш мушкул; уни элликка кирган ёки етмишга борган мўйсафид чол дейиш мумкин. Қалпоғи тўқима эди, йиртиқ-ямоқ кўйлагининг устидан ҳам тўқима халат кийиб олган: на нимчаси, на белбурмा камзули бор эди. Кўпдан буён соқолига устара тегмагани кўриниб турарди. Лекин энг ажабланарлиси, ҳатто даҳшатлиси — унинг кўзлари эди: у мендан нигоҳини узмасди, юзларимга еб қўйгудек бир алфозда тикилиб-тикилиб қарапди. Унинг касб-кори, ҳунари нима эканини айтиш қийин, албатта. Шундай бўлса ҳам, у кўпроқ кекса хизматкорга ўхшарди — аллақачон ҳеч ишга ярамай қолгану фақат қорнини тўйдириш учун уйни кўриклаб ётарди.

— Овқат ейсанми? — деб сўради у, нигоҳини тахминан тиззаларимга қадаган кўйи.— Манави бўтқанинг тузини кўришинг мумкин.

— Назаримда, бу овқатни ўзингиз емоқчисиз,— деб жавоб бердим.

— Ҳечқиси йўқ,— деди у.— Мен шундоқ ҳам бир иложини қиласман. Лекин пивони ичиб қўяман, бу йуталимга дори бўлади.— У мендан кўзларини узмай яrim

кружкани бўшатди-да, бирдан қўлини чўзиб:— қани, кўрайлик-чи, қанақа хат экан,— деди.

Мен эътиroz билдиридим:

— Бу хат сизга эмас, мистер Бэлфурга аталган,— дедим.

— Сенингча, мен кимман? — деди у.— Александрнинг хатини буёқча бер!

— Сиз отамнинг исмини биласизми?

— Билмас эканман-да! — деб тўнғиллади у.— Отанг менинг туғишган оғам, азиз дўстим Дэви, мен сенга амаки бўламан. Кўриниб турибдики, сен мендан ҳам, уйимдан ҳам, тўйимли сули ошимдан ҳам жирканяпсан. Тағин менинг туғишган жиянимсан. Қани, хатни бер-чи, ўзинг ўтири — қорнингни тўйдириб ол.

Агар бир-икки ёш кичикроқ ўсмир бўлғанимда борми, уялганимдан, чарчаганимдан, ҳафсалам пир бўлганидан хўнграб юборардим. Ҳозир на бир оғиз ҳақорат ёки мақтов сўзи айтишга қурбим етмаса-да, индамай хатни унга бердим ва ёрма бўтқани пок-покиза туширдим.

Бу пайт амаким гулханга энгашган кўйи қўлидаги хатни айлантира бошлади.

— Унда нималар ёзилганини биласанми? — деб сўради у туйқусдан.

— Сэр, муҳр бузилмаган,— деб жавоб қайтардим.— Ўзингиз ҳам кўриб турибсиз-ку.

— Шундайликка шундайку-я,— деди у.— Лекин сен буёқча бекордан бекорга келмагандирсан, тўғрими?

— Хатни топширгани келдим.

— Ана холос! — деди муғомбирлик билан.— Ўйлайманки, нимадандир умидвор ҳам бўлгансан, шундайми?

— Тонмайман, сэр,— дедим.— Бой-бадавлат қариндошларим бор эканини айтишган пайтда ростдан ҳам умидвор бўлганман: улар менга мадад беришади, деб ўйлаганман. Аммо мен тиланчи эмасман, сизнинг садағангизга қараб қолганим йўқ. Ҳарҳолда, чин кўнгилдан ҳадя этилмаган инъом ўзингизга сийлов. Одмигина уст-бошимга эътибор берманг, менинг дўстларим кўп — ҳар доим жон деб ёрдам берадилар.

— Пақ-пук, милтиқдори! — деди Эбенезер амаким.— Бекордан бекорга тажанг бўлаверма. Мана кўрасан, биз ҳали апоқ-чапоқ бўлиб кетамиз. Дэви, дўстгинам, агар бўтқага тўйиб қолган бўлсанг, косани ўзим ялаб қўяман. Ҳм-м, сули бўтқа — донғи кетган овқат,— деди у ва мени табуреткадан нари сурдию қўлимдан қошиқни олди.— Тўйимли емиш, ширинлигини айтмайсанми! — У шоша-пи-

ша калима қайтардию овқат емоққа тутинди.— Эсимда бор, отанг ҳам овқат ейиши жуда яхши кўрарди. Уни ебтўймас деб бўлмасди-ю, лекин ниҳоятда хўра эди, мен ундаи эмас — бир-икки чўқилайману тўяман-қоламан.— У пивони лўқ-лўқ ичдию бирдан меҳмондўстлиги ёдига тушиб қолди шекилли:— Агар томоғингни ҳўллаб олмоқчи бўлсанг, эшик орқасида сув бор,— деди.

Мен индамадим, амакимдан кўзларимни узмай, серрайиб туравердим. Сабр косам лим-лим тўлган эди. Амаким эса ҳамон оғзига овқат тиққан кўйи дам-бадам менинг бошмоқларимга, дағал, қишлоқча пайпоқларимга назар ташлаб қўярди. У фақат бир марта нигоҳини қўтардию кўзларимиз тўқнашди: амаким худди қўлга тушган киссавур каби саросимага тушиб қолди. Бу ҳолат кўнглимда ғалати мулоҳаза уйғотди: балки, у кўпдан бери одамларга аралашмай қўйгани учун ҳам ўзини ғайритабий тутаётгандир, бир оз кўнникма ҳосил қилгач, ҳаммаси ўтиб кетар — амаким бутунлай бошқа одамга айланар? Унинг хирилдоқ товуши хаёлларимни тўзғитиб юборди.

— Отангнинг вафот этганига анча бўлдими-а?

— Уч ҳафта бўляпти, сэр,— деб жавоб бердим.

— У хаёлчан одам эди, Александрни айтаман-да, сирли кўринарди, индамас эди,— деб давом этди амаким.— Ёшлигига баъзан кун бўйи бир оғиз ҳам гапирмасди. Ҳойнаҳой, мен ҳақимда ҳам кўп гапирмаган бўлса керак-а?

— Сэр, узингиз айтганингизга қадар мен унинг укаси борлигини ҳам билмасдим.

— Бай-бай-бай,— деди Эбенезер.— Нәҳотки, у Шос ҳақида ҳикоя қилиб бермаган?

— Бу номни бирор марта тилга олмаган, сэр.

— Ақл бовар қилмайди! — деди амаким.— Ҳайронман, у қанақа одам экан!

Шунга қарамай, у ўзиданми, менданми ёки отамнинг ажабтовур хулқ-атвориданми — билмадим-у, лекин ниҳоятда мамнун эди. Шубҳасизки, мен пайдо бўлган дастлабки пайтлардаги бегонасираш, ҳатто кин-адоват кайфияти аста-секин тарқала бошлади. Ҳарқалай, бирпасдан сўнг у сапчиб ўрнидан турдию менга орқа томондан яқин келиб, дадил-дадил елкамга қоқиб қўйди.

— Озгина муддат ўтсин, ана иннакейин биз апоқ-чапоқ бўлиб кетамиз! — деб қичқирди у.— Очиғини айтсам, мен сени уйга таклиф этганимдан хурсандман. Ҳўп, энди ўринга кириб дамингни олгин.

Ажабланарлиси шундаки, у фонус ёки шамчироқ ёқиб ўтирмади, қоп-қоронғи йўлакка чиқдию пайпасланганча,

ҳансираб-ҳансираб зинапоядан юкорига кўтарила бошлади, кесин қандайдир эшик қаршисида тухтади ва уни очиб ичкарига кирди. Мен кўр-кўрона равишда унинг орқасидан эргашиб борардим; оёғини босиб олган заҳотим у ма-на шу хона менга аталганини эълон қилди ва ичкарига киришга таклиф этди. Остонадан ўтдиму бир неча қадам юрганимдан сўнг жойимда таққа тўхтаб, ўринга кириб олиш учун чироқ сўрадим.

— Пақ-пук! — деди Эбенезер амаким.— Оппоқ ойдинда-я!

— Сэр, на ой бор, на юлдуз! — деб эътиroz билдирам.— Зим-зиё, каравотни кўрмаяпман.

— Пақ-пук, сафсата! — деди у.— Мен уйда чироқ ёқиб ўтиришни ёмон кўраман. Ёнғин чиқишидан ўлгудай қўрқаман. Хайрли тун, Дэви, азиз дўстгинам!

У яна эътиroz билдиришимни кутиб ўтирмай зудлик билан эшикни ёпди-да, ташқаридан қулфлай бошлади.

Дам кулгим қистарди, дам йиғлагим келарди. Хона қудуқдан ҳам совуқроқ эди; пайпаслай-пайпаслай каравотни топдим; маълум бўлдики, у ҳам ботқоқ мисоли шилта экан. Яхшиямки, қалин жун рўмол билан бўғчани қўлтиғимга қистириб олган эканман; рўмолга ўрандиму салобатли каравот ёнига — полга чўзилдим. Бирпасда кўзим илинди.

Тонг отиши билан уйғониб кетдим: кенг-мўл хонада ётардим, деворларга нақш солинган терилар ёпиштирилган эди, хилма-хил мебеллар териб қўйилганди ва учта йирик-йирик деразаси бор экан. Ўн йил, эҳтимолки, йигирма йил муқаддам бундай жойда ухлаш ёки уйғониш кишига ҳузур бағишлиаган бўлиши мумкин, албатта. Лекин ўтган давр мобайнинда намлиқ, тартибсизлик, кўршапалаклару ўргимчаклар ўз ишларини адо этиб улгуришган эди. Боз устига, деразаларнинг барча ойналари чил-чил синиб тушган эди ва умуман, бутун қўрғон ойнасиз ҳувиллаб ётарди; беихтиёр ўйлаш мумкини, бир замонлар амаким Женнет Клустон бошчилигидаги ғазаби қайнаган қўни-қўшниларининг тажовузкорона ҳужумларига дош берган бўлса-да ажаб эмасди.

Айни чоқда дераза ортидан чарақлаб қуёш кўринди. Мен бўлсам, лаънати хонада жунжикib ўтирадим. Зўр бериб эшикни тақиллата бошладим ва товушимни баралла қўйиб, зиндонбонни чақирдим. Ниҳоят, у мени озод қилди.

У каминани уй орқасидаги қудуқ бошига эргаштириб борди. Қудуқ тепасида ёғоч пақирча осиғлик турарди.

«Мана, истасанг — ювингин», деди амаким. Юванибтарандим ва тезда ошхонага бордим: у ўчоққа олов қалаб, яна сули бўтқа пиширади. Стол устида иккита коса, икки дона сүяқ қошиқ турарди-ю, лекин бир кружка пиво бор эди, холос. Назаримда, дастурхонга бир оз синчков назар солдим шекилли, балки ажабланаётганимни амаким сезгандир, ҳарқалай, у менинг фикримга жавоб қайтараётгандай:

— Пивожон ичгинг келяптими? — деб сўради. Суюқ ичимликни улуғлаб, «пивожон» деб атарди.

— Одатда оз-моз ичиб турардим, лекин сиз хотиржам бўлинг, — деб жавоб бердим.

— Нега энди, — деди у. — Сен учун ҳеч нарсамни аямайман. Албатта, меъёрни унутмаслик керак.

Жавондан иккинчи кружкани олдию унга кўзадан тўлдириб пиво қўйиш ўрнига ўзининг кружкасидаги пивонинг роппа-роса ярмини бўлиштирди. Бу ҳаракат ўзига хос олижаноблик аломати эди; қалбим тўлқинланиб кетди. Албатта, қаршимда хасис чол турарди, лекин у учига чиққан хасис эди — унинг иллати ҳам гўё фазилатдай туюларди.

Овқатланиб бўлдик. Эбенезер амаким идиш-товоқлар сақланадиган жавон ғаладонини очди-да, сопол трубкасини, бир қути тамакисини олди ва бир чекимлик тамакини ушатдию қутичани жойига тиқиб қўйди. Кейин деразадан тушаётган офтобга ўзини тоблаганча жимгина тамакисини тутатди. Гоҳ-гоҳ менга назар ташлаб қўярди ва узук-юлук саволлар берарди. Бир пайт у мендан:

— Кампир қалай, онангни айтаман? — деб сўради.

— У ҳам вафот этган, — деб жавоб бердим.

— Ҳа, хушрўй қиз эди бояқиш. — Кейин анча пайтгача миқ этмади ва охири: — Дўстларинг қанақа одамлар? — деб сўради.

Ҳаммаси жентльменлар — Кемпбеллар авлодидан, деб жавоб бердим. Аслида эса, уларнинг орасида менга зифирча эътибор берадигани бўлса, у ҳам ёлғизгина руҳоний эди, холос. Аммо, назаримда, амаким мени камситаётгандай туюлди ва юзма-юз турган пайтимизда сўроқлайдиган жонкуярларим борлигини унга писандади қилиб қўймоқчи бўлдим.

Афтидан, у ичидагималарнидир хомчўт қилиб кўрди, сўнг тилга кирди:

— Дэви, дўсти азиз, амакинг Эбенезер ҳузурига ташриф буюриб хато қилмагансан. Мен учун оила

ШОН-ШАРАФИ ҳамма нарсадан юқори туради. Бурчимни адо этаман, қарзимни узаман. Лекин мен сени қаёқса жойлашни узил-кесил ҳал этмагунимча оғзингдан гуллаб қўймагин; аллақандай тоғли ўлқадаги ялангоёқ Кемпбеллар олдида Бэлфур ўз қадрини туширмаслиги лозим. Сени ҳуқуқшунослик соҳасига тавсия этсаммикан ёки руҳонийлик дурустми, балки ҳарбий хизмат маъқулдир — ахир йигитлар фақат сипоҳ бўлишни орзу қиласидилар-ку?.. Илтимос, ҳозирча ўзингта маҳкам бўл: ҳеч қандай хат-пат ёзмайсан, бирор билан алоқа қиласайсан. Хуллас, ҳеч кимга ҳеч нарса демайсан, агар бу талабим ёқмаса, ана — катта кўча, хоҳлаган томонга кетавер, худо ёр бўлсин!

— Эбенезер амаки, сизга ишонаман — менга фақат яхшилик қилмоқчисиз,— дедим.— Шундай бўлса ҳам билиб қўйингки, мендаям ўзимга ярашаш ғурур бор: бу ерга ўз ҳоҳишимга кўра келганим йўқ, агар бир марта кўчани кўрсатадиган бўлсангиз, кейин бу сўзни такрорлашга ҳожат колдирмайман.

Оҳ, кўрдимки, жавобим унга ёқмади!

— Пақ-пук!— деди у.— Шошқалоқ экансан, мұхтарам дўстим. Бир-икки кун сабр қилгин, ахир! Кўриб турибсан-ку, мен сеҳргар эмасман — бўтқа сузилган анави косадан жаранглаб олтин тўколмайман. Сен фақат менга бир ёки икки кун мухлат бергин, ҳеч кимга ҳеч нарса демагин: хотиржам бўл, мен сенинг ғамингни ейман, холос.

— Хўп майли,— дедим.— Қисқа ва лўнда. Агар сиз менга ёрдам бермоқчи бўлсангиз, миннатдор бўлардим.

Назаримда, амакимнинг попуги пасайиб колди (балки, янглашаётгандирман), шунинг учун дарров унга янги талабимни баён этдим: кўрпа-тўшакларимни офтобга ёйиб қуритиш лозим, бундай ҳўл латта-путталарга бурканиб ухлашни мутлақо истамайман.

— Бу уйда ким хўжайин: сенми ёки мен?— деб хириллади у ёқимсиз товушда, сўнг бирдан дами ичига тушиб кетди.— Дэви, дўстгинам, биз энди талашиб-тортишиб ўтирасак уят бўлар... Қондошлиқ — қуруқ гап эмас, Бэлфурлар авлодидан фақат икковимиз қолдик, холос.

У тутилиб-тутилиб шажарамизнинг қадимий шон-шуҳрати ҳақида сўзлай бошлади: айтишига қараганда, бувам ушбу қўрғон қурилишига асос солган экан, лекин у ортиқча сарф-харажатларга чек қўйибди. Шу пайт Женнет Клустон топшириғини бажаришга аҳд қилдим.

— Ярамас махлук!— деб тўнғиллади у.— Бир минг

икки юзу ўн тўққиз — демак мен унинг қарзлари эвазига лаш-лушларини сотиб юборганимдан бери ҳар куни қарғаётган экан-да! Ҳечқиси йўқ, Дэви, ҳали у қўлимга тушади — додини бераман! Мен буни шундоқ қолдирмайман. Жодугар, кимдан хоҳласанг — ўшандан сўра, у жодугар! Мен ҳозироқ воситачи қозига учрашаман.

У жавраб-жавраб сандиқни очди-да, кийилмасдан эскириб кетган чакмонини, нимчасини ҳамда бинойидек мовут шляпасини олди: уст-бошларига уқа қадалмаган эди. У бор бисотини кийди, жавончадан таёқ олди — қуролланди, сўнгра сандиққа қулф осди ва эндигина оstonага қадам қўяман деган пайтда хаёлига бир гап келдию жойида таққа тўхтади.

— Уйни сенга ёлғиз ташлаб кетолмайман,— деди у.— Ташқарига чиқ, мен ҳозир эшикни қулфлайман. Миямга қон тепди, ғазабим қайнаб кетди.

— Агар уйни қулфлассангиз, бундан кейин мени кўрмайсиз,— дедим.— Ишқилиб, бундан буён яхшиликча учрашмаймиз.

Амакимнинг ранг-рўйи оқариб кетди ва лабини тишлади.

— Дэвид, бундай қилиш ярамайди,— деди у ҳирқираб, бурчакка тикилган кўйи.— Бу аҳволда икки дунёда ҳам кўнглимга йўл тополмайсан.

— Сэр, мен ёшингизни, қариндош эканингизни ниҳоятда қадрлайман, аммо иззат-ҳурмат эвазига сиздан садақа олишга номус қиласман. Аввало, ўзимни ҳурмат қиласман — каминага шундай тарбия берганлар: менга йигирма баробар амаки бўлсангиз ҳам, бу дунёда сиздан бошқа бирорта паноҳим бўлмаса ҳам, лекин бундай тарзда кўнглингизни овлашни асло истамайман,— деб жавоб бердим.

Эбенезер амаким ошхонага ўтди ва деразага қараганча жим туриб қолди. У худди безгак тутган кишидай дир-дир титради. Бироқ, у орқасига ўгирилган пайт юзларига ханда юргурган эди.

— Хўп, майли,— деди.— Барибир худонинг айтгани бўлади, биз ожиз бандалармиз. Мен ҳеч қаёққа бормайман, вассалом.

— Эбенезер амаки, ҳайронман: нима бало, сиз мени ўғри деб ўйлајпсизми?!— дедим ўзимни тутолмай.— Муомалангизга қараганда, каминани кўрарга кўзингиз, отарга ўқингиз йўқ шекилли. Ҳар дақиқада, ҳар бир сўзингиздан шу нарса маълум бўляпти. Сиз жиянингизни унчалик хушламадингиз, энди ҳеч қачон яхши

кўрмайсиз. Ўзимга келсак, мен вақти-соати келиб одамлар билан худди ҳозиргидай мумомала қиласман деб, етти ухлаб тушимда ҳам кўрмаганман. Ҳуш, нега мени ушлаб турибсиз? Келинг, мен ўз дўстларим — мени яхши кўрадиган кишилар ёнига қайта қолай!

— Йўқ, йўқ! — деди у ҳаяжонланиб. — Йўқ. Сен менинг жигаримсан. Биз ҳали апоқ-чапоқ бўлиб кетамиз. Қолаверса, бу уйдан қуп-қуруқ чиқиб кетсанг ёмон бўлади. Озгина сабр қил, сабрнинг таги олтин. Эсли бола бўлгин — меҳмонсан: индамай, бемалол юравер. Мана кўрасан, ҳали ҳаммаси михдай бўлиб кетади!

— Начора, сэр,— дедим бир оз ўйлаб.— Майли, яна уч-тўрт кун яшаб кўраман. Ҳарҳолда, бегоналардан кўра, қариндошларим яқинроқ — барибир суяқ тортадида. Агар биз чиқиша олмасак, ўйлайманки, бунга фақат сиз айбдор бўласиз.

## Тўртинчи боб

### ШОС ҚЎРҒОНИ — БАЛО-ҚАЗОЛАР УЯСИ

Хийла нохуш бошланган кун баҳарнав поёнига етди. Биз тушда сули ёрмасидан тайёрланган бўтқа едик: у яхдай эди, кечки пайт иссиқ овқат ичдик. Маълум бўлишича, бўтқа билан кучсиз пиво амаким хуш кўрадиган «канвойи таомлар» сирасига кираг экан. У кам гапиради, ўз одатига содиқ эди; анча вақтгача чурқ этмай ўтирадио бирдан саволларга кўмиб ташларди; мен ўз келажагим хусусида гап очишга уриниб кўрдим, лекин у доимо жавобдан ўзини олиб қочди. Менинг ихтиёrimга топширилган хонада сон-саноқсиз лотинча, инглизча китоблар бор экан: жон-жон деб эртадан-кечгача китоб титкилаб ўтиредим. Суюмли машғулот билан банд бўлганим туфайли вақт қандай ўтганини ҳам сезмай қолдим: энди тақдирга тан беришга — Шос қўрғонига кўнишишга деярли рози здим, лекин Эбенезер амакимни, унинг олма-кесак тераётган бежо кўзларини кўрдиму кўнглимда яна шубҳа уйғонди.

Туйқус ғалати нарсага дуч келдимки, натижада кўнглимдаги шубҳаларим баттар алнга олиб кетди. Юпқагина манзумалар тўплами (Патрик Уокер туркумидан) қўлимга тушиб қолди; китоб мұқовасига менинг отам ўз қўли билан (бунга заррача ҳам гумон қилмайман)

қўйидаги жумлаларни ёзиб қўйган эди: «Акам Эбенезерни беш ёшга тўладиган кун билан табриклайман». Бунга ақл бовар қилмасди: чунки отам ака-укаларнинг кичкин-тойи эди-да, демак у қўпол хатога йўл қўйган ёки ҳақиқатан ҳам ҳали беш ёшга етмасданоқ катта кишилардек чиройли, дона-дона ёзишни ўрганиб олган.

Кейин бирталай эски-туски тарихий китобларни, шерлар ва ҳикоялар тўпламини кўздан кечирган бўлсам-да, бироқ отамнинг дастхати сира хаёлимни тарк этмади — у менга сирли бўлиб туюлаверди. Ниҳоят, бўтқаю пиво билан қорнимни тўйдирив олиш мақсадида яна ошхонага қайтиб кирдиму Эбенезер амакимдан, отам осонликча савод чиқарганми, деб сўрадим шоша-пиша.

— Александрми? Қаёқда! — деб жавоб берди. — Ундан кўра, ўзим тезроқ савод чиқарганман, болалигимда ниҳоятда қобилиятли эдим. Отанг билан баробар ўқишини ўрганиб олганман.

Бундан сўнг янада ҳайратландим, бошим қотди ва амакимдан, мабодо сизлар эгизак эмасмисизлар, деб сўрадим.

Амаким худди чаён чақиб олгандай сапчиб табурет-кадан турди, сувж қошиқ тушдию полда юмалаб кетди.

— Сен нега мени тергов қиляпсан?! — деди ҳирқираган кўйи ёқамга ёпишар экан. У чақнаб турган биткўзларини кўзларимга қададиу кипприкларини ажабтовур пирпиратди.

— Ие, бу яна нима қилиқ бўлди? — дедим босиқ оҳангда; чунки мен ундан хийла кучли эдим, каминани қўрқитиб қўйиш осон эмасди. — Ёқамни қўйиб юборинг! Уялмайсизми?

Амаким зўр-базўр ўзини қўлга олди.

— Парвардигори олам ҳаммасини кўриб турибди, Дэвид, — деди. — Менинг ёнимда отанг ҳақида гап очмагин. Чакки қилдинг. — У қалт-қалт титраганча жойига ўтирди, ликопчасига қараб кўзларини пирпиратди. — Биласанми, менинг фақат биттаю битта биродарим бор эди, — деб қўшиб қўйди ясама оҳангда. Кейин полда ётган қошиқни олдию яна овқатини ея бошлади: ҳамон титроғи босилмаган эди.

Нега у менга қўл кўтарди? Нима учун кутилмаганда раҳматли отам тўғрисида яхши гапириб қолди? Унинг охирги сўзлари тасаввуримга асло сиғмасди: кўнглимдаги гўмон баттар кучайди, айни чоқда юрагимнинг тубида милт этган умид учқуни ҳам пайдо бўлди. Ростини

айтсам амаким ақлдан озган шекилли, деб ўйладим. Агар шундай бўлса, у билан ёлғиз қолиш хавфли эди. Беихтиёр халқ ўртасида машҳур бўлган битта манзума воқеалари хаёлимга келиб қўлди: унда қўрғоннинг қонуний мерос-хўри баҳтиқаро ўсмир ва уни ҳамма нарсадан бенасиб қўлмоқчи бўлган ёвуз қариндош ҳақида ҳикоя қилинарди. Дарҳақиқат, кутилмаганда остонасига бош уриб келган камбағал, қашшоқ қариндоши олдида амаким нега ўзини минг мақомга соляпти, нима учун юзидағи ниқобни сидириб ташламаяпти, нимадан хавфсираяпти?

Ўзим истамасам-да, бадбин ўй-хаёллар миямга миҳланиб қолди ва ногаҳон амакимнинг ажабтовур одатини ўзлаштириб олдим: кўз қирим билан унинг хатти-ҳаракатларини зимдан кузата бошладим. Биз стол теварагида худди сичқон-мушук мисоли бир-биримизни яширинча таъқиб этардик. У энди дўнғилламай қўйди, тилёғламалик ҳам қилмасди, миқ этмай ўтираверди, лекин муттасил равишда нималарнидир ўйларди; биз қанчалик узоқ ўтирган бўлсак, мен уни шунчалик кўпроқ синчиклаб кузатардимки, охир оқибатда ёмон нияти борлигига тўла-тўқис ишонч ҳосил қилдим.

Товоқни ялаб-юлқаб бўлгач, у худди эрталабкидай бир чимдим тамаки олди, табуреткани бурчакка — ўзоққа яқинроқ жойга сурди, ўтириди ва менга орқа ўгирганча тамаки чека бошлади.

— Дэви, хаёлимга бир нарса келди...— деди узоқ жимликдан сўнг. Бир оз сукут сақлаб тургач, яна бояги гапини такрорлади:— Ҳа, бир нарсани ўйлаб қўйдим. Сен ҳали дунёга келмасингдан аввал мен отангга, чақалоққа бир ҳовуч тилло совға қиласман, деб ваъда бергандай бўлганман. Йўқ, сен тўғри тушунгин, унга расман ваъда берган эмасман; улфатчилик қилиб ўтириб, ҳазил аралаш шундай деганман, холос. Ҳўш, ўзимга зарар бўлса-да, лекин ўша пулни асраб қўйдим — ваъдага вафо қилиш керак, ахир! Йиллар ўтгани сайн пул болалайверади, ҳозир роппа-роса...— У сўзида тутилиб қолди, сўнг:— Роппа-роса... деярли қирқ фунт<sup>1</sup> бўлди!— деди тўрсиллаб.

Елкаси оша менга назар ташлади ю шу заҳоти қўшимча қилди:— Шотландия пули ҳисобида!

Шотландия фунти — инглиз шиллинги қаторида тура-

<sup>1</sup> Фунт — пул бирлиги. Англиядага бир фунт стерлинг йигирма шиллингга тенгdir, Шотландияда эса анча қадрсиз (тарж. изоҳи).

ди; амакимнинг қистирма гали туфайли ер билан осмонча тафовут вужудга келарди, албатта. Қолаверса, унинг ҳамма гаплари гирт ёлғон эканлиги ҳам яққол сезилиб турарди: нима учун шунча уйдирмаларни тўқиб чиқараётганини англаб етмоқчи бўлдиму заҳарханда аралаш:

— Бас қилинг, сэр, яхшилаб ўйлаб кўринг! — дедим.— Балки, фунт стерлингдир-а?

— Мен ҳам «фунт стерлинг» дедим-ку! — деб кўкрагига муштлади амаким.— Сен бир дақиқа ташқарига чиқиб, об-ҳаво қанақа эканини билиб келганингда бўларди, мен ўша пулни ҳозирлаб қўяман-да, сени чақираман.

Унга итоат этдим, мийиғимда кулганимча ташқарига йўл олдим: у мени осонликча лақиллатаман, деб ўйлаяпти, галварс! Кеча қоп-қоронғи эди, осмони фалакда онда-сонда юлдузлар милтираб кўринарди; оstonада турар эканман, узоқлардаги қир-адирлар узра эсаётган шамолнинг мунгли товуши қулоғимга чалинди. Ҳаво айниб турибди, момақалдироқ бўлади, деган қарорга келдим. Лекин бу қарорим қанчалик мұхим аҳамиятга эга эканини билмасдим...

Кейин амаким мени чақириб олди; ўттиз еттита тилла тангани санаб-санаб қўлимга тутқазди, лекин ҳовучида бир сиқим майда-чуйда тилла, кумуш тангалар қолган пайтда юраги дош беролмади ва уларни чўнтағига солиб қўйди.

— Мана сенга пул,— деди у.— Энди билдингми? Мен ғалати одамман, айниқса, бегона кишилар билан сира тил топиша олмайман. Аммо сўзимдан қайтмайман, бунинг исботини кўриб турибсан.

Тўғрисини айтсам, амаким бойликка ўтакетган даражада хирс қўйган кимсага ўхшарди; унинг фавқулодда ҳотамтойлигини кўриб, донг қотиб қолдим, ҳатто кўнгилдагидай миннатдорчилик билдира олмадим.

— Қўй, гапирма! — деб хитоб қилди.— Миннатдорчиликнинг кераги йўқ! Мен ўз бурчимни адо этдим; ҳамма ҳам шундай қиласарди, деёлмайман. Лекин эҳтиёткор инсон бўлсам-да, туғишган биродаримнинг ўғлига яхшилик қилаётганимдан бениҳоя хурсандман. Ўйлайманки, энди биз apoқ-чапоқ бўлиб кетамиз, аслида ҳам, яқин қариндошлар орасидан қил ўтмас дўст бўлиши керак.

Унга қўлимдан келганча жавоб бердим. Айни чоқда энди нима бўлишини тахмин қила бошладим; ахир у жони дилидан ҳам азиз кўрадиган тангаларини бекордан

бекорга инъом этиб юбормагандир: сохта «дил сўзлари» гўдакни ҳам аврай олмасди.

Ниҳоят, у менга қиялатиб нигоҳ ташлади.

— Ўзинг ҳам биласан: мушук бекорга офтобга чиқмайди — сиздан угинаю биздан бугина,— деди.

Мен миннатдорчилигимни исботлашга тайёр эканимни изҳор этдим ва бирон-бир мушқул вазифани ижро этишимни сўраса керак деб, кутиб турдим. Бироқ амаким иродасини жамлаб олдию фақат кексайиб, кучдан қолганидан нолиди ҳамда мендан уй ишларига, томорқага қарашиб туришимни сўради, холос. Менга унинг гаплари жўялидек туюлди.

— Жон деб хизматингизни қиласман,— дедим.

— Ундай бўлса, бошлаймиз!— Чўнтағидан занг босган калитни олди.— Бу — қўрғоннинг нариги қанотидаги болаҳона-миноранинг калити,— деди.— Уёққа фақат таш-қаридан чиқиш мумкин, чунки уйнинг ўша қисми ҳали битмаган. Қани, бўлақол, пиллапоядан кўтарилигин-да, юкорида турган сандиқни менга келтириб бергин. Унинг ичиди қозозлар бор,— деб илова қилди.

— Сэр, чироқ кўтариб олсан майлими?— деб сўрадим.

— Йў-ўқ!— деди у муғамбирана оҳанга.— Менинг уйимда ҳеч қандай чироқ ишлатилмайди.

— Бахайр, сэр. Пиллапоя бақувватми?

— Пиллапоя ажойиб,— деди ва мен эшик томон ўғирилишим билан қўшимча қилди:— Дёвортга яқинроқ юргин, панжараси йўқ. Лекин пиллапоя зўр!

Ташқарига чиқдим. Зим-зиё тун эди. Узоқ-узоқларда ҳамон шамол чийилларди, лекин Шос қўрғонида қилт этган шабада йўқ эди. Теварак-атрофни деярли кўриб бўлмасди; яхшиямки, чала-яним уй қаноти бўйлаб, деворни пайпаслаб минора пиллапояси эшигини топиб олдим. Қулф тешигига калитни солдиму ҳали уни бурашга ҳам улгурмасимдан туйкус чараклаб чақмоқ чақди ва яна ҳамма томонни зулмат қоплади. Шамол йўқ, атрофда мозор сукунати ҳукмрон эди. Қоронғиликка кўникма ҳосил қилиш учун кўзимни қўлларим билан беркитдим, лекин барибир минорага шапкўрга ўхшаб кириб бордим.

Ичкари янада қоронғироқ эди, худди нафас олишга ҳаво етишмаётгандек туюларди. Эҳтиёткорлик билан ҳаракат қила бошладим; олдинга чўзилган қўлларим тез орада деворга тегдию пиллапоянинг пастки поғонасига оёқ босдим. Силаб-сийпалаб билдимки, девор силлиқ йўнилган тошдан тикланган эди, пиллапоя

погоналари ҳам төп-текис, мустаҳкам силлиқ тошлардан ясалган бўлса-да, лекин хийла энсиз ва айланма эди. Панжара йўқлиги ҳақидаги амакимнинг йўл-йўриклигига ёмал қилиб, деворга яқинроқ юришга интилардим: зим-зиё қоронғилик қўйнида юрагим дукурлаши аниқ эшитилиб туради, погоналарни пайпаслаб-пайпаслаб зўрға топардим.

Шос қўргони чердакдан ташқари, яна бутун бошли беш қаватдан иборат экан. Юқорига кўтарилганим сайнин, назаримда, пиллапояда нафас олиш ҳам енгиллашаётгандай туюларди, қоронғилик бир оз сийраклашди гўё. Фақат яна-тағин туйқус чақмоқ чаққанига ҳайрон қолдим, холос. Агар қўққисдан қичқириб юбормаган бўлсан, бунинг сабаби — қўрқув томоғимдан ғиппа бўғиб олган эди; агар тўсатдан пастликка учиб кетмаган бўлсан, бунинг сабаби — менинг эпчиллигим эмас, балки парваридигори оламнинг марҳаматидир. Ҳар томондаги девор ёриқларидан минорага чақмоқ ёғдуси бостириб кирди: маълум бўлдики, гўё ўрмон бағридаги яланглик бўйлаб юқорига ўрмалаб чиқаётган эканман, боз устига, поғоналар ўртасидаги масофанинг ҳар хил эканини ва ўнг оёғим тубсиз жарликдан бор-йўғи икки энлик берида турганини пайқаш учун ўткинчи ёруғлик кифоя қилди. Пиллапоя қай даражада «ажойиб» эканини энди билдим! Ана шу фикр хаёлимдан кечиши биланоқ қалбимни аллақандай ўжар жасорат чулғаб олди. Демак, амаким билиб туриб мени хавф-хатар сари йўллабди-да, эҳтимолки, ажалга йўлиқтирмоқчи бўлгандир! Ҳатто бўйним остимда қолган тақдирда ҳам амаким «билиб туриб» ёки «бilmасдан» шундай қилганини аниқлашга қасам ичдим. Аста энгашдиму тошбақага ўхшаб тўрт оёқлаб эмаклаганимча пиллапоядан ўрлай бошладим; ҳар бир қарич жойни пайпаслаб кўрардим ва тошларнинг мустаҳкам эканига ишонч ҳосил қилганимдан кейингина олға силжирдим. Чакмоқ чақнагандан сўнг қоронғилик гўё икки баробар қуюқлашиб кетгандай бўлди; устига устак, юқорида — минора тўсинлари остида кўршапалаклар даҳшатли шовқин-сурон кўтарди, натижада қулоқларим битиб қолди, хаёлларим паришон бўлиб кетди; ўлганинг устига тепгандай, жирканч маҳлуқлар пастга қараб учиб туша бошлашди: уларнинг қанотлари гоҳ юзларимга, гоҳ елкаларимга тегиб ўтарди.

Айтиш мумкинки, минора тўртбурчак шаклида эди, ҳар тўрт зина оралиғидаги бурчакли супа плиталари эса кенгроқ бўлиб, ҳажми жиҳатидан авваллариға

ўхшамасди. Мен яна битта бурилиш жойга кўтарилидим-да, кўрлардай пайпаслаб ўзимга йўл қидира бошладим ва туйкус қўлларим бўшлиққа дуч келди: юқори томонда поғоналар йўқ эди. Нотаниш кимсани зимиштон кечада бундай пиллапоядан кўтарилишга мажбур қилиш — уни нақд ўлимга гирифтор этиш билан баробар эди. Албатта, чақмоқ шарофати ва ўзимнинг эҳтиёткорлигим туфайли омон қолдим, лекин қандай хатарга рўбарў келганимни, нечоғли даҳшатли баландликдан қулаб тушишим мумкинлигини ўйлаган заҳотим бутун вужудимдан совуқ тер чиқиб кетди ва бирдан дармоним қуриди.

Шунга қарамай, энди бундан кейин нима қилишим кераклигини билардим: ортимга бурилдим-да, эмаклаб пастга туша бошладим. Юрагим нафрата тўла эди. Тахминан ярим йўлга келган пайтим/минорага кучли шамол уриб бердию бирпасдан кейин тинди ва шариллаб ёмғир қуя бошлади; охирги поғонага оёқ босар-босмасимдан ёмғир шунчалар кучайдики, худди челаклаб сув қуяётганга ўхшарди. Ташқарига чиқдим-да, ошхона томон назар солдим. Боя ташқарига чиққанимдан сўнг зичлаб ёпиб қўйилган эшик энди қия очиқ тўтарди, ичкарида ғира-шира ёруғлик кўринарди. Ёмғир остида эса одам шарпаси қимир этмай, гўё нимагадир қулоқ солиб тўтарди. Шу чоқ кўзларимни қамаёттириб чақмоқ чақдию янглишмаганимга амин бўлдим: ўша жойда ҳақиқатан ҳам амаким қаққайиб тўтарди. Бирдан момоқалдироқ гулдиради. Момоқалдироқ гулдур-гулдури мобайнинда Эбенезер амакимнинг қулоғига қандай товуш чалинганини билмайман: эҳтимол, у мен тап этиб қулаб тушганимни илғагандир, балки қотилни фош этаётган парвардигори оламнинг ғазабнок товушини эшийтгандир? Қайдам. Бу ҳақда ўқувчи мулоҳаза юритиб кўрар деган умиддаман. Лекин бир нарса шубҳасизки, у талвасага тушиб қолди: шоша-пиша ўзини уйга урди, эшикни ёпиб қўйиш ҳам эсидан чиқиб кетди. Иложининг борича товуш чиқармасликка тиришиб, унинг орқасидан эргашдим: сездирмай ошхонага кириб олдиму тўхтадим ва кузата бошладим.

У аллақачон товадонни очиб, похолга ўралган каттаги-на виски шишиасини олишга улгурган эди ва эшикка орқа ўгириган кўйи стол ёнида ўтиради. Дағ-дағ титради: бирдан товушининг борича ингрраб юборди ва шишани бўғзидан ушлаб даст кўтардию сув аралаштирилмаган қувватли арақни қулт-қулт этказиб ича бошлади.

Мен олға қадам ташладим, унга орқа томонидан

яқинлашдим-да, елкасига зарб билан шап этказиб түширдим.

— Ҳа-а! — деб қичқириб юбордим.

Амаким маърашга ўхшаш ғалати товуш чиқардию қулочини ёйганча ўлиқдай қулаб тушди. Ўзим ҳам эсанкираб қолдим; ҳарҳолда, аввало ўзимнинг ғамимни ейишим лозим эди, кўп ўйлаб ўтирумай амакимни ётган жойида қолдиришга қарор қилдим. Идиш-товоқлар сақланадиган жавончада бир боғлам калит осиғлиқ турарди: амаким бирорта ҳийла-найранг ишлатишга қодир бўлмаган — беҳуш ётган пайтдан фойдаланиб, ўзимга қурол топиб олишим лозим эди. Жавончада қандайдир бўш шишаҷалару дори-дармонлар, шунингдек, кўплаб ҳисоб-китоб дафтарларию ҳар хил қофозлар сақланар экан: агар вақт тифиз бўлмагандага жон-жон деб уларни титкилаб кўрадим. Бундан ташқари, турли-туман ҳўжалик буюмлари ҳам шу жойга тикиб қўйилган эди, лекин уларни сариқ чақалик қиммати йўқ. Кейин сандиқларни ағдар-тўнтар қила бошладим. Биринчи сандиқ лиммо-лим ун экан, иккинчи сандиқда эса халта-халта танггалару боғлам-боғлам қофозлар уюлиб ётарди. Учинчи сандиқда эски-туски кийим-кечаклар орасидан занглаган бўлса-да, лекин кўриниши хийла маҳобатли шотланд ханжарини топиб олдим: қинсиз эди. Уни нимчамнинг остига яширдиму амаким ётган жойга қайтдим.

У худди бўш қопга ўхшаб шалвираб ётарди, ҳолати ўзгармаган эди: бир тиззаси букилган, қулочи ёйилган бўлиб, башараси кўкариб кетибди, нафас олиши эшитилмасди. Ростини айтсам, қўрқиб кетдим: ўлиб қолган бўлса-я! Сув келтирдим-да, юзларига пуркай бошладим; шундан кейингина унга жон кирди — лабини чапиллатди, қовоқлари қимирилади. Ниҳоят, кўзларини очдию мени кўриб қолди ва ғайритабиий қўрқувдан афт-башараси жийилиб кетди.

— Ҳечқиси йўқ, ҳечқиси йўқ,— дедим.— Қани, астагина ўрнингиздан туринг-чи!

— Сен тирикмисан? — деди ҳиқиллаб.— Худойим-эй, наҳот сен тириксан-а?

— Тирикман, кўриб турибсиз-ку,— дедим.— Бунинг учун сиздан миннатдор бўлишим керакми?

У ҳансира-ҳансира, чуқур-чуқур нафас ола бошлади.

— Мовий шишаҷа... — деди эшитилар-эшитилмас товушда.— Жавончада мовий...

Унинг нафас олиши янада сустлашди.

Мен жавонча томон югурдим. Ҳақиқатан ҳам у ерда

қорнига ўлчовли миқдор ёзилған ёрлиқ ёпиштирилған мовий дори шишачаси бор эди. Зудлик билан дорини амакимга келтириб бердим.

— Юрагим,— деди бир оз ўзига келгач.— Дэви, юрагимнинг мазаси йўқ. Мен касалманд одамман.

Амакимни стулга ўтқаздим-да, синчиклаб назар солдим: кўриниши ниҳоятда аянчли эди, тӯғрисини айтсан, унга раҳмим келди, лекин айни пайтда қаҳрғазабимни аранг жиловлаб турардим. Уни саволларга кўмиб ташладим, жавоб беришни талаб қилдим. Нега сиз ҳар доим ёлғон гапирасиз? Нима учун мени қўйиб юборишдан қўрқасиз? Нима учун отам билан эгизакмисиз деб сўрасам, жинингиз қўзиб кетди? Демак, тахминан тӯғри экан-да? Нега пул бердингиз, ахир бу пул менини эмас-ку?! Ва ниҳоят, нега мени ўлдирмоқчи бўлдингиз?

У ҳамма гапимни охиригача тинглади-да, кейин титроқ товушда ўринга ётқизиб қўйишимни илтимос қилди.

— Эрталаб ҳаммасини айтиб бераман,— деди.— Ҳаётимни гаровга тикиб, қасам ичаман...

У шу қадар мажолсиз эдик, ноилож таклифига рози бўлдим. Ҳар эҳтимолга қарши у ётган хонани қулфладим-да, калитни чўнтағимга солиб қўйдим; сўнгра ошхонага қайтиб келдим ва ўчоққа гуриллаб гулхан ёқиб юбордим: бу ўчоқ кўп йиллардан бери бундай иссиқ оловни кўрмаган бўлса керак. Жун рўмолга ўралдиму сандиқнинг устига чиқиб чўзилдим ва тезда кўзларим илинди.

### Бешинчи боб

## «КУИНСФЕРРИ» КЕЧУВИ ТОМОН ИУЛ ОЛДИМ

Тун бўйи ёмғир ёғди. Эрталаб шимолий-ғарбдан аччиқ изғирин эса бошлади: жулдурвоқи булутларни қаёкларгадир ҳайдаб кетди. Дарё соҳилига югурни бориб, сув тўла бочкага шўнгигиб-шўнгигиб олган пайтим ҳали қуёш ётоғидан бош кўтармаган эди, осмонда тонг юлдузи — чўлпон чараклаб турарди. Чўмилганимдан сўнг бутун вужудимни гўё оташ чулғаб олди; яна ўчоқ ёнига ўтирдиму гулхангага тараша ташладим ва ҳозирги аҳволим тӯғрисида жиiddий ўйлай бошладим.

Амаким душман эди — бунга энди мутлақо шубҳаланмасдим; шубҳа йўқки, мен ҳар қадамда ўз ҳаётимни

хавф остида қолдираман, чунки у жамики ҳақ-ноҳақ йўллар билан бўлса-да, каминани жувонмарг қилишга интилиши тайин эди. Лекин мен ёш эдим, ғайрат-шижоатим жўш уриб ётарди ва ҳар қандай қишлоқи ўсмир сингари ўз ақл-идрокимга ниҳоятда бино қўйган эдим. Мен гўё тиланчи мисоли, деярли ўз боласидай унинг остонасига нажот истаб борган эдим: у мени қандай кутиб олди? Макр-ҳийла ишлатди, тошбагирлик қилди; агар энди уни ўзимга итоат эттириб олсан ҳам, чўпон қўй подасини минг мақомга йўргалатгандай, хўрласам ҳам ҳаққим кетади!

Гоҳ-гоҳ тиззаларимни силаб-сийпалаб, киприкларим орасидан гулханга термулган кўйда жилмайиб ўтирадим: хаёлимда аллақачон унинг сирларини бирин-кетин фош этиб, амакимнинг соҳиби қиролига айланиб ултурган эдим. Мишмишларга қараганда, эссендинлик жодугар ғаройиб кўзгу ясаган эмиш — ҳар қандай одам ўша кўзгуга қараб туриб ўз пешонасидаги ёзувни ўқиб олиши мумкин экан; назаримда, ўша устаси фаранг зот ойнасини кўмир чўғида тобламаган шекилли, чунки менинг кўз ўнгимда турфа хил манзаралар, ажойиботлар сурати намоён бўлган эса-да, лекин улар орасида на кема, на саватдек шапка кийган денгизчилару ва на менинг хумкалламга мўлжалланган таёқ бор эди — хуллас, тез орада мурғак бошимга ёғилажак кулфатлар тўғрисида жиндек имо-ишора ҳам учрамасди.

Ниҳоят, хурсандлигимдан теримга сиёмай, ўпкамни қўлтиқлаганимча юқорига кўтарилидим ва ўз маҳбусимни озодликка чиқардим. У хушмуомала оҳангда каминага «хайрли кун» тилади, мен бўлсан заҳарханда аралаш, кеккайиб, худди ўшандай тилак изҳор этдим. Кўп ўтмай биргалашиб нонушта қилишга ўтиридик: гўё кечадан бери ҳеч нарса ўзгарамагандек эди.

— Хўш, сэр? — дедим аччиқ қилиб. — Наҳотки менга айтадиган гапингиз қолмаган бўлса? — Жавоб аниқ бўлгани учун сабрим чидамай, қўшимча қилдим: — Назаримда, энди бир-биримизни тушунмоғимиз лозим. Сиз мени қишлоқи бўш-баёв бола, қўрқоқ, аҳмоқ, худди тўнкага ўхшайди деб ўйладингиз. Мен эсам, сизни олижаноб инсон деб, ҳеч бўлмаса, бошқалардан ёмон эмасдир деб ўйладим. Кўриниб турибдики, иккимиз ҳам хато қилибмиз. Хўш, нима учун мендан қўрқасиз, нега одамни алдайсиз, нечун ҳаётимга суюқасд қиласиз?..

У ҳазилкаш одамман, беғараз ҳазил қилмоқчи эдим, деб тўнғиллади-ю, лекин мийигимда кулиб ўтирганимни

кўриб, дарҳол мұомала йўсинини ўзгартирди ва нонуштадан кейин зудлик билан ҳаммасини тушунтириб беришга ваъда берди. Бироқ, афт-башараси айтиб турадики, ҳозирча бирорта ёлғон-яшириқ уйдирма тўқишига улгурмаган эди: унга бекорга чираняпсиз, демоқчи бўлдим-у, аммо шу пайт нохосдан эшик тақиллаб қолди.

Амакимга жойидан жилмай ўтиришни тайнладимда, эшикни очгани кетдим. Остонада денгизчилар кўйлагини кийиб олган қандайдир ўсмир турарди. У мени кўриши биланоқ тиззаларига шаппатилаб, денгизчиларга ўхшаб рақсга туша бошлади (у пайтлари денгизчиларнинг шунаقا ҳунари ҳам борлигини билмасдим): рақкос бармоқларини қасирлатар, оёқлари билан ерни дупирдунир тепар эди. Шунга қарамай, у совуқдан гезарид кетган, афтидан, ўсмир ночор аҳволда эди: мана ҳозир ё кулиб юборади, ёки йиғлаб юборади, деб ўйладим — унинг чапанилиги сира-сира шу тобдаги ҳолатига мос тушмасди.

— Дўстим, аҳволлар қалай? — деб сўради ҳазил товушда.

— Нима ишинг бор? — дедим мағрур туриб.

— Менинг кўнглимни шод этингиз! — деди ва ашула айта бошлади:

Ойдин оқшом, баҳор айёми

Оҳ, нақадар соз!<sup>1</sup>

— Қўпол гапириб қўйсам кечирасан-у, лекин бу ерга бирор иш юзасидан келмаган бўлсанг, бор йўқол — тошингни тер! — дедим.

— Шошма, оғайн! — деб қичқирди. — Нима бало, ҳазилни тушунмайсанми? Ёки мени боплаб савалашларини истайсанми? Мен мистер Бэлфурга мўйсафид Хози-озидан мактуб келтирдим. — У менга хатни кўрсатди-да, қўшимча қилди: — Бундан ташқари, оғайн, очдан ўлай деяпман.

— Хўп, майли, — дедим. — Уйга кир. Қорнимнинг пўстаги чиқса чиқсинки, лекин сенга бир бурда нон топилади.

Уни ошхонага бошлаб кирдим ва ўз ўрнимга ўтқазиб қўйдим: шўрлик нонуштанинг қолган-қутганини пок-покиза тушира бошлади; гоҳ-гоҳ менга қараб кўзини қисиб қўярди, ғайритабиий қиликлар қиласарди — кўриниб турибдики, у одамохун йигитча эди ва

<sup>1</sup> Шеърий тизмаларни Равшан Файз ва Мушфиқ Муртазо таржима қиласан.

ҳақиқий эркак ўзини айнан мана шундай тутиши керак, деб ўйларди. Бу пайтда амаким ҳатга кўз югуртириб чиқиб, теран ўйга толган эди. Бирдан дилгир тортиб, ўрнидан сапчиб турди-да, мени ошхона бурчагига етаклаб борди.

— Ма, ол, ўқиб кўргин,— деб у ҳатни қўлимга тутқизди.

Мана ҳозир ҳам — ушбу жумлаларни ёзаётган пайтимда ҳам ўша ҳат қўл остимда турибди.

«Куинсферри» кечуви,  
«Дўлана» меҳмонхонаси

Сэр!

Мен бандаргоҳга кираверишдаги жойда бекор ётибман ва кичик денгизчи воситачилигида сизга хабар юборяпман. Агар аввалги топшириғингизга бирор нарса қўшимча қилишни лозим кўрсангиз, бугун охирги имкониятингиз бор, чунки шамол ўнгай томондан эсяпти — биз эртага кўрфазни тарқ этамиш. Тонмайман, биз ишончли вакилингиз бўлмиш мистер Ранкилер билан баъзи бир масалаларда келиша олмадик; шошилинч равишда ҳал этилмаган ҳар қандай муаммо маълум миқдорда зарар келтириши мумкин. Мен сизга тушум ҳисоботини тартиб бўйича тузиб қўйдим, сэр, маблағ ўзимда турибди, деб

камина қулингиз Элайс Хозисон».

— Биласанми, Дэви, бу Хозисон икки елканли «Васият» савдо кемасининг дарғаси, Дайсетдан келяпти. Биз у билан бир иш қиляпмиз. Агар икковимиз ҳозир анави бола билан бирга борсак ёмон бўлмасди: шунда мен дарға билан «Дўлана» меҳмонхонасида ёки «Васият» кемасида юзма-юз учрашардим ва зарур бўлса бирорта қофоз-поғозга имзо чекардим-да, кейин вақтни бекор ўтказмасдан тўппа-тўғри ишбоши — мистер Ранкилер ҳузурига борардик. Бўлиб ўтган воқеалардан сўнг, ўйлайманки, гапларимни сариқ чақага ҳам олмайсан, лекин Ранкилерга ишонарсан. У маҳаллий зодагонларнинг teng ярмининг ишбошисидир, кекса одам, ҳамма ҳурмат қиласди, боз устига, у отангни ҳам танирди.

Ўйланиб қолдим. У мени бошлаб бормоқчи бўлган томонда кемалар сероб, демак одамлар ҳам кўп

бўлса керак; амаким одамлар олдида зуғум ўтказишга ботинмас, қолаверса, бизнинг ёнимизда кичик денгизчи бор-ку — хавфсирашга ҳожат йўқ. Ҳозир амаким алдаш учунгина ишбошини эслатган бўлса-да, лекин уёқдан амакимни ўша киши ҳузурига боришга мажбур қиласман. Бундан ташқари, денгизни ва кемаларни яқинроқдан томоша қилишни жуда-жуда истардим! Эсингизда бўлсинким, мен соҳилдан олисда — тоғда ўсган боламан; фақат икки кун аввал бепоён, кўм-кўк кўрфазни ва худди ўйинчоққа ўхшаш, жимитдай елканли кемаларни кўрдим. Ишқилиб, нима бўлганда ҳам, рози бўлдим.

— Маъқул,— дедим.— Майли, кечувга бориб келамиз.

Амаким шляпа ва чакмонини кийиб, занг босган эски ханжарини белига тақиб олди. Сўнгра ўчоқдаги оловни ўчирдик ва эшикни қулфладик-да, йўлга тушдик.

Йўл яйдоқ далалар бағрини кесиб ўтган эди. Шимолий-ғарбдан эсаётган изғирин юзимизни чимдиб-чимдиб оларди. Июнь ойи эди, майсазор узра достор-гуллар оқаришиб кўринади, дараҳтлар чаман-чаман гулларга бурканган, лекин кўкариб кетган бармоқларимизу тўнгиб қолган қўлларимизни кўрган киши қиши келдими-кан, худди декабрь ойидагидек қаҳратон-ку, деб ўйлаши мумкин.

Эбенезер амаким йўл четида имиллаб, тарванглаб борарди — худди даладан ҳориб-толиб қайтаётган қўшчи-га ўхшарди. У йўл бўйи миқ этмади ва мен беихтиёр кичик денгизчи билан сұхбатлашиб кетдим. Унинг исми Рансом экан; тўққиз ёшидан бошлаб дengiz bўylab сафарга чиқади, ҳозир неча ёшда эканини аниқ айтольмайди, чунки ҳисобини чалкаштириб юбориби. У панд-насиҳатларимга қулоқ солмай, кўкрагини очиб шамолга тутди, шамоллаб қолсанг борми, ажалингдан беш кун бурун ўлиб кетасан, дейишимга қарамай, баданидаги нақшинкор ёзувларни менга кўз-кўзлади; ҳуда-беҳуда болаҳонадор қилиб сўкинаверарди, лекин сўкинишни қойиллатмасди — бўз болалиги билиниб қоларди; у қаҳрамонона жасоратлари-ни бирма-бир санаб берди: яширин ўғирликлар, туҳмат-лар ва ҳатто қотиллик ҳам қилганмиш. Лекин тафсилот-ларига одам боласи ишонмасди, булар қуп-қуруқ, ноchor мақтанчоқликдан бошқа нарса эмасди, ундан кўра, туюнинг думи ерга тегибди, деган уйдирма ростроқ туюларди, айни чоқда бола пақирга одам ачинарди.

Мен ундан елканли кема ҳақида сўрадим: «Ў-ў, олам-жаҳондаги энг зўр кема — ўша!»— деди. Капитан

хусусидаги сўровимга ҳам оғзидан бол томиб, оташин жавоб қайтарди. Таърифларига қараганда, Хози-ози (у хўжалик бошлиғини ҳамон шундай ном билан атарди) шайтону иблисдан ҳам ҳайиқмайдиган довюрак зотлардан экан, яъни «ҳатто қиёмат қойимга ҳам елканли кемада учиб борар»миш, феъл-атвори ҳам шунга монанд экан: ваҳший, кутурган, шафқатсиз. Шунга қарамай, шўрлик бола пақир дарға шаънига таҳсиллар ўқирди, уни денгиз бўриси ва ҳақиқий эркак деб биларди! Рансом ўз тангрисининг биттаю иллатини илғаган экан.

— Фақат денгизчи сифатида уч пулга қиммат,— деди қулоғимга шивирлаб.— Кемани мистер Шуан бошқаради, у ҳақиқий денгизчи! Бунақаси етти иқлимдан ҳам топилмайди, лекин ичкилиқка мукласидан кетгани ёмон-да, баччағар! Муни қарагин! — Пайпоғини туширдию яллиғланиб турган ўйдим-чукур ярасини менга кўрсатди. Нафасим ичимга тушиб кетди. У бўлса, ғурурланиб илова қилди: — Бунинг ҳаммаси ўша мистер Шуаннинг ҳунари!

— Нима?! — деб қичқириб юбордим.— Сен шундай ваҳшийликка ҳам чидаյпсанми? Нима бало, қулмисан, нега сенга бундай мумомала қилишади?

— Ҳали кўрсатиб қўяман! — деб сўзимни илиб кетди омадсиз савдойи ва дарҳол тўнини тескари кийиб олди.— Шошмай турсин, тавбасига таянтираман! — Филофдан катта пичноғини чиқарди. Ўзининг айтишича, буни ўғирлаб олган экан.— Қўрдингми? — деб сўради.— Қани энди қўлини теккизиб кўрсин-чи! Мен уни бўғизлаб қўяман! Худога шукрки, у биринчиси эмас! — Дағдағасини мустаҳкамлаш мақсадида болаҳонадор қилиб сўкинди, лекин сўкиши ўрнига тушмади.

Ҳеч қачон ҳеч кимга манави ғарип калтафаҳмга ачинганимдек ич-ичимдан куйинмаган эдим; шундай бўлса-да, англай бошладимки, елканли кеманинг номи илоҳий — «Васият» эса-да, маълум бўлишича, унда камдан-кам кишигина жаҳаннамдагидан бир оз афзал, умргузаронлик қилас, эланни ташкил келадиган.

— Қариндош-уруғларинг йўқми? — деб сўрадим. Унинг айтишича, инглиз бандаргоҳларининг бирида, афсуски, номи эсида қолмабди, отаси бор экан.

— Яхши одам эди, бироқ вафот этди.

— Худойим-эй, наҳотки қуруқликда ўзингблоп бирорта иш тополмайсан-а? — деб сўрадим тутақиб.

— Э-э, йўқ,— деб эътироҳ билдириди у ва маккорлик

билан кўз қисиб қўйди.— Мен сен ўйлаган одам эмасман! Қуруқликда бирпасда бирорта ҳунарманда шогирд тусиришади.

Мен ундан ҳозир машғул ҳунаридан ҳам ҳаёт учун хавфлироқ — нафақат бўронлару тўлқинлар, айни пайтда хўжайнинг бағритошлигидан-да даҳшатлироқ қасб-кор бормикан, деб сўрадим. У, гапларинг тўғри, деди. Аммо шу заҳоти ўша ҳаётни кўкларга кўтариб мақтай бошлади, чўнтақ тўла пул бўлса, қуруқликка қадам қўйишнинг ҳам ўзгача гашти борлиги тўғрисида, даста-даста пулни сарфлаш нақадар соз эканлиги, олма харид қилиш ва умуман, «қуруқлик чурвақалари» нинг (у айнан шундай деди) кўзини кўйдириш хусусида тўлиб-тошиб гапириб берди.

— Унчалик даҳшатли эмас,— деди мардонавор.— Бошқаларнинг пешонаси янада шўрроқ. Масалан, «йигирма фунтлик»ни олиб кўрайлик. Эҳ! Уларга нечоғли оғир эканини бир кўрсанг эди! Биттасини ўз кўзим билан кўрганман: сен тенгқур эркак (мен унинг назарида гўё чол эдим), соқолдор — михдай: кўрфазни тарқ этишимиз биланоқ кайфи тарқалиб кетди ва дунёни бошига кўтариб, шунақаям додладики! Бундан кўра ўлгани яхши-е! Ишонавер, уни роса қалака қилдим! Ёки янга-тағин тирмизаклар масаласига қайтайлик. Оҳ, булар ниҳоятда майда гаплар! Ишонавер, уларни чизган чизигимда юргизаман. Ҳар эҳтимолга қарши, кемада тирмизаклар пайдо бўлиб қолишса, асқотиб қолар деган мақсадда атайлаб битта таёқ олиб қўйганман — уларни калтаклайман-да.

Эс-ҳушимни йиғиб олгунимча ана шунаقا олди-қочди гапларни роса эшилдим. Фаҳмлашимимча, «йигирма фунтлик» — бу Шимолий Америкага сурғун қилинган баҳтиқаро жиноятчилар бўлса керак, балки ўша замонларда расм бўлган ибора билан айтганда, ғаразли ниятда ёки қасос олиш учун алдаб-сулдаб олиб қочилган бегуноҳ шўртумшуқлардир??

Биз тепалик устига кўтарилдик ва кўз ўнгимизда кечув билан кўрфаз намоён бўлди. Маълумки, Фёрт шу жойда хийла торайган; шимолий қисми ўртача дарё кенглигига — кечиб ўтиш учун жуда қулай жой, юқори томонида эса ҳар қандай кема фойдаланса бўладиган ёпиқ бандаргоҳ вужудга келган; кўрфазнинг нақ бўғзида ҳароғ зорга айланган орол бор; жанубий қирғоқда соллар боғлаб қўйиладиган маҳсус жой ҳозирланган ва ушбу причал охирида, йўлнинг

нариги бетида, гуллаб ётган найзабаргли дараҳтлару дўланалар орасида меҳмонхона биноси кўзга ташланиб турарди.

Күнсферри шаҳарчаси ғарбий томонда жойлашган эди. Ҳозир меҳмонхона атрофида одам сийрак бўлиб, йўловчилар чиқарилган сол яқинда шимолий соҳил томон жўнаб кетганди. Дарвоҷе, причалга эшкакли қайиқ боғлаб қўйилган эди, эшкакчилар бочкаларнинг устида мудраб ўтиришарди. Рансом, бу «Васият»га қарашли қайиқ, дарғани кутиб турибди, деб изоҳ берди. Тахминан соҳилдан ярим миль<sup>1</sup> нарида лангар ташлаб турган «Васият» кўринди. Палубада сафарга қизғин тайёргарлик кўриларди: арқонларга ёпишиб олган денгизчилар мачталардаги елкан боғланадиган кўндаланг ёғочларни шамол эсадиган томонга тўғрилашарди, улар жўровоз бўлиб куйлаётган қўшиқни шамол соҳилга учирив келмоқда эди. Мен йўл-йўлакай эшитган гаплардан сўнг икки елканли кемага жирканиб назар ташладим ва денгиз сафарига жўнайдиган манглайи қора одамларга чин дилдан ачиндим.

Тепалик четида мен йўлнинг нариги бетига ўтдим-да, амакимга:

— Сэр, сизни огоҳлантириб қўйишм лозим: нима бўлганда ҳам «Васият» бортига қадам босмайман,— дедим.

Назаримда, амаким уйқудан энди уйғонгандек бўлди.

— И? Нима гап? — деб сўради.

Мен гапимни тақрорладим.

— Майли, майли,— деди у.— Сен айтганча бўла қолсин, сўзимдан тонмайман. Нега ғўдайиб турибмиз? Совуқ жон-жонимдан ўтиб кетди. Агар янглишмаётган бўлсан, «Васият» елканларини кўтаришга ҳозирлик кўрятти шекилли...

### Олтинчи боб

## КЕЧУВДА РЎЙ БЕРГАН ҲОДИСА

Меҳмонхона остонасини ҳатлаб ўтишимиз биланоқ Рансом пиллапоя бўйлаб бизни юқорига бошлаб чиқди: битта каравот турган хонага кирдик, ўчоқда

<sup>1</sup> Денгиз миляси 1852 метрга teng (тарж. изоҳи.).

кўмир лов-лов ёнарди, хона худди тандир мисоли исиб кетган эди. Ишchan қиёфали бақувват, қорайган эркак ўчоқ ёнидаги столга ўмганини берганча бир нималарни қоғозга тушириш билан машғул эди. Хона иссиқ бўлишига қарамай, денгизчилар курткасининг ҳамма тұғмаларини қадаб олган, саватдай шляпасини эса қулоғигача бостириб кийган эди; ростини айтсам, умрим бино бўлиб мен бу денгизчи дарғадек совуққон, оғир-вазмин инсонни учратмаганман, унинг олимона қиёфасига ҳатто мажлислар залида ўтирадиган судъя ҳам ҳасад килиши мумкин эди.

У дерҳол ўрнидан турди-да, бизнинг истиқболимиз сари пешвоз чиқди ва куракдай қўлини Эбенезер амакимга узатди.

— Менга мурувват кўрсатганингиз учун миннатдорман, мистер Бэлфур,— деди жарангдор товушда.— Кечикмай келганингиз яхши бўлди. Шамол ҳам йўлимизга монанд равишда эсяпти, умид қиласманки, кеч кирмасдан Мей ороли соҳилидаги кўхна манқалдон<sup>1</sup> бизни имлади.

— Дарға Хозисон, хонангиз тоқат қилиб бўлмайдиган даражада иссиқ экан,— деди амаким.

— Ўрганиб қолганман, мистер Бэлфур,— деди денгизчилар бошлиғи.— Табиатан совуққа чидамсиз кишиман, қоним совуқ, сэр. Нафси замрни айтганда, мўйна ҳам, жун ҳам, ҳатто иссиқ арақ ҳам баданимни иситмайди. Тропик денгизларда жигаригача қовурилган одамлар шунақа бўлиб қолар экан, сэр.

— Начора, дарға,— деди амаким.— Киши ўз табиатидан ҳеч қаёққа қочиб қутуолмайди.

Шундай бўлса ҳам дарғанинг ғалати қилиғи бошимга битган бало бўлди. Қариндошимни кўздан қочирмайман деб ўз-ўзимга сўз берган бўлсан-да, лекин денгизни яқинроқдан кўриш истаги юрак-бағримни шунчалар ўртаб юбордики, асти қўяверасиз! Боз устига, хона димиқиб кетган эди, шунинг учунми, амаким, «пастликка тушиб, бир айланиб келсанг бўлармиди-а?» дейиши билан аҳмоқ-қа ўхшаб тезда кўна қолдим.

Қандайдир қоғозларга кўмилиб, вино ичишиб ўтиришган кишиларни хонада қолдирдим-да, меҳмонхонадан ташқарига чиқдим ва йўлни кесиб ўтиб, сув бўйига тушдим. Қучли шамол эсаётган бўлишига қарамай, фақат майнин-майнин тўлқинлар соҳил томон югуриб

<sup>1</sup>Манқалдон — кўмир билан ёқиладиган кўчма ўчоқ.

келарди — булар мен кўлда кўрганимдан сал йирик эди, холос. Лекин майсалар янгилик эди: гоҳ кўм-кўк, гоҳида қўнғир, нақ белга уриб қолибди, баъзилари ғовачак ҳосил тугибди, уларни бармоқларим орасига олиб эзсан «пақ-пүқ» этиб ёриларди. Ҳатто шу ерда — кўрфаздан анча олисда ҳам денгиздан келаётган шўртак таъм бурунларимни қичиштиради. Ана, «Васият» мачталарига елканлар кўтариляпти: ҳамма нарса узоқ сафар руҳи билан суғорилган эди, кўнгилда нотаниш ўлкаларга нисбатан ажаб қизиқиш уйғонарди.

Қайиқда ўтиришган эшкакчиларни ҳам томоша қилдим: бадқовоқ азаматлар экан; баъзилари кўйлакчан, бошқалари бушлатда, бир неча киши томоқларини гулдор рўмол билан боғлаб олганди, биттаси белига иккита тўппонча осиб олибди, икки-уч киши эса белига ҳанжар осиб, серкўз таёқ ушлаб олган эди. Кўринишидан ширақайф бўлган бир киши билан салом-алик қилдим-да, ундан, кема қачон жўнаб кетади, деб сўрадим. У, тўлқин орқага қайтган заҳоти йўлга тушамиз, деди ва на майхонаси бор, на машшоқлар учрайдиган лаънати шаҳарча аллақачон жонига текканини айтди, сўнг болаҳонадор қилиб сўкина бошладиу камина шоша-пиша жуфтакни ростладим.

Бу учрашувдан кейин яна Рансом ҳақида ўйлай бошладим: назаримда, у мана шу шайка орасидаги энг мўмин-қобил йигитча эди. Тез фурсатда унинг ўзи меҳмонхонадан чиқиб қолди ва мусаллас билан сийлашимни сўраб, ялиниб-ёлборгранча югуриб кела бошлади. Мен унга, чучварани хом санаяпсан, тирранча, уларга ўхшаб тантиқлик қилишимизга ҳали еттита қовун пишиғи бор, дедим.

— Илтифот қилсинлар, тақсир! Атиги бир кружка пиво ичаман, холос,— деб қўшиб қўйди.

У афт-башарасини буриштириб мени роса бўралаб сўккан бўлса-да, лекин барибир пиво олиб беришга рози бўлдим. Бирпастдан кейин биз меҳмонхона пешайвонида пиво билан газакни мақтаб ўтирадик. Меҳмонхона хўжайини билан танишиб олсан ёмон бўлмасди, деб ўйладим, ахир у шу ерлик киши. Ўша замон одатига кўра, мен уни ўзимиз ўтирган столга таклиф этдим; аммо у бизга ўхшаган тирмизаклар билан улфатчилик қилиб ўтирадиган кишилар тоифасидан эмасди, мўътабар зот эди. У салмоқли қадам ташлаган кўйи залдан чиқиб кета бошлади, аммо

құлай фурсатни қўлдан бой бермай, мистер Ранкилерни танимайсизми, деб сўрадим.

— Нега танимас эканман! — деди хўжайнин. — Бениҳоя ҳурматли инсон! Айтмоқчи, сен Эбенезер билан бирга келдингми?

— Ҳа.

— Мабодо сизлар ёру дўст эмасми? — Бу — шотланд тилида «сизлар қариндош эмасми» деган маънони билдиради.

«Йўқ», деб жавоб бердим.

— Ўзим ҳам шундай ўйлаган эдим, — деди хўжайнин. — Ҳартугул, сен мистер Александрга жуда ҳам ўхшар экансан.

— Нима бало, Эбенезер ўлкада ёмон ном чиқарганми? — деб сўрадим.

— Бўлмасам-чи, — деб жавоб бердий хўжайнин. — Сассиқ чол. Унинг «марҳамати» туфайли битидан бошқа ҳеч вақоси қолмаган Женнет Клустон каби одамлар Эбенезерни дорда тишиларини тиржайтириб турганини кўришса, кўз ҳақига бор дунёсини ҳадя этишарди. Тавба, у қачонлардир бамаъни йигит бўлган эди. Кейин мистер Александр ҳақида мишмишлар тарқалдию бутунлай ўзгариб кетди.

— Қанақа мишмишлар? — деб сўрадим.

— Эбенезер унинг бошини еган, дейишарди, — деди хўжайнин. — Наҳотки, эшитмаган бўлсанг?

— Нима учун бошини еган экан-а? — дедим талмовсираб.

— Нима учун бўларди, қўргонни ўзиники қилиб олиш илинжида, албатта.

— Қайси қўргонни? Шосними?

— Бўлмасам-чи! — деди хўжайнин.

— Аникроғи, иззат-икром талашибди-да? Тўғрими? Демак, менинг... Демак, Александр тўнғич фарзанд экан-да?

— Албатта. Акс ҳолда, Эбенезер унинг бошини еганидан нима фойда?

Шундай дедиую аввал-бошданоқ' кетишига баҳона тополмай турган хўжайнин пешайвонни тарқ этди.

Албатта, қўпдан бери шулар тўғрисида гумонсираб юрардим, аммо гумон — бошқа нарса, асл ҳақиқат — бошқа. Ростини айтсам, бу хабар мени эсанкиратиб қўйди, қулоқларимга ишонмасдим; икки кун аввал чўнтагида сарық чақаси бўлмаган, Этрик ўрмонининг чанг-тўзон йўлида тентираб юрган йигитча бирдан бойиб

кетса, қўрғону ер-мулк эгасига айланиб қолса ва эҳтимолки, эртадан бошлаб қонуний ҳуқуқи кучга кирса-я! Хуллас, пешайвонда лаззатбахш ўй-хаёлларга фарқ бўлиб ўтирадим, ҳеч нарсага эътибор бермасдим; фақат эсимда бори шуки, тўсатдан дарға Хозисонни кўриб қолдим — у соҳилдаги эшкакчиларига қандайдир фармойиш берар эди. Кейин яна меҳмонхона томон йўл олди; денгизчилар каби лапанглаб эмас, балки шаҳдам қадам ташлаб, азamat қад-қоматини тик тутиб, оғир-вазмин ҳаракат қиласди, қиёфаси жиддий, ўйчан эди. У ҳақда Рансом айтган гаплар кўнглимда шубҳа ўйғотди: камина эшитган дийдиёлар дарғанинг ҳозирги қиёфасига мутлақо ёт эди. Аслида у мен тасаввур этгандек олижаноб эмасди ва айни пайтда Рансом тасвирилагандай ёвуз кишига ҳам ўхшамасди: унинг жисми жонида гўё иккита одам истиқомат қиласдию кемага чиқаётган чоқда дарғанинг «яхши» қисми бандаргоҳда қолиб кетарди.

Ниҳоят, амаким мени чақира бошлади: бошимни кўтариб қарасам, улар иккаласи йўлда туришган экан. Мен билан биринчи бўлиб дарға гаплашди; иззат-ҳурматимни ўрнига қўйиб, худди тенгқуридек муомала қилди — ширин гап-сўзлар билан ўсмиirlарни бирпасда оғдириб олиш мумкин.

— Сэр, мистер Бэлфур сизга ниҳоятда юксак баҳо берди,— деди у.— Колаверса, бир кўришимдаёқ менга жуда ёқиб қолдингиз. Афсуски, бу ерда сиз билан яқиндан таниша олмайман — вақт тифиз, лекин ихтиёrimda қолган фурсатдан оқилона фойдаланишга ҳаракат қиласман. Тўлқин қайтишигача яна ярим соат бор, мен сизни кема бортига таклиф этаман: насиб этса бир пиёладан май ичамиз.

Ҳақиқий кеманинг ички қисми қанақа эканини бир кўришни жуда ҳам истардим-у, аммо ўз ҳаётимни ҳавф остида қолдиролмасдим; шунинг учун, биз амаким билан ишбошига учрашмоқчи эдик, деб жавоб бердим.

— Дарвоқе, у ҳам менга шунақа деган эди,— деди дарға.— Бўпти, қайиқда сизларни шаҳар бандаргоҳигача кузатиб қўяман, кейин Ранкилерга бир қадам қолади, холос.— Туйқус энгашди-да, қулоғимга шивирлади:— Қари тулкига кўз-қулоқ бўлиб туринг, унинг нияти ёмон. Юринг, менинг кемамга чиқайлик — ўша жойда бир-икки оғиз гаплашиб оламиз.— У кўлтиғимдан олдию қайиқ томон бошлади ва товушини баландлатиб сўзлай бошлади:— Очигини айтаверинг, Каролинадан мен

сизга нима олиб келай? Доимо мистер Бэлфурнинг дўстларига жон-жон деб хизмат қилишга тайёрман. Бир қути тамакими? Патдан тўқилган ҳиндиёна бош кийими керак эмасми? Балки, худди мушукка ўхшаб миёвлайдиган тўтиқуш оларсиз-а? Ёки қизил қанотли сайроқи кардинал қуши маъқулми? Кўнглингиз тусаганини танлайверинг!

Биз деярли қайиқ ёнига бориб қолдик, у мени ўриндиқقا ўтказди... Қаршилик кўрсатишни хаёлимга ҳам келтирганим йўқ; олижаноб дўст, маслаҳатгўй топганимдан хурсанд эдим — аҳмоқ бўлмасам, кемани ҳам томоша қиласман деб суюнармидим! Биз жой-жойимизга ўтиришимиз биланоқ қайиқни қирғоқдан итариб юбориши ва у тўлқинда чайқалганча юзиб кетди. Бу ҳаракат янгилик эди, қалбимни ғалати ҳис-туйғулар чулғаб олди: мен сув ичиди ўтирадим, соҳил ҳам кўзимга ажабтовор кўринарди, ҳув нарида турган кема аста-секин катталаша бошлади — буларнинг барчаси мени ўзига ром қилиб қўйди; дарғанинг гап-сўзлари элас-элас қулоғимга чалинарди, холос. Ўйлашимча, унга тумтароқ жавоб қайтарардим.

Биз «Васият»га ёндошган пайтда (кеманинг нақадар улкан эканини, бортга тўлқинлар зарб билан урилаётганини, ҳар хил юмушларни бажараётган қувноқ денгизчиларни кўриб оғзим очили-иб қолди) Хозисон, дастлаб кема бортига чиқамиз, деди ва ўртада кўндаланг турган нарвонни пастга тушириш ҳақида бўйруқ берди. Мени палубага тортиб олишди ва дарға худди шуни кутиб тургандай дарҳол қўлтиғимдан қўлини ўтказди. Бирмунча вақт жойимда қимирламай турдим; бошим айланниб кетди: оёқларим остида қалқиб турган тахтада мувозанатимни сақлашга интилардим, бегона одамлар олдиди сал-пал истиҳола қиласардим-у, лекин хилма-хил таассуротлардан ниҳоятда мамнун эдим. Айни чоқда дарға мени ажойиботлар билан таништира бошлади: кема қисмларининг вазифаларини, номларини ҳижжалаб тушунтириди.

— Ие, амаким қани? — деб сўрадим бирдан.

Амаки?! — деб тақрорлади Хозисон ва дарҳол юзлари жиддий тусга кирди.— Ана холос — пишди гилос!

Холим ҳароб эканини англадиму кучим борича юлкиниб, унинг чангалидан чиқиб кетдим ва ўзимни борт тўсиғига урдим. Не кўз билан кўрайки, қайиқ шаҳар томон юзиб бораради, қайиқнинг қўйруқ томонида амаким ўтиради.

— Ёрдам бери-инг! — деб қичқирдим томогим йиртилгудай бўлиб ва товушим кўрфаз узра баралла таралди.— Ёрдамга-а! До-од, ўлдириб қўйишади-и!

Амаким мен томон ўгирилиб қаради: унинг юз-кўзларида раҳм-шафқатдан асар ҳам йўқ эди.

Шундан бошқа ҳеч нарсани кўрмадим. Бақувват кишилар мени тўсиқдан ажратиб олдилару гўё бирор бошимга гурзи билан туширғандай бўлди ва кўзларимдан олов чақнаб кетдию ҳушимни йўқотиб қўйдим.

## Еттинчи боб

### «ВАСИЯТ» КЕМАСИДА ДЕНГИЗ БЎЙЛАБ САФАР

Зим-зиё қоронғиликда ўзимга келдим, аъзойи баданим сирқираф оғририди, қўл-оёқларим чирмаб боғланган эди. Қандайдир ғалати товушлар қулоқни қоматга келтиради. Сув худди тегирмон новидан тушаётгандек тинимсиз шовулларди; тўлқинлар кема бортига гурс-гурс уриларди, елканлар жазавага тушиб «чапак» чаларди, денгизчилар эса бақириб-чақиришарди. Олам-жаҳонгоҳ кўкка сапчирди, гоҳо чирпирак бўлиб тубанликка шўнғирди: ҳолимга маймунлар йиғларди, кўнглим айнирди, жисми жоним эски увадага ўхшаб ҳилвираб қолган эди, кўз олдимда алланималар жимиirlашарди, узук-юлуқ хаёлларимни жамлаб, инграй-синграй оёқ-кўлим боғлиқ эканини англаб етгунимча бир қанча вақт ўтди; лаънати кеманинг аллақайси бурчагида ётардим, шамол борган сари кучаярди, довул бошланаётган эди. Бошимга қандай кулфат тушганини тўлатўкис идрок этишим биланоқ қоним қайнаб кетди, бемаънилигим аччиғимни келтиради, шу тобда амакимни кўрарга кўзим, отарга ўқим йўқ эди. Сўнг яна эс-ҳушимни йўқотдим.

Ҳушимга келган чоғимда ҳамон ўша шовқин-сурон қулоқларимни қоматга келтиради, бетартиб зарбалардан дам нариги томонга, дам бериги томонга юмалаб кетардим. Қуруқликда яшашга ўргангандай мендай бечора, ўлганнинг устига тепгандай, денгизда чайқаларди. Елдирим болалик йилларимда бошимга не-не мусибатлар ёғилган бўлса-да, лекин ҳеч қачон елканли кемадаги дастлабки соатлардагидек умидсизликка тушмаган эдим, бунчалик азобланмагандим.

Мана, охирги замбарак товуши қулоғимга чалинди: энди кема довулга бас келолмайди шекилли, шунинг учун табиий офат түғрисида сигнал бериляпти. Менга қолса, бу азоб-уқубатлардан қутулиш учун ҳатто денгиз тубига чўкиб кетишга ҳам рози эдим. Бироқ, ўқ отилиш нинг сабаби бошқа экан: кейинчалик менга ҳикоя қилишларича, дарғанинг шунаقا одати бор экан. Демокчиманки, энг бемаъни одамнинг ҳам қандайдир бемаъни фазилати бўлиши мумкин. Маълум бўлишича, биз Дайсет ёнидан ўтаётган эканмиз; елканли кема шу ерда қурилган бўлиб, бир неча йил муқаддам дарғанинг онаси, кекса миссис Хозисон ҳам ушбу масканга кўчиб келган экан — «Васият» сафарга кетаётib ёки уйига келаётib, байроғи баланд кўтарилган ҳолда албатта замбаракдан ўқ узиб кампиршони муборакбод этаркан.

Вақт ҳисобини чалкаштириб юбордим, камина ётган бижғиб кетган кема қорнидаги бу «молхонада» кундуз ҳам тунга үшшарди; устига устак, бундай расво аҳволда ҳар бир соат одатдагидан икки баробар узокроқ чўзиларди гўё. Шунинг учун кема қандайдир қояга урилиб, тумшуғи билан гирдоб комига ботиб кетишига илҳақ бўлиб қанча ётганимни аниқ айтольмайман. Ниҳоят, кўзим илиндию барча азоб-уқубатлардан фориғ бўлдим.

Юзимга тушаётган қўлфонар нуридан уйғониб кетдим. Кўзларимни очсан, ўттиз ёшлардаги кўк кўз, патила сочли йигит устимга энгашган кўйи тикилиб турарди.

— Хўш, ишлар қалай? — деб сўради у.

Жавоб бериш ўрнига инграндим; нотаниш киши томиримни ушлаб, чаккамга кафтини босиб кўрди ва бошимдаги яра-чақаларимни ювиб, боғлашга киришди.

— Ҳа-а, боплаб дўппослашибди-ку,— деди.— Оғайничалиш, мунча шалвирайсан?! Э-э, қўйсанг-чи, тетик бўл! Нима бало, охир-замон бўптими?! Ҳай, бу гал омадинг юришмабди, кейинги сафар ишларинг юришиб кетади. Мана кўрасан! Овқат-повқат беришдими?

Овқат ҳақида ўйласам, кўнглим айнийди, дедим. Шундан сўнг тунука кружкада бир қултум сув аралаштирилган конъяк ичирди-да, яна ўзимни ёлғиз ташлаб чиқиб кетди.

У қайтиб келган чоқда қоронғиликка тикилганимча ё ухлаб ётардим, ёки уйғоқ эдим; денгиз касалидан қутулғандим-у, аммо бошим гир-гир айланарди, нарсалар кўзимга оёғи осмонда бўлиб кўринарди, хуллас, азоб-

уқубатларим зиғирча ҳам камаймаган эди. Боз устига, аъзойи баданим зирқиради, чирмаб боғланган арқон эса оёқ-қўлларимни оловдай куйдиради. Бу ерда ётар эканман, назаримда, ўзим ҳам бижғиб кетганга ўхшардим; ёлғиз ётган пайтларим гоҳ атрофимда изғиб юрган, баъзан устимга ҳам ўрмалаб чиқиб кетадиган кема каламушлари, гоҳ алоқ-чалоқ тушлар ҳоли-жонимга қўймасди.

Қопқоқ очилдию фонарнинг ғира-шира ёғдуси чарак-лаган қуёш нури остига кўмилиб кетди: кўзимга фақат ўзим ётган «зиндан»нинг йўғон-йўғон қорамтири ёғочлари кўринган бўлса-да, лекин қувонганимдан қичқириб юборишга тайёр эдим. Нарвондан биринчи бўлиб бояги кўк кўз йигит тушди; негадир оёқларини аранг кўтариб босарди. Унинг орқасидан дарға пайдо бўлди. Иккаласи ҳам миқ этишмасди: кўк кўз худди аввалгидай зудлик билан ўёқ-буёғимни текшириб кўрди ва яра-чақаларимни янгитдан боғлаб қўйди, Хозисон эса афт-башарамга ўқрайганча тикилиб турарди.

— Сэр, мана, ўзингиз ҳам кўриб турибсиз,— деди кўк кўз.— Иситмаси юқори, иштаҳаси йўқ; на ёруғлик, на овқат бор — оқибати нима бўлиши ўзингизга аён.

— Мистер Риак, мен фолбин эмасман,— деб жавоб берди дарға.

— Ётар, сэр,— деди Риак.— Елкангизда турган бoshингиз бутун, тилингиз бийрон; ҳар қандай шотландни мот қиласиз — хўп, майли, менинг гапим ҳам ичимда қолмасин: йигитчани бу қандикдан чиқариб, кеманинг умумий хонасига жойлаштиришни истайман.

— Истайсизми ёки истамайсизми, бу сизнинг ишингиз, сэр,— деб эътиroz билдири дарға.— Лекин мен нима десам, шу бўлади. Бу жойда ётибдими, майли, ётаверсинг.

— Айтайлик, сизга мўмайгина ҳақ тўлашди, хўп, бироқ менга-чи? — деди Риак.— Беодобчилик бўлса-да, эслатиб қўйишга ижозат берасиз: камина ҳемири ҳам олганим йўқ. Менга ҳақ тўлашади, албатта. Дарвоқе, маошим унчалик кўп эмас; фақат ушбу эски тоғорада иккинчи ёрдамчи бўлганим учунгина мояна беришади, холос. Ўзингизга жуда яхши маълумки, пешона теримни тўкиб пул топаман. Афсуски, ҳамёнимга моянмдан ташқари сариқ чақа ҳам тушмайди.

— Агар сиз, мистер Риак, топган-тутганингизни дарҳол сувдонга тиқавермаганингизда борми, ҳозир бунчалик нолимасдингиз,— деб жавоб берди дарға.—

Шунинг учун илмоқли гапларни йиғиштиринг, тилингизга эҳтиёт бўлинг. Хўп, энди палубага чиқиш керак,— деди у ҳукмдор оҳангида ва нарвон поғонасига оёқ қўйди.

Мистер Риак унинг ёнгидан ушлаб қолди.

— Хўйуш, айтайлик, сизга қотиллик учун ҳам пул тўлашса...— деб гап бошлади у.

Хозисон таҳдид солиб ортига ўгирилди.

— Нима-нима? — деди гулдирак товушда.— Бу яна қанақа гап?

— Кўриниб турибдики, сизни фақат шунаقا гаплар билан сергак торттириш мумкин, холос,— деди мистер Риак, унинг кўзларига тик боқиб.

— Мистер Риак, биз сиз билан уч марта денгиз сафарида бирга бўлдик,— деди капитан.— Назаримда аллақачон менинг феъл-авторимни билиб олишингиз керак эди: ҳа, мен чўрткесар, шафқатсиз кишиман, лекин оғзингизга қараб гапиринг!.. Уялмайсизми? Фақат кўнглида кири бор, виждан тоза бўлмаган одамгина шунаقا дейиши мумкин. Агар сиз ростдан ҳам йигитчанинг ўлиб қолишига ишонсангиз...

— Сув берилса — бас, ўлади! — деб таъкидлади мистер Риак.

— Бўпти, сэр, — деди Хозисон.— Уни хоҳлаган жойингизга элтиб қўйинг.

Шундан сўнг дарға нарвондан юқори кўтарилиди, мистер Риак эса унинг ортидан масхараомуз таъзим бажо келтириди: камина ҳайратона сухбатга гувоҳ бўлдим. Жоним кўзимга кўриниб турган бўлса ҳам, лекин иккита нарсани тушуниб олдим: биринчидан, дарға шаъма қилганидек, ёрдамчи ширакайф эди; иккинчидан, маст ёки маст эмаслигидан қатъий назар, у билан яқинроқ дўстлашиб олишим лозим.

Беш дақиқалардан кейин қўл-оёқларимга боғланган аркон кесиб ташланди ва қандайдир денгизчи мени елкасига ортди-да, кеманинг умумий хонасига элтиб, дағал адёл тўшалган ўринга ётқизиб қўйдию бирдан ҳушимдан кетдим.

Эҳ, куппа-кундузи, одамлар орасида ҳушга келишнинг гашти ўзгача бўлар экан! Умумий хона кенг-мўл бўлиб, шифтга осма каравотлар илиб қўйилган эди: посбонликдан холи денгизчилар тамаки чекиб ўтиришарди, баъзилар ўринда чўзилиб ётишарди, бошқалар эса ухлашарди. Об-ҳаво сокин эди, ғир-ғир шабада эсарди; туйнук қопқоғи очиқ бўлгани учун хонага ёруғ-

лик тушарди, кема бир ёнига қийшайган маҳалда осмони фалакда порлаб турған қүёш ҳам хонага мўралардики, бирдан кўзларим қамашиб, ич-ичимдан тўлқинланиб кетардим. Бундан ташқари, сал-пал қимириладиму дарҳол битта денгизчи мистер Риак тайёрлаб қўйган дорини оғзимга тутди ва тезроқ соғайишим учун жимгина ётишим лозим эканини таъкидлади.

— Суякларинг бутун,— деди у.— Парво қилма, бошинг ҳам янчилгани йўқ.— Сўнгра қўшиб қўйди:— Биласанми, сени каминаи камтарин сийлаган эди!

Бу жойда узоқ кўнлар мобайнида қатъий назорат остида ётдим, дармонга кирдим ва йўлдошларим билан сиртдан танишдим. Денгизчилар асосан дағал ҳалқ бўлади, булар ҳам ўшалар тоифасидан эди: инсонни олижанобликка, хушмуомалаликка ўргатадиган муҳитдан мосуво, шафқатсиз хўжайин қўл остида якта-ну якжон бўлиб, алғов-далғов, бераҳм табиат қучоғида умргузаронлик қилишга маҳкум этилганлар. Уларнинг баъзи бирорлари илгари қароқчилар кемасида хизмат қилган бўлса, бошқалари қироллик флотидан қочганлар ва бўйнидаги сиртмоқ билан яшайдилар-у, лекин ўтмишларини сир тутмайдилар: улар кўрган-кечирган ҳодисаларни ҳикоя қилишга тил ҳам ожиз: ажабки, энг қадрдон дўстлар «сал нарсага ҳам бир-бирларининг тумшуқларига солиб» қолиши ҳеч гап эмасди. Умумий хонада бир неча кун ётганимдан кейин амин бўлдимки, дастлаб бандаргоҳда улар ҳақда ёмон хулоса чиқарганим — уларни ҳайвонлардан ҳам баттар экан, деб ўйлаб хато қилган эканман, бундан виждоним қийнала бошлади. Одамлар ёппасига аблаҳ бўлмайдилар: ҳар қандай тоифа орасида яхши-ёмон кишилар учрайди ва айни пайтда «Васият» денгизчилари ҳам бундан холи эмас. Тўғри, дағал эди, афтидан, ахлоқсиз кўринишарди, лекин уларнинг ичиде яхши кишилар ҳам кўплаб топиларди. Кези келганда, ниҳоятда дилкаш бўлиб кетишарди, ҳатто мен каби содда қишлоқи йигит қарвисида ҳам очиқ кўнгил эканликлари билиниб турарди, ҳалолликни ҳамма нарсадан устун қўядилар.

Ўшалардан бири — қирқ ёшлар чамасидаги денгизчи каравотим чеңида соатлаб ўтиради ва тинимсиз равишда ўз хотинию ўғли ҳақида ҳикоя қилаверарди. Илгари у балиқ овларди, аммо қайнидан ажралиб қолади ва очиқ денгизда юзиб юрадиган кемага ишга ёлланишга мажбур бўлади... Мана, ўшандан бери неча йиллар ўтиб кетди, бироқ уни сира ҳам

унутолмайман. Ўзининг севимли ибораси билан айтганда, «ниҳолдай, мендан икки мучал кичкина хотиним» уйда интизорлик билан кутарди. Афсуски, у энди ҳеч қачон эрта тонглада хотини учун ўчоқقا ўт ёқолмайди, хотини бетоб бўлиб қолган пайтларда эса ўғил-часига қараб туролмайди. Ҳа, шўрпешоналарнинг кўпчилиги ўшанда охирги сафарга жўнаган экан: уларни Денгиз ўз бағрига олди, жасадлари балиқларга ем бўлиб кетди. Айтмоқчи, марҳумлар тўғрисида ёмон гапириб бўлмайди.

Менга кўрсатилган олижаноб ёрдамларидан бири — ҳаммага тенг бўлашиб, тарқатиб юборилган пулимни каминага қайтариб беришганидир: пулимнинг учдан бир қисми изсиз йўқолган бўлса-да, лекин мен барибир хурсанд бўлиб кетдим ва чўнтағим қуруқ эмаслигини ўйлаб, биз бораётган мамлакат тўғрисида ширин хаёлларга чўмар эдим. «Васият» Каролина томон борарди, лекин у жойни мен сургун қилинган овлоқ деб ўйламанг. Ростини айтганда, ўша замонларда ҳали қулфурушлик қизғин давом этарди, фақат Америка мустамлакаларида қўзғолонлар бўлиб ўтгач ва Қўшма Штатлар ташкил топгач, ўз-ўзидан равшанки, қулдорликка чек қўйилди. Бироқ болалик йилларимда оқ танлилар ҳам заминдорларга сотиларди; ёвуз ниятли амаким мени қулбаччадек сотиб юборишни кўзлаган эди.

Кичик денгизчи Рансом қуйруқдаги бошқармада ётиб-туриб юарди, ўша ерда хизмат қиласарди ва гоҳ-гоҳ мендан хабар олгани келардию (бу ёвузликлар ҳақида илк бора ундан эшитган эдим) моматалоқ бўлиб кетган юзларини, лат еган жойларини миқ этмасдан силаб-сийпалаб ўтиради ёки жазаваси тутиб мистер Шуаннинг гўрига ғишил қалай бошларди. Юрагим зардобга тўлиб кетарди, аммо денгизчилар катта ёрдамчини ниҳоятда ҳурмат қилишарди, у ҳақда гап кетса, «барча шаллақилар орасидаги бирдан-бир денгизчи — ўша, кайфи тарқалган пайтда одамга ўхшаб қолади», дейишарди. Ҳақрост, мен биринчи ва иккинчи ёрдамчиларнинг аломат хусусиятларини пайқадим: мистер Риак жиддий, бадқовоқ, ўжар, асабий эди; мистер Шуан эса кайф бўлмаган пайтларида чивинга ҳам озор бермасди. Дарға тўғрисида сўраб-суриштиридим, бу темир одам маст бўлган чоқларида ҳам эс-хушини йўқотмайди, деб жавоб беришди.

Узук-юлук сухбатлар мобайнинда Рансом исмли нотавон жонзорни одам қилишга, аниқроғи, уни рисола-

дагидек йигитча мақомида тарбиялашга ҳаракат қиласадим. Лекин унинг ақл-ҳуши жойида эканига шубҳаланарадим. У болалик йилларини, дengизга кетгунча бўлган даврини мутлақо эслай олмасди, фақат отасини сал-пал биларди; отаси соатсоз эди, устахонасида чуғурчиқ боқарди, чуғурчиқ: «Менинг масқаним шимол», деб сайрарди; бошқа нарсалар муҳтожлик ва шиддаткор йиллар мобайнида хотирасидан буткул ўчиб кетган эди. Денгизчиларнинг ҳикоялари асосида унда қуруқликтаги ҳаёт тўғрисида қўрқинчли тасаввур пайдо бўлган эди: Гўёки ўёқда ўғил болалар ҳунармандчилик деб аталадиган маҳсус қулчилик «дўкон»га топширилар экан ва шогирдваччалар рутубатли қамоқхоналарда кечасию кундузи ачиб-сасиб ётишаверар экан. У дуч келган шаҳарликни одам ёллайдиган жосус деб, ҳар учта уйдан биттасини эса денгизчилар алдаб-сулдаб тузоққа тушириладиган, сўнг маст қилиниб сўйиладиган ўғрихона деб биларди. Дарагини эшитса — бас, унинг лабларига учук тошадиган қуруқликтаги одамлар ҳақида, уларнинг меҳрибончилигию ширин-шакар таомлар билан сийлашгани, ота-онам ва дўстларим менинг таълим олишимга қанчалик ғамхўрлик қилишгани борасида «эртаклар» сўйлардим. Одатда, у калтак еб келгандан кейин аччиқ-аччиқ йиғларди ва «Худо ҳаққи, қочиб кетаман!» деб, қасамлар ичарди-ю, аммо бошқармада бир стакан мусаллас ичиб келган, хушчақчақ чоғларида менинг кулгимни қистатарди, холос.

Шубҳасизки, мистер Риак (ишқилиб, унинг гуноҳини худонинг ўзи кечирсан!) кўнгилчанлик қилиб йигитчага «оби замзам» қўйиб берарди, лекин алкўҳил Рансомнинг саломатлигини путурдан кетказарди: бечораҳол жонивор нима балолар ҳақида жаврай-жаврай довдираб рақсга туша бошлаган кезлари унга одамнинг раҳми келарди. Бу ажаб ҳолни кўрган баъзи бир денгизчилар тишларининг оқини кўрсатишиб тиржайишарди, аммо ҳаммаси эмас; бошқалар эса ўзларининг болалигини ёки фарзандларини ўйлашиб, тумтайиб олишарди, қовоқларидан қор ёғарди ва раққоснинг енгидан тортиб каравотга ўтқазиб қўйишарди. «Бемаънилилкни йиғиштири, эсингни ёдингми, чўчқа!» дейишарди. Мен бўлсам, шўрлик йигитчага қарашга ҳам уялиб ўтирадим. У ҳозир ҳам менинг тушларимга киради.

Айтиш лозимки, ўтган кунлар давомида «Васият» шамолга қарама-қарши йўналиш томон юзиб борди, рўпарадан бостириб келадиган тўлқинлар елканли кема-

мизни ўёқдан-буёққа итқитиб юборарди, туйнук қопқоғи доимо ёпиқ турарди, умумий хонани шифтда чайқалиб турган фонарь ғира-шира ёритарди, холос. Юмуш ҳаммага етиб ортарди: бир соат ўтар-ўтмас елкан күтарилади ёки пастроқ тушириларди. Одамлар ниҳоятда ҳолдан тойдилар, дам нариги каравотда, дам беригисида даҳанаки жанг бошланиб кетарди; менга эса палубага қадам қўйиш тақиқланган эди, бундай ҳаёт нақадар жонимга теккани, бирор ўзгаришга қанчалик муштоқ бўлганимни тасаввур этиш унчалик мушкул эмас, албатта.

Ниҳоят, ўзгариш рўй берди, лекин аввалом бор, мистер Риак билан қилган битта сұхбатим тафсилоти тўғрисида гапириб беришим лозим, чунки ўшандан кейин синовларга бемалол бардош берадиган бўлиб қолдим. Унинг кайфи тароқ бўлиб турган қулай фурсатни (мистер Риак маст бўлмаган пайтлари мен томонга ҳатто қиё боқмасди) пойлаб туриб, тилни тийишга қасам ичирдим-да, кўрган-кечиргандаримни очик-ойдин гапириб бердим.

У, мен эшитган гапларнинг ҳаммаси манзумага ўхшайди, деди ва куч-қувватини аямасдан менга ёрдам беришга ваъда берди, фақат перо, қоғозу сиёҳ топиб мистер Кембелл билан мистер Ранкилерга хат битмоқ даркор: агар мен ёлғон гапирмаётган бўлсан, Риак уларнинг кўмагида мени узил-кесил кулфатдан қутқариб олади ва ҳуқуқларимни ҳимоя қиласди.

— Ҳозирча руҳинг тушмасин,— деди у.— Сен дастлабкиси ҳам, охиргиси ҳам эмассан, менга ишонавер. Баҳри мұхитнинг нариги қирғоғида тамаки экишиб, дәхқончилик қилиб юришгән кимсалар жуда кўпчилик. Эҳ, ким ҳам ўз юртида шоҳ бўлишни орзу қилмайди-я! Аччик-чучукни татиб кўрмаган инсон бу ҳаётнинг қадрига етармиди? Ҳаммамиз эски ашулани хиргойи қилишга мажбурмиз шекилли. Мана, ўзим заминдорнинг ўғлимани, салкам ўқимишли табибман, лекин Ҳозисоннинг соясида яшайман!

У мени беадаб экан деб ўйламаслиги учун ўз ўтмишини сўйлаб беришни илтимос қилдим.

Ҳуштак чалиб юборди.

— Қанақа ўтмиш ахир! Эрмак қилишга ишқивоз эдим, вассалом.

У зудлик биллан умумий хонани тарқ этди.

## Саккизинчи боб

### ҚУЙРУҚДАГИ БОШҚАРМА

Бир куни ярим кечаси, соат ўн бирларда мистер Риак сменасидаги посбон бушлатини олиш учун палубадан пастга тушди ва бирпасда умумий хона бўйлаб мишмиш тарқалди: «Шуан уни барибир ўлар ҳолатга етгунча дўппослабди». Манглайи қоранинг номини ҳеч ким тилга олмасди, аммо ким тўғрисида гап кетаётганини билардик; биз бу янгиликни ростакамига идрок этиб, муҳокама қилишга улгурмасимииздан туйнук қопқофи очилдию нарвондан дарға Хозисон тушиб келди. У фонарнинг ўйноқи шуъласи тушаётган каравотларга бир қўр синчков назар солди-да, тўппа-тўғри менинг ёнимга келди ва ҳеч кутилмагандага мулойим оҳангда сўзлай бошлади:

— Оғайни, гап бундай; биз сени қуйруқдаги бошқармага хизматга олмоқчимиз. Рансом билан каравотларингни алмаштирасан. Қани, бошқармага югар!

У ҳали гапини тугатмасдан туйнукда иккита денгизчи кўринди — улар Рансомни кўтариб тушишарди. Шу пайт кема бир томонга қийшайиб кетдию фонарь чайқалди-да, кичик» денгизчининг юзига шуъла тушди. Ўнинг юзи қофоздай оппоқ эди, лабларида қўрқинчли заҳарханда қотиб қолганди. Худди мени бирор зарб билан ургандек юрагим ҳаприқиб кетди, нафасим бўғилди.

— Бошқармага югар, имиллама! — деб қичқирди Хозисон.

Мен денгизчилар қўлида сас чиқармай, беҳуш ётган Рансом ёнидан қисилиб ўтдиму нарвондан жадал юриб палубага чиқдим.

Кема худди маст кишидек чайқалиб, сонсаноқсиз тўлқинларни ёриб борарди. У ўнг томонга қийшайиб қолган эди, чап томонда эса, олдинги мачтанинг пастки елкани остидан қип-қизил уфқ кўриниб туради. Мен ҳайратдан донг қотиб қолдим — вақт алламаҳал бўлса ҳам қуёш эндиғина ётоғига бош қўярди! Шотландиянинг шимолий чегарасини кесиб ўтаётганимизни, Оркней ва Шетланд ороллари оралиғидан Пентленд-фёртнинг ваҳшиёна оқимини четлаб, очик денгиз сари йўл олганимизни билмасдим, албатта, кўз ўнгимдаги ажабтовур ҳодисаларни тўғри баҳолаш учун билимим етишмасди. Бир қанча вақт тутқинликда бўлганим, ёруғликни кўрмаганим туфайли ва доимо

рўпарамиздан шамол эсаётганини эътиборга олмай, ўзимча Атлантика океанининг ярмига ёки ундан ҳам нарига бориб қолган бўлсак керак, деб ўйладим. Кечаси қуёш ботаётганини кўриб, ёқамга туфлаб қўйган бўлсам-да, лекин бошимни қашлашга ҳам фурсатим йўқ эди: дам-бадам палуба устига тўлқин шалоп этиб тушарди, таранг тортилган арқонни ушлаган кўйим зўр-базур олға, силжирдим; агар доимо марҳаматини дариф тутмайдиган битта денгизчи ёнгинамда пайдо бўлиб қолмаганда борми, кучли тўлқин мени бирпасда кемадан итқитиб ташларди.

Кўйруқ устига қурилган болохона палубадан бир қулоч чамаси баланд бўлиб, «Васият» каби кемаларга муносиб эди. Энди шу ерда ётишим, хизмат қилишим лозим. Ичкарида палубага маҳкамланган стол, ўриндиқ ва иккита каравот бор экан: биттаси дарғага мўлжалланган, бошқасида эса навбати билан ёрдамчилари ухлашарди. Деворга қадалган жавон шифтга тегиб турарди; унда бошлиқларнинг шахсий буюмлари ва кеманинг асбоб-анжомлари сақланарди; қўйироқда яна битта хона бўлиб, унга маҳсус қопқоқдан кириларди: энг яхши озиқ-овқатлар, аъло навли тузланган гўштлар, спиртли ичимликлар ҳамда милтиқдорининг барча қўр-қути асраб қўйилган эди. Бир жуфт мис замбаракдан ташқари «Васият»нинг барча ўқ отиш қуроллари хона деворига осилган бўлса-да, қурол-яроқларнинг асосий қисми бошқа жойда сақланарди.

Бошқармага кундузи қўш қаватли дарчадан ёруғлик тушарди, юқоридаги қопқоқли туйнукдан ҳам нур киради; оқшом чўкиши билан лампа ёқиларди. Ичкарига кирган чоғимда лампа ёниб турарди, гира-шира шуъла сочарди; бошқармада мистер Шуан ўтирганини дарҳол пайқадим: унинг олдидаги столда бир шиша конъяк билан тунука кружка турар эди. У новча, қад-қомати келишган, қорача, қора соч киши бўлиб, ҳозир маънисиз нигоҳини столга қадаб ўтиради.

У менга мутлақо эътибор бермади; дарға кириб келган пайтда ҳам жойидан қўзғалмади, дарға менинг ёнимга келди-да, каравотга суюнганча ёрдамчисига ўқрайиб назар ташлади. Ҳозисондан ўлгудек қўрқар эдим, лекин у ҳозир менга унчалик қўрқинчли туюлмасди ва негадир дадиллашиб қулоғига пи chirладим:

— У қанақа одам?

Дарға бош чайқади, гўё билмайман ва билишни ҳам истамайман демоқчи бўлди; афтидан, ғазаби қўзиб кетган эди.

Тез орада мистер Риак етиб келди. У дарғага маъноли нигоҳ ташлади: унинг қарашларидан йигитча ўлганини билиб олиш мушқул эмасди; кейин у ёнимизга яқинлашди ва биз учаламиз индамасдан мистер Шуанга тикилиб туравердик, айни пайтда мистер Шуан ҳам столга тикилган кўйи миқ этмасдан ўтиради.

Бирдан у конъяк шишасига қўл чўзди, лекин худди шу тобда мистер Риак олға интилдию шишани тортиб олди (у кучли бўлгани учун эмас, балки Шуан кутилмаган ҳаракатдан эсанкираб қолган эди) ва товушини баланд кўтариб сўқинди; бу жойда кўп бемаъни ишлар қилинди, бунинг касофати кемага ҳам урди, деди. Шундан сўнг у шимолга беткай томондаги икки ёққа очиладиган эшикдан шишани денгизга улоутариб юборди.

Кўз очиб-юмгунча Шуан оёққа қалқди. У ҳамон таажжубланиб туради; кўзлари қонга тўлган эди; агар уларнинг ўртасига дарға туриб олмаганида борми, қотил бир кечада иккинчи марта қон тўкишдан ҳам қайтмасди, албатта.

— Жойингга ўтири! — деди Хозисон гулдурак товушда.— Нима қилиб қўйганингни биласанми ўзи, ҳайвон?! Норасида болани ўлдирдинг!

Афтидан, мистер Шуан тушунди; ҳарҳолда у жойига ўтириди-да, кафти билан пешонасини ишқалади.

— Нима бўпти? — деди у.— Ўзи менга ювиқсиз кружкани тутқазди-да!

Шу сўзлар қулогимизга чалиниши биланоқ мен, дарға, Риак — ҳаммамиз бир-биrimизга хавотирланиб назар ташладик; Хозисон ўзининг катта ёрдамчисига яқинлашдию елкасидан қучганча каравот ёнига бошлаб келди ва ётиб ухла, деди. Одатда, шўхлик қилаётган бола пакирни худди шундай тарзда овунтирадилар. Қотил йифлаб юборди, лекин этигини ечиб, каравотга итоаткорона чўзилди.

— Ў-ў! — деб қичқириб юборди мистер Риак даҳшатли товушда.— Сиз аллақачон аралашмоғингиз лозим эди! Энди жуда ҳам кеч бўлди.

— Мистер Риак, бугун кечаси рўй берган ҳодисани Дайсетда ҳеч ким билмаслиги керак,— деди дарға.— Сэр, бола пакир бортдан йиқилиб тушди, ҳамма гап шундан иборат, холос. Агар менга қолса, айнан шундай бўлиши учун чўнтағимдан кетадиган беш фунт пулимни ҳам аямасдим.— У стол томон ўгирилди-да, қўшиб қўйди:— Нима учун сиз лиқ тўла шишани ирғитиб юбордингиз? Бу калтафаҳмлик, сэр. Қани, Дэвид, менга оғзи очилмаганидан олиб бер-чи! Ҳув, анави жойда, пастдаги қу-

тида.— У менга калитни ирғитди.— Дарвоқе, сэр, сиз ҳам бир стакан отиб олсангиз зиён қилмасди,— деб у яна Риакка мурожаат этди.— Чамаси, жасадга роса тикилиб қараган бўлсангиз керак-а?

Иккаласи ҳам стол теварагига ўтиришди-да, стаканларини уриштиришди, шу чоқ каравотда ҳиқиллаб ётган қотил тирсагига суюниб, ўмганини кўтардию аввал шишадошларига, сўнгра менга нигоҳини қадади...

Янги хизмат жойимдаги дастлабки кечака худди шундай ўтди, эртаси куни эса ўз вазифаларимни деярли ўзлаштириб олдим. Мен емишларга кўз-қулоқ бўлиб туришим лозим эди: дарға посбонликда турмаган бирорта ёрдамчиси билан биргалашиб ҳар соатда албатта овқатланарди, худонинг берган куни ҳали унисига, ҳали бунишига ичкилик таширдим; бошқарма пойгаҳидаги икки эшик ўртасида яйдоқ тахта устида адёлга ўралиб ўхлардим, ён-веримдан елвизак ғириллаб ўтарди. Бу қаттиқ, совук ўрин эди: қолаверса, ҳеч бемалол ухлатишмасди; дам-бадам палубадагилар томоқларини ҳўллаб олишга кириб туришарди, посбонлар алмашаётган пайтлари эса иккала ёрдамчи ҳам (кўпинча уларга дарға ҳам шерик бўларди) стол атрофига ўтиришарди-да, пиёлаларни тўлдиришиб мусаллас ичишарди. Уларнинг ва ўзимнинг ҳам қандай қилиб соғ-саломат юрганимга ҳеч ақлим бовар қилмасди.

Умуман, хизмат унчалик оғир эмасди. Столга ҳеч қандай дастурхон ёзилмасди, асосий овқат — бўтқа билан тузланган гўшт эди, ҳафтасига икки бора сули ёрмасидан қовурдоқ ҳозирланарди; чайқалаётган кемада зўрға оёқда турсам ҳам, баъзан таом тўлдирилган патнисни кўтариб бораётуб тўнтирилиб кетардим-у, лекин мистер Риак билан дарға менга ниҳоятда босиқлик билан муомала қилишарди. Ўзимча уларнинг виждонлари азобланаётган бўлса керак, деб ўйладим, агар илғари Рансомга нисбатан ноҳақлик қилишмагандা, ҳозир мен билан пачакилашиб ўтиришмасди.

Мистер Шўанга келсак, ичкиликбозлиқми ёки жиноят азобими, эҳтимол, иккаласи қўшилишиб, унинг эс-ҳушини хиралаштириб қўйди. Уни ақл-идроқи жойида бўлган ҳолатда бирор марта ҳам кўрмадим. Бошқармада туришимга у сира кўниколмасди, доимо кўзларини олайтириб қаради, назаримда, мени ногаҳон кўриб қолса, қўрқиб кетарди, стол теварагига ўтирган пайтида унга бирор нарса узатсам тушунмаяпти, деб ўйладим ва икки кундан сўнг бунга ишонч ҳосил қилдим. Бир куни икковимиз ёлғиз қолдик; у узоқ вақт менга тикилиб ўтирди-да,

кейин сапчидан ўрнидан туриб кетди ва жон-понимни чиқарип, ёнимга яқин келди: ранги ўлкникидай оппоқ эди. Лекин бекорга қўрқсан эканман.

— Сен илгари бу ерда йўқ эдинг-а? — деб сўради у.

— Ҳа, сэр.

— Бу ерда қандайдир бошқа бир бола борми?

Мен жавоб бердим.

— Ў-ў! Ўзим ҳам шунаقا бўлса керак деб ўйлаган эдим,— деди у ва мендан узоқлашди, жойига бориб ўтиридию лом-мим демади, фақат: «Конъяк келтир!» деб буйруқ берди, холос.

Бу ҳолат ғалати туюлиши мумкин. Уни қанчалик ёмон кўрсам ҳам, ичимда унга ачинардим. У уйланган эди, хотини Литада яшарди; уларнинг фарзандлари бор-йўқлигини ҳозир аниқ эслолмаяпман; чамамда, фарзанд кўришга улгурмаган эди.

Умуман айтганда, бу ёрда унчалик кўп яшамаган бўлсам-да (тез орада ўзингиз шунга амин бўласиз), ҳаёт кечиришим оғир бўлмади. Мени дарға ҳисобидан боқишарди, тузланган гўшт ва зиравор сепилган балиқ беришарди (энг ноёб емиш), ёрдамчилар билан теппантенг миқдорда овқат ажратишарди; агар ўзим истасам эртадан-кечгача мистер Шуан каби ичкиликбозлик қилишим мумкин эди. Боз устига, ошна-оғайнилардан ҳам нолимасам бўларди. Ҳартугул, мистер Риак коллежда сабоқ олган эди, у хуноби ошиб турмаган кезлари дўстона равишда гурунглашиб ўтиради, қизиқарли, ибратор-муз ҳикоялар сўйлаб берарди; одатан, дарға мени ўзидан сал нарироқ тутишга интилса-да, лекин баъзан кўнгли юмшаб кетардию ўз кўзи билан кўрган ажиб мамлакатлар тўғрисида гапиришдан сира чарчамасди.

Биз ўзимизни қанчалик ўёқдан-буёқка урмайлик, аммо барибир тўртовимизни ҳам, айниқса, мен билан мистер Шуани шўрлик Рансомнинг арвоҳи тинмасдан таъкиб этаверарди. Устига устак, кулфатим ўзимга етиб ортади. Ҳўш, қаерга келиб қолдим? Қора ишчиман, учта эркакнинг югурдагиман; лекин уларни кўргани кўзим йўқ, энг камида улардан биттаси дорга осилиши лозим. Ҳозирги аҳволим шундай. Келажагим-чи? Тамаки экиладиган далаларда занжилар билан елкама-елка туриб, қулдек ишлашим зарур: бундан бошқа нарсага умид қилолмасдим. Мистер Риак, эҳтиёткорликни кўзлабми, мени оғиз очиргани қўймасди; дарға эса унга мурожаат этишга оғиз жуфтлаши биланоқ ҳудди итга гапиргандек: «Жим бўл!» деб пўписа қилиб берарди, ҳатто га-

Пимни эшитиши ҳам истамасди. Кунлар бирин-кетин ўтаверди, борган сари руҳим чўқаверди, охир-оқибатда жон-жон деб ишга ёпишардим: ҳеч бўлмаса, оғир ўй-хаёллардан қутулардим, бошимни қашлашга фурсатим ҳам қолмасди.

## Тўққизинчи боб

### ТИЛЛА КАМАРЛИ КИШИ

Бир ҳафтадан кўпроқ вақт ўтди. Сафар мобайнида «Васият»ни таъқиб этиб келаётган шум тақдир ўзини яққол кўрсата бошлади. Баъзи кунлари оз-моз олға силжиридик, холос. Бошқа пайтлари эса кемамизни тўлқинлар орқага итқитиб ташларди. Ниҳоят, оқим бизни жануб томонга суриб кетдию тўққиз сутка давомида одам оёғи етмаган, Рат бурнининг серқоя қирғоқлари кўриниб турган жойда тебраниб ўтиравердик. Дарға кенгаш чақирид; қандайдир қарор қабул қилинди, лекин қарорнинг мазмунини тўлиқ тушунмадим, фақат унинг оқибатини кўрдим, холос: биз шамол йўналиши бўйлаб юза бошладик, демак жануб томон бурилибмиз.

Ўнинчи куни оқшом маҳали довул пасая бошлади, аммо намчил, оқиш, қалин туман тушди — қуйруқда туриб кема тумшуғини кўриб бўлмасди. Тун бўйи палубага чиққан пайтим мен ҳар гал борт тўсигига ўмғанларини бериб турган денгизчиларни, дарға ва унинг ёрдамчиларини учратардим, улар ниманидир илғаб олмоқчи бўлишарди, бир-бирларидан: «Оқ тўлқин кўринмаяптими?» деб сўрашарди. Бу сўзларнинг асл маъносини билмасдим-у, қандайдир хавф-хатар борлигини ҳис этардим, шунинг учун ҳушёр тортиб қолған эдим.

Чамамда, кечаси соат ўнларда — мистер Риак билан дарғага эндиғина кечки овқат беряётган чоғимда елканли кема бир нарсага гумбурлаб урилдию бирдан шовқинсурон кўтарилиди. Иккаласи ҳам сапчиб ўрнидан туришди.

— Сув остидаги қояга урилдик! — деб қичқирид мистер Риак.

— Ундей эмас, сэр,— деди дарға.— Бор-йўғи қандайдир қайиқ билан тўқнашиб кетдик, холос.

Улар шоша-пиша палубага кўтарилишди.

Дарға ҳақ бўлиб чиқди: биз туманда битта қайиқка урилган эканмиз; қайиқ иккига бўлинниб кетибди ва

бутун командаси билан ғарқ бўлибди. Фақат бир киши омон қолибди: кейинчалик билсам, у йўловчи экан, қайиқ қўйруғида ўтирган экан, бошқалар эса банкалар устида ўтиришганча эшкак эшаётган эканлар. Тўқнашув чоғида қайиқ бошқармасию йўловчи осмонга учиб кетибди, у тиззасидан пастрофини паҳмоқ чопон билан ўриндиқقا боғлаб қўйган бўлса-да, қўллари бўш бўлгани учун ҳаводан қайтиб тушаётган пайтда кемамиз тумшуғидаги елкан ўрнатиладиган ёғочга осилиб қолибди. Кўриниб турибдики, омади бор экан; агар шундай оғир вазиятдан ҳам омон-эсон қутулиб чиқибдими, демак эпчил, бақувват экан. Кўп ўтмай, дарға уни бошқармага олиб кирди ва мен биринчи марта нотаниш йўловчини кўрдим: унинг қиёфаси ниҳоятда хотиржам эди, гўё ҳеч нарса рўй бермагандек бепарво. Ўрта бўйли, зуваласи пишиқ, эчкидай абжир киши эди; истараси иссиқ, офтобда хийла қорайган юзларида чечак излари бор эди, сепкилдор; кўзлари чақнаб, олма-кесак териб турарди, нигоҳидан жунуни зўр эканини билса бўларди, бу ҳол дарров эътиборни ўзига тортарди ва кўнгилга ғулғула соларди. У эгнидан плашчини ечди-да, камарига қистирилган бир жуфт аломат, кумуш дастали тўппон-часини олиб столга қўйди; белида узунгина қилич осиғлик турарди. Боз устига, нозик ҳаракат қиларди; бажонидил дарғанинг соғлиғи учун қадаҳ кўтарди. Хуллас, дастлабки, таассуротларимга биноан, бундай кишини душманим деб эмас, дўстим деб атаган бўлардим.

Дарға ҳам нотаниш кимсани синчиклаб кўздан кечирарди, лекин унинг шахсиятидан кўра, уст-бошига кўпроқ эътибор берарди, чамамда. Табиийки, меҳмон плашчини ечиб ташлагандан сўнг кўз ўнгимиизда ажиб кўриниш намоён бўлди: патли шляпа, лоларанг нимча, қол-қора ипдухоба енгича-шим тиззасига қадалиб турарди, ёқаларига зар уқа қадалган, кумуш тугмали мовий чакмон — қимматбаҳо кийим-боши туман таъсирида бир оз намиққан, ечинмасдан ухлагани учун жийилиб қолган эди, шунга қарамай савдо кемасининг бошқармасида бундай инсонни учратиш камёб ҳодиса ҳисобланарди.

— Мен сизнинг қайиғингизга жуда ачиндим, сэр,— деди дарға.

— Нақадар ажойиб инсонлар сув остига ғарқ бўлдилар-а! — деди нотаниш кимса афсусланиб.— Уларни яна ер юзида кўриш учун ўнта қайиқ беришга ҳам рози эдим.

— Улар дўстларингиз эдими? — деб сўради Хозисон.  
— Сизларнинг ўлкангизда ундан дўстлар бўлмайди,—  
деган жавоб эшитилди.— Улар мен учун итдан ўлишга  
ҳам тайёр эдилар.

— Барибир, сэр, ер юзида одамлар шунчалар кўпки,  
ҳаммага қайиқлар етмайди,— деди дарға, меҳмонни  
синчиклаб кузатишда давом этаркан.

— Тўғри, нима ҳам дердим! — деб қичқирди нотаниш  
кимса.— Кўриниб турибдики, сиз, сэр, жуда ҳам синчков  
одам экансиз.

— Тақсир, мен Фарангистонда бўлганман,— деди  
дарға сирли оҳангда нимагадир ишора қилиб.

— Ижозатингиз билан, барча муносаб инсонлар  
сингари, деб қўшиб қўймоқчиман,— деди меҳмон.

— Шубҳасиз, сэр,— деди дарға.— Айтмоқчи, ярашиқ  
мундир кийиб борган эдим.

— Ўҳ-ҳў! — деди нотаниш кимса.— Мана, гап қаёқقا  
қараб кетяпти! — Узудлик билан қўлларини тўппон-  
чаларига узатди.

— Шошманг,— деди дарға.— Бемаврид ёмёнлик  
қилманг. Ҳа, сиз фаранг ҳарбийларининг мундирини  
кийиб олибсиз, лекин худди шотландга ўхшаб гапир-  
япсиз, ҳўш, нима бўпти? Бизнинг замонда жуда  
кўпчилик ҳалол кишилар шундай қилишади ва ростини  
айтганда, бундан ҳеч нарса ютқазмайдилар.

— Шунақами? — деди мундир кийган жентельмен.—  
Демак, сиз ҳам ҳалол одамлар тўдасига мансуб  
экансиз-да?

Бу дегани — якобинчилар<sup>1</sup> тўдасини билдиради.  
Хозиргидек ўзаро даҳанаки жангларда ҳар қайси  
томон фақат ўзини ҳалол деб билади.

— Ўзингиз биласиз, сэр,— деди дарға.— Худога  
шукрки, мен ҳақиқий протестантман<sup>2</sup>.— Бу менинг олдим-  
да дин ҳақида айтилган дастлабки сўз эди; кейинчалик  
билсан, у қуруқликда ибодатхонага канда қилмай бориб  
турар экан.— Шунга қарамай, деворга тақаб қўйилган  
бўлса-да, лекин таслим бўлишни истамаётган кишига  
ёрдам беришга кодирман.

— Ростданми? — деб сўради якобинчи.— Начора,

<sup>1</sup> Якобинчилик — XVIII аср охирида Фарангистонда бошланган инқилобий-демократик ҳалқ ҳаракати.

<sup>2</sup> Протестантлик — Ғарбий Оврупода XVI асрда христиан динидан ажralиб чиқсан турли илоҳий мазхабларнинг номи (тарж, изоҳлари).

агар бор гапни айтадиган бўлсам, мен қирқ бешинчи ва қирқ олтинчи йилларда бошига мусибат тушган ҳалол жентельменлардан биттаси бўламан. Энди гапнинг индаллосини айтсам, мабодо қизил мундирли жаноблар қўлига тушиб қолсам борми, ахволим ёмон бўлади. Шундай қилиб, сэр, мен Фарангистонга йўл олган эдим. Мана шу жойларда Фаранг кемаси соқчилик қиласди; улар менин кемага тортиб олишлари лозим эди, лекин туман халақит берди — анча наридан ўтиб кетишиди; сизлар ҳам менин кўрмасдан ўтиб кетганингда айни муддао бўларди! Бир гапни айтаб қўймоқчиман: агар сизлар каминани ўзим айтган жойга элтиб ташласаларинг, муносиб тақдирлашга қурбим етади.

— Фарангистонгами? — деб сўради дарға.— Йўқ, сэр, бу иш қўлимдан келмайди. Агар сиз ҳозир келган жойингизда бўлган тақдирингизда бу ҳақда келишиб олиш мумкин эди.

Бахтга қарши, дарға шу пайт бурчакка кўз ташлади ю менин кўриб қолди ва ошхонага зинғиллаб бориб, жентельменга овқат келтир, деб буюрди. Ишончнинг комил бўлсин, вақтимни зое кетказганим йўқ, аммо бошқармага қайтиб келган чоғимда меҳмон белидаги камарини ечиб, унинг қатидан икки ёки учта тилла тангани стол устига қоқиб туширган экан. Дарға эса гоҳ тилла тангаларга, гоҳ камарга, гоҳида нотаниш кимсанинг юзларига қарапди; назаримда, у сезиларли дараражада ҳаяжонланарди.

— Ярмини берсангиз, хизматингизга тайёрман! — деб қичқирди у.

Нотаниш кимса тилла тангаларни камарга тиқди-да, уни нимчаси остидан белига боғлади.

— Ҳўқизнинг қулоғига танбур чертаётганим йўқ, сэр. Бунинг ичида менин бир чақа ҳам ҳаққим йўқ. Пуллар қабиламиз бошлиғига тегишили.— У ҳурмат маъносида таъзим бажо келтириди.— Мен бор-йўғи битта чопарман, холос. Улгуржи бойликни асраб қолиш учун жиндек чиқимдан қочилса, бемаънилик бўларди. Аммо ўз бошимни сақлаб қолиш учун хонумонимдан кечиб юборсам, ҳайвондан фарқим қолмайди. Агар менин қирғоққа чиқариб қўйсангиз — ўттиз танга, Лоҳ-Линнга элтиб қўйсангиз — олтмиш танга оласиз. Истасангиз — шу, истамасангиз — ўзингиз биласиз.

— Ана шунақа,— деди Хозисон.— Мабодо сизни аскарлар қўлига топширсам нима бўлади?

— Чучварани хом санаяпсиз,— деб жавоб берди

меҳмон.—Хабарингиз бўлса керак, қабиламиз бошлиғининг бор бисоти Шотландиядаги барча ҳалол инсонларнинг мол-мулки қаторида мусодара қилингган. Ерлари қирол Георг номли кишининг ихтиёрига ўтиб кетган, энди келгинди амалдорлар мўмай даромад олишмоқда; аникрофи, даромад олишга тиришмоқдалар. Шотландиянинг ҳаққи-хурмати, батрак-чоракорлар йўлбошчи-лари қувғинда бўлса-да, унинг юзига оёқ қўймаяптилар: бу пуллар ўша даромаднинг бир қисми, қирол Георг ҳам шунга кўзини олайтириб турибди. Сэр, назаримда, тушунадиган одамга ўхшайсиз; хўш, айтинг-чи, агар бу пуллар бир ямлаб-бир ютадиган ҳукуматнинг қўлига тушиб қолса, сизга қанча улуш берилади?

— Албетта, унчалик кўп эмас,— деб жавоб қайтарди Хозисон ва бирпас жим тургач, қуруққина оҳангда қўшиб қўйди: — Пул борлигини билишса ҳисоб-да. Мен бўлсам, ишончингиз комил бўлсинки, агар ҳаракат қилсан тилимни тия оламан.

— Худди шу ўринда мен сизга панд бераман!— деб қичқириб юборди нотаниш кимса.— Ал қасосул миналҳақ! Агар қўлга тушсан борми, қанча пулим борлиги ҳаммага ошкор бўлади.

— Хўп, кўриниб турибдики, иложи йўқ,— деди дарға.—Хулласи калом, олтмиш танга. Қўл ташлайсизми?

— Қўл ташладик,— деди меҳмон.

Дарға негадир шоша-пиша ташқарига чиқиб кетди ва мен нотаниш киши билан бошқармада ёлғиз қолдим.

У пайтларда қирқ бешинчи йил садолари ҳали тинмаган эди; жуда кўпчилик қочоқлар ҳаётларини хавф остида қолдириб бўлса ҳам ватанига қайтарди — дўстлар билан дийдор кўришмоқчи ёки оз-моз пул ғамлаб олмоқчи бўлишарди; мол-мулки мусодара қилинганд тоғликларининг йўлбошчилари ҳақида ҳар хил мишишлар тарқалган эди; чорикорлар эса ўзлари емай-ичмай, топган-тутганларини хорижга жўна-тишарди, лекин аскарларнинг тумшуғи остида қабила-лар оралаб пул тўплаш, усталик билан хайрия йиғиш ва шавкатли Буюк Британия флотининг кўзини шамғалат қилиб, маблағни Катта ерга юбориш хийла мушкул эди. Ўз-ўзидан равшанки, улар тўғрисида бирорлардан эшиг-тан эдим, ҳозир эса гуноҳлари учун ўлим жазосига ҳукм этилиши мумкин бўлган инсонни ўз кўзим билан кўриб турардим: устига устак, у фақат ғалаёнда иштирок этиб ёки чегарадан яширинча пул олиб ўтиб қўя

қолмасдан, айни чоқда фарангি қироли Людовик туғи остида хизмат қилмоқда эди. Булар ҳам камлик қилаётгандек, у қатига тилла танга тўлдирилган камарни белига боғлаб олганди. Дунёқарашим қандай бўлишидан қатъий назар, бундай одам қизиқиш уйғотмаслиги мумкин эмасди.

— Демак, сиз якобинчисиз-а? — дедим унинг олдига овқат қўяр эканман.

— Ҳа,— деди у таомга қўл чўзаётуб.— Сен, найнов, бўй-бастингга қараганда, виг<sup>1</sup> бўлсанг керак, тўғрими?

— Яримта ўртамиёнаман,— деб жавоб бердим унинг ғазабини қўзғатиб юборишдан хавотирланиб. Аслида, мистер Кембеллдан сабоқ олган ашаддий виг эдим.

— Бу дегани — бүм-бүм! — деб чўрт кесди у.— Бироқ, менимча, мистер Яримта-Ўртамиёна, шиша бўм-бўшга ўхшайди-ку? Ярамаслар-эй, олтмиш тангамни шилиб олишади-ю, яна-тағин бир қултум мусалласини қизғанишади-я!

— Мен ҳозир калитни олиб келаман,— дедим-да, палубага чиқдим.

Туман ҳали ҳам қалингина эди, лекин довул тинибди. Биз қаерга бориб қолганимизни ҳеч ким аниқ билмасди; шамол ҳам (ёки шамолнинг қолдиғи — шабада) бизга ўнғай бўлмаган томондан эсарди, бундай пайтда кемамиз лангар ташлаб бир жойда туришга мажбур эди. Баъзи бир денгизчилар ҳамон кўпикли тўлқин бор-йўқлигини кузатиб турарди, лекин дарға ва унинг ёрдамчилари юқори палуба саҳнида тўп бўлиб олишиб, ўзаро шивир-шивир қилишарди. Сабабини билмаймән-у, аммо уларнинг нияти бузўқ эканини дарров кўнглим сезди ва писибгина яқинлашган пайтимда эшитган дастлабки сўзлар ҳам тахминим тўғрилигини тўла-тўқис тасдиқлади. Мистер Риак гўё теша тегмаган фикр топиб олгандек бундай деди:

— Агар уни алдаб-сулдаб бошқармадан чиқарсак-чи?

— Аксинча, ўша жойда турса бизга фойда бўлади,— деб эътиroz билдириди Хозисон.— Қиличи билан бемалол ҳаракат қила олмаслиги лозим.

— Гапингиз тўғри,— деди Риак.— Лекин уни осонликча қўлга тушириб бўлмайди-да.

— Сафсата! — деди Хозисон.— Уни гап билан чалғи-

<sup>1</sup> Виг ёки бўлмагур виглар — қирол Георг мухлисларининг масҳараомуз лақаби (муаллиф изоҳи.).

тиб турамизу сиз бир томонидан; мен бошқа томонидан — шартта қўлига ёпишамиз. Сэр, агар бунга муваффақ бўлолмасак, бошқа йўли ҳам бор: иккала эшикдан туйқус бостириб кирамиз-да, қиличини қинидан суғургунча қўлини қайириб, таппа остимизга босиб оламиз.

Бу гапларни эшитганимдан сўнг вужудимни қўркув, ғазаб чулғаб олди: тақдир тақозоси билан кемада тасодифан ҳамроҳ бўлиб қолганим мунофиқ, иккиюзла мачи, қонхўр одамларни кўтарга кўзим йўқ эди. Дастлаб, дарҳол жуфтакни ростлаб қолмоқчи бўлдим, аммо бирпасдан кейин қайсарлигим тутиб қолди.

— Дарға, анави жентельмен конъяк сўраяпти, шиша эса бўм-бўш,— дедим.— Сиз менга калитни берасизми?

Учаласи ҳам сесканиб кетишдию, мен томонга ўгирилишиди.

— Вож, ана, қурол-яроқ олиб чиқиш учун қулай имконият туғилди! — деб қичқирди Риак.— Менга қара, Дэвид, сен тўппончалар қаердалигини биласанми? — деди у менга.

— Нега билмас экан, нега биљмасин! — деб гапни Хозисон илиб кетди.— Дэвид билади, Дэвид зўр бола! Оғайнчалиш, Шотландия тоғларидан тушиб келган анави каллакесар кемамизни албатта бирорта фало-катта гирифтор қиласди; уни худо ярлақагур қирол Георгнинг қутурган ғаними эканини айтиб ўтирумайман.

«Васият»га чиққанимдан бери атрофимда бунчалик гирдикапалак бўлишмаган эди: «Дэвиджон, Дэвидбой!» ва ҳоказо, асти қўяверасиз! Бироқ, мен:

— Кўргулик экан-да, сэр,— деб қўя қолдим пинағимни бузмай.

— Гап шундаки, қурол-яроқларимиз — пилта милтиғимииздан тортиб то охирги тўппончамизгача бошқармaga яширилган, анави кимсанинг тумшуғи остида турибди, — деб давом этди дарға.— Порох ҳам ўша ерда. Мабодо мен ёки менинг ёрдамчим бошқармага қурол олгани кирсак борми, унинг кўнглида шубҳа уйғониши мумкин. Дэвид, сенга ўхшаган ёш бола бир жуфт тўппонча билан унча-мунча порох олиб чиқса, ҳеч ким сезмайди. Эвии тополсанг, буни унутмайман, зарур пайтда сени қўллаб-қувватлайман, Каролинага борган чоғимизда бироннинг ёрдамига муҳтоҷ бўлишинг тайин, албатта.

Шу пайт мистер Риак унинг қулоғига бир нималар деб пицирлади.

— Мутлақо, тўғри, сэр,— деб жавоб берди дарға ва яна каминага мурожаат этди: — Бундан ташқари, Дэвид, анави нусханинг бели тўла тилла: чин сўзим шуки, сени ҳам қуруқ қўймаймиз!

Хоҳишингизни бажо келтираман, дедим. Назаримда, товушимни ўзимдан бошқа одам эшитмади, шекили. Шундан сўнг дарға менга ичимлик сақланадиган сандиқ қалитини бердию аста-секин бошқармага йўл олдим. Нима қилмоқ керак? Улар итвачча, талончилар эди; мени ватанимдан жудо қилдилар, шўрлик Рансомнинг бошини едилар: наҳотки, навбатдаги қотилликка замин ҳозирласам? Айни пайтда қўрқув кўнглимга ғулғула соларди, билардимки, агар уларнинг айтганини қилмасам борми, ҳолимга маймунлар йиғларди: битта ўсмир билан битта катта киши, ҳатто асрлондек жасур бўлсалар ҳам бутун бошли кема денгизчиларига қарши нима қила оларди?

Бошқарма остонасига қадам қўйган пайтимда ҳам қатъий бир қарорга келмаган эдим, ўйлаб ўйимнинг охирига етолмасдим; якобинчи эса лампа шуъласида ўтирганча апил-тапил овқатланарди: ажабки, бирпасда аниқ тўхтамга келдим. Бу ерда менинг хизматим йўқ: гўё бирор орқамдан итараётгандай беихтиёр стол ёнига яқинлашдим-да, якобинчининг елкасига қўлимини қўйдим ва:

— Қачон ўлишингизни кутиб ўтирибсизми? — деб сўрадим.

У сапчиб ўрнидан турдию савол назари билан менга тикилди.

— Ҳа, уларнинг ҳаммаси қотиллар! — деб қичқирдим.— Кеманинг ичи одамхўрларга лиқ тўла! Улар битта йигитчани асфаласофилинга жўнатиши, энди сизнинг навбатингиз.

— Ҳай-ҳай,— деди у.— Ҳозирча мен уларга таслим бўлганим йўқ, ахир.— У менга қизиқсиниб назар ташлади.— Мен томонда туриб уришасанми?

— Бўлмасам-чи! — дедим куюнчаклик билан.— Мен талончи ҳам, қотил ҳам эмасман. Мен сиз томонда бўламан.

— Ундей бўса, айт-чи, исминг нима?

— Дэвид Белфур,— дедим ва бунчалик башанг кийинган одамга баландпарвоз унвон мойдай ёқса керак деган хаёлга бордиму умримда илк бора:

— Шос қўрғониданман,— деб илова қилдим.

У каминанинг сўзларига шубҳаланмади, албатта.

Чунки тоғлиқ шотланд тағли-тұглы заминдорларни қашшоқ ахволда күраверіб дийдаси қотиб кетган эди; ўзининг ер-мұлки бўлмаса-да, болалардек мақтанчоқлиги тутиб кетдими, бирдан қаддини ростладио:

— Мен эсам, Стюартлар авлодидан бўламан,— деди.— Исмим — Алан Брек. Каминага қиролнинг исми шарифини күтариб юришнинг ўзиёқ кифоя, агар номим қуйруғига қишлоқ кўчаларида илаштириб олган ахлатни илова қилмаётган бўлсан, айбга буюрмайсанда!

Гўё муҳим нарса ҳақида гап кетаётгандек пичинг қилдио «қалъя»ни кўздан кечира бошлади. Қўйруқдаги бошқарма кучли тўлқинлар зарбасига дош берадиган даражада мустаҳкам қурилган эди. Унда бешта тирқишу тўйнук бўлса ҳам, бироқ фақат юқоридағи қопқоқдан ва бир жуфт эшикдан одам сиғарди, холос. Боз устига, эшиклар жипслашиб ёпиларди: қалин, эмандан ясалган эшик қанотлари ўёқ-буёққа қараб ариқчасимон из бўйлаб силжирди ва зарур пайтда очиб ёки ёпиб қўйиш учун маҳсус илгак билан жиҳозланган эди. Ёпиқ турган эшикка илгак солдим-да, наригиси томон йўл олган чоғимда Алан каминани тўхтатиб қолди.

— Дэвид...— деди у.— Негадир сенга қарашли ернинг номи эсимдан чиқиб кетяпти, шунинг учун ижозат берсангу сени шунчаки Дэвид деб чақираверсам... Хуллас, мудофаа планимиз зафар келтирсинг десак, ўша эшикни очиқ қолдирган маъқул.

— Ёпиб қўйсак янада ишончли бўларди,— дедим.

— Э-э, йў-ўқ, Дэвид! Ахир менинг юзим битта, тушундингми?! Агар шу эшик очиқ бўлса, унга юзма-юз турман: душманларимнинг асосий қисми ҳам кўз ўнгимда бўлади — бу ҳаммасидан-да қулай-ку!

У пештахтада турган ханжарларнинг биттасини менга олиб берди; милтиқ ва тўлпончалардан ташқари Алан ҳам битта ханжарни танлаб олдио бош чайқаганча, умримда бунақа расво қуролни кўрмаганман, деб қўйди. Кейин у мени стол ёнига ўтқазди-да, порох тўлдирилган мугуз ва ўқ тўла халтачани олдимга қўйди: бирпасда стол устини тўлпончаларга тўлдириб ташлади ҳамда, ҳаммасини бирма-бир ўқлагин, деди.

— Ижозат берсинлар, тақсир! Туғма дворян ғужалоқ дengizchilarning коса-товоғини ювиб, уларга ичкилик ташиб юрганидан кўра, мана шунақа иш билан машғул бўлгани афзал.

Кейин у эшик рўпарасига борди-да, қиличини

қинидан сүғуриб, бемалол қиличвозлик қилишга имкон бор-йўқлигини чамалаб кўрди.

— Фақат қиличнинг учи билан ишлашга тўғри келар экан,— деди у бош чайқаб.— Мен эсам, аксига олгандек қулочкашлаб қиличвозлик қилишнинг ҳавосини олганман. Афсуски, бу ерда бор ҳунаримни на-мойиш этолмас эканман. Ҳечқиси йўқ. Сен тўппончаларни ўқлайвергину айни чоқда гапларимни ҳам эшитиб ўтиргин.

Қулоғим сизда, дедим. Юрагим ҳаприқмоқда эди, оғзим қуриб қолди, кўз олдим қоронғилашди; бу ерга қанақа тўда бостириб киришинию устимизга ташланишини ўйласам, беихтиёр юрагим орқасига тортиб кетарди ва кема ташқарисидан эштилаётган денгиз шовуллаши қулоғимдан нари кетмасди: чамамда, жонсиз жасадимни тонг отгунча денгизга улоқтириб юборишса керак.

— Авваламбор, бизнинг душманимиз нечта? — деб сўради Алан.

Бармоқларимни букиб санай бошладим, лекин хаёлларим паришон бўлганлиги туфайли тезда ҳисобдан адашиб кетдим ва қайтадан хомчўт қилиб кўрдим.

— Ўн бешта.

Алан ҳуштак чалиб юборди.

— Майли, нима ҳам қилардик,— деди у.— Энди гапимга қулоқ сол: менинг вазифам — шу ерда турив эшикни ҳимоя қилишдир; сезяпманки, олишув ниҳоятда қизғин бўлади. Олишувда сен иштироқ этишинг шарт эмас. Эҳтиёт бўлгин, бу томонга қаратиб ўқ узмагин — фақат мени қулатасан, холос. Сенга ўхшаган орқамдан отадиган битта иттифоқдош ортимда тургандан кўра, ўнта душманим рўпарамда тургани минг марта афзал.

Ростдан ҳам менинг қандай мерган эканимни худо билади, дедим.

— Мардонавор гап бўлди! — деди у тўлқинланиб.— Ҳар қандай олижаноб дворян ҳам очиқчасига гапиришга журъат этавермайди.

— Сэр, орқангиздаги эшикни нима қиласиз? — деб сўрадим.— Туйқус уни бузиб юборишса-чи?

— Буниси энди сенинг вазифанг бўлади,— деди у.— Тўппончаларни ўқлаб бўлган заҳотинг, тирқиш рўпарасидаги ҳув анави каравот устига чиқиб оласан. Мабодо бирор-бир киши эшикка қўлини теккизса — бас, отасан! Бу ҳали ҳаммаси эмас. Ҳозир сендан қанақа

аскар чиқишини кўрамиз. Хўш, яна нимани қўриқлашинг лозим?

— Қопқоқни,— деб жавоб бердим.— Бироқ, мистер Стюарт, ҳам унисини, ҳам бунисини қўриқлашим учун менинг орқамда тағин бир жуфт кўзим бўлиши даркор; ахир қопқоққа қараб турган пайтим тирқишига орқа ўгириб тураман-да.

— Жуда тўғри,— деди Алан.— Хўш, қулоғинг борми?

— Ҳақ-рост! — деб қичқирдим.— Ойна чил-чил синса, эшитилади-ку!

— Сенда соғ ақлнинг куртаклари кўриняпти,— деди Алан маъюс оҳангда.

### Ўнинчи боб

## БОШҚАРМА ҶАМАЛИ

Айни замонда тинчлик фурсати поёнига етиб қолган эди. Палубада кутиб турган кишиларнинг сабр косаси тўлди: Алан ҳали гапларини тугатмасданоқ оstonонда дарға пайдо бўлди.

— Тўхта! — деб қичқирди Алан, қиличини рақиби-нинг кўксига йўналтириб.

Дарға жойида таққа тўхтади-ю, қиёфасида бирор ўзгариш сезилмади, айни чоқда ортига ҳам чекинмади.

— Қилич яланғочланибди-ку! — деди у.— Меҳмондўстлик кираси шу экан-да!

— Сиз мени аниқ кўряпсизми? — деди Алан.— Мен қироллар авлодидан бўламан, исми шарифим ҳам қиролларга хос. Гербимга эман тасвири туширилган. Қиличимни кўряпсизми? Бу қилич шунчалар кўпчилик бўлмағур вигларнинг калласини узганки, марҳумларни санашга сизнинг оёқ-қўлингиздаги бармоқлар ҳам етмайди. Сэр, қаланғи-қасанғиларни мададга чорланг-да, ҳужум қилинг! Олишув қанчалик эрта бошланса, ушбу пўлат таъмини шунчалик барвақт татиб кўрасиз!

Дарға Аланга ҳеч қандай жавоб бермади, мен томонга қаттолона нигоҳ ташлади.

— Дэвид, мен сенга ҳали кўрсатиб қўяман! — деди у.

Унинг товушини эшитдиму аъзойи баданимдан совук тер чиқиб кетди.

Бирпасдан сўнг у ғойиб бўлди.

— Хўп, энди маҳкам бўл, довдирама: ҳозир муштлашамиз,— деди Алан.

Бирорта муртад юқори кўтарилиган қилич остидан ўтиб кетишга ҳаракат қилса йўлини тўсиш учун Алан чап қўлига ханжарини ушлаб олди. Мен бўлсам, бир қучоқ тўппончани кўтардиму каравот устига чиқдим ва нафасимни ичимга ютганимча дарчани очдим: шу ерда ташқарини кузатиб ўтиришим лозим эди. Палубанинг бир парчаси кўриниб туради, биз учун шунинг ўзи кифоя эди. Денгиз тинчиб қолганди, шамол ҳамон ўша йўналиш бўйича эсмоқда — елканлар қилт этмасди, кемада мозор сукунати ҳукм сурард, аммо қасам ичишим мумкинки, бўғиқ шовқин-сурон элас-элас қулоққа чалинарди. Бир оз вақт ўтгач, пўлат жаранг-журунги эшитилди, дедак рақибларга ханжар тақсимланарди; кимдир қуролини палубага тушириб юборди шекилли, сўнгра яна ҳаммаёқ сув қўйгандек жимжит бўлиб қолди.

Билмадим, қўрқаётган эдимми-йўқми, ишқилиб, юрагим қафасдаги қушча мисоли типирчиларди, кўзларимни дам-бадам юпқа парда қоплаб оларди; мижжаларимни тез-тез уқалаб қўйсам-да, хоб яна босим келаверарди. Кўнглимда жимитдай ҳам умид учқуни йўқ эди, шу тобда ҳеч нимадан тап тортмасдим, бутун дунёдан нафратланардим ва ўз ҳаётимни баимкон қадар арзигулик ишга қурбон қилишни истардим, холос. Эсимда, калима қайтаришга уриниб кўрдим, лекин паришон хаёлларимни барибир жамлай олмадим: диққат-эътиборим чалғиб кетаверарди. Ҳаммаси тезроқ бошланишини истардим; кейин нима бўлса бўлар!

Ниҳоят, биз кутган дамлар етиб келди-ю, бу мен учун барибир кутилмаган ҳол бўлди: туйқус тапир-тупур қадам товушлари: бақир-чақирлар, Аланнынг жанговар даъвати эшитилди ва шу заҳоти зарба берилдию кимдир оғриққа чидамай инграб юборди. Ўгирилиб қарасам, оstonада Алан мистер Шуан билан қиличларини уриштириб туришарди.

— Ўша болани ана шу аблаҳ ўлдирган! — деб қичқирдим.

— Дарчадан кўзингни узмай! — деб бақирди Алан ва унинг қиличи катта ёрдамчининг қорнига ғирч этиб кириб кетганини кўз қирим билан илғиб қолдим.

Алан ўз вақтида огоҳлантирган экан, мундоқ қарасам, дарча ёнидан беш киши югуриб ўтиб кетди: улар елкан боғланадиган ёғочни қучоқлаб олишган эди, ча-

маси, эшикни пачоқламоқчи эдилар. Мен бир-икки марта милтиқ отиб кўрган бўлсам-да, аммо тўппончани қўлимга ҳам олмаган эдим: устига устак, одамга қаратада ҳеч қачон ўқ узмагандим. Шунга қарамай, ҳозир ўйлаб ўтиришга фурсат йўқ эди: ҳаёт-мамот масаласи ҳал бўлаётганди. Улар ёғочни сарсон қилишиб, эшикка уришмоқчи бўлган пайтда мен: «Мана, сизларга!» деб қичқирдиму тўдага қаратада ўқ уздим. Ҳартугул, биттасига ўқ тегди шекилли, додлаган кўйи ортига чекинди, бошқалари эса каловланиб қолишиди. Эс-хушини йиғишириб олгунча осмонга қаратиб яна бир марта ўқ уздим: нишонга тегмаган учинчи ўқдан кейин тўда ёғочни ташлади ўтиришга ростлади.

Сўнгра теварак-атрофимга нигоҳ ташладим: ўқ узилгандан кейин бошқарма пороҳ тутунига тўлиб кетган эди, қулоқларим эса битиб қолганди. Алан эса ҳамон ҳеч нарса бўлмагандай бепарво турарди: қиличи дастасигача қип-қизил қонга ботган эди: худди ғалаба нашидасини сураётган жангчига ўхшарди: ҳақиқатан ҳам, у енгилмас паҳлавонни эслатарди. Оёқлари остида Шуан эмаклаб турарди, оғзидан тинмасдан қон кетарди, ҳолсизланиб тобора ерга ёпишарди; кўз ўнгимда кимдир унинг оёқларидан ушлаб ташқарига судради ва бошқармадан олиб чиқиб кетди. Афтидан, бирпасдан сўнг жон таслим қилган бўлса керак.

— Мана, сизга виглардан биттаси! — деб қичқирди Алан ва менга ўгирилиб, қандай ютуқни қўлга киритганимни сўради.

Биттасини қуллатдим, ўлашимча, у дарға эди, деб жавоб бердим.

— Мен иккитасини тинчитдим,— деди у.— Ҳа, кўп қон тўкилмабди, улар яна қайтиб келишади. Жойжойимизга борайлик, Дэвид. Бу хамир учидан патир, холос.

Яна ўз постимни эгалладим ва дарчага кўз-қулоқ бўлиб турдим, боя отилган тўппончаларни қайта ўқладим.

Рақибларимиз палубада кенгаш бошлашди: тўлқинларнинг шовуллашига қарамай уларнинг баъзи бир гапсўзларини эшитиб турардим — баланд товушда гаплашишарди-да.

— Манави Шуан биз бошлаган мусиқани расво қилди! — деб хитоб этди кимдир.

— Энди фойдаси йўқ; оғайни! — деб жавоб қайтарди бошқаси.— У ўз насибасини олди-ку.

Шундан сўнг, одатдагидек, тушуниб бўлмайдиган шивир-шивир бошланди. Энди кўпроқ бир киши гапирмоқда эди, гўё у галдаги вазифалар ҳақида кўрсатма берардию бошқалар худди буйруқ олган аскарлар каби қисқа-қисқа жавоб қайтаришарди. Англадимки, улар янги ҳужумга тайёргарлик кўришарди. Аланга ўз фикримни баён этдим.

— Шундай бўлса, худога шукр! — деди у.— Агар биз уларнинг эс-ҳушини жойига келтириб қўймасак борми, иккаламизни ҳам тинчтишмайди. Фақат эсимингда бўлсин: улар энди ҳазиллашиб ўтиришмайди.

Бу пайтда тўппончаларим жанги жадалга тайёр бўлган эди; биз энди тиқ этган товушни ҳам эътибордан четда қолдирмай пайт пойлашимиз лозим. Қизғин олишув пайтида қўрқув ҳақида ўйлашга фурсат тополмаган эдим, лекин ҳозир ҳам, ҳаммаёқ жимжит бўлиб қолган чоқда ҳам хаёлимга ҳеч нарса келмасди. Ўткир тиғ ва муздай пўлатни яққол тасаввур этардим: бошқарма сиртидан эҳтиёткорона қадам товушлариниу кийимкечак шитирлашини пайқаган пайтим амин бўлдимки, рақиблар қоронғи тушганидан фойдаланишиб, қулай жойларни эгаллаб олишмоқда эди. Ростини айтсан, додлаб юборишимга озгина қолди. Кўнгилсиз ҳодисалар Алан турган томонда рўй бермоқда эди; энди жанг қилишимга ҳожат қолмаса керак, деб ўйлай бошладиму бирдан кимдир бошқарма томидан нақ бошим узра осилиб тушса бўладими!

Боцманнинг ҳуштаги чуриллади (шартли имо-ишора нишонаси) ва тўдалашиб туришган ханжарли кишилар бирдан эшикка ўзларини урдилар; худди шу сонияда ёруғлик тушадиган қопқоқ ойналари чил-чил синдию сочилиб кетди ва туйнуқдан битта денгизчи амалтақал қилиб ўтди-да, полга сакради. Ҳали қаддини ростлашга ҳам улгурмасдан унинг орқасига тўппончамни тирадим: бирдан уни отиб ташлардим-у, лекин тирик вужудга қўлим теккан заҳоти бутун борлиғимни қаҳрғазаб чулғаб, тепкини босишга ҳолим қолмади. Айни пайтда қанот чиқариб учиб кетиш ҳам қўлимдан келмасди, албаттта.

У полга сакраб тушган чоқда қўлидаги ханжар учиб кетиб эди, орқасига тўппонча қувури тираганини сезган маҳалда шартта ўгирилдию мени маҳкам ушлаб олди: болаҳонадор қилиб сўкина бошлади: шундагина мардлигим қўзиб кетди ёки қўрқув ўрнини шижоат эгалладиую қулоқни қоматга келтирадиган дара-

жада чинқирганимча унинг қорнига қаратада ўқ уздим. Заҳимали тарзда инградио полга қулади. Шу пайт тўйнукдан оёғини осилтириб турган иккинчи денгизчи пошнаси билан бошимнинг учига тепди: дарҳол бошқа тўппончани қўлимга олдиму унинг сонига қаратада ўқ уздим. У тешикдан сирғалиб ўтдию пастда ётган шеригининг устига қоп мисоли дуп этиб тушди. Нишонга урмаслик мумкин эмасди, лекин мўлжаллаб ўтиришга ҳам фурсат йўқ эди: тўппонча қувуруни унга теккизиб туриб тепкини босдим, вассалом.

Жасадлардан кўзимни узмай яна қанча пайт тикилиб турардим билмадим-у, лекин Аланнинг қичқирганини эшитишм биланоқ дарров эс-ҳушимни йиғиб олдим: чамада, у мени ёрдамга чорларди.

У шу пайтга қадар эшикка қалқон бўлиб турарди, аммо Алан битта малъун билан олишаётган чоқда бошқаси қилич остидан эмаклаб ўтибди-да, орқасидан қучоқлаб олиби. Алан чап қўлидаги ханжари билан тинмасдан рақибининг қорнига зарба берарди-ю, бироқ у Аланни сира қўйиб юбормасди — худди канага ўхшаб ёпишиб олган эди. Бошқармага яна бир киши ёпирилиб кирди. Эшик ўрнида айқаш-уйқаш қиёфалардан иборат сунъий девор пайдо бўлди. Энди биз асфаласофилинга кетдик, деб ўйладим ва ханжаримни чангллаган кўйим ён томондан тўдага ташландим. Лекин ёрдам беришга шошилмасам ҳам бўларди: ниҳоят, Алан рақибини устидан улоқтириб юборди: орқасига тисарилиб туриб худди ярадор ҳўқиз мисоли бўкирганча душманлари устига ўзини отди. Улар икки томонга ажраб, тумтарақай қоча бошлиашди: бечоралар бир-бирларига урилганча йиқилиб тушишарди. Аланнинг қиличи эса ҳавода ялт-юлт қиласарди питракка ўхшаб қочоқ душманлар тўдасига санчиларди ва пўлатнинг ҳар бир чақнашига жавоб тариқасида ярадорларнингвойвойлаши эштиларди. Ҳамон энди кунимиз битди, деб турардим ичимда. Лекин бирдан ҳужумчиларга сичқоннинг ини минг танга бўлиб қолди: Алан уларни палуба бўйлаб қувлаваб кетди — гўё бўри қўй-қўзиларни олдига солиб қувлаётганга ўхшарди.

Бироқ, у бошқармани тарқ этгандан сўнг дарҳол изига қайтди, чунки эҳтиёкорлиги жасурлигидан қолишмасди: денгизчилар эса ҳамон бир-бирларини турткиласханча, бақиришиб-чақиришиб қочиб боришарди,

худди изларидан Алан югуриб бораёттандек туюларди шекилли. Улар шоша-пиша умумий хонага киришди-да, туйнук қопқогини ёпиб олиши.

Кўйруқдаги бошқарма қассобхонага ўхшарди: ичкарида учта жасад ётарди, оstonада биттаси ўлим билан олишмоқда эди: мен билан Алан — ғолиблар соғ-саломат эди.

Алан қучогини очган кўйи яқинлашди.

— Кел, сени бир қучоқлаб олай! — деди у ва мени қучоқладио икки ёноғимдан чўлл-чўлл этказиб ўпиди. — Дэвид, сенга худди укамдек меҳрим тушиб қолди. Ростини айт-чи, баҳодир жангчига ўхшайманми? — деди у тантанали оҳангда.

Сўнгра у тор-мор келтирилган душманларимиз томон ўгирилди-да, тўртталасини ҳам бирин-кетин судраб ташқарига чиқариб ташлади. Гоҳ қандайдир қўшиқни эслашга уринарди, аслида эса ўзи қўшиқ тўқимоқчи эди! У худди янги ўйинчиқча кўзи тушган беш яшар боласингари юзлари қизариб, кўзлари чақнаб кетди. Кейин стол устига ўтиридио қиличини дирижёр таёқчаси мисоли силкитганча кўнглидаги таронани излай бошлади: дастлаб ўзига ишонқирамай кўйлади, охири товушини вадавант қўйганча шотланд кельтлари тилида ўзи тўқиган қўшиқни айтиб юборди.

Кўйида ўша қўшиқнинг мазмунини келтирмоқчиман, лекин уни назм билан ифода этолмайман, чунки мен шеър тўқишга уста эмасман: лекин инсон боласи тушунадиган тилда баён этишга ҳаракат қиласман. У кейинчалик ҳам тез-тез хиргойи қилиб турарди, ҳатто ўша қўшиқ машҳур бўлиб кетди: қисқаси, уни бир неча марта эшлишга муяс-сар бўлганман ва турлича талқин қилинганига ҳам ўзим гувоҳман.

Бу қўшиқ Аланинг қиличи ҳақда:  
Уни дегрез ўғли ҷархлаган.  
Гулхан ўз бағрида тоблаган,  
Энди Алан Брек илкида чағнамоқда ул.

Сон-саноқсиз эди ёвнинг кўзлари,  
Ҳар бир нигоҳ найда ёки жоҳ.  
Қулларнинг сон-саноқсиз қўллари талпинаверади,  
Қилич эса танҳо, тураверади.

Тоғда ўйноқлайди сарғиши буғулар,  
Улар ҳам сон-саноқсиз, тоғ эса танҳо.

Сарғиш буғулар ҳам кетарлар абас,  
Тоғ эса кўр тўкиб тұраверади.

Ҳей, ўтқиркүз лочинлар,  
Арчагулли яшил қирлардан,  
Ороллардан учиб келингиз,  
Бу ерда ўлаксалар мунтазир сизга!

Илк ғалабани қўлга киритган пайтимиз Алан томонидан яратилган (сўзини ҳам, куйини ҳам ўзи тўқиган) ушбу қўшиқда каминанинг хизматлари муносиб баҳоланган деб бўлмайди: ахир мен ҳам у билан елкама-елка туриб курашганиман-ку! Ўша кураш пайти мистер Шуан ва яна беш дангизчи бандаликни бажо келтирди: баъзилари тил тортмай ўлди, бошқалари оғир ярадор бўлди, ўшалардан иккитаси — бошқармага туйнукдан тушган кимсаларни ўз қўлларим билан нариги дунёга равона қилдим. Бундан ташқари, яна тўрт киши яраланган эди, энг камида ўшаларнинг биттасини камина сафдан чиқардим. Кўриниб турибдик, умуман айтганда, душманимизни тор-мор этишда муносиб ҳисса қўшганиман ва Алан тўқиган қўшиқдан жой олишга ҳақим бор эди. Сир эмаски, шоирлар аввало шеърнинг қоғияси хусусида қайғурладилар, лекин Алан ўзаро сұхбат чоғида (қоғиядор тарзда жумла тузмаса ҳам) доимо хизматларимни юксак баҳоларди.

Бироқ ўша пайларда менга нисбатан қандайдир адоялатсизлик қилинаётганини хаёлимга келтирмасдим. Тўғри, шотланд шевасида айтилган сўзларнинг маъносини тушунмасдим. Серташвиш дамлар, қизғин олишувлар натижасида бошимни қашлашга ҳам фурсатим етмасди: устига устак, қўлим қонга ботганини эсласам беихтиёр вужудими и ваҳима босарди, ур-йиқитлар поёнига етганидан бенихоя хурсанд эдим, тезда стулга ўзимни ташладим. Кўкрак қафасим тобора торайиб бораётгандек туюларди, ҳансираб-ҳансираф зўрга нафас олардим: ўз қўлим билан отиб ўлдирган анави икки кишини эсласам алоқ-чалоқ тушкўраётгандай сандирақлай бошлардим. Ўзимга нима бўлганини тўла-тўқис идрок этолмасдим: бирдан ёш бола мисоли ҳўнграб юбордим.

Алан елкамга қоқди-да, довюраксан, азamat йигитсан, сен озгина мизғиб олишинг лозим, деди.

— Биринчи бўлиб ўзим қоровуллик қиласман,— деди у.— Дэвид, бошидан охиригача менга панд бермадинг. Сени бутун бошли Эпин тоғларига ҳам алмаштирумайман. Э-э, Эпин нима бўлибди! Бредалбенга алмаштирумасман!

. Полга жой солдим, у бўлса белига қиличини таққанча, кўлида тўппонча тутиб биринчи сменада қоровул турди: деворда осиғлиқ вақт ўлчагич (дарғаники) бўйича уч соат постни тарк этмаслиги лозим эди. Кейин у мени уйғотди, мен ҳам уч соат туриб бердим: навбатчиликим поёнига етгунча осоишишта тонг отди; қиялама тўлқинлар кемани оҳиста тебратарди, дарға бошқармаси полига тўкилган қон ҳалқоби ўёқдан-буёққа бориб-келарди: томга тақиртуқур этиб ёмғир ёға бошлади. Навбатчиликда турган вақтимда ҳеч ким бош кўтармади, рулнинг тарақ-турӯрк этишидан сездимки, ҳатто штурвал ҳам ўз ҳолига ташлаб қўйилган эди. Кейин маълум бўлишича, улар орасида ўлган ва ярадор бўлганлар анчагина экан, қолганлар эса очиқ-оидин норозилик билдириша бошлашибди ва дарға билан мистер Риак худди мен билан Алан каби навбатмавбат посбонлик қилишибди (кема нохосдан қирғоққа чиқиб қолмаслигини исташарди). Шукрки, тун осоишишталик билан ўтди, ёмғир ёға бошлаган заҳоти шамол ҳам тинди. Кема атрофида чир айланган кўйи балиқчи қушларнинг янгроқ товушидан билдимки, тўлқин «Васият»ни Шотландия соҳилига ёки Гебрид оролларининг бирорта қирғоги томонга сурив кетган эди. Ниҳоят, бошқарма туйнугидан бошимни чиқариб қарадим: бортнинг ўнг томонида Скай тоғининг улкан қоялари салобат тўкиб турарди, янада нарида эса сирли Рам ороли ястаниб ётарди.

### Ун биринчи боб

## ДАРҒА ТАҚДИРГА ТАН БЕРДИ

Эрталабки соат олтиларда биз Алан иккаламиз нонушта қилгани ўтирдик. Бошқарма полига ойна синиқлари сочилиб ётарди ва қон билан булғанганди — даҳшатли манзара: унга кўзим тушган заҳоти иштаҳам бўғилиб, томоғимдан овқат ўтмай қолди. Лекин, умуман олганда, аҳволимиз ёмон эмасди, балки аломат эди: дарға билан унинг ёрдамчиларини каютасидан ҳайдаб чиқарганимиздан сўнг кемадаги барча спиртли ичимликлар запаси (винолар ҳам, конъяклар ҳам), зиравор сепиб тайёрланган сабзавот қоқиларию оппоқ ундан ҳозирланган қотган кулчалар каби лаззатли озиқ-овқатлар ихтиёrimизга ўтиб қолди. Шуларнинг ўзиёқ дилларимизни шод этарди. Ачинарлиси шунда эди-

ки, Шотландиянинг иккита ютоққан ўғли (марҳум мистер Шуан бу ҳисобга кирмайди) ташқарида — барча ноз-неъматлардан бенасиб бўлиб ўтиришарди ва ўзлари жинидан ҳам баттар ёмон кўрадиган нарсани, яъни совуқ сувни ичишга мажбур эдилар.

— Ишонавер, тез орада улар тавбасига таянишади,— деди Алан.— Уришқоқ одамни инсофга келтириш мумкин, лекин ичкиликбоз одам икки дунёда ҳам инсофга келмайди — ичмаса туролмайди.

Биз жуда иноқ эдик. Алан ниҳоятда меҳрибон эди: у столда турган пичоқни олдию мундирига қадалған күмуш тугмачадан биттасини кесиб берди.

— Булар отамдан — Дункан Стюартдан мерос,— деди у.— Энди ўшалардан бирини сенга бераман, ўтган кунлардан эсадалик сифатида асраб қўйгин. Қаёққа боришингдан қатъий назар ушбу тугмани кўрсатсанг бас, дарҳол атрофингда Алан Брекнинг дўстлари ҳозиру нозир бўлишади.

Жиддий қиёфада сўзларди, беихтиёр уни Буюк Карл деб ўйлаш мумкин эди, гўё қўл остида сон-саноқсиз қўшин битта ишорасига маҳтал бўлиб турарди: мен эсам, ростини айтсам, довюраклигига қойил қолардим-у, аммо шуҳратпарамастлигидан кулгим қистарди — аранг ўзимни тутиб қолардим, чунки «пиқ» этиб кулиб юборсам борми, худо кўрсатмасин-у, оламшумул жанжал бошланиши турган гап эди.

Овқатланиб бўлганимиздан кейин Алан дарғанинг сандигини титкилаб чўтка топди-да, мундирини эгнидан ечиб, синчиклаб кўздан кечирди ва эринмасдан доғларни тозалай бошлади. Менимча, бу фақат аёлларга хос фазилат эди. Тўғри, бошқа мундири йўқ эди, Қолаверса, агар гаплари рост бўлса, бу мундир қиролга тегишли эди, демак уни сидириб-сийпалаш ҳам улуғ мартаба ҳисобланарди. Шунинг учунмикан, кесиб олган тугмача ўрнидаги ҳар битта ипни дикқат билан суғуриб олаётганига қўзим тушдию совғаси бебаҳо эканига имон келтирдим.

Мистер Риак палубада турганча бизни чақириб, ярашиш учун музокара бошлашни таклиф этган пайтда Алан ҳамон чўткани қўлдан қўймаган эди. Бошқарма томига чиқдим-да, туйнук ёнига ўтирган кўйим мардонавор қиёфада (ойна синиқларига қўзим тушиб, юрагим орқасига тортиб кетаётганига қарамасдан) унга тўппонча ўқтаблиб, берироқ келиб сўзлашни буюрдим. У бошқарма ёнига келди-да, арқонга сўйинди: ияги том билан баробар эди, шу тарзда бир неча дақиқа бир-биrimизга лом-мим демай тикилиб турдик. Қўринишдан мистер Риак жанг

майдонида унчалик жон қойитмаганга ўхшарди, шунинг учун юзи салгина шилинибди, холос. Лекин тун бўйи дам ярадорлар тепасида, дам пошибонликда тик тургани туфайли ниҳоятда афтодаҳол, ҳориб-толган қишидек кўринар эди.

— Хунук воқеа бўлди,— деб минғирлади бош чайқаганча.

— Уни биз бошлаганимиз йўқ,— деб жавоб бердим.

— Дарға сенинг дўстинг билан гаплашмоқчи экан. Дераза орқали бўлса ҳам майли.

— Балки яна хиёнат қилмоқчидир, мен қаёқдан биламан?! — деб қичқирдим.

— Асло ундаи эмас, Дэвид,— деди мистер Риак.— Ростини айтсам, у истаган тақдирда ҳам биз барибир одамларни ўз томонимизга оғдириб ололмаймиз.

— Шунақами ҳали! — дедим жўрттага.

— Сенга бундан бошқа гапларни ҳам айтаман,— деб давом этди у.— Гап фақат денгизчиларда эмас, гап ўзимда. Менинг бўларим бўлди, Дэвид.— Мийигида қулиб қўйди.— Биз бир нарсани истаймиз, колос: у бизга тегмасин.

Шундан кейин Алан билан маслаҳатлашиб олдим ва музокара бошлашга рози бўлдик: иккала томон ҳам ҳарбий қаракатларни тўхтатиш мажбуриятини ўз зиммасига олди. Бироқ мистер Риакнинг ваколати шу билангина чекланмади: ялиниб-ёлвориб бир қултум ичкилик беришимни сўрай бошлади, жира пашибадек тинғирлайверди, раҳмимни келтирадиган тарзда илгари яхшилик қилганини бот-бот эслатди: охири тунука кружкани яримлатиб конъяқ қўйиб бердиму қутулдим. У озгинасини иди-да, қолган қисмини дарға билан teng баҳам кўриш учун олиб кетди.

Шартномага кўра, бирпасдан кейин бошқарма дарчаларининг биттаси остига дарға яқинлашди: у ёмғир остида турарди, қўлини боғлаб бўйнига осиб олган эди, қиёфаси тунд, ранг-рўйи оппоқ, қаримсиқقا ўхшарди: уни ярадор қилганим учун ич-ичимдан афсусландим.

Алан дарғанинг манглайига тўлптончасини тўғрилади.

— Бу зормандани нари олинг! — деди дарға.— Сэр, сўзимда тураман деб кафолат бердим-ку, ахир! Ёки мени калака қилмоқчимисиз?

— Дарға, барибир гапингизнинг бурди бўлмайди,— деб жавоб берди Алан.— Кеча оқшом ҳам бозордаги чайқовчи хотинга ўхшаб роса қийпангладингиз, кўзларингизни сувдингиз: гапингиздан тонмасликка ваъда бердингиз, боз устига, ишончли бўлишимиз учун эркакчасига

қўл ташлашдик. Кейин нима бўлганини эса ўзингиз биласиз. Сиз берган баъдаларга лаънатлар бўлсин!

— Қўйинг-э, сэр,— деди дарға.— Сўкинишдан ҳеч қандай фойда чиқмайди.— Қойил қолиш лозим, дарғанинг ўзи шундай нуқсондан холи эди.— Бошқа гапларимиз кўп. Сиз кемани кулфатга гирифтот этдингиз,— деди у алам билан.— Кемани қандай бошқаришни ҳам билмайман, одамлар етишмаяпти: менинг ўнг қўлим бўлиб қолган катта ёрдамчимнинг қорнига қиличингизни зўғотасигача ботириб олибсиз шекилли, шўрлик хайр-маъзурни ҳам насия қилиб нариги дунёга равона бўлди. Сэр, энди Глазго Бандаргоҳига қайтишга мажбурман, бошқа иложим йўқ: янги денгизчилар ёллайман, кейин... агар ижозат этсангиз, сиз билан яхшироқ тил топишадиган кишилар ҳам топилади.

— Шунақами? — деди Алан.— Бахайр, худо ҳаққи, менинг ҳам уларга айтадиган гапларим кўп! Ўша шаҳарда инглиз тилини тушунадиган ҳар қандай кишига қизик-қизик воқеаларни сўйлаб бераман. Бир томонда шаънини булғаган ўн бешта денгизчию иккинчи томонда — битта эркак билан ғўр ўсмир. Туф-э, шармандалик!

Хозисон қисқичбақага ўхшаб қип-қизариб кетди.

— Йўқ,— деб давом этди Алан.— Бунақаси кетмайди. Истайсизми-истамайсизми, шартномага биноан, мени қирғоқда қолдириб кетишингиз лозим.

— Тўғри, лекин менинг катта ёрдамчим ҳалок бўлди,— деди Хозисон.— Қандай ўлганини ўзингиз жуда яхши биласиз. Бундан ташқари, сэр, бирортамиз ҳам ўша қирғоқни билмаймиз, бу ерлар кема қатнови учун ниҳоятда хавфли.

— Сизни йўл танлаш имкониятидан маҳрум қилмайман,— деди Алан.— Мени Эпин соҳилига ташлаб кетишингиз мумкин. Ардгур, Морвен, Арисейг ёки Морар соҳилига, хуллас, Кембеллар ўлкасидан бошқа истаган жойингизда — ватаним сарҳадларидан ўттиз миль атрофидаги ҳар қандай соҳилда қолдириб кетсангиз ҳам розиман. Бу хийла катта нишон. Агар яна мўлжалга уролмасангиз борми, бир пулга қиммат, жангари денгизчи эканингизни намойиш қиласиз, холос. Агар билмоқчи бўлсангиз, биз томонларда ҳар қандай камбағал одам ҳам кечасию кундузи шалоқ қайиқ билан бир оролдан бошқасига бемалол юзиб ўтаверади.

— Сэр, қайиқ — кема эмас,— деб эътиroz билдириди дарға.— У тўнкарилиб кетса ҳам сувга чўкмайди.

— Ундей бўлса, ижозат этинг, Глазгога кетдик! — деб

ди Алан.— Жилла қурса, сизнинг устингиздан қулиб қайтамиз.

— Ҳозир менинг кўнглимга хушчақчақлик сиғмайди,— деди дарға.— Сэр, мушук бекорга офтобга чиқмайди.

— Бахайр, сэр,— деди Алан.— Мен ҳўқизнинг қулоғига танбур чертишни ёмон кўраман. Агар соҳилга элтиб қўйсангиз — ўттиз танга, Лоҳ-Линнга олиб бориб қўйсангиз — олтмиш танга бераман.

— Аммо ўзингиз ўйлаб кўринг, сэр, бу ердан, биз ҳозир турган жойдан Арднамёрхангача бир неча соатлик масофа бор, холос,— деди Хозисон.— Олтмиш танга берсангиз сизни ўша ерга элтиб қўяман.

— Сизга қулай бўлсин деб этигимни тўзитаманми, ўз ҳаётимни хавф остида қолдириб, қизил мундирли тўнғизларга дуч келаманми-а?! — деб хитоб қилди Алан.— Йўқ, сэр, отмиш танга олишни хоҳласангиз, марҳамат, аввало пешонангиздан тер чиқсин — мени она юртимга элтиб қўясиз.

— Сэр, шундай қилсам кемани хавф-хатар остида қолдирган бўламан,— деди дарға.— Айни чоқда ҳаётингиз таҳликада бўлади.

— Истамасангиз, кераги йўқ,— деди Алан.

Дарға қошларини чимиради.

— Ҳеч бўлмаса, бир нави йўл кўрсатиб борасизми?

— Ҳм-м, қўлимдан келармикан? — деб жавоб берди Алан.— Ўзингиз амин бўлдингизки, мен жангчиман, зинҳор-базинҳор денгизчи эмасман. Қолаверса, каминани тез-тез ўша соҳилларга элтиб қўйишарди, ўйлайманки, қандай қилиб қирғоқقا боришини билсам керак.

Дарға яна қошларини чимираган кўйи бош чайқади.

— Сэр, агар мен бу хосиятсиз сафар мобайнида чиқимдор бўлмаганимда борми, ўз кемамни хавф остида қолдиргандан кўра, танобингизни тортиб қўйишга жонжон деб рози бўлардим,— деди у.— Майли, энди сиз айтганча бўлақолсин. Шамол йўналиши ўзгариши биланоқ йўлга тушаман. Янгишмасам, шамол йўналиши ўзгаряпти. Лекин яна бир гапни айтиб қўйишим лозим: агар йўл-йўлакай қирол иҳтиёридаги кемага дуч келиб қолсак, улар бизни исканжага олишади — мендан рухсат сўраб ўтиришмайди. Бу ерларда соҳил бўйлаб соқчи кемалар изғиб юришади. Улар кимнинг манфаатини ҳимоя қилиши ўзингизга маълум, албатта. Шундай қилиб, сэр, бирор кор-ҳол рўй берса, пулингизни менга қолдирсангиз дуруст бўларди.

— Дарға, агар сиз камбар байроқчани — таниқлик

белгисини кўриб қолсангиз, зудлик билан жуфтакни ростлашингиз лозим,— деди Алан.— Эштишимга қараганда, палубада спиртли ичимлик таңқис экан: хўш, икки пақир сувга бир шиша конъяк алмаштирасак қандай бўларкан-а? Хоҳлайсизми?

Шартноманинг охирги моддасини иккала томон ҳам сидқидилдан адо этди. Шундан кейин биз Алан билан бошқармани тартибга келтирдик: марҳумларни эслатиб турган изларни ювиб ташладик. Мистер Риак билан дарға эса кўнгиллари истаган тарзда, яъни бир шиша майни майдалаб ўтиришиб, роҳат-фароғат қилиш имкониятига сазовор бўлдилар.

## Ўн иккинчи боб

### МАЛЛА ТУЛКИ

Шимолий-шарқ томондан шамол кўтарилган лайтда биз ҳамон дарға бошқармасини тозалаш билан овра эдик. Шамол булутни ҳайдаб кетди, қуёш кўринди.

Кези келганда, бир оз нафасимни ростлаб олишим ва баъзи бир нарсаларга изоҳ бериб ўтишим лозим, айни пайтда ўқувчи лутф қилса, ҳаритага кўз ташлаб қўйсам ҳам чакки бўлмасди. Денгизга қалин туман тушган ўша машъум куни биз Аланинг қайинини сувга ғарқ этиб юборган Кичик Минч бўғози узра юзиб борардик. Қирғиндан сўнг, эрта тонгда Канн оролининг шарқий томонида, аниқроғи, Лонг-Айленд ороллари туркумига мансуб бўлмиш Эриске билан Канн ороли ўртасида — аросатда қолдик. У ердан тўппа-тўғри Лох-Линнга бориш учун Саундоф-Малл бўғозини кесиб ўтиш лозим эди. Лекин дарғанинг қулида денгиз ҳаритаси йўқ эди, шунинг учун у кемамиз билан ороллар орасида адашиб кетишдан қўрқарди: шамол йўналишимизга монанд томонга эсаётгани туфайли Тайри оролини ғарбий соҳилидан айланиб ўтишини афзал деб билди ва улкан Малл оролининг жанубий қирғоқлари бўйлаб манзилга этиб олмоқчи бўлди.

Кун бўйи тинмасдан шамол эсади, йўналиши ҳам ўзгармади; кечга томон биз Гебрид ороли теварагидаги тўлқинлар диёрига этиб олдик. Ичкарида сочилиб ётган гурух-гуруҳ оролларни четлаб ўтишимиз, яъни жанубий-ғарб томон бурилишимиз лозим эди: шунинг учун дастлаб кемамизнинг ён тарафига тўлқинлар шалоплаб тегардию денгизчилар дам-бадам бериги бортдан нарига бортга

бориб урилишарди. Оқшом чўккан паллада, Тайри оролининг этагидан айланиб ўтганимиздан сўнг, йўналишимизни шарқ томон ўзгартиридик ва тўлқин кемамиз орқасига келиб урила бошлади.

Дарвоқе, куннинг биринчи ярмида денгиз осоийшта бўлиб, сув бетида юзиб юриш жуда ёқимли эди: қўёш чараклаб нур сочарди, теварак-атрофимизни тоғли ороллар қўршаб олганди. Шамол кемамизнинг қуйруқ томонидан эсаётганини ҳисобга олиб, бошқарма эшикларини ланг очиб қўйдим ва Алан билан мен дарға ғамлаб қўйган хушбўй тамакидан олдик-да, трубкага солиб чекиша бошладик. Худди шу пайт бир-биримизга ўзимиз ҳақда гапириб берик: сұхбатимиз, айниқса, мен учун фойдалй бўлди, чунки тез орада қадам қўйишим лозим бўлган тоғли Шотландиянинг ёввойи ўлкалари борасида баъзи бир қимматли маълумотларни билиб олдим. Ўша замонларда, буюк қўзғолон яқин ўтмиш бўлган йилларда арча гуллар мамлакатига яширинча ташриф буюраётган одам у ерда ўзини нималар кутаётганини билиб қўйса зиён қилмасди.

Биринчи бўлиб камина ўрнак қўрсатдим: бошимга тушган мусибатлар тўғрисида Аланга ҳикоя қилиб бердим. У гапларимни диққат-эътибор билан тинглади, олижаноб дўстим — рӯҳоний Кемпбелля номини тилга олган пайтим Алан ўзини идора қилолмай қолди ва қичқира бошлади: ўша номни эслатадиган одамларни кўргани кўзим йўқ, деди.

— Сизга нима бўлди? — дедим.— У киши ажойиб инсон, у билан қўл бериб сўрашишнинг ўзи фахр-ку!

— Ҳартуғул, Кемпбеллига қўлимни узатмаган бўлардим,— деди Алан.— Фақат уни пешонасидан отишими мумкин. Менга қолса, уларни қабила-пабиласи билан қарчигайлар каби қириб ташлаган бўлардим. Жон берәётган бўлсан ҳам ўшаларнинг биттасини отиб ўлдириш учун деразамнинг остигача эмаклаб борардим.

— Раҳмингиз келсин, Алан! — деб қичқирдим.— Кемпбеллар сизга нима ёмонлик қилишди?

— Мана, эшит бўлмасам, ўзингга маълумки, мен эпинлик Стюартлар авлодидан бўламан,— деди.— Кемпбеллар эса-азал-азалдан қавм-қариндошларимга ёмонлик қилишади, зарар етказишади: доимо макр-ҳийла ишлатишиб ерларимизни тортиб олишади: қурол кучи билан зўравонлик қилишса ҳам гўрга эди!— Охирги сўзларни товушининг борича бақириб айтди-да, столга зарб билан мушт туширди. Рости, бу ҳолга үнчалик эътибор бермадим, чунки мағлубиятга учраган кишилар өдатда ўзларини

шунаقا тутишини билардим.— Бундан ташқари ҳам кўп ишлар бор, лекин ҳаммаси бир хил йўсинда амалга оширилади: ёлғон сўзлар, ёлғон қоғозлар, товламачилик — чакана савдо гарга хос хусусиятлар: ажабки, ишлар қонунийлик ниқоби остига олинади ва баттар ғазабни қўзғатади.

— Сизга ўхшаб тугмаларини саҳийлик билан тарқатидиган киши амалий иш борасида бирор нарсанинг фарқига борармикан? — деб танбеҳ берди.

— Ҳм-м! — деди у ва яна лабларига табассум ёйилди.— Исрофгарчилик ҳам тугмаларнинг эгасидан мерос қолган: ғарип отахонимнинг исми шарифи Дункан Стюарт эди: илойим мозорининг тупроғи енгил бўлсин! Ўз қавм-қариндошлари орасида энг зўр, Шотландиянинг илғор қиличбози эди: бу дегани «дунёдаги энг илғор» деган гап билан баробар! Ахир биламан-ку, у менга бекорга таълим бергани йўқ! Илк бора йўқлаган пайтларда Қора Постда туради ва барча асилзода посбонлар каби доимо орқасидан қуролбардорини эргаштириб юрарди: қуролбардори эса жанги жадалга унинг пилтамилиғини кўтариб киради. Афтидан, қирол ҳазратлари шотланд тоғликлари қандай қиличбозликка тушишини томоша қилмоқчи бўлибди шекилли. Отам билан яна уч кишини танлаб олишибди ва маҳоратларини намоён этишлари учун Лондонга жўнатишибди. Улар саройда — қирол Георг, қиролича Каролина, жаллод герцог Кемберлендский ва бошқаларнинг кўз олдида (уларнинг ҳаммасини номма-ном эслолмайман) икки соат мобайнида қиличбозлик санъатининг барча нозик сирларини кўрсатишибди. Томоша ниҳоясига етгач, қирол нечоғли сурбет мустабид бўлишига қарамай, қиличбозларни олқишлабди ва ҳар бирига ўз қўли билан уч тангадан улашибди. Саройдан ташқарига чиқиш пайтида дарвоза қоровулхонасидан ўтишлари лозим экан: ўша маҳалда отамнинг миясига ғалати фикр келиб қолибди — у шотланд заминдорларидан биринчи бўлиб шу дарвозадан ўтятпими, демак камбағал дарвозабонга хайр-эҳсон бериб кетиши керак, токи у кимга қуллуқ қилганини бир умр эсидан чиқармай юрсин. Шундай қилиб, дарвозабон кафтига беписандлик билан қирол берган учта тилла тангани ташлаб ўтади: орқасидан келаётган уч ҳамроҳи ҳам худди шундай қиладилар. Қанчалик тер тўккан бўлишларига қарамай, шип-шийдам бўлиб кўчага қадам қўядилар. Баъзи кишилар қирол дарвозабонига биринчи бўлиб фалончи

тангаларини берган, дейди: бошқа бирор эса пистончи берган, дейди, лекин ҳақиқатда бу ишни биринчи бўлиб Дункан Стюарт бошлаган — мен қилич ҳамда тўппонча ёрдамида гапимнинг чин эканини исботлашга тайёрман. Отам мана шунаقا зот эди: илойим, жойи жаннатда бўлсин!

— Ўйлайманки, ундан зот сизга мўл-кўл бойлик қолдирмаган бўлса керак,— дедим.

— Тўғри айтасан,— деди Алан.— У киши уят жойимни яшириб юришим учун бир жуфт иштон қолдирган, холос. Бошқа ҳеч вақо йўқ. Шунинг учун ҳарбий хизматга ёлландим: ана шу нарса дориломон кунларда шаънимга доғ бўлиб тушди, агар қизил мундирли тўнғизларнинг қўлига тушганимда борми, нақ онамни кўрсатишарди.

— Йўғ-э?! — деб хитоб қилдим.— Ахир сиз инглизлар қўшини сафида хизмат қилгансиз-ку!

— Ҳамма гап шунда,— деди Алан.— Энди мен Престонпанс<sup>1</sup> остоналарида ҳақиқат учун курашаётган жангчилар томонига ўтиб кетдим деб, ўзимга таскин бераман, холос.

Бундай дунёқарашиб билан асло муроса қилолмасдим: жанг пайтида қочоқлик қилган одам ўз номига доғ туширади. Ёш бўлишимга қарамай, бу ҳақда товушимни чиқармай лом-мим демаслигим лозим эканига ақлим етарди.

— Ҳа-а! — дедим.— Ахир бунинг учун қатл этадиларку!

— Ҳа, агар Алан уларнинг қўлига тушса борми, пачакилашиб ўтиришмайди — шартта дорга осадилар! Тўғри, чўнтағимда Фарангистон қироли имзо чеккан сипоҳи унвонининг ҳужжати бор: ҳартугул, арзимас бўлса-да, лекин ҳимоя воситаси ҳисобланади.

— Унчалик ишонмайман,— дедим.

— Менинг кўнглимда ҳам иштибоҳ йўқ эмас,— деди Алан қуруққина оҳангда.

— Ё худо! — деб юбордим беихтиёр.— Сиз ахир ашаддий ғаләёнчи, қочоқ, фаранг қиролининг малайи экансиз-ку, яна нимадан умидвор бўлиб Шотландияга боряпсиз? Тақдир билан ҳазиллашманг-да!

<sup>1</sup> 1745 йил 21 сентябрь куни Престонпанс остоналарида шотландлар инглиз қўшинини тор-мор келтирди.

— Во-о! — деди Алан.— Мен қирқ олтинчи йилдан бери ҳар йили уёққа қайтиб бораман.

— Сизни нима мажбур қиласди?

— Биласанми, жудаям соғиниб кетаман,— деди у.— Дўстларимни, юртимни соғинаман. Таъриф йўқ, Фарангистон дилбар мамлакат, лекин арчагуллар масканига, буғулар гўшасига боргим келаверади. Йўл-йўлакай бекордан бекор сангиб юрмайман, иш топилади. Ёш-ялангларни фарангни қироли хизматига ёллайман. Мажбурий хизматга, билдингми? Шундай йўсинда оз-моз пул топаман. Лекин буёққа келишимнинг асосий сабаби шуки, йўлбошчим Ардшилнинг топшириғини бажараман.

— Менимча, сизнинг йўлбошчингизнинг исми Эпин бўлса керак,— дедим.

— Тўғри, лекин Ардшил — қабила йўлбошчиси,— деб изоҳ берди Алан, аммо гапига ишонқирамадим.— Ўзинг танангга ййлаб кўргин, Дэвид: насл-насаби тоза — қирол авлодидан, умр бўйи эгар устида юрган зот ҳозир қашшоқ аҳволда яшаяпти. Фарангилар шаҳрида мусофириликда умргузаронлик қиляпти. Ўша одам, яъни биринчи даъватидан сўнг тўрт юзта жасур қиличбозни атрофида тўплай олган одам (ўз кўзим билан кўрганман!) энди бозордан мой ҳарид қиляпти ва карам япрогига ўраб уйига кўтариб кетяпти. Бу ҳол фақат кишига алам қилмайди, айни чоқда бутун қабилани иснодга қолдиради. Эпинга киндик қони тўкилган болалари — сўнмас умидлари бор: улар мусофириликда илм олишлари, қиличбозлик санъатини эгаллашлари лозим. Шунаقا. Эпинлик ижарадорлар қирол Георгга фойданинг маълум қисмини беришга мажбур бўляптилар, лекин уларнинг юраги бутун ўз йўлбошчиларига содик: шу тариқа — кучли муҳаббат туфайли ва сал-пал тазиик қилинган (баъзан дўқ-пўписа қилишга ҳам тўғри келади), бечора камбағаллар тирноқлаб йиққан-терганларининг бир бўлагини Ардшилга берадилар. Мен эсам, Дэвид, ўша улушни эгасига элтиб берадиган воситачиман, холос.

У белидаги камарига шаппатилаб қўйди: тилла тангалилар жиринг-жиринг товуш чиқарди.

— Халқ икки ҳокимга солиқ тўляяптими? — деб сўрадим ҳайратланиб.

— Шундай, Дэвид. Иккаласига ҳам тўляяпти.

— Наҳотки? Ҳеч жаҳонда иккиёқлама солиқ ҳам бўладими?

— Бўлар экан, Дэвид,— деб жавоб берди Алан.—

Анави дарғаваччага ёлғон гапирган эдим, лекин сенга ростини айтаман. Қеракли улушимни осонгина ундириб олаётганимдан ўзим ҳам ҳайронман. Бу борада Генлар авлодидан бўлмиш Жеймснинг (бизнинг қариндошимиз, у раҳматли отамнинг дўсти эди), бошқача айтганда, Ардшилнинг туғишган укаси Жеймс Стюартнинг саъй-ҳаракатларини алоҳида таъкидламоқ зарур, албатта. Барча ташкилий масалалар ўшанинг зиммасида, пулни ҳам унинг ўзи тўплайди.

Кейинчалик дорга осилгач, номи тилларда достон бўлиб кетган Жеймс Стюарт ҳақида илк бор ўшанда эшитган эдим. Бироқ нотаниш киши номига деярли эътибор бермагандим: камбағал тоғликларнинг тантилигида ич-ичимдан қойил қолиб ўтирадим.

— Олижанобликни қаранг-а! — деб хитоб қилдим.— Майли, мен виг ёки ўшанга ўхшаш тоифага мансуб бўлсам ҳам, комил ишонч билан айтаманки, бу ғирт олижаноблик!

— Тўғри,— деди Алан.— Сен вигсан, аммо жентельменсан, шунинг учун ҳамма нарсага ақлинг етади. Агар анави падарлаънат Кемпбеллар қабиласидан бўлганингда борми, бундай гапни эшитган заҳотинг тишларингни ғичирлатардинг, холос. Мабодо Малла Тулки...— Алан шу сўзларни айтдию тилини тишлади, тишларини қайради. Мен умримда кўп ғазабнок қиёфаларни кўрганман, лекин уларнинг бирортаси ҳам Алан Малла Тулкини эслаган пайтидагидек заҳар сачратмасди.

Сал-пал ҳайиқдим-у, қизиқувчанигим барибир устун келди.

— Малла Тулки ким ўзи? — деб сўрадим.

— Ким бўларди?! — деб қичқирди Алан.— Яхши, сенга айтаман. Куллонден остоналарида шотланд қабиласарининг жангчилари тор-мор келтирилди, ҳақиқат топталди, отлар эса шимолдаги асилизода зотлар — хотинлар ихтиёрига топширилди. Ардшил худди заҳарланган буғудек тоғларга қочиб чиқиб кетишга мажбур бўлди — хотини, бола-чақаси билан биргаликда қочди. Биз уларни кемага чиқариб олгунимизча она сутимиз оғзимизга келди. Йўлбошчимиз ўрмонда яшириниб юрган кезларда ярамас инглизлар уни ҳаётдан маҳрум этолмадилар, лекин азалий ҳуқуқларини поимол этдилар. Ундан ҳокимиятни, ер-мулкни ўттиз асрдан бери қурол-яроқ кўтариб юрадиган қабиладош оға-инилари қўлидан қиличини тортиб олдилар, эгниларидағи кийим-бошларини йиртиб ташладилар: шундай қилиб, энди

қалин жун рўмол ўраб юриш ҳам жиноят ҳисобланади, шотландларга ўхшаб юбка кийиб юрганинг учунгина зинданга ташлашлари мумкин. Улар фақат бир нарсанинг уддасидан чиқолмадилар: қабилаларнинг ўз йўлбошчиларига бўлган муҳаббатини отиб ўлдиrolмадилар. Манави тангалар — гувоҳдир. Энди саҳнада янги қиёфалар пайдо бўлади: Кемпбелл, Гленурдан чиқсан малла Колин...

— Малла Тулки деганда сиз ўшани назарда тутяпсизми? — деб сўрадим.

— Эҳ, бирор киши ўша тулкининг думини кесиб келса борми! — деди Алан тишларини ғижирлатиб.— Ҳа, ўша аblaҳ! У ўйинга қўшилди, қирол Георг уни Эпиннинг бошқарувчиси лавозимига тайинлади. Дастлабки пайтлари ўзини хокисор кўрсатиб, Шеймус (яъни, йўлбошчимизнинг ваколатли вакили Жеймс Глен) билан оғиз-бурун ўпишиб юрди. Кейинчалик аста-секин боя айтган ҳодисани пайқаб қолади: эпинлик камбағаллар, оддий деҳқонлар, ижарачилар, ёйандозлар денгиз ортида умргузаронлик қилаётган Ардшил ва унинг баҳтиқаро болаларига ўз насибаларининг маълум бўлагини жўнатаётганини билиб олади. Сен буни нима деб атадинг-а?

— Олижаноблик, дедим, Алан.

— Виглардан унчалик фарқ қилмайдиган сендей одам шундай деса-я! — деб хитоб этди Алан. — Лекин бу гап Колин Рой қулоғига етиб боргач, томирларида гупураётган кемпбеллонга ҳаром қон миясига тепади. У тўкин дастурхон теварагида ҳам тишларини қайраб ўтиради. Наҳот! Стюарт бир бурда нонни бемалол еб ўтирса-ю, ҳеч нарса қилолмаса?! Уҳ, сариқ иблис, ҳали қўлимга тушарсану ўшанда додингни худога айтасан! — Алан ҳовурини босмоқчи бўлиб, тилини тишлади.— Ҳўш, Дэвид, сенинг назарингда, кейин у нима қилди? Барча фермалар ижарага берилади, деди. Аслида эса, нияти қора: «Бирпасда янги ижарачилар топаман, улар савдо-сотиқ жабҳасида барча Стюартлару, Макколлару Макробларни ер тишлатади, дейди ўзича; Дэвид, уларнинг ҳаммаси қабиладошларимиздир. Кейин Ардшил истаса-истамаса Фарангистон кўчаларида гадойтўрвасини елкасига осиб юришга мажбур бўлади».

— Ҳўш, кейин-чи? — деб сўрадим.

Алан аллақачон ўчиб қолган трубкасини бир четга қўйди-да, кафтларини тиззаларига тиради.

— Кейинми? — деди у ўсмоқчилаб.— Умр бўйи бош қотирсанг ҳам кейин нима бўлганини тасаввур этолмай-

сан! Сўнгра иккиёқлама солиқ (бирини мажбурият бўйича қирол Георгга, иккинчисини одамгарчилик юзасидан Ардшилга) тўлайдиган Стюартлар, Макколар, Макроблар биргаликда Маллавойдан мисли кўрилмаган пора сўрадилар. Бундай маблағ бутун Шотландияни эгаллаб олган Кемпбелларнинг тушига ҳам кирмайди! У Клайднинг номини рўкач қилиб кирмаган эшиги, бош сўқмаган тешиги қолмади, Эдинбурггача борди: ялинди-ёлборди, кўзёш тўқди: Кемпбелл малла кўппаги Стюартни хомталаш қилишини истасангиз, марҳаматингизни дариғ тутманг, ёрдам беринг!

— Алан, бу ҳайратомуз, ажойиб тарих экан,— дедим.  
— Эҳтимол, мен вигдирман, лекин ўша аглаҳнинг яксон бўлганидан ниҳоятда хурсандман.

— Яксон бўлган? — деб сўзимни илиб олди Алан.— Кимни айтяпсан?! Кемпбелларни яхши билмас экансан, боз устига, Малла Тулки ҳақида тасаввурга ҳам эга эмассан. Токи тоғ ёнбағирлари унинг қонига бўялмас экан, у яксон бўлмайди. Дўстим Дэвид, агар бир-икки кун бўш вақтим бўлганда борми, унга овчилик қанақа бўлишини кўрсатиб қўярдим: арчагуллар мамлакатида — Шотландияда у жон сақлайдиган бирорта кандик ҳам топилмай қоларди!

— Дўстим Алан, шунчалик дарғазаб бўлишдан нима фойда бор? — дедим.— Бу гаплар жўяли эмас, мўмин бандалар бундай қилмайдилар. Куруқ гапларингиз сиз Тулки деб атаётган махлуқقا ҳеч қанақа зиён-заҳмат етказмайди, бекорга хуноб бўляпсиз. Воқеаларни бирмабир сўзлаб беринг, вассалом. Кейин у нима қилди?

— Дэвид, ўз вақтида танбех бердинг,— деди Алан.— Дарҳақиқат, ачинарлиси шундаки, унга гап билан зарар етказиб бўлмайди! Агар «мўмин бандалар» деган иборангни ҳисобга олмаганда (чунки «мўмин бандалар» деганда бутунлай бошқа нарсани тушунаман) барча гапларингга тўла-тўқис қўшиламан.

— Фикр-мулоҳазалар ўз йўлига, аммо бутпарастлар дини қасоскорликни тақиқлади — буни ҳамма билади.

— Ҳа-я, яққол кўриниб турибдики, Кемпбелл сени тамоман йўлдан оздирраб ташлабди! — деди у.— Агар арчагуллар тўпи ортида қўлига қурол ушлаган бирорта азамат пойлаб ётмаса борми, Кемпбеллга ўхшаган исқиrtlар бу дунёда ўзлари билган номаъқулчилигини қилишарди! Шундай бўлса-да, бу гапларнинг ишга алоқаси йўқ. Хуллас, кейин у нима қилди?

— Балли! Шуни айтиб беринг! — дедим.

— Дэвид, сенга малол келмасин-у, лекин у энг жирканч йўллар билан бўлса ҳам содда одамлардан қутулмоқ ғамини еди. Фақат Ардшил оч қолса бас: асосий муддаоси шу эди. Мусофири маддий жиҳатдан таъминлаётган кишиларни пул билан енга олмадими, демак ёлғон-яшириқ усуллар ёрдамида сиқиб сувини ичади. У қонуншунослардан кўмак сўрайди, қофоз-поғозларни тўғрилайди-да, қизил мундирлиларга одам жўнатади! Шундай қилиб, бечораларни киндик қони тўкилган, болалиги ўтган азиз гўшалардан қувиб чиқаради, бегона юртларга ҳайдаб юборади. Хўш, уларнинг ўрнини кимлар эгаллашди? Чувринди гадойваччалар! Энди қирол Георг хайр-эҳсонни ҳаммомда олади! Энди бешала панжасини оғзига тиқмай қўя қолсин: шундоқ ҳам малла Колиннинг ташвишлари бошидан ошиб-тошиб ётибди! Ардшилга зарар етказдими бас, энди уни кўнгли тўқ! Худди ёш боланинг қўлидан қўғирчоғини тортиб олгандек, йўлбошчимнинг насибасини қиди: у то ўз уйига — Гленурга етгунча хурсандлигидан ўйинга тушиб кетади.

— Ижозат берсангизу бир оғиз гапирсам! — дедим.— Ишончингиз комил бўлсинки, агар солиқ камайтирилгани рост бўлса, демак бу ҳукуматимиз марҳаматидан нишонадир. Кемпбелл айбдор эмас, унга шунақа буйруқ берилган. Айтайлик, эртага Колинни гумдон қилдингиз, лекин бундан бирор фойда чиқармикан? Сиз ҳали бошингизни қашлашга улгурмай туриб, ўрнида янги ишбоши пайдо бўлади.

— Тўғри,— деди Алан.— Жанг чоғида сендан азаматроқ йигит бўлмайди, лекин бошқа пайтлари турган-битганинг виг!

Дафъатан, у беғараз гапираётгандек туюларди, лекин беписанд гап оҳангидан қаҳр-ғазаб сезилиб турарди. Шунинг учун суҳбат мавзусини ўзгартиришни лозим топдим. Мен ҳайратланётганимни яшириб ўтирамадим.

— Шимолий Шотландия худди қамал қилинган шаҳар мисоли аскарлару соқчиларга тўлиб ётган бўлса-да, ҳар йили бу ёққа бемалол келиб-кетаётганингиз, қўлга тушириб олишмаётгани ниҳоятда ажабланарли, — дедим.

— Бу ҳол сен ўйлаганчалик мураккаб эмас,— деб жавоб берди Алан.— Биласанми, ўз йўлингни яхши билсанг кифоя: тоғ ёнбағирлари яйдоқ — агар бир жойга соқчи қўйишса, бошқа жойдан чап бериб ўтиб кетаверасан. Қолаверса, арчазор — энг зўр мададкор. Ҳар томонда дўст-ёрларнинг уйлари, молхоналари,

пичан ғарамлари бор. Вөз устига, «ҳаммаёқ аскарлару соқчиларга тұлиб ётибди», деган гап сафсата, сүз үйини, холос. Битта аскарвачча фақат ўз этигининг изини түлдириб туради. Шундай пайтлар бўлганки, ҳатто нариги қирғоқда қоровуллар изғиб юришган чоғларда ҳам балиқ овлаганман: шунақаям катта гулмоҳи илинтирганманки, асти қўяверасан! Соқчидан беш-олти қадам наридаги арчазор тўпи остида ўтирадим, э-э, ўшанда ундан ниҳоятда таъсиран ҳуштак чалишни ўрганиб олганимчи! Мана бундай! — Алан қандайдир қўшиқ кўйини ҳуштакда чала бошлади.— Бундан ташқари, ҳозир қирқ олтинчи йилдагичалик қийинчиликлар йўқ,— деб давом этди Алан.— Айтиш мумкинки, тоғларда тинчлик ҳукм сурмоқда. Буни ҳеч ажабланадиган жойи йўқ, чунки Киптайрдан то Рат бурунигача на бирорта пилтамилтиқ, на бирорта қилич топилади. Албатта, кимдир томга босилган похол остига қурол-пуролини яшириб қўйган бўлиши мумкин. Дэвид, мен фақат бир нарсани билишни истардим: бундай ҳолат қачонгача давом этаркан? Бир қараашда, бу узоқ давом этмайди: токи Ардшил каби инсонлар мұхожириликда азоб чекар экан, токи Малла Тулки сингари ярамас махлуклар майпарастликка мукласидан кетиб, камбағалларни қонқора қақшатар экан, охири халқнинг сабр косаси тўлади. Бироқ, халқнинг сабр косаси қачон тўлажагини ҳеч ким аниқ айтиб беролмади. Йўқса, малла Колинни жафокаш Элиним бўйлаб отда сайру саёҳат қилиб юрганини қандай изоҳлаш мумкин? Наҳотки, шартта пешонасидан отиб ташлайдиган битта довюрак чиқмаса!?

Алан сўзлашдан тўхтадио теран ўйга толди ва лошим демасдан, қайғули қиёфада узоқ ўтириди.

Дўстим ҳақида айтилган барча гап-сўзларга қўшимча қилиб қуйидагиларни илова қилмоқчиман: у хилма-хил мусиқа асблобларини, айниқса, сибизғани қойиллатиб чаларди: ўз она тилида ажойиб шеърлар ёзган машҳур шоир эди; фарангига ва инглиз тилларида яратилган кўплаб китобларни мутолаа қилганди: нишонга бехато урадиган мерган, устаси фаранг балиқ овчи эди; севимли қиличини жонидан ҳам азиз биладиган ажойиб қиличбозу рапирачи эди. Айни чоқда камчиликлари ҳам кафтдагидек яққол кўриниб турарди, уларни бирма-бир санаб беришим мумкин. Тўғри, дарға бошқармасидаги олишувдан сўнг у (менга нисбатан) болаларча аразгўйлигини жанжалкашлигини деярли йиғиштириб қўйди. Фақат нима учун бундай ўзгариш

рўй берганини аниқ айтольмайман: балки мен тубанлашмагандирман, эҳтимол довюраклигига гувоҳ бўлган дирман? Негаки, Алан Брек бошқаларнинг жасоратини қанчалик юксак қадрламасин, энг аввало, ўзининг — Алан Брекнинг жасоратига тан берарди.

## Ўн учинчи боб

### КЕМА ҲАЛОКАТИ

Қўйруқдаги бошқарма эшигини кимдир тақиллатган ва бир оздан кейин ичкарига Хозисон мўралаган чоқда вақт алламаҳал бўлган эди (агар йилнинг ҳозирги мавсумини эътиборга олсан, ҳали қоронғи тушмаганди).

— Эй, буёққа чиқинглар! — деди ў.— Бир қараб кўринглар-чи, сизлар кемани ҳув анави жойдан олиб ўтасизларми-йўқми?

— Яна кўзбойлоқчилик қилмоқчимисиз? — деб сўради Алан.

— Кўзбойлоқчиликка йўл бўлсин! — деб қичқирди дарға.— Шундоқ ҳам бош-кетимни йўқотиб қўйдим-ку, кема ҳалокат ёқасида турибди!

Унинг ташвишманд қиёфасию кема ҳақида жон қўйдирив гапираётганидан амин бўлдикки, дарға бу гал мутлақо самимий эди: Алан икковимиз панд еб қолишдан чўчимай палубага чиқдик.

Суякни қақшатадиган изғирин эсади, булутсиз осмон шафақдан таралаётган заррин шуълага бурканган эди ва айни чоқда кўкда тўлин ой балқиб турарди. Изғирин кеманинг ён томонидан уриларди: чунки Малл ороли этакларини жанубий-ғарб томондан айланиб ўтиш мўлжалланмоқда эди: орол-тоғ ва улуғвор чўқилари булат бағрига санчилиб турган Бен-Мор кема тумшуғининг чап тарафида ястаниб ётарди. Шамол «Васият» йўналишига нисбатан хийла ноқулай томондан эсаётган бўлса-да, кема ғарбий тўлқинлар забти остида зир титраб, баъзан тумшуғи сувга ботиб-ботиб катта тезликда олға юзиб бораарди.

Аслини олганда, бу оқшом дengiz сафари учун хавфли эмасди. Шунинг учун улкан пўртана кемани бирдан кўтариб юборган пайтда дарға қўли билан қаёққадир ишора қилганча ваҳимали тарзда қичқирганини эшидиму бир оз ҳайрон бўлдим.

— Қаранглар-а! — деб хитоб қилди ў.

Шамол ялаб-юлқаб ўтаётган борт олдида — ойдинда денгиздан фавворага ўхшаш бир нарса ҳавога құтарилилуу  
Бирдан узоқдан бүғиқ шов-шув эшилтилди.

— Сизнингча бу нима? — деб сүради дарға ҳасратли оҳангда.

— Тұлқинлар сув остидаги қояға бориб уриляпти,—  
деди Алан.— Энди хатарлы жой қаерда эканини билиб олдингиз. Яна нимадан норози бўляпсиз?

— Билиб олдим, албатта,— деди Хозисон.— Афсуски,  
сув ости қояси ёлғиз бўлмайди-да...

Дарҳақиқат, у сўзларини якунлашга улгурмасдан денгизнинг хиёл жанубий томонидан яна битта фаввора құтарилиди.

— Кўрдингизми? — деди Хозисон.— Ана холо-ос!  
Агар қоялар мавжуд эканини билганимда, қўлимда денгиз харитаси бўлганида борми, ҳеч бўлмаса Шуан тирик қолганда эди, олтмиш танга учун, ҳатто олти юз танга эвазига ҳам кема билан бундай тошлоқда таваккалчилик қилмасдим! Сэр, ўнглишмасам, йўл кўрсатиб бориш кафолатини зиммангизга олган эдингиз, энди нима дейсиз?

— Менимча, булар Торрен қоялари деб аталади,—  
деди Алан.

— Ҳали кўпми?

— Сэр, сал инсоф қилинг ахир, мен лоцман эмасман,— деди Алан.— Назаримда, йигирма чақиримга-  
ча ҳала-дўнгалак бўлса керак.

Мистер Риак билан дарға бир-бирларига қараб олишди.

— Лекин қаердадир бехавотир йўлак бордир ахир? —  
деб сўради дарға.

— Шубҳасиз,— деди Алан.— Бироқ қаерда ўша йўлак? Аниқ айтольмайман-у, қирғоққа яқин жойлар бехавотир бўлса керак.

— Шунақами? — деди Хозисон.— Ундай бўлса, мистер Риак, шамолга тескарироқ йўналишдан боришимиз лозим. Сэр, Маллни айланиб ўтаётган пайтимиз иложи борича қирғоққа яқинроқ юрилсин. Тўғри, қирғоқ бизни барибир шамолдан тўсив туради, шамолга беткай томон эса тошлоқдан иборат. Қолаверса, энди орқага чекиниб бўлмайди, аста-секин олға силжийверамиз.

У бошқарувчига буйруқ берди ва Риакни кема бурнидаги мачтанинг кузатиш супачасига жўнатди.  
Дарға билан ёрдамчисини қўшиб ҳисоблаганда палубада

ишга яроқли (ишга жалб этилган) фақат бештагина экипаж аъзоси бор эди. Шунинг учун, юқорида таъкидлаганимдек, мачта устига чиқиб ўтириш вазифаси мистер Риак зиммасига тушди ва энди у кузатувчилик қиларди: дам-бадам олдинда нималарни кўраётгани ҳақида овозининг борича бақириб ахборот берарди.

— Жануб томонда қоялар тиқилиб ётибди,— деб огоҳлантирди ва бир оздан кейин:— Ҳақиқатан ҳам, қирғоққа яқин жойлар бехавотирга ўхшайди,— деди.

— Хўш, сэрг, кўрсатмангиз бўйича ҳаракат қилишга уриниб кўрамиз,— деб Хозисон Аланга мурожаат этди.— Тасаввур қилишимча, кўр мусиқачига ҳам худди шу тарзда ишонч билдириш мумкин. Ҳудоё худовандо ҳақ бўлиб чиқинг-да!

— Ё раббим! — деб қулоғимга шивирлади Алан.— Шошма, шу гапни қаерда эшигтан эдим-а? Э-э, майли, барибир тақдирдан қочиб қутулиб бўлмайди.

Қирғоққа яқинлашиб борганимиз сари денгиз тубидан бўртиб чиқкан қоялар ҳам кўпайиб кетди: улар йўлимиз устида тез-тез пайдо бўлиб қолардию мистер Риак, йўналишни ўзгартириш керак, деб қичқиради. Гоҳида ўз вақтида хавфдан хабардор бўлиб қолардик: масалан, битта қоя устига харита ёйиладиган тахтачага тегайтегай деб ўтиб кетди: унга пўртана келиб урилган чоқда майда томчилар палубага ёмғир мисоли ёғилди ва биз бошдан-оёқ шаллаббо бўлдик.

Ойдин кеча эди, барча хавф-хатар кафтдагидай яққол кўриниб турарди: шунинг учун кўз ўнгимизда рўй бераётган ҳодисалар янада ваҳималироқ туюларди. Мен дарғанинг қиёфасини аниқ-равшан кўриб турардим: у бошқарувчи ёнида дам чап оёғига-дам ўнг оёғига оғирлигини ташлаган кўйи гоҳ-гоҳ бармоқларига куҳ-куҳлар эди, лекин диққат-эътибори бир нуқтага жамланганди, денгиздан кўзларини узмасди, қоядек собит эди. Олишув пайтида на у, на мистер Риак жасорат кўрсатганди, аммо мен ишонч ҳосил қилдимки, жасорат бобида тенг келадиган инсон йўқ экан: бу ҳол уларнинг қадр-қимматини хийла кўтариб юборарди, албатта. Боз устига, Алан бўздай оқариб кетган эди.

— Оҳ-оҳ-оҳ, Дэвид, шу аҳволда ўлиб кетишни асло истамайман! — деб ғудраниб қўйди у.

— Алан, сизга нима бўлди?! — деб хитоб қилдим.— Иштонингизни ҳўллаб қўйдингизми-а?

— Йўғ-э,— деди у қуриб қолган лабларини ялаб.— Қўриб турибсан-ку, итдай ўлиб кетамиз шекилли...

Бу пайтда сув ости қояларига урилмаслик учун йўналишимизни тез-тез ўзгартириб, ҳамон шамолга ёндош ҳолатда ва қирғоқдан унчалик узоқлашмасдан Айон оролини айланиб ўтдик-да, Малл соҳили бўйлаб олға юзавердик. Бурун этакларига бориб урилаётган тўлқинлар ниҳоятда кучли эди: кемани худди пайраха мисоли уёқдан-буёққа итқитиб ташларди. Рулни иккита денгизчи бошқариб борарди, баъзан Хозисон ҳам ўз ихтиёри билан уларга ёрдамлашиб турарди, лекин учта ғўлабирдай эркак бутун оғирлигини дастак устига ташласа-да, у гўё тирик жонзот каби қаршилик кўрсатарди, рулчиларни орқага улоқтириб юборарди: ғалати манзара! Бу ҳол шундоқ ҳам қалтис бўлиб турган вазиятни янада чигаллаштиради, албатта. Аммо баҳтимизга, мана, бир неча чақиримдан сўнг сув ости қоялари таъқибидан халос бўлдик. Кузатув мачтасида ўтирган мистер Риак бирдан, йўналишимиз топ-тоза, деб хабар берди.

— Сиз ҳақ бўлиб чиқдингиз,— деди Хозисон Аланга.— Сэр, ҳисоб-китоб қиласидан пайт келган пайтда мен буни унутмайман: сиз кемани асраб қолдингиз.

Имоним комилки, бу сўзларни чин дилдан айтиётган эди ва албатта сўзининг устидан чиқарди: «Васият» дарға учун бениҳоя азиз эди. Бироқ булар менинг шунчаки тахминим, холос. Чунки ҳаммаси у айтгандан бошқа томонга ўзгариб кетди.

— Қаршимизда улкан қоя турибди!— деб қичқирди бирдан мистер Риак.— Шамол эсаётган тарафда сув ости қояси бор!

Шу тобда қирғоққа зарб билан урилган пўртана кема устига шалоп этиб тушдию елканлар пучайиб қолди. «Васият» бизбизакдай шамолга юзма-юз турдию туйқус сув ости қоясига зарб билан урилди ва ҳаммамиз палубага устма-уст йиқилдик, мистер Риакнинг эса мачтадан учиб кетишига бир баҳя қолди.

Бирпасда ўрнимдан сапчиб турдим. Кемамиз тўқнашиб кетган сув ости қояси Маллнинг жанубий-тарб этакларида бўлиб, бортнинг чап томонидан қорайиб кўриниб турган мўъжазгина Иррейд оролчасидан унчалик узоқ эмасди. Тўлқинлар тоҳ кемага уриларди, тоҳида эса бечорани қояга олиб бориб урарди, биз қандай қилиб унинг абжағи чиқаётганини эшитиб турардик: бунинг устига, елканлар тинимсиз шалопларди, шамол чийилларди, ойдинда пўртана кўпикланиб ҳар ёнга сачрарди, хавф-хатарни ҳис этиб турардик — эҳтимол, шунинг учун бўлса керак, бошим гир-гир айланарди,

ҳартугул, эс-ҳушим жойида эмасди, кўз ўнгимда рўй бергаётган ҳодисаларни тузукроқ идрок этолмасдим.

Кўп ўтмай, мистер Риак билан денгизчилар қайиқлар теварагида ўралашиб юришганини илғаб қолдиму ақл-ҳушим ўзимда бўлмаса-да, уларга ёрдам беришга шошилдим; ишга қўл урган чоғимда бирдан миям тиниқлашди. Бизнинг вазифамиз хийла мушкул эди, чунки қайиқлар палубанинг ўрта қисм саҳнига маҳкамланганди ва ҳар хил лаш-лушлар билан боғлаб ташланганди; палубани эса оғатли пўртаналар тинимсиз чайқалти-рардию ишимизни ташлаб тез-тез арқонларга ёпишиб олардик, лекин имкон туғилган заҳоти ўлиб-тирилиб ғимирлай бошлар эдик.

Айни замонда кема тумшуғидаги туйнук қопқоғидан палубага чиқиб олган ярадорлар ҳам қўлларидан келганча кўмаклашмоққа киришдилар: қаравотларда бемажол ётган ярадорлар бўлса: «Бизни қутқаринглар!» дейишиб ялиниб-ёлворардилару бундан кўнглим бузиларди.

Дарға бир четда серрайиб турарди. Назаримда, ақлдан озиб қолганга ўхшарди. У мачталар боғланган йўғон арқонни ушлаб олган эди, ўзи билан гаплашарди, тўлқинлар кемани қояга элтиб урган пайтларда ҳар гал инграб юборарди. «Васият» унинг учун умр йўлдоши ҳам фарзанд эди: Хозисон баҳтиқаро Рансомга ҳар куни азоб беришаётганини кўриб турса-да, пинак бузмасди, лекин кема бошига кулфат тушган пайтда, кўриниб турардики, дарға суюмли фарзандининг азоб-уқубатларига тенг шерик бўлаётган эди.

Эсимда, биз қайиқлар билан овора бўлиб турган пайтимиз қирғоққа нигоҳ ташладиму Аландан бу ўлка ҳақида сўрадим. У, мен учун бундан ҳам баттарроқ жой бўлиши даргумон, чунки бу ерлар Кемпбелларга қарашли, деб жавоб берди.

Ярадорлардан бирига тўлқинларга кўз-қулоқ бўлиб туриш ва агар бирор кор-ҳол рўй бериб қолса, зудлик билан хабар бериш вазифаси топширилди. Ниҳоят, биз қайиқни сувга туширишга ҳозирлик кўраётган чоғимизда бирдан унинг ваҳимали чинқириғи эшитилиб қолди: «Худо ҳаққи, эҳтиёт бўлинглар!» Билдикки, мана ҳозир қандайдир даҳшатли ҳодиса рўй беради ва охири ўлаганим бўлди: баҳайбат пўртана бостириб келди-да, кемани пат мисоли кўтариб туриб отиб юборди. Ҳайронман, огоҳлантириш садосини кечроқ эшитиб қолган эканманми ёки арқонни маҳкамроқ ушламаганим учун-

ми, ишқилиб, кема түйқус қийшайған маҳалда борт түсіғидан учиб кетдіму денгизга қулладим. Худди тошга үхшаб сув остига чұка бошладим: боз устига, анчамунча сув ҳам ютиб юбордим, кейин сув сатқига чиқдим ва ойга күзим түшдию яна бошим билан сувга ботиб кетдім. Айтишларича, учинчи марта ҳам сувга чўкиб кетсанг борми, кейин умуман ёруғ дунёни кўрмайсан. Агар ўша гап рост бўлса, демак мен бошқаларга үхшамас эканман: чунки камина неча марта чўкиб, неча марта сув сатқига юзиб чиққанимни ҳам билмайман — саноқда янгилишиб кетдім. Бу вақт мобайнида ниҳоятда силлам қуриди, урилиб-сурилдим, нафасим бўғилди ва охири денгиз тубига ғарқ бўла бошладим; шу қадар эсанкираб қолибманки, ҳатто қўрқув нима эканини ҳам унүтиб юборибман!

Бир замон қарасам, қандайдир ёғоч бўлагига ёпишяпману сув сатқида туришим хийла енгиллашиб қолди. Кейин тўсатдан осойишта сувда пайдо бўлдим. Маълум бўлишича, запас лангарга ёпишиб турган эканман: мундоқ қарасам, кемадан ниҳоятда йироқлашиб кетибман. Ажабландим. Албатта, дарҳол бақира бошладим, аммо товушимни бирор эшитиши амримаҳол эди. «Васият» ҳамон сув юзасида турарди: қайиқни сувга туширган-туширмаганларини билолмадим: масофа узоқ эди, мен пастда эдим — кема устидаги важларни илғаб бўлмасди.

Кемадагиларни ёрдамга чақираётган пайтимда ўзим билан кема орасида улкан пўртанаалар етиб келмайдиган йўлак борлигини илғаб олдим: ойдинда бу ерда оппоқ кўпик кўпирисиб, атрофга пуфакчалар сачраётгани ҳам яққол кўриниб турарди. Гоҳ сокин йўлак худди илоннинг думи сингари бир томонга буралар, гоҳида ҳеч қандай из қолдирмай тўғриланардию бирдан кўпирисиб кетарди. Бу не сеҳр эканлигига сира ақлим бовар қилмасди ва бутун вужудимни беихтиёр қўрқув чулғаб оларди. Ҳозир аниқ биламанки, у қирғоқ бўйидаги кучли оқим, «туйилган тўлқин» эди: у мени оқизиб кетарди, аёвсиз равишда ҳар томонга отиб юборарди ва ниҳоят, ўз эрмагидан зерикди шекилли, каминани ҳам запас лангар билан биргаликда қирғоққа итқитиб ташлади.

Бу ердағир этган шабада йўқ бўлса-да, совуқда қотиб қолиш ҳеч гап эмасди. Иррэйд соҳили қўл узатса етадиган жойда эди, ой ёруғида арчагуллар қорайиб кўринарди, қояларда эса ёнувчи тоғ жинслари чараклаб нур таратарди.

«Нима бўпти?— дедим ўзимча.— Озгина қолди-ку, наҳотки юзиб боролмасам?»

Юзишни яхши билмасдим: Эссең-Уотер дарёси биз томонларга келган пайтда чумчукнинг тўпифини ҳам кўмомлассади. Лекин лангарни икки қўллаб ушлаганимча сёёкларим билан сувни тепкилай бошлаган чоғимда олға силжиётганимни сезиб қолдим. Бу ниҳоятда мушкул машғулот бўлиб, имиллаб олдинга қараб кетардим: шунга қарамай, бир соатча шалоп-шулуп қилганимдан сўнг икки бурун оралиғидаги хийла масофани ортда қолдирдим ва тепаликлар қуршовидаги қумлоқ кўр-фазга кириб бордим. Кўрфаз жимжит эди, тўлқин шо-вулламасди; оппоқ ойдин кеча, умримда бунчалик ҳувиллаган, кимсасиз овлоқ жойни учратмаган эдим. Шунга қарамай, бу қуруқлик эди. Ниҳоят, соҳилга яқин масофа қолгач, лангарни қучоғимдан бўшатиб юбордим ва қулочкашлаб юзиб кетдим: қўрғоққа етган чоғимда вўжудимни кўпроқ чарчоқ олган эдими ёки мамнуниятми — буни аниқ айтольмайман. Ҳарҳолда, иккаласи ҳам шу тобда «меҳмоним» эди: шу кечага қадар дунёда бунақа чарчоқ ҳам бор эканини билмасдим, айни чоқда яратган эгамдан бениҳоя мамнун эдим ва ундан мамнун бўлишимга етарли асосим ҳам бор эди.

## Ўн тўртинчи боб

### МЎҶАЗ ОРОЛ

Шундай қилиб, қўрғоққа қадам қўйдим ва ўз саргузаштларимнинг энг аянчли саҳифасини очдим. Ярим кеча эди. Тоғлар соҳилни шамолдан тўсиб турган бўлса-да, аммо совуқ кишини қақшатиб юборарди. Ерга ўтиришга юрагим бетламади, музлаб қолишдан чўчидим: бунинг ўрнига оёқ кийимимни ечдим-да, ўлар ҳолатда ҳориб-толганимга қарамасдан, қумлоқда сарпойчан уёқдан-буёққа юра бошладим: сал-пал баданим қизирмикан деган умидда кўкракларимга шап-шап уриб қўярдим. Яқин атрофдан на одам боласининг айнан тонг отаётган бўлса ҳам бирорта хўроз қичқирмади: узоқ-узоқларда тўлқинлар ҳамон қояларга зарб билан урилар эдию яна бошимдан кечирган хавф-хатарлар эсимга тушарди: денгиз соҳилида бемахал ке-

заётганим, бу жойлар инсон оёғи етмаган овлоқ эканини ўиласам юрагим орқасига тортиб кетарди.

Тоғлар орти бўзараётган паллада бошмоғимни кийдиму баландликка ўрлай бошладим: умримда бу қадар мешаққатли ғовни сира ҳам енгиг үтмаган эдим: баъзан ортимга чекинардим-да, улкан гранит палахсалар орасидан ўтиб кетардим ёки биридан наригисига сакрар эдим. Чўққига омон-эсон етиб борган пайтимда расмана тонг отди. Кеманинг изи ҳам кўринмасди, ҳойнаҳой, у қоя устидан сирғалиб тушиб, фарқ бўлиб кетган бўлса керак. Теварак-атрофда қайиқ ҳам йўқ эди. Денгизда кўзим етган сарҳадларда на елкан, на қуруқлик ва на бирорта тирик жону бошпана бор.

**Ҳамроҳларим** бошига тушган кулфат ҳақида ўйлашнинг ўзи даҳшатли эди, бўм-бўш бўшлиққа термилиб тўриш янада даҳшатли түюларди. Қолаверса, ўзимнинг ғам-ташвишим ўзимга етиб ортарди: кийимларим жиққа ҳўл, ўлардек чарчаганман, қорним очганди, ичакларим сурнай чаларди. Жанубий соҳил бўйлаб шарқ томон йўл олдим: бирорта бошпанага дуч келишдан, уйга кириб исиниб олмоқдан умидвор эдим. Эҳтимол, бахтсиз ҳодиса туфайли айрилган саффдошларим тўғрисида қандайдир хабар топарман. Ҳеч бўлмаса, тез орада қуёш чиқади, кийимларимни қуритиб оламан-ку, деб ўйлардим.

Бир оздан сўнг кичик қўлтиқчага дуч келдим, у торгина кўрфазга ҳам ўхшарди: қуруқликдан ниҳоятда чукур кўринарди, ундан ўтиш учун тагимда қайиғим бўлмагани туфайли ортга қайтиб, ҳавзани айланиб ўтишдан ўзга чорам қолмади. Ҳамон олға силжиш мешаққатли эди: аслини олганда, нафақат Иррейд, балки унга туташиб кетган Малл ороли бўлаги — Росс деб аталувчи орол ҳам бутунлай улкан гранит қояларидан иборат эди: қоялар оралиғида эса арчагуллар гуж-гуж бўлиб ўсиб ётарди. Ўйлаганимдек, дастлаб қўлтиқча торайиб борди, лекин бирмунча вақтдан кейин, ажабки, яна кенгая бошлади. Ташибланиб, энсамни қашлаб қўйдим. Нега бундай бўлаётганига асло ақлим етмасди. Ниҳоят йўлим тагин баландликка кўтарила бошладио бирдан кўзим ярқ этиб очилди: камина тентираб юрган ер мўъжазгина ташландиқ орол бўлиб, ҳар томонидан денгизнинг шўр суви қуршаб олган эди.

Кўпдан бўён қуёш чиқишини кутаётган бўлсам-да, лекин ҳадемай қалин туман тушди ва шивалаб ёмғир ёға бошлади: хуллас, аҳволимга маймунлар йиғларди,

Сингир остида қалт-қалт титраб туравердим, нима қилишимни билмасдим. Охири қўлтиқни кечиб ўтсам-чи, деган фикрга келдим. Яна судралиб изимга қайтдим ва қўлтиқнинг тор жойидан сувга тушдим. Бироқ қирғоқдан уч қадамча узоқлашган пайтимда бирдан ўмбалоқ ошиб кетдим: агар бир йўла нариги дунёга равона бўлмаган эсам, бу менинг оқиллигимдан нишона эмас, балки оллоҳнинг иноятидир. Яна баттарроқ шалаббо бўлдим десам, кулгили бўларди. Чунки уст-бошим шундоқ ҳам жиққа ҳўл эди: сувга йиқилиб тушганимдан кейин совуқ суяқ-суягимдан ўтиб кетди, умидим пучга чиқди, кайфиятим тушди. Шундан кейин бирдан ёғочни эслаб қолдим: унга осилиб балои қазодан қутулган эдим. Шундоқ бўлгач, торгина қўлтиқчадан ҳам бемалол юзиб ўтсам керак, ахир. Шу мақсадда оролчанинг қоқ ўртасидан тепалик сари дадил йўл олдим: ўша ёғочни топиб, буёқقا келтирмоқчи бўлдим. Йўл олис, машиқатли эди: агар умидим менга мададкор бўлмаганда борми, ҳолдан тойиб йиқилиб қолардим ва бемаъни саъй-ҳаракатлардан дарҳол воз кечардим. Денгизнинг шўр сувини ичганим учунми ёки иситмам кўтарилаётганиданми чанқоқ юрак-бағримни ўртаб юбордию йўл-йўлакай ботқоқлик ёқасида тўхтадим-да, лойқа сувдан ичиб олдим.

Ниҳоят, оёқларимни аранг судраб ўзим тарқ этган кўрфазга етиб бордим ва бир қараашдаёқ сездимки, лангар анча нарига оқиб кетибди. Учинчи марта сувга тушдим... Сув ости сип-силлик қумлоқ текислик эди, ичкарига қараб қиялаб бораради: бўйнимга қадар сувга ботгунимча, майин тўлқинлар юзимга урилгунча олға юрдим. Оёғим сув тубига етмай қолгунча юриб бордиму тўхтадим, яна ичкарироқ боришга юрагим дов бермади. Лангар-ёғоч эса мендан йигирма қадамча нарида, сув юзасида тебраниб турарди. Оёқларим ердан узилгунча сабот-матонат вужудимни тарқ этмаган эди, лекин охирги зарбага дош беролмадим — изимга қайтдим-да, қумлоқ соҳилга ўзимни ташлаб, ҳўнграб юбордим.

Оролда ўтказган вақтимни эсласам, ҳозир ҳам юрак-бағрим эзилиб кетади: шунинг учун воқеалар тафсилотига батафсил тўхталиб ўтирмайман. Олди-қочди китобларни ўқисангиз, кема ҳалокатига учраган одамларнинг чўнтаклари зарурий асбоб-анжомларга лиқ тўла бўлади. ёки денгиз тўлқинлари ҳаёт учун биринчи навбатда керак бўладиган важлар солинган сандиқни «буюртма бўйича» қирғоқка чиқариб ташлайди. Лекин камина

ғойибдан келадиган хайр-эҳсондан баҳраманд бўлмадим — пешонамга ёзилгани бошқа экан-да. Чўнтағимда озгина пўл билан Алан ҳадя этган кумуш тугма бор эди, холос. Қолаверса, денгизчи маҳоратидан ҳам бенасиб эдим, чунки болалигим дengiz соҳилида кечмаганди.

Тўғри, бир пайтлар дengiz моллюскаларини тановул қилса бўлади, деб эшигандим: оролдаги сув ости қояларида мўл-кўл «озуқалар»ни қўлга киритдим, лекин тажрибасизлигим туфайли егулик қисмини ажратиб ололмай роса овора бўлдим. Билмасдимки, бу борада уддабуронлик талаб қилинарди. Оролда кичкина шиллиққуртлар яшар экан: Шотландияда уларни «тасқара» деб аташарди; инглизлар эса, менимча, «минорча» дейишади. Емишим ана шунаقا «озиқ-овқатлар» у «тасқаралар»дан иборат эди, уларни тириклиайн, муздай ҳолатда ютиб юборардим: ниҳоятда очлигим туфайли бундай «таомлар» дастлабки пайтлари мазали туюларди.

Эҳтимол, ҳозир уларни овлайдиган мавсум эмасди, балки камина қўноқ бўлган оролнинг сувида бирор-бир чатоқлик бор эди, чамамда. Ишқилиб, нима бўлганда ҳам, «тасқара»нинг дастлабки қисмини пок-покиза тушириб улгурмасимдан кўнглим айний бошлади: ичакчавогим оғзимдан отилиб чиқиб кетай дерди. Шундан сўнг анча пайтгача қимирламай ётиб қолдим: на ўлиқ эканим, на тириклигим маълум эди. Ўша озуқани иккинчи марта (бошқа егулик йўқ эди-да) синовдан ўтказиш хийла муваффақиятли кечди ва дармонга кириб қолдим. Умуман, оролда яшаган пайтимда овқатланганимдан кейин нима бўлишини барибир билолмасдим: бир гал ҳеч нарса бўлмасди, бошқа сафар эса ҳаммаси чаппасига кетарди, лекин қайси моллюска мижозимга ёқаётганини аниқлаб олишга сира ҳам ўрганолмадим.

Кун бўйи ҳудди пақирлаб қуяётгандай шариллаб ёмғир ёғди, орол увада мисоли сувга бўкиб қолди: куруқ жойни излаб топиш амримаҳол эди: кечаси бир-бирига тегиб турган иккита тош остида ухладим, сёқларим эса ботқоққа ботиб, ивиб кетган эди.

Эртаси куни оролни узунасига ҳам, кўндалангига ҳам кезиб чиқдим. Лекин бирор жойда, жилла қурса, ташландиқ бошпанага дуч келмадим: чор атроф қипқизил тошлоқ эди, ҳаёт нишонаси йўқ, фақат мен овлай олмайдиган ёввойи паррандалару олисдаги қояларга ин қўйган балиқчи қушлар чарх уриб юрарди, холос. Шунга қарамай, кўрфазнинг шимолий қисмida, аниқроғи,

Ирреидни Росс оролидан ажратиб турган бўғоздан кўрфазга ўтиладиган жойда (айни чоқда шу ердан Айон бўғозига ўтиларди) яшашга муносиброқ бошпана топдим: аслида, бундай яйдоқликни «бошпана» деб аташнинг ўзиёқ кишига алам қиласди. Албатта, бу жойни бекорга танламаган эдим. Оролнинг шу қисмида кичкинагина кулба бор эди, каталакка ўхшарди: назаримда, оролга ташриф буюрган балиқчилар шу ерда тунаб қолишарди: илма-тешик томи аллақачон қулаб тушган эди, шунинг учун кулбанинг фойдаси тегмасди ҳисоб — ундан кўра, харсанг тош остида ётганим тузук эди. Аммо бошқа томондан қулайлиги бор эди: чиғаноқлар бу ерда тўлиб-тошиб ётарди, тўлқин орқага қайтиши биланоқ ярим кунга етадиган озиқ-овқат «маҳсулотлари»ни тўплаб олардим. Ўз-ўзидан равшанки, бу ҳол айни муддао эди. Лекин ҳақиқий сабаб жиiddийроқ: оролда якка-ёлғиз эканимдан изтироб чекардим, бунга сира кўниколмасдим ва қочоққа ўхшаб чор тарафга термилавериб сира чарчамасдим: одамзод қорасини кўришдан умидвор эдим, ҳам кўрқардим. Хуллас, кўрфаз томондаги қоя устига чиқилса, олислардан улуғвор кўхна ибодатхона ҳамда Айонидаги иморатларнинг томлари кўзга чалинарди. Нариги қанотда, Росс пасттекисликларида эса жарлиқдаги қандайдир<sup>\*</sup> қўргондан эрталаб ва оқшом чоғлари кўкка тутун ўрларди. Аъзойи баданим музлаб, бошдан-оёқ ҳўл бўлиб, ёлғизлиқдан гангид қолган кезларим олисдаги тутундан кўз узмасдим: лов-лов гулхан ёнаётган ўчақ атрофида дўстона сухбат қуриб ўтиришган одамларни эсласам, беихтиёр юрагим ҳаприқиб кетарди. Айондаги иморатлар томига орзиқиб термилардим. Инсон зоти истиқомат қилаётган бошпаналар кўриниши, ҳузур-ҳаловат нишонаси ўзимнинг бошимга тушган кулфатни янада теранроқ англаш етишимга ундаса-да, лекин кўнглимдаги умид учқунларини аланга олишига ҳам ёрдам берарди: шиллиққуртларни иштаҳа билан ютардим-у, тезда меъдамга уради: ўлик қоялару ёввойи қушлар, ёмғири муздай денгиз қўршовида ғам-ғуссага ботсам-да, ҳаётдан умидимни узмасдим.

«Умидимни узмасдим», дедим. Дарҳақиқат, ўз ватаним соҳилида, оддий кўзга ҳам ибодатхона қўнғироқлари ва инсон яшаётган уйдан тараалаётган тутун кўриниб турган жойда итдай ўлиб кетишимни сира тасаввур этолмасдим. Иккинчи сутка ўтиб бораарди: коронки тушганча яна-тағин сергаклик билан атрофга назар

ташладим, лекин бўғозда на бирорта қайиқ, Росс оролида на бирорта йўловчи кўринди — менга ёрдам берадиган жонзот йўқ эди. Ҳамон ёмғир ёғарди. Сувга тушган сичқондай жиққа ҳўл аҳволда ўринга чўзилдим: томоғим оғрий бошлади, бироқ яқин қўшниларимга — Айон ороли аҳолисига «хайрли кеч!» тилаш имкониятига эга бўлганимдан мамнун эдим, шу нарса менга таскин берарди.

Ажойиб кунларнинг бирида иккинчи Карл, дунёнинг бошқа жойларидан кўра Англия шароитида йилнинг кўпроқ қисмини очиқ ҳавода ўтказиш мумкин, деган эди. Агар қирол бўлсанг, саройда йўлингга интизор бўлиб туришса ва ҳар дамда эгнингга қуп-қуруқ уст-бош **кийдириса**, мулоҳаза юритишнинг ҳам гашти ўзгача **бўлади**. Кўриниб турибдики, бу лаънати оролда мен тортган азоб-уқубатлар олдида у Вустердан жуфтакни ростлаган пайтдаги кўргилик ҳолва экан! Айни ёз бўлишига қарамай, бир кечаю бир кундуз тинимсиз ёмғир ёғди: фәқат кечга томон ҳаво очилди.

Уша кун таассуротларга бой бўлди. Эрталаб сарғиш тусли, шоҳдор эркак буғуни учратдим: у оролнинг энг баланд жойида, ёмғир остида турарди, аста-секин қўналғамда қаддимни ростлашим билан буғу каминани кўриб қолди шекилли, оролнинг қарама-қарши томонига йўртиб кетди. У бўғоздан юзиб ўтган бўлса керак, деб ўйладим. Тирик жонзот нима учун Иррейдга келганига сира ҳам ақлим бовар қиласди.

Анчадан сўнг, тошдан-тошга сакраб юрган пайтимда (емиш қидиардим) нимадир жаранглаб кетдию чўчиб тушдим: қоя устига танга тушди-да, денгиз томони юмалаб кетди. «Васият» денгизчилари пулларимни қайтариб беришган чоқда учдан бир қисмини ва отамдан мерос бўлиб қолган ҳамёнимни ҳам олиб қолишган эди: уша кундан бери тилла тангларимни чўнтағимга солиб, тугмамни қадаб юрадим. Маълум бўлишича, чўнтағим йиртилиб кетибди: шоша-лиша чўнтағимга ёпишдим. Лекин кечиккан эдим! Куинсферри кечувини тарқ этаётганимда мен эллик фунт пули бор бойвачча эдим, ҳозир эса ёнимда бор-йўғи иккита тилла тангаю кумуш шиллинг қолган эди, холос.

Шундан сўнг янада маъюс бўлиб қолдим, аҳволим чатоқ эди. Уст-бошим, айниқса, пайпоқларим илма-тешик бўлиб кетган, баданим кўриниб турарди: муттасил намгарчиликда юриб қўлларим шалвираб қолди, томоғим сирқираб оғир, мадорим борган сари қуриб

борарди. Мен тановул қилишга мажбур бўлганим жирканч наесалар меъдамга шу даражада урдики, уларга кўзим тушиши биланоқ кўнглим айний бошларди.

Бироқ энг ёмон кўргулик ҳали олдинда эди.

Иррейд оролининг шимолий-ғарб томонида хийла баланд қоя бор, ўшанинг устига тез-тез чиқиб туардим: чунки унинг тепасида теп-текис майдонча бўлиб, у ердан Саунд-оф-Мали кафтдагидай яққол кўринарди. Очигини айтсам, мен бир жойда узоқ ушланиб қолмасдим, фақат тунардиму яна орол бўйлаб тентирай бошлардим: ҳеч қаерда қўним топмасдим: ёмғирда бекордан-бекорга дайдиб юраверганим туфайли ўлар ҳолатга етардим. Хуллас, қуёш кўриниши биланоқ исиниб олиш учун ўша қоя устига чўзилдим. Қуёш тафтининг бунчалик қадрдан эканини сўз билан таърифлаб бўлмаса керак! Жонимдан тўйиб турган пайтимда дилимда халос бўлишинга умид уйғонди ва яна денгиз билан Россияни қизиқиб томоша қила бошладим. Мен ётган қоянинг жануб томонидан оролнинг бир қисми денгизга бўртиб кирган эди: уфқ тараф тўсилиб туарди ва ўша ёқдан кема ёнгинамдан ўтиб қолса уни пайқамаслигим ҳеч гап эмасди.

Туйқус, ғойибдан тушгандек, оролнинг айнан ўша бурчагидан елкани таранг балиқчи қайиқ (унда иккита балиқчи бор эди) отилиб чиқдию зудлик билан Айон томон йўл олди. Мен кучимнинг борича қичқирдим ва тиз чўкканимча қўлларимни чўзиб, илтижо қилдим. Улар бундай яқин масофадан товушимни эшитмасликлари мумкин эмасди: ҳатто уларнинг соchlари қанақа рангда эканини ҳам аниқ ажратса олдим: шубҳасиз, мени кўришди, шунинг учун кулги аралаш, геллар тилида бир нималар деб бақиришди. Аммо ясси қайиқ йўналишини бир қарич ҳам ўзгартирмади ва шувиллаганча ёнимдан Айон томонга ўтиб кетди.

Ўз кўзларимга, одамларнинг бунчалар бағритошлигига ишонмасдим. Тошдан-тошга сакраб, қирғоқ бўйлаб югурдим, уларнинг орқасидан ялинчоқ оҳангда чинқиравердим: ҳатто товушимни эшитмайдиган масофага узоқлашган пайтда ҳам қўлларимни силкитиб ёрдамга чақиравердим. Қайиқ кўзга кўринмай кетгандан кейин мана энди, юрагим торс ёрилиб кетса керак, деб ўйладим. Сарсон-саргардон юрган кезларим фақат икки марта кўзёшларимни тия олмаганман холос. Биринчи марта — лангар-ёғочни бой берган пайтимда, иккинчи марта — мана ҳозир, балиқчилар мени зор-зор қақшатиб кетган

дамларда беихтиёр ҳўнграб юбордим. Бу сафар шунчаки кўзёш тўқмадим, балки саннаб-саннаб, сўкиниб йиглардим: худди инжиқ болаларга ўхшаб тирноқларим билан ерни юмдалардим, юзимни майсаларга буркаб олган эдим. Агар қотилликка майл билдирганимда ўша иккала балиқчи эрталабгача тирик қолмасди. Қолаверса, ўзим ҳам тез орада ана шу оролда жон таслим қилиб қўя қолардим.

Қаҳр-ғазабим сўнгач, қорнимнинг ғамини ейдиган пайт яқинлашиб қолганди, лекин иштаҳам ғиппа бўғилган эди: охири барибир очлик устунлик қилди. Ростини айтсам, оч қолсам яхши бўларди: чунки лаънати моллюскадан яна заҳарландим. Дастребаки галдагидек азобуқубатни тагин бошимдан кечирдим: томоғим лўқ-лўқ ~~ири~~ зўрга ютинардим, баданим увишар, безгакдан ~~ишиларим~~ такилларди: шотланд ти哩да ҳам, инглиз ти哩да ҳам аниқ номи бўлмаган — юракни хун қилиб юборадиган ғам-ғусса, сирқовланиш дарди бутун вужудимни чулғаб олди. Бу дунёдан қўлимни ювиб, қўлтиғимга урдим. Дорилбақога равона бўлишимга ишончим комил эди: ўзимни яратганинг ихтиёрига топшириб, хаёлан ҳамма билан ва ҳар бир киши билан хайр-хўшлашдим, ҳатто амакимдан, аnavи ёвуз ниятли балиқчилардан ҳам рози-ризолик сўрадим, хуллас, адойи тамом бўлдим деб ўйладим. Бироқ сира кутилмаганда кўзларим ярқ этиб очилиб кетди: ойдин кеча эртага чароғон кун бўлишидан дарак берарди, уст-бошим ҳам деярли қуриб қолганди, қисқаси, оролга қадам қўйганимдан бери бунчалик тўқис баҳтга мұяссар бўлмаган эдим. Ана шундай ширин хаёллар оғушида уйқуга кетдим.

Эртаси куни (бемаъни ҳаётим бошлангандан кейинги тўртинчи кун) ниҳоятда bemажол эканимни ҳис этдим. Шукрки, тепамда қуёш нур сочар, ҳаво мусаффо ва топ-тоза эди: кўзларимни чирт юмиб ютиб юборган моллюскалар ҳам менга озор етказмади. Руҳим хийла тетикилашди.

Коя устига қайтиб чиққан пайтим (одатда, овқатланиб бўлишим биланоқ дарҳол тепага кўтарилардим) Саунд бўйлаб битта қайиқ юзиб келаётганини кўриб қолдим. Янглишмасам, у тўппа-тўғри мен томон келарди. Бирдан қалбимни ҳам қўрқув, ҳам қандайдир умид чулғаб олди: эҳтимол, ўша кишилар ўзларининг тошбағирлиги учун афсусланишиб ёрдам бергани келишаётгандир? Аммо худди кечагидек умидим пучга чиқса, бундай кулфатга дош беролмаслигим аниқ эди. Мен денгизга орқамни

ўгирдим-да, ичимда уч юзгача санамагунимча ўша томонга қайрилиб ҳам қарамадим. Қайиқ ҳамон орол томон яқинлашиб келарди. Кейинги гал иложининг борича имиллаб минггача санадим, юрагим эса қинидан чиқиб кетай дерди. Ҳа, ҳеч қандай шубҳага ўрин қолмади! Қайиқ түппа-тӯғри Иррейд сари йўл олган эди! Ўзимни ортиқ тутиб туролмадим: соҳилга югуриб тушдим-да, сувдан чиқиб турган қоялардан-қояларга сакраб, охирги тош-супага бориб турдим. Мўъжиза туфайли сувга қулаб тушмадим, фарқ бўлиб кетишм ҳам ҳеч гап эмасди: тўхтаган чоғимда тиззаларим қалтирас, оғзим қур-иб қолган эди, денгизнинг шўр суви билан оғзимни ча-йиб олишга мажбур бўлдим, акс ҳолда, товушим чиқмасди.

Бу вақтда қайиқ анча яқинлашиб қолган эди: у кечаги қайиқ бўлиб, ичида ўша кишилар ўтиришарди. Уларни соchlаридан танидим: бирининг сочи сарғиш-малла, бошқасиники қатрондек қоп-қора эди. Энди қайиқда учинчи одам ҳам бор эди: афтидан, у муҳтарам зотга ўхшарди.

Мен билан бемалол таплашадиган масофага яқинлашгач, елканни йигиштириб олдилар-да, қайиқни ўз ҳолига қўйдилар. Ялининб-ёлворишимга қарамай, берироқ келишмади. Энг даҳшатлиси шундаки, учинчи одам менга бошдан-оёқ разм солиб, шерикларига бир нималар дедиую қорнини чанглалаб хаҳолай бошлади. Кейин қайиқ устида қаддини ғоз тутиб узундан-узун нутқ сўзлади: сўзларни нўхатдек сочиб ташлади, қўлини appa-appa қилди. Унга, гэллар тилини тушунмайман, дедиму балога қолдим: жаҳли чиқиб кетди. Чамамда, у инглизча гапиряпман деб ўйларди. Сўзларига диққат билан қулоқ солдиму бир неча марта «нама» деганини илғаб олдим. Ҳамма сўзлар гэлча эди: менга қолса, бу тил хитойчадан деярли фарқ қиласди.

— Нима,— деб тақрорладим, ҳеч бўлмаса битта сўзни тушунганимни англатиш мақсадида.

— Ҳа-ҳа,— деб илиб кетди у.— Ҳа-ҳа.— Шерикларига гердайиб назар ташлади, тўё: «Кўрдиларингми, мен инглизча биламан демаганмидим!» деб мақтанмоқчи бўларди. Сўнгра гэллар тилида янада тумтароқ оҳангда бидирлай бошлади.

Кейинги гал ҳам битта сўзни илғаб қоядим: «қайтиш». Шу тобда тўсатдан миямга бир фикр келди. Унинг нима учун боядан бери Ross томонга имо-ишора қилаётганини энди тушуниб ётгандим.

— Сиз, тўлқин қачон қайтади демоқчимисиз? — дедиму яна нафасимни ичимга ютдим.

— Ҳа-ҳа,— деди у.— Тўлқиннинг қайтиши.

Унинг гап-сўзларига қулоқ солмай қўйдим: масла-ҳатга муҳтож зот пиқир-пиқир кула бошлади, сўнг хахо-лаб юборди. Камина эса тошдан-тошга сакраб, боя келган йўлимдан изимга қайтдим: соҳилга чиқиб олга-нимдан сўнг оролни ўрталаб тирақайлаб қочдим — ум-римда бу қадар тез югурмаган бўлсан керак. Тахминан ярим соатлардан сўнг қўлтиқчага етиб бориб қарасам унинг ўрнида кичкинагина ариқча пайдо бўлибди. Мен шимимни тиззамгача қайтариб нариги қирғоққа ўтиб олдим ва Росс ороли бўйлаб ғолибона югуриб кетдим.

Соҳилда яшайдиган бола Иррейд оролида бир кун ҳам қолмайди, чунки у бор-йўғи «сувнинг пасайиши натижасида ҳосил бўладиган дўнглик» эди, бундан таш-қари, ҳар ойнинг жуфт кунларининг биринчи чорагида саир этиш учун Росс оролидан қуруқлик орқали ёки кечувдан ўтиш мумкин. Вассалом. Кўрфазда ўтириб тўлқиннинг келишини ва қайтишини кузатганимда, ҳатто тўлқиннинг қайтишини пойлаб ётган чоғларим (чиғаноқларни йигишириб олиш учун қулай фурсат келишини кутардим-да), ўзим ҳам Иррейд ороли сирини билиб олардим ва озодликка чиқардим. Ағсуски, аччиқ тақ-диримдан нолиб ўтираверибман, калламни ишлатиш ҳақида ўйлаб кўрмабман. Шунинг учун балиқилар дафъатан гап нимада эканини тушунишмади. Янада ҳайратланарли жойи шундаки, улар охир-оқибатда мени аҳмоққа ўхшаб ўзимни-ўзим адаштириб ўтирганимни англаб етишибди ва эринмасдан изларига қайтиб келишибди. Бу оролда деярли юз соат оч-наҳор яшадим, совқотдим. Агар балиқилар бўлмагандан, сўякларим ўша ерда чириб кетиши мумкин эди ва бунга фақат ўзимнинг калтабинлигим сабаб бўларди. Шундоқ ҳам бемаънилии қилганим қимматта тушди: ўтган кунлар мобайнида тортган азобларимни-ку қўя турайдик, ҳозирги ҳолатим ҳам аянчли эди: уст-бошларимга қараб мени гадой-падой деб ўлаш мумкин эди, оёқларимни аранг судрардим, томогим сирқ-сирқ оғрирди.

Дунёда аблажларни ҳам кўрдим, аҳмоқларни ҳам учратдим: бу икки тоифага мансуб кимсалар бижиб ётибди. Ўйлайманки, қачон бўлмасин ҳар қайси одам ўз қилмишига яраша жазосини тортади: ҳарҳолда, аҳмоқлар сал илғарироқ ўз «уулушлари»ни олсалар керак.

«КУМУШ ТУГМАЧАЛИ ЎСМИР»

МАЛЛ ОРОЛИДА

Росс оролида, бошқача қилиб айтганда, Малл оролинг ўзим қадам қўйган қисмида ҳам нариги томондагидек йўлсизликка дуч келдим: чор атроф ботқоқлик, бутазору харсанг тошлардан иборат. Эҳтимол, бу жойларни яхши биладиган одам ўзига йўл топар-у, лекин менинг билиш қобилиятимдан бошқа йўл бошловчим ҳам, Бен-Мор чўққиларидан бошқа ишорат қозигим ҳам йўқ эди.

Оролда турган чоғимда тез-тез орзиқиб термилиб қўядиган тутун буруқсиётган томон боришга ҳаракат қилдим ва нечоғли ҳориб-толганимга, йўлсизлик азоблағрига қарамай, кечки соат олтиларда жарлик тубидаги уйни топиб бордим. Уй пасқамгина бўлса-да, аммо узун эди: деворлари тошдан тикланган томига чим босилганди: ташқарида, офтобшувоқда битта мўйсафида тамаки чекиб ўтиради.

У инглиз тилини бузиб гапиради: тушунтиришича, ҳалокатга учраган йўлдошларим омон-эсон соҳилга чиқиб олишибди-да, мана шу бошпанада бир кун меҳмон бўлишибди.

— Улар орасида башанг кийинган битта жаноб ҳам бормиди? — деб сўрадим.

Мўйсафида, уларнинг ҳаммаси дағал плаш кийган эди, лекин биринчи бўлиб келган киши хийла ораста кўринарди, найчасимон шими бор эди, бошқалар эса денгизчилар иштонида эдилар, деб жавоб берди.

— Ҳа, ҳа, албатта, шляпасига пат қадалган бўлса керак-а? — дедим.

— Йўғ-э,— деб эътироуз билдириди мўйсафида,— йўловчи худди сен каби ялангбош эди.

Дастлаб, Алан шляпасини йўқотиб қўйганмикан, деб йўладим: кейин ёғингарчилик эсимга тушдию у қимматли бош кийимини авайлаб, қўлтиғига тиқиб олган бўлиши ҳам мумкин деган қарорга келдим. Беихтиёр кулгим қистади: демак, дўстим соғ-саломат экан, демак у ҳамон ўзига бино қўйишини канда қилмабди.

Шу пайт суҳбатдошим кутилмаганда пешонасига шапатилади-да, э-э, жин урсин, сен анави, ҳалиги кумуш тугмачали ўсмир бўлсанг керак-а, деб сўради.

— Ҳа, нимайди? — дедим пинак бузмай.

— Ҳеч нима,— деди мўйсафид.— Ундей бўлса, зудик билан Торос орқали дўстингга етиб олишинг тозим.

У бошимга не кунлар тушганини сўраб-суриштириди, мен эсам кўрган-кечирганларимни ҳикоя қилиб бердим. Жанубий Шотландияда рўй берган бундай ҳодиса ҳар ҳандай одамнинг кулгисини қистатарди, албатта. Аммо кекса жентельмен (у бағоят одобли бўлгани ва оҳори гўкилган уст-бош кийиб олгани учун шундай деяпман) сўзларимни охиригача қунт билан эшилди, гоҳ-гоҳ бош чайқаб, ҳамдардлик билдириб турди. Гапимни тугатгани сўнг, қўлтиғимдан олди-да, ўзининг фақирона (бу бошпанани «фақирона кулба» деб атаким кетмасди) бошлаб кирди ва мени худди мисоли улуғлаб кампирига таништириди — гўё камаршо қиролича эдилар.

Меҳрибон бувигинам олдимга зоғора нон билан муздай каклик гўшти қўйдию елкаларимни силаб-сийпалаб, атрофимда парвона бўла бошлади, ул зоти мукаррара инглиз тилини мутлақо билмасди: кекса жентельмен ҳам кампиридан қолишмасликка ҳаракат қиласди, у майга шарбат қўшиди-да, ширингина ичимлик тайёрлаб берди. Мен бўлсан, овқатимни пок-покиза тушираётib қам, унинг орқасидан пунш ичаётib ҳам иқболим бунчалар баланд эканига асло ишонмасдим: тезак тутунидан қорайиб кетган, панжарадек илма-тешик бу вайрона кўзимга қасрдек кўринарди.

Пуншни ичиб олганимдан кейин аъзойи баданимдан фар-фар тер чиқиб кетди ва ширин-ширин эснай бошладим: дилкаш уй эгалари мени ўринга ётқизишдию сўнгра безовта қилишмади: эртаси куни йўлга отланашётган пайтим чошгоҳ бўлиб қолган эди, томоғим салпал оғрирди, холос. Тўйиб овқатланганимдан, хушхабар эшиганимдан кейин ғам-ғуссалар ҳам вужудимни тарқ этган, кўнглим равshan тортган эди. Худонинг зорини қилсам-да, кекса жентельмен пул олишни асло истамади, боз устига, бошимни иссиқ-совуқдан асрашим учун эски шапкасини қўйнимга солиб қўйди: ростини айтсам, қўналғадан хийла узоқлашган заҳотим йўл четидаги булоқчада совғани обдон ювиб олдим. Ичимда эса: «Агар тоғликларнинг ҳаммаси шунаقا меҳр-оқибатли бўлишса, юртдошларим ҳам оз-моз ёввойилашсалар зиён қилмасди», деб ўйлардим.

Алҳол, кечикиб йўлга тушганим етмагандек, адашиб

ҳам қолдим, янглишмасам, вақтимнинг тенг ярми зое кетди. Тұғри, күпгина одамларни учратдым: баъзилар ўзларининг бир тутамгина, ҳатто жүжіларини боқишига ҳам етмайдиган лаҳтак ерида үймаланишарди: бошқалар эса пак-пакана, жайдари сигиру әшакларини яйловларда үтлатиб юришарди. Құзғолон күтариған йилдан бери тоғлайларга чопон кийиб юриш қонун бүйича тақиқланған эди: тубжой ақолиси еттиёт бегона халқ кийим-кечакларини кийиб юришга маңкум этилганди: ҳозир үларнинг ола-қуорқ ташқи күрениши кишида ғалати таассурот қолдиради. Баъзи бирорлар елкасига плаш ёки рүдапо чакмон ташлаб олиб, яланғоч юради, иштонларини эса бүйінтурүқ мисоли елкаларида күтариб юришарди: бошқалар қуорқ матолардан кампирларнинг құрама тұшакларига үхшаш шотландча рүмөл тикиб олишганди: ҳанузгача тоғлайларга хос юбкаларни ечмаған кишилар ҳам учради. Фақат юбканинг ўртасига икки-үч жойидан бурма солишган ва худди голландларнинг шалворига үхшатиб олишган эди. Бундай ҳийла-найранглар учун танбеқ бериларди, жазоланарди: қон-қардошлик, уруғчиллик үдүмларини барбөд этиш маңсадыда қонун кучайтирилған бўлса-да, лекин овлоқ оролда кишиларни жазолайдиган ишқивозлар кам тошлиларди, чақимчи муттаҳамлар эса ягонда бир учради, холос.

Кўрганларим бўйича хулоса чиқарадиган бўлсам, бу жойларда одамлар даҳшатли даражада қашшоқ турмуш кечиришарди; қароқчиларнинг хуружларига барҳам берилмаган эди, йўлбошчилар яшириниб юришарди: олис қишлоқлардаги эгри-бугри йўл ёқаларида тиланчилар ғиж-ғиж эди. Айни чоқда бу жойлар билан бизнинг юртимиз ўртасида қиёслаб бўлмайдиган тафовут бор экан: бизда тиланчилар (ҳукумат томонидан ҳат-ҳужжат бериб қўйилган бўлса-да) ниҳоятда хушмумалла, итоатгўй: агар унга кумуш танга ҳадя этсанг борми, албатта мис танга қайтим беради. Тоғлик тиланчи бўлса, ўз ғурурини ўртага қўйиб тамагирлил қиласди; хайр-эхсон сўрайди — тамакингни бир ҳидлаб кўрайин, дейди-ю, аммо қайтариб бермайди.

Албатта, майда-чуйда тафсилотларга тўхталиб ўтириш каминанинг вазифасига жирмайди, лекин йўлда шуларга алаҳсиб қолдим-да. Бу ерларда камдан-кам кишиларгина инглиз тилини тушунишлари мени ҳайрон қолдиради: биладиган кимсалар ҳам (тиланчи оғайниларимиз бундан мустасно, албатта) ёрдам беришни унчалик хуш-

лашмасди. Манзилим Торос эканини билардим, қўлим билан ишора қилиб: «Уёқдами?» деб сўрардим. Улар йўл кўрсатиб қўйиш ўрнига, бир-бирлари билан гэллар тилида мингир-мингир қилишардию нима балоларни узоқ мұҳокама этишарди, мен эсам қулоқларимни динг қилиб тураверардим. Шунинг учун аслида тўғри йўналиш бўйича юраётган бўлсан ҳам, лекин тез-тез адашиб кетганим унчалик ажабланарли эмас.

Ниҳоят, кечки соат саккизларда (чарчаганимдан зўрға обёнда турардим) битта ёлғиз уйга дуч келдим: хонадон соҳибидан бошлана сўрадим, лекин рад жавоби олдим. Уз вақтида пулнинг қудрати (айниқса, мана шундай **қашшоқ** ўлкаларда) эсимга тушиб қолдию тилла тангабирини хонадон соҳибига кўрсатдим. У шу **хонадон-ишоралар** билан мени остоидан ҳайдётган **инглиз** тилини тушунмаётган қилиб кўрсанган **бўлса-да**, бирдан тили чиқиб қолди: бузилган **талафғузда**, беш шиллинг эвазига бир кеча тунаб **қолишига** ва эртаси куни Торосгача кузатиб қўйишга рози **эканини** билдириди.

Уша кечаси хавотирланиб ухладим, тўнаб кетишларидан қўрқардим, аммо бекорга ташвиш чеккан эканиман: уй эгаси ўғри эмасди, фақат ибодатхонадаги сичқонлар каби оч эди, холос. Албатта, муттаҳамликда шайтонга ҳам сабоқ берарди. Бу ерда ҳамма қашшоқ ҳаёт кечиради: эрталаб биз тилла тангани майдалаш учун беш чақирим жойга — маҳаллий бойнинг уйига (мезбоннинг ибораси) яёв бордик. Эҳтимол, Маллда бундай кишиларни «бой» деб аташар, лекин бизнинг жанубда истиҳола қилишарди: чўнки йигирмата кумуш танға бериш учун у бор бисестини, уйини ағдар-тўнтар қилиб ташлади: боз устига, қўшнисидан товон ундириб олди. Йигирма биринчи шиллингни бой ўзига олиб қолди ва бўнчалик йирик «ўлик мол»ни — битта тилла тангани асраб ўтиришга қурбим етмайди, деди. Айни замонда у бағоят хушчақчақ, назокатли эди: бизни оила аъзолари қаторида тушлик қилишга таклиф этди ва ажойиб чинни косада пунш тайёрлади: муттаҳам йўлбошловчимнинг оғзи ичкилика текқач, очилиб кетдию ўрнидан туришни эсидан ҳам чиқариб юборди. Тобора фифоним фалакка чиқарди: мадад сўраб бойваччага илтижо қилдим (унинг исми шарифи Гектор Маклин эди) — у бизнинг олди-бердимизга гувоҳ бўяған — беш шиллинг бераётганимни кўрганди. Бироқ Маклин ҳам аллақачон томогини ҳўллаб олган бўлиб, ўзини ҳурмат қиладиган

жентельмен дастурхонга бир коса пунш қўйилгандан кейин ўрнидан туриб кетса, уят бўлади, деб худонинг зорини қила бошлади: шундай қилиб, якобинчиларнинг қадаҳ сўзларини, гэлча қўшиқларни тинглашга мажбур бўлдим. Ниҳоят, улфатчилик поёнига етгач, бирор каратотга, бошқаси эса пичан ғарамига ўзини таппа-таппа отдию ўйқуга кетди.

Малл ороли бўйлаб дайдиб юрганимнинг тўртинчи куни эрталаб ҳали соат беш бўлмасданоқ ўрнимиздан турдик, аммо кazzоб йўлбошловчи кўзини очар-очмас дарҳол шишага ёпишди: бир эвини қилиб, уни уйдан судраб чиққунимча уч соат вақтим кетди: бундан топган фойдам шу бўлдики, у янги ишқалликни бошлади.

Биз Маклиннинг уйи рўпарасидаги арчагуллар ўсиб ётган кўкаlamзорга тушганимизча ҳамма иш кўнгилдагидек эди: фақат йўлбошловчи тез-тез олазарак бўлиб орқасига қараб қўярди, ундан бунинг сабабини сўрасам, тишларининг оқини кўрсатиб, тиржайиб қўйди. Бироқ уйнинг деразалари кўринмай кетиб тепаликдан ошиб ўтаётанимизда у Торосга бориш учун тўғрига юриш лозимлигини, йўлдан адашмасликнинг энг яхши кафолати — ҳув авави чўққини (қайси чўққи эканини кўрсатди) кўздан қочирмаслик эканини обдон тушунтира бошлади.

— Э-э, ёнимда сиз борсиз-ку, менга нима ғам? — дедим.

Пихини ёрган фирибгар гэллар тилида зудлик билан, инглизча тушунмайман, деди пинагини бузмай.

— Шунақами ҳали, яхши йигит! — дедим.— Сиз инглиз тилини қай даражада тушунишингизни биламан: гоҳ тилингиз чиқиб қолади, гоҳ соқов бўлиб қоласиз. Нима қилсан сизга забон битар экан-а? Айтмайсизми? Балки, яна пул керакдир?

— Яна беш шиллинг берсанг, шахсан ўзим манзилинга элтиб қўяман,— деб жавоб берди у.

Бир оз ўйлаб турдим-да, икки шиллинг таклиф этдим, у ҳарислик билан дарров рози бўлди ва ўзининг иборасига кўра, «баҳт учун» пулни қўлига беришимни талаб қилди. Билардимки, унга нимаики баҳт келтирса, менинг пешонамга шўрва бўлиб тўкиларди.

Икки шиллинг унга икки чақирим йўл босиши учун ҳам етмади: сўқмоқ четига чиқди-да, оёқларидан қўпол бошмоқларини ечди — гўё бамайлихотир дам олишга ҳозирланарди.

Фигонимдан дуд чиқиб кетди.

— Ҳа, ярамас! — дедим.— Яна инглиз тилини унтиб қўйдингми?

— Ҳудди шундай,— деди пинак бузмай.

Шундан кейин тоқатим тоқ бўлиб сурбетнинг қулоқчаккасига тарсаки тортиб юбормоқчи бўлдим, у эса жулдурвоқи чопонининг ички чўнтағидан пичоғини суғуриб олди-да, ўзини орқага ташлаб, ҳудди ёввойи мушукдай энгашганча менга кўзларини олайтириб тикилиб қолди. Ғазабим жўшиб кетганидан ўзимни тутолмай унга ташландим: пичоқ ушлаган қўлини уриб юбориб ўнг қўлим билан тумшуғига туширдим. Мен ёш бўлишимга қарамай, хийла кучли эдим, устига устак, ғазабимни жиловлай олмасдим: у бўлса нимжонгина эди — бир зарбадан кейин тўнтарилиб тушди. Бахтимга, ийқилаётган чоқда пичоғи учиб кетди. Пичоқни ва бошмоғини олдиму унга таъзим бажо келтирдим. Сўнгра ялангоёқ, қуролсиз йўлбошловчимни қолдириб тўғрига кетавердим. Ҳийифимда кулиб борардим, чунки уччиға чиққан муттаҳамдан қутулганимга ишончим комил эди ва бунга етарли асосларим ҳам йўқ эмасди. Биринчидан, у энди сариқ чақа ҳам ундириб ололмаслигини яхши биларди: иккинчидан, ўлкада бундай бошмоқни бир неча тийинга сотиш мумкин эди. Қолаверса, қонун бўйича у ёнида пичоқ (аслини олганда, бу ханжар эди) олиб юришга ҳақсиз эди.

Тахминан ярим соатлардан сўнг йиртиқ-ямоқ кийимили бир кишига етиб олдим: у илдам одимларди-ю, лекин йўлини ҳассаси билан пайпаслаб борарди. Унинг икки кўзи ҳам ожиз эди, қонуншуносликдан сабоқ берар экан. Бир қарашда ундан гумонсирашга ҳеч қандай асос йўқ эди. Бироқ қиёфаси менга шубҳали туюлаверди: ташқи кўриниши яхшиликдан дарак бермас, ўтакетган ҳийлакор, фитначига ўхшарди. Биз ёнма-ён кета бошладик ва мен тез орада чўнтағидан тўппончанинг пўлат дастаси кўриниб турганини пайқаб қолдим. Бундай матоҳни кўтариб юрган киши дастлаб эллик фунт стерлинг жарима тўлашга ҳукм этиларди, сўнгра эса мустамлака ўлкаларга сургун қилинарди. Умуман, қонун-қоидалардан ваъзхонлик қиласидиган домланинг қуролланган ҳолда юриши кишини ажаблантиради.

Бошимга битган кулфат — йўлбошловчим ҳақида гапириб бердим: мен хийла мағрур эдим, шунинг учун ғурурим ақл-идрокимдан устунлик қилди. «Беш шиллинг» дейишим биланоқ ҳамроҳим товушининг борича «оҳ!» уриб юбордию кейинги икки шиллинг борасида

инدامай қўя қолишини мақсадга мувофиқ деб топдим ва йўлдошим менинг юзларим лавлагидай қизариб кетганини кўрмәтганидан ич-ичимдан қувондим.

— Нима, ортиқча ҳақ тўлаб юборибманми? — деб сўрадим тутилиб.

— Бўйласам-чи! — деди у ваҳима аралаш.— Азизим, бир қултум арақ қўйиб берсанг ўзимоқ сени Торосга кузатиб қўяман. Боз устига, каминадек билимдан инсоннинг суҳбатидан баҳра оласан.

Кўр қандай қилиб йўлбошловчи бўлиши мумкин, деб эътиroz билдиридим: бунга жавобан у ҳаҳолаб юборди ва токи қўлимда ҳассам бор экан, қўзларим лочинникидан ҳам ўткирдир, деди.

— Ҳартугул, Малл оролида мен билмайдиган жой йўқ,— деб қўшиб қўйди у.— Бу ердаги ҳар бир тош, ҳар туп арчагул болалигимдан буён ёд бўлиб кетган. Мана, ўзинг қара-чи! — деди ишонч билан чад, ва ўнг томондаги ерни тақиллатар экан.— Ҳув анави пастликда ирмоқ шарқираб оқяпти: ирмоқ тепаликдан бошланади, тепаликнинг энг устида битта харсанг тош осилиб турибди: тепаликнинг пойидан Торосга элтадиган йўл ўтади, шу йўл бўйлаб кўпинча пода ҳайдалади: йўл обдон шиббаланганг սупургигуллар ўртасидаги уватни кўм-кўк майса қоплаган.

У зигирдек ҳам хатога йўл қўймаганини тан олишга мажбур бўлдим: таажжубланганимни яшиrolмадим.

— Ҳа-а, бу нима? — деди.— Қарор эълон қилингандан кейин ўлкада курояроқ кўринмай қолди десам, ишонмайсан. Мен эсам, зўр мерған эдим! Шунақаям зўр эдимки! — деб қичқирди-да, мийигида кулганча қўшимчча қилди: — Айтайлик, мабодо сенда тўплонча топилса ҳозироқ қанақа отишими кўрсатиб қўярдим.

Тўплончам йўқ, дедим ва ундан узоқроқ юра бошлидим. Эҳ, агар у чўнтағида тўплончаси борлиги яққол сезилиб турганини, тўплончасининг дастаси қўёшда ялтираётганини билганда эди! Бахтимга ҳеч нарсанни билмас, ўзича ҳаммаси маҳфий, яширин деб ўйларди. Хуяллас, ғофил банда ёлғон гагиришда давом этарди.

Сўнгра ҳийлакорлик билан мени қаерда түғилгансан, бой-бадавлатмисан, беш шиљлинглик таңгамни майдалаб бермайсанми деб аврай бошлади. Унинг айтишича, шотландча чарм ҳамёнида пўли бор эмиш. Ўзи эса тобора менга яқинлашишга интишар, мен бўлсам, ундан узоклашардим. Бу пайтда биз пода ҳайдаладиган йўлга чиқиб олган эдик: тепаликдан ошиб ўтилса,

Торосга бориларди. Қизиғи шундаки, йўлда кетаётib худди шотландча рақс туштандек тез-тез ўрнимизни алмаштиравердик. Устунлик мен томонда эди, қўзбой-лоқчилик ўйини ёқиб қолди, кайфим чоғ бўлди; бироқ қонуншуноснинг хуноби ошиб кетди, охири гэл тилида бўралиб сўкина бошлади, ҳатто ҳассаси билан оёғимга солмоқчи ҳам бўлди.

Шундан сўнг унга, ҳақиқатан ҳам, чўнтағимда тўп-пончам бор; сизда ҳам қурол бор, албатта. Агар ҳозироқ орқангизга қайтмассангиз, ўйлаб ўтиrmасдан пешонангидан отиб ташлайман, дедим.

У дарҳол мулойим тортиб қолди, кўнглимни овлашга киришди, лекин бекорга овора бўлаётганини сездию яна бир марта гэл тилида бўралаб сўкинди-да, жуфтакни ростлади. Унинг орқасидан қараб турдим: катта-катта қадам ташлаганча ботқоқзору арчагуллар оралаб, ҳассасини тўқиллатиб кетиб бораради: ниҳоят, тепаликдан бурилдию жарликка тушиб, кўздан ғойиб бўлди. Шундан кейингина йўлимда давом этдим: ёвуз ниятли йўлдошимдан — олимваччадан қутулганимга хурсанд эдим. Умуман олганда, бу кун омадсиз бўлди, аммо анавиларга ўхшаш фирибгарлар бошқа дуч келишмади.

Торосда, Саунд-оф-Маля кўрфазида деразалари Морвенга қараган меҳмонхона бор бўлиб, унинг хўжайини ҳам Маклинлар уруғидан экан. Афтидан, мўътабар зотлардан шекилли. Биз томонларда ҳам меҳмонхона эгаси ҳурматли киши ҳисобланарди, лекин тоғли Шотландияда бўндай кишига ҳавас билан қарашаркан. Чунки меҳмондўстликни жойига қўяркан. Қолаверса, бу машғулотнинг ўзига яраша гашти борга ўхшайди. Қаҳвахона эгаси инглиз тилида бемалол тапирав экан: менинг саводим ёмон эмаслигини билгач, дастлаб француз тилидан билимим қанақа эканини синаб кўрди ва осонгина каминани ўсал қилди: кейин лотинчага ўтди, бу соҳада ким кимни доғда қолдирганини айтолмайман. Ҳарҳолда, ажойиб мусоҳаба бизни дарҳол дўстлаштириб қўйди: кейин унинг ёнида пунш ичиб ўтирдим: аникроғи, у пунш ичиб ўтирди, мен томоша қилдим ва охири қайф аралаш елкамга бошини қўйди-да, кўзёшини тўка бошлади.

Кези келганда, Аланинг тутмачасини кўрсатдиму жўрттага синаб кўрдим: маълум бўлдики, у бунақа нарсани умуман билмас экан. Боз устига, Ардзилининг қариндош-уругларини ю дўст-ёрларини жинидан ҳам баттар ёмон қўаркан; ичкликтан эс-ҳушини йўқотмасдан

аввал у менга қабиланинг битта вакилига бағишилаб ўзи ёзган ҳақоратномасини ўқиб берди: мазмуни ниҳоятда заҳарли бўлса-да, аммо лотинча сайқал берилган, мунгли рубобий шеър эди.

Кейин йўлда учратганим қонуншунос ҳақида гапириб бердим. У бош чайқаганча, баҳтиңг бор экан, осон қутулибсан, деди.

— Ўша одам ниҳоятда хавфли,— деб изоҳ берди.— Унинг номи Дункан Маккей: товуш чиққан жойни узоқ масофада туриб аниқ нишонга олади: бир неча марта қароқчиликда айбланган, бир пайтлар қотилликка ҳам қўл урган.

— Яна-тагин уялмай-нетмай «қонуншуносман» дейди-я! — дедим.

— Нега уялсин, ахир ростдан ҳам қонуншунос-ку! — деб эътиroz билдириди Маклин.— Дюартлик Маклин кўрга раҳми келганидан шунаقا унвон ҳадя этган. Афсуски, бу нарса ҳам бечорага наф келтирмади,— деб қўшимча қилди қаҳвахона соҳиби.— Сира тиниб-тинчимайди, доимо дайдиб юради: ёшлар тоат-ибодатни рисоладагидек ижро этяптиларми-йўқми, текшириб туриш лозим, деб юради. Шу нарса бу мискин кимсага таскин беради...

Ниҳоят, қаҳвахона эгаси ичкиликка тўйиб олгач, мени каравот тепасига бошлаб борди ва бамайлихотир ухлагани ётдим. Тўрт кун мобайннида Иррейддан Торосгача бўлган йўлни унчалик қийналмасдан босиб ўтдим: агар тўғри йўлдан юрилса, эллик миль: бекорга сарсон-саргардон бўлганимни ҳам ҳисобга олсак, юз миль атрофида масофани босиб ўтдим — бепоён, машақкатларга тўла Малл оролининг ўртасидан кесиб чиқдим. Бундай узоқ сафардан сўнг ўзимни илгарига нисбатан хийла тетик ҳис этардим.

### Ўн олтинчи боб

### «КУМУШ ТУГМАЧАЛИ ЎСМИР»

#### МОРВЕН ОРОЛИДА

Торосдан Қинлохалинга — қуруқликка доимо паром қатнаб туради. Саунднинг ҳар икки соҳилидаги ерлар Маклинларнинг қудратли қабиласи тасарруфида бўлиб, мен билан бирга паромга чиққан одамларнинг деярли

ҳаммаси ўша қабила аъзолари эди. Бироқ паромчининг исми шарифи Нийл Рой Макроб эди: Макроблар эса Алан Брек мансуб қабила таркибига киришарди. Дарҳақиқат, кечувга ҳам каминани шахсан унинг ўзи кузатиб қўйди: энди Нийл Рой билан юзма-юз ўтириб гаплашишга интиқ эдим. Паром йўловчиларга лиқ тўла эди, жуда секинлик билан олға силжирдик. Равшанки, гавжум жойда холи қолишнинг сирам ило-жи йўқ эди. Қилт этган шабада йўқ, шўрлик кеманинг жиҳозлари ниҳоятда ночор: чап томондаги бортida бир жуфт човхода бўлса-да, ўнг томондаги бортда фақат биттагина эшкак мавжуд эди, холос. Лекин эшкакчилар чин дилдан ҳаракат қилишарди: боз устига, йўловчилар навбати билан уларнинг ўрнига ўтиришарди, бошқалар жўровоз бўлишиб гэл тилида қўшиқ хиргойи қилишарди. Кечувнинг ўзига хос гашти бор эди: денгизчиларнинг қўшиқлари янграр, денгизнинг шўртак таъми димоққа урилар, тетиклик ва биродарлик кайфияти ҳукм сурарди, ҳаво мусаффо, киши ажид манзараға қараб тўймасди!

Шунга қарамай, бир ҳодиса дилимизни хуфтон қилди. Лохалиннинг қўйилиш жойида улкан кемага дуч келдик: у лангар ташлаб турарди: дастлаб, қиролликтиннинг соқчи кемаларидан бўлса керак деб ўйладим — якобинчилар фарангилар билан алоқа қилмаслиги учун яқинлашганимиздан сўнг у савдогарларнинг кемаси эканлиги маълум бўлди, таажжубланарли жойи шунда эдики, нафақат палубада, ҳатто соҳилда ҳам оломон гавжум эди ва соҳил билан кема ўртасида эшкакли қайиқлар тинимсиз қатнарди. Яна бир оз олдинга борганимиздан кейин мотам куйи қулоғимизга чалинди: палубадаги, қирғоқдаги одамлар бир-бирларининг елкаларига бошларини қўйишганча ўз дардларини айтибайтиб йиғлашарди. Беихтиёр бизнинг кўзларимизда ҳам ёш милтиллади. Шундагина бу Америкадаги мустамлака ўлкаларга сургун қилинаётган маҳбуслар солинган кема эканини англаб етдим.

Кемага ёндашган пайтимиз қувғинга учраган кимсалар кеманинг борт тўсиғидан энгашиб, ҳўнг-ҳўнг йиғлашганча паромдаги ҳамроҳларимга қўлларини узатишиди: ёру дўстлар бир-бирларининг дийдорига тўймасдилар. Бу ҳол яна қанча давом этиши мумкинлигини билмайман: назаримда, вақт ўтаётгани ҳеч кимнинг эсига келмасди: охири дарға борт тўсиғи олдига ўтди-да, оҳ-воҳлардан, тўс-тўполондан эс-ҳушини йўқотар ҳолатга етганига қара-

масдан (бу табиийдир!), биздан йўлнимизда давом этишимиизни ўтиниб сўради.

Нийл дарҳол кемадан нари кетдию хиргойичиларимиз ғамгин қўшиқ бошлаб юборишиди, уни қувғинга учраган кишилар илиб олишди, сўнгра соҳйлда турган кузатувчилар ҳам жўровоз бўлишиб қўшиқ айта бошладилар — гўё марҳумни сўнгги манзилга кузатиш маросими авжиди эди. Паромдаги эркаклару аёллар, энгашғанча човхода эшаётган эшқакчиларнинг юзларидан шашқатор ёшлар оқарди. Беихтиёр ўпкам тўлди. Айниқса, қўшиқ оҳанги қаттиқ таъсир этди (унинг номи «Абадул абад кечиргил, Лоҳабер» эди).

Кинлохалин соҳилида Нийл Ройни бир четга тортдим-да, сиз Эспинда туғилган бўлсангиз керак-а, деб сўрадим.

— Хўш, нима бўпти? — деди у.

— Мен битта одамни қидириб юрибман. Назаримда, сиз ўша одам тўғрисидаги баъзи маълумотлардан хабардор бўлсангиз керак,— дедим.— Унинг исми шарифи Алан Брек Стюарт.— Негадир дарғага тұгмачани кўрсатиш ўрнига чўнтағига шиллинг солиб қўймоқчи бўлдим.

У ортига чекинди.

— Бу ҳақорат,— деди у.— Йигит кишига бунақа мұомала қильмаслик керак. Сиз номини тилга олган инсон Фарангистонда юрибди. Агар у шу ерда бўлган тақдирда ҳам ҳамён-ҳамён пулни унинг ҳаром тўкигаям алмаштирган бўлардим.

Қўпол хатолик ўтганини пайқаб қолдиму фурсатни бой бермасдан, дарҳол табаррук тұгмачани кўрсатдим.

— Ҳа-а, ана,— деди у.— Гапни шундан бошлаш керак эди-да! Хўш, ҳақиқатан ҳам кумуш тұгмачали ўсмир бўлсанғ, хотиржам бўл — сени керакли манзилга омон-эсон элтиб қўйиш чорасини кўраман. Ҳафа бўлмагину сенга очиқ-ойдин айтиб қўйишм керақ, бундан буён ўша Алан Брекнинг номини сира тилга олмайсан — кейин ҳалиги бемаъниликтин қайта тақрорламагин, яъни тоғлик жентельмен чўнтағига палид пулингни тиқиширишга уринма.

Мушкул ахволда қолдим: ахир ўзини асл йигитман деб юрган (айнан шундай эди) кишини афтидан билиб бўлмайди-ку! Айни пайтда Нийл пачакилашиб ўтиришни унчалик хушламасди — зиммасига юклатилган вазифани тезроқ адo этсан бир ташвишдан қутулса: у зудлии билан йўл-йўриқ кўрсата бошлади. Мен шу ердаги, Кинлохалиндағи қўнаржойда тұнаб қолишим лозим эдис:

эртаси куни эса Марвендан Ардгургача бўлган масофа-ни босиб ўтишим ва Клейморда Жон исмли кимсадан бир кеча тунаш учун жой топиб беришни илтимос қилишим керак (албатта, уни огоҳлантириб қўйишган экан): учинчи куни Корран ва Баллахулиш кўрфазларидан ўтганимдан сўнг, Эпиннинг Дюороро музофотидаги Жеймс Гленнинг ер-мулкига қандай бориш мумкинлигини сўраб-суриштирмоғим зарур эди. Қўриниб турибдики, яна иккита кўрфазни кечиб ўтишим керак: қуруқлик атрофини дengиз қуршаб олган бўлиб, торгина қўлтиқчалар тоғларнинг пойига бориб тақаларди. Бундай ўлкаларни мудофаа қилиш осон-у, лекин яёв кезиб чиқиш мушкул, табиати шафқатсиз, жилов нималигини билмайди: фожеий ҳолатларга ҳар қадамда дуч келиш мумкин.

Нийлдан зарур маслаҳатларни ҳам эшидим: йўл-пўлда бегона одамлар билан гаплашмаганим, виглару, кемпбеллару қизил мундирлилардан узокроқ юрмоғим, агар аскарларни кўриб қолсан, дарҳол йўл четига чиқиб, бутазор орасида яшириниб ўтиришим керак экан, «акс ҳолда, бу халқдан яхшилик кутиб бўлмайди», деди. Бир сўз билан айтганда, ўзимни худди қароқчи ёки якобинчиларнинг айғоқчиси каби (афтидан Нийл мени жосус деб биларди) тутишим лозим эди.

Кинлохалиндаги мусофирихона дунёдаги энг расво ташландиқ жой экан: бундай жойда фақат чўчқа боқиши мумкин эди: тутун буруқсиб ётар, бурганинг ҳисоби йўқ эди. Етоқда камгап тоғликлар ҳам учради, албатта. Бундай жойда тунаш менга алам қилди ва Нийлга дағал муюмала қияганим учун ўзимдан ўпкалай бошладим. Назаримда, бундан баттар бўлиши мумкин эмасди. Лекин тез орада бундан-да баттар аҳвол бўлиши мумкин эканига амин бўлдим: келганимга ярим соат бўлар-бўлмас (бу вақт ичиди эшик кесакисига суюниб турдим, кўзларим сира ҳам тезак тутунига кўниколмасди), момақалдиrok гулдирадио бирдан сел босиб келди, мусофирихона ҳовлисида қўлмак пайдо бўлди ва биз турган уйнинг бир қисмидан шарқираб «санҳор» оқиб ўта бошлади. У замонларда бутун Шотландияда жўнгилдагидек меҳмонхонани учратиб бўлмасди, аммо оғстонадан ўрингача тўпиқдан сув кечиб бориш — мен учун ёввойилик аломатидан бошқа нарса эмасди.

Эртаси куни йўлга чиққанимдан сўнг кўп ўтмасдан гирдиғум, миқтигина ёши улуғ кишига етиб олдим: у маймоқланиб аста кетиб борарди; қандайдир китобчадан

кўз узмас, баъзи жойларини тирноғи билан чизиб ҳам қўярди: ўзи руҳонийларга ўхшаб одмигина кийинган, уст-боши ярашиб турарди. Маълум бўлишича, бу киши дин пешволаридан экан, лекин Малл йўлида учраган кўр қоридан мутлақо фарқ қиласкан: йўловчи чакана одам эмасди: Эдинбургдаги «Христианлик таълимотини тарқатувчилар» жамиятининг ишончли вакилларидан бири эди: унинг зиммасига олис Шимолий Шотландияда Инжил ғоялари тўғрисида ваъз ўқиш вазифаси юклатилганди. Исли Хендерленд бўлиб, мен соғинган жанубликлар шевасида сўзларди. Бундан ташқари, бизни фақат юртдошлиқ туйғуси боғлаб турмаган экан, шахсий манфаатларимиз ҳам туташади. Гап шундаки, меҳрибон устозим — эссендинлик руҳоний бўш пайтларида баъзи бир диний қўшиқларни, илоҳиётга оид рисолаларни геллар тилига таржима қиласкан; Хендерленд эса улардан фойдаланар, буни юксак қадрларди. Йўлда уни айнан ўша рисолалардан бирини мутолаа қилиб кетаётган пайтда учратган эдим.

Биз дарҳол ҳамроҳ бўлишга қарор қилдик: боз устига, иккаламиз ҳам Кингерлохача боришимиз лозим эди. У ҳар бир дарвиш билан ҳам, ишчи-хизматчи билан ҳам эринмасдан сұхбатлашарди: улар нималар хусусида сўзлашаётганини тушунмасдим албатта, лекин бу ўлкада мистер Хендерлендинг иззат-ҳурматга сазовор экани кўриниб турарди. Ҳарҳолда, кўпчилик чўнтағидан суяқ тамакидонини чиқарапди-да, уни бир чимдим тамаки билан сийларди.

Ўз ишларимнинг баъзи бир қирралари тўғрисида гапириб бердим. Аниқроғи, Аланга алоқадор жиҳатлари борасида лом-мим демадим: охирги манзилим — Баллахулиш, ўша ерда дўстимни учратишим лозим, дедим. Охарн ёки Дюорорнинг номлари қулоққа жарангдор эштилади: Аланнинг изига тушишлари мумкин, деб ўйладим. Кези келганда, Хендерленд ўз ишларию таниш-билиш одамлар, сеҳргар мажусийлару қочоқ якобинчилар, қуролсизлантириш ва кийим-кечакни ўзгартириш ҳақидаги қарорлар, бир қанча ғаройиб расм-руслар ҳақида тўлиб-тошиб ҳикоя қилиб берди. Афтидан, мўтадил табиатли кишига ўхшарди: парламентни тез-тез сўкар, айниқса, белига қурол осиб юрадиган кишилардан кўра, тоғликлар кийимидағи одамларни қаттиқроқ жазолаш ҳақида қарор чиқаргани учун ҳукумат аъзоларини сира кечиролмасди.

Теран фикр-мулоҳазаларини эшитганимдан кейин

ундан Малла Тулки ва эпинлик ижарадорлар ҳақида сўраб-суриштирудим: ўзимча, бир мусофири бундай масалаларга қизиқса, ғалати туюлмас, деб ўйладим.

Бу жуда ҳам ачинарли воқеа, деди.

— Умуман, ҳайратомуз ҳодиса,— деб қўшиб қўйди у.— Ижарадорларнинг ўзлари ярим яланғоч яшайдилару, ортиқча пулни қаёқдан топишади экан-а? Айтмоқчи, мистер Бэлфур, озгина тамаки топилмайдими?.. Эҳ, шунақами! Майли, бир иложини қиласман, камроқ чексам — ўзимга фойда-ку. Дарвоқе, ижарадорлар хусусида: албатта, маълум маънода уларни зўрлашяпти. Дюорорлик Жеймс Стюарт (унинг Жеймс Глен деган номи ҳам бор) қабила йўлбошчиси Ардшилнинг туғишиган укаси бўлади: бу ерда энг улуғ зот ўша: ҳеч кимни ўз ҳолига қўймайди. Яна биттаси бор, Алан Брек деган кимса...

— Ҳа, ҳа! — деб юбордим беихтиёр.— У ҳақда нима дейсиз?

— Хоҳлаган томонига қараб эсадиган шамол тўғрисида нима дейиш мумкин? — деди Хендерленд.— Худди шунинг ўзи бугун бир жойда бўлса, эртага бошқа жойда, ё учиб юради ёки дом-дараксиз бўлиб кетади: ҳақиқий саёқ. Агар шу тобда ҳув авани дуккакли ўсимликлар остида бизни кузатиб ўтирган бўлса ҳам ажабланмайман. Бўлиши мумкин-да!.. Мабодо ёнингизда тамакингиз йўқми?

Мен, йўқ, деб жавоб бердим ва илгари ҳам бир неча марта сўрадингиз-ку, дедим.

— Ҳа-я, эсим қурсин,— деди уф тортиб.— Ажаб, тамаки олиб юрсангиз бирор жойингиз камайиб қолармиди-а?.. Мен сизга айтсан, Алан Брек деган қушча — авбош, таптортмас, боз устига, ҳамма биладики, Жейм Гленнинг ўнг қўли ҳисобланади. У аллақачон ўлимга ҳукм этилган: энди йўқотадиган ҳеч нарсаси қолмаган, агар бирорта фақир измига юрмаса борми, ҳанжар билан шартта қорнини ёриб ташлашдан ҳам тоймайди.

— Гапларингизга қараганда, мистер Хендерленд, ҳақиқатан ҳам иш пачавага ўхшайди,— дедим.— Ҳамма томонни ваҳима босиб кетибди: қулогимни беркитиб олгим келяпти.

— Э-э, йўқ! — деди мистер Хендерленд.— Бундан ташқари, муҳаббату тарки дунёчилик ҳам борки, шу жиҳатдан сиз билан мен унга ҳавас қиласак арзиди. Эҳтимол, бу ҳол христианлик нуқтаи назарида гуноҳ

саналар, лекин инсоний нуқтаи назардан қаралса, бағоят савобдир. Билишимча, шунинг учун азамат Алан Брекни ҳамма жойда ҳурмат қилишади. Айтайлик, мистер Белфур, ватанимизда мунофиқ ва суллоҳлар йўқми? Бижиб ётишибди! Аммо улар ибодатхоналарда олдинги қатордаги ўриндиқда ўтиришади, одамлар орасида ҳам иззат-икромга сазовор: ўзлари эса, аслида, адашган банда бўлмиш каллакесар, қонхўр Аланнынг ҳаром тукига ҳам арзимайдилар. Йўқ, йўқ, биз тоғликлардан кўп нарсаларни ўргансак зарар кўрмасдик... Нима учун мен тоғу тошларда узоқ вақтдан бери меҳмон бўлиб юрганимга ҳайрон бўляпсиз, тўғрими? — деди у кулимсираб.

— Йўғ-э, унчалик эмас,— деб эътироz билдиридим:  
— Қолаверса, ўзим ҳам тоғликларга мафтун бўлиб қолганман: агар гап тоғликлар хусусида бўлса, мистер Кембелл ҳам тоғли юртда туғилганини унутмаслик лозим.

— Тўғри айтдингиз,— деб жавоб бердим.— У асилзодалар авлодидан.

— Дарвоқе, ўёқларда қиролнинг ишбошиси нима балоларни бошлаб юрибди? — деб сўрадим.

— Ўша Колин Кембеллни айтяпсизми? — деди Хендерленд.— Э-э, арининг инига чўп тиқяпти!

— Эшишишимга қарагандা, у зўравонлик қилиб ижарадорларни ҳайдамоқчи бўлган эмиш-а?

— Шундай,— деб тасдиқлади Хендерленд.— Халқ ибораси билан айтганда, пайтдан фойдаланиб ҳар ким ўз улушини юлиб олмоқчи бўлаётгани чатоқ, холос, Жеймс Глен Эдинбургга бориб Стюартлар қавмидан бўлган битта амалдорни ёллаб келди-да, кўчиришни тўхтатиб қўйди. Ўз-ўзидан равшанки, улар кўршапалакка ўхшаб доимо ғуж бўлиб юришади. Кейин Колин Кембелл ҳам тинч ётмади: молия муассасаси судида жараённи ўз фойдасига ҳал этди. Айтишларича, эртага илғор ижарадорлар кўч-кўронларини кўтаришлари лозим экан. Жеймснинг тумшуғининг тагида истиқомат қиласидиган Дюорордан бошлашмоқчи шекилли, фикри ожизимча, бу унчалик оқилона тадбир эмас.

— Қаршилик кўрсатишади деб ўйлайсизми? — деб сўрадим.

— Биласизми, улар қуролсизлантирилган,— деди Хендерленд.— Ҳарҳолда, ҳозирча шундай деб ҳисоблашяпти... Аслида эса, хилват жойларга кўплаб қурол-яроқлар яшириб қўйилган, Устига устак, Колин Кембелл

а́сқарлардан ёрдам сўраган. Агар ҳозирги ҳолатда унинг рафиқаси ўрнида бўлганимда уйга қайтиб келмагунча юрагимни ҳовучлаб ўтирадим. Эпинлик Стюартларни, оятда довюрак халқ.

— Ҳамма гап шундаки, улар ҳам чакана эмас,— деди Хендерленд.— Аслида, калаванинг уни мана шу жойда. Негаки, мабодо Колин Кемпбелл Эпиндаги ишларни тартибга солиб қўйса-да, яқин атрофдаги ўлкада — Камеронлар ер-мұлки ҳисобланган Маморда яна ҳаммасини бошидан бошлишга мажбур бўлади. Чунки у ҳар иккала ўлкада қирол тайинланган ишбоши ҳисобланади, демак, икки томондан ҳам ижарадорларни сиқиб чиқармоғи даркор. Биласизми, мистер Бэлфур, қўлларимни кўксимга қўйиб айтаманки, агар у биридан қутулган тақдирда ҳам, иккинчисига бориб тутилади. Бунга имоним комил.

Биз йўл бўйи қизғин суҳбатлашиб бордик, шу зайл куннинг қандай ўтганини ҳам сезмай қолдик: охири мистер Хендерленд, мендай ҳамроҳга дуч келганидан мамнун эканини изҳор этди ва айниқса, мистер Кемпбеллнинг дўсти билан танишганимдан бағоят хурсандман, деди («Мен ҳеч иккиланмай сизни мўл-кўл жун етиштириладиган Сион ўлкамизнинг янгроқ товушли куйчиси деб атаган бўлардим», деди). Бирпас нафасимни ростлаб олишимни, лозим топсан унинг уйида бир кеча тунаб кетишимни илтимос қилди. У шу яқин атрофда — Кингерлоҳдан сал нарида яшар экан. Рости ни айтсан, ич-ичимдан қувониб кетдим: клейморлик Жонга ялинишни унчалик хушламасдим. Устига устак, икки марта омадим чопмагандан кейин (дастлаб, йўлбошловчичув тушириб кетди, сўнгра жентельмен-паромчидан ҳам ёруғлик чиқмади) кўнглимда ҳар қандай тоғлилка нисбатан шубҳа пайдо бўлган эди. Биз мистер Хендерленд билан гапни бир жойга қўйдик-да, кечги томон Лох-Линн соҳилида қаққайиб турган бир кулба ёнига бордик. Ардгур тоғларининг бериги қанотида оқшом чўйкан, лекин чап қанотига — Эпин томонига ҳамон қуёш нур сочиб турарди. Кўрфаз сокин, худди кўлга ўҳшарди: сув сатҳида фақат балиқчи қушлар чарх уриб учиб юришарди. Бу ерларда қандайдир мудҳиш тантана содир бўлаётгандек туюларди.

Остонага қадам қўяр-қўймасимииздан, мистер Хендерленд каминани ҳайратда қолдириб (шукрки, тоғлиларнинг мӯомала тарзига кўникма ҳосил қилган эдим),

уялмай-нетмай меҳмонни эшикка қисиб қўйдию ўзини хонага урди: сопол тамакидонни, суюк қошиқчани қўлига олиб, жонҳолатда бўрунларининг тешикларига тамаки тиқа бошлади. Кейин маза қилиб, кетма-кет чучкураверди. Ниҳоят, ҳузурдан талтайган кўйи илжайиб менга қаради:

— Онт ичиб қўйғанман,— деб изоҳ берди у.— Агар йўлга тамаки кўтариб чиқсан, худо урсин деб, қасам ичганман. Бу оғир албатта, кейин азият тортаётган кишилар, фақат жун етиштираётган чорвадорлар эмас, христианлик эътиқоди учун жафо чекаётган жамики бандалар ёдга тушадиу зорланаётганимдан уялиб кетаман.

Тамадди қилиб бўлишимиз биланоқ (мехрибон уй соҳибининг энг totli таоми бўтқаю зардобга қорилган қатиқ экан) у қиёфасига жиддий тус берди-да, мистер Кемпбелл олдиаги бурчим туфайли сенинг парвардигори оламга қанчалик содиқ эканингни текшириб кўришга мажбурман, деб эълон қилди. Тамаки ҳодисасидан сўнг шарақлаб кулиб юборишдан аранг ўзимни тийиб ўтирадим: бироқ у гап бошладиу кўп ўтмай кўзларимда ёш филтиллади. Одатда, инсон қалби икки ҳолатда бирпасда эриб кетади: самими мөхрибонлик ва мўмин-қобилликка рўпара келсак бас, дарҳол инон-ихтиёризни бой берамиз: бизнинг қаҳри қаттиқ замонимизда, совуққону манмансираган одамлар бундай фазилат камёб жавҳардир: айни чоқда мистер Хендерленд тимсолида самимияту мўмин-қобиллик жонланган эди. Шу пайтгача кўрган-кечирган саргузаштларим мобайнида кўпинча ўлиб-тирилиб ўз шаън-шавкатимни ҳимоя қилган бўлсам-да, унинг гап-сўзларини тинглаб тез орада соддадил, камбағал мўйсафид қаршисида тиз чўқдим: шундай улуғ зот ёнида ўтирганимдан бошим осмонга етди, кўнглим чароғон бўлди.

Үйқуга кетишимдан аввал у уйининг торфдан қурилган девори киндигида сақланадиган оз-моз пулидан олти пенс санаб берди, йўл-пўлда асқотиб қолар, деди: бундай инсоний мурувватга қандай жавоб қайтаришни билмасдим. Шу қадар ўтиниб илтимос қилдики, қўлини қайтарсам — беодобчилик бўларди, охири олдим: албатта, бу билан рўзгори яна ғариблаган эди.

## МАЛЛА ТУЛКИНИНГ ЎЛИМИ

Эртаси куни мистер Хендерленд Лох-Линнинг нариги соҳилига кечки томон ўз қайигида балиқ овига жўнайдиган бир кишини излаб топди. Қайиқчи ўз қавмидан бўлгани туфайли мистер Хендерленд уни битта йўловчни бирга олиб кетишга кўндириди: шундай қилиб, кун бўйи йўл азобидан қутулдим ва кечувдан ўтиш учун паромчига тўлайдиган кира ҳақи ҳам ёнимга қолди.

Қирғоқни тарқ этган пайтимиизда туш бўлиб қолган эди: ҳаво тунд, булутили эди, гоҳ-гоҳида қуёш мўралаб қўярди, холос. Бу жойлар ҳам денгиз каби чуқур бўлса-да, сув сатҳида бирорта тўлқин кўринимасди: бир ҳовуҷ сув олиб ичиб кўрдим: сувнинг ҳақиқатан ҳам шўр эканига ҳеч ишонгим келмасди. Икки томонда улуғвор, ғадир-будур, яланғоч тоғлар қўр тўкиб турарди: булат соя ташлаб турган маҳалда қоп-қора, ваҳимали кўринар, қуёш нур сочиб турган чоқларда эса бутун бағрини кумуш жилғалар чулғаб олганини кўриш мумкин эди. Эпин деганлари шафқатсиз ўлка бўлиб, нимаси юракдан уриб қолишигаю Алан нега усиз яшай олмаслигига сира ҳам ақлим бовар қилмасди...

Йўл давомида диққатга сазовор бирор ҳодиса рўй бермади ҳисоб. Эндиғина жойимиздан жилган эдикки, шимол томондан — сувга яқин жойда қуёш нурида ял-ял товланаётган қирмизи ранг лоп этиб кўриндию яна ғойиб бўлди. Қирмизилигига қараганда, у аскарлар мундирини эслатарди: ундан яшин тараляётгандек туялар, гўё ярқироқ пўлат юзасига нур тушардию акси қайтарди.

Мен қайиқчидан, бу нима, деб сўрадим. Ҳартугул, Форт Вильямдан келган қизил мундирлilar Эпинда мол-мулки мусодара қилинган ижарадорлар тўполонини бостириш учун кетишаётган бўлса керак, деди у. Ростини айтсам, бу манзара кўнглимга ғулғула солиб қўйди: билмадим, Алан тўғрисида ўйлаётганим учун шундай бўлдими ёки қандайдир ёмон иш рўй беражагини юрагим сезиб турармиди, ишқилиб, қирол Георг аскарларини иккинчи марта кўраётган бўлсан ҳам, улардан яхшилик чиқмаслигига ишончим комил эди.

Ниҳоят, Лох-Линнинг қуйилиш жойига яқинлашган вақтимиизда, қайиқчидан қирғоқда қолдириб кетишини сўради. Балиқчи ҳалол одам эди, дин пешвосига сизни

Баллахулишга элтиб қўяман деб ваъда берганман деб, дастлаб, илтимосимга унамай турди: лекин ваъда-лашган пинҳоний учрашув манзилимдан йироқлашиб кетаётганим учун сўзимда қаттиқ туриб олдим: охири Аланинг она юрти Эспинда, Литтер соҳили (бу жойларнинг бошқача номи ҳам қулогимга чалинган эди: Литтер қароқчизори) этакларида қайиқдан тушиб қолдим.

Кўрфазга энгашиб турган қоядор тоғ ёнбағирлари қайнизор ўрмондан иборат эди. Нишабликни кўм-кўк пўпанак қоплаганди, қирққулоқлар ўсиб ётар, тўқай оралаб шимолдан жанубга томон ёлғизоёқ сўқмоқ ўтганди. Сўқмоқ четига чиқдим-да, чашма қайнаб турган жойда тўхтадим ва бирпас нафасимни ростлаб, мистер Хендерленд бериб юборган зогора нонни сувга ботириб еб олишга ҳамда эндиғи ишларимни, пухта режалаштиришга аҳд қилдим.

Аъзойи баданимни пашша чақиб ташлади, ташвишлар ҳам ҳол-жонимга қўймасди. Нима қилмоқ керак? Алан билан нима учун алоқа қиласпман? Ахир у қонун олдида жавоб бериши керак: бугун одам ўлдирмаган бўлса-да, эртага албатта бирор кишининг бошини ейди. Бу ерда қўрқиб-лisisib ўтиргандан кўра, жануб томонларга кетиб қолганим яхши эмасми? Вақти-соати келиб мистер Кембеллми, мистер Хендерлендми ўзбошим-чалик қилганимни билиб қолишса, кўзларига қандай қарайман?! Улар менга, дарвиш экансан, дейишмайдими, ахир! Хуллас, қалбим шубҳаю гумонлар гирдобида қолди.

Ўй суриб ўтирган пайтимда бирдан тўқай томондан одамларнинг товуши ва от түёқларининг дупур-дупури эшитила бошлади. Тез орада бурилишда тўртта йўловчи кўринди. Ўша жойда сўқмоқ шу қадар торайиб кетган эдики, улар отнинг жиловидан ушлашганча етаклаб келишарди. Олдинда жингалак мalla сочли норғул киши келарди: афтидан, амалдорга ўхшарди, юзлари бўғриқиб кетган, шляпасини қўлига ушлаб олганча дамбадам силкитиб қўяр ва ҳансира-ҳансираф зўрға нафас оларди. Қоп-қора кийимга ва бошидаги оппоқ ясама сочига қараганда, ишбоши иккинчи бўлиб шахдам одим ташларди. Кейин катак гулли, ёқасига заррин уқа қадалган кийимли хизматкор келарди; демак унинг хўжайини тоғлик асилзодалардан экан; чунки шотландча катак гулли кийимда юриш қонун билан тақиқланган эди: хўжайин ё қонунни сариқ чақага олмайди ёки у боёнлар орасида жуда катта иззат-икромга сазовор эди.

Агарда мен бундай масалаларнинг нозик жиҳатларидан хабардор бўлганимда, жиякнинг рангига қараб Арғайлар тимсолини, бошқача айтганда, Кембеллар нишонасини таниган бўлардим. От эгарига хуржун ташлаб қўйилганди, эгарнинг қошига эса (сайр-саёҳатга ишқивоз маҳаллий аҳоли орасида шунаقا одат расм бўлганди) тўрва танғиб боғланган, тўрвага пунш тайёрлаш учун ишлатиладиган норинж тўлдириб олинганди.

Тўртинчи одам масаласига келсак, илгари унга ўхшаган кимсаларни кўп учратганиман ва бирпасда у суд ижрочиси эканини илғаб олдим.

Уларга кўзим тушган заҳотиёқ негадир (ўзим ҳам билмайман) саргузаштларим йўналишини ўзгартири-масликка. қарор қилдим: мен ўтирган жойга яқинлашган чоқларида майсадан турдим-да, олдидағисидан Охарнга қандай борса бўлади, деб сўрадим.

У жойида таққа тўхтадио бошимдан-оёғимгacha син-чиклаб разм солиб, сўнгра ишбошига ўгирилди.

— Манго, иккита ҳалол қароқчига дуч келишдан ҳам ортикроқ яхши аломат бўлмаса керак! — деди.

— Хўш, ўзларингга маълум иш бўйича Дюорога кетаётсам, бирдан қирқулоқлар орасидан нав-ниҳол битта ўсмир чиқиб Охарнга йўлингиз тушмайдими, дея сўраб турса, бүёғи қандай бўлди.

— Гленур, ҳазилнинг ўрни эмас,— деб жавоб беришди унинг ҳамроҳлари. Уларнинг иккитаси яқин келиб менга синчиклаб назар ташлашди, қолган иккитаси нарироқ туришди.

— Хўш, Охарнда нима ишинг бор, йигитча? — деб сўради лақаби Малла Тулки бўлган гленурлик Колин Рой Кембелл: мен айнан ўшани саволга тутгандим.

— Битта одамни кўрмоқчиман,— деб жавоб бердим.

— Жеймс Глен бўлса керак,— деб минғирлади Гленур ва яна суд ижроисига мурожаат этди:— Кўриниб турибдики, ўз одамларини тўпламоқчи экан.

— Нима бўлганда ҳам ортимиздан аскарлар етиб келишини шу ерда кутиб турганимиз маъқул,— деб жавоб берди шериги.

— Мени деб саросимага тушиб қолганга ўхшайсизлар,— дедим.— Ундан бўлса, эшишиб қўйинглар: мен унинг ҳам, сизнинг ҳам одамингиз эмасман: қирол Георгнинг оддий, ҳалол фуқаросиман: ҳеч кимдан қарзим йўқ, бирордан қўрқадиган жойим ҳам йўқ.

— Емон гап эмас,— деб маъқуллади ишбоши.— Факат ижозат этсалару битта савол берсан: ҳалол фуқаро

ўз юртидан олисларда нима қилиб юрибди, нима учун Ардшилларнинг биродарини қидиряпсиз? Агар хабарингиз бўлса, бу ерларда камина ҳукмрондир. Яъни ана шу ўлкаларга қирол томонидан тайинланган ишбоши бўламан, орқамда эса ўнлаб аскарларим бор.

— Эшитганман! — дедим зардали оҳангда.— Бутун ўлка бўйлаб сизнинг қанақа қалтис жойларда уяларингиз борлиги тўғрисида мишмиш тарқалган.

У ҳамон менга тикилиб туарар, гўё бирор қарорга келишга иккиланарди.

— Начора,— деди ниҳоят.— Тилинг заҳар экан, лекин мен тўғрисўз одамларни яхши кўраман. Агар бошқа куни Жеймс Стюартнинг уйига қайси йўлдан борса бўлади деб сўраганингда, сени алдаб ўтирасдим, ҳатто ортингдан оқ йўл тилаб қолардим. Лекин бугун... Манго, нима дейсан? — У яна суд ижрочисига ўгирилди.

Бироқ, худди шу тобда — у бошини ўгираётган дамда тепадан, қоядан ўқ товуши янградию ўқнинг акс садоси тинмай туриб Гленур тап этиб сўқмоққа қулади.

— Сен! — деб иҳраб юборди у.— Мени ейишди!

Ижрочи уни қучоғига олдию хиёл кўтариб тураверди, хизматкор эса қўллари ҳориб-толганига қарамасдан унинг устига энгашганча қотиб қолди. Ярадор қўрқув аралаш гоҳ унисига, гоҳ бунисига тикиларди: охири одамнинг юрак-бағрини эзиб юборадиган ғалати товушда тилга кирди:

— Кочинглар. Мен энди одам бўлмайман.

У чакмонининг тугмаларини ечиб ташламоқчи бўлди: афтидан, ярасини ушлаб кўрмоқчи эди, лекин бармоқлари мажолосизлигидан фақатгина тугмаларни силаб-сийпаларди, холос. Чуқур нафас олдию боши елкасига шилқ этиб тушди.

Суд ижрочиси лом-мим демади, аммо ранги мурдадай оқариб, ёноқ суяклари бўртиб кетдӣ: хизматкор ёш боладек ҳўнграб юборди. У бошларига муштлаб саннаб йиғларди: менинг эса, қўрқувдан тилим калимага келмай қолди, ғўдайганимча улардан кўз узмай туравердим.

Ниҳоят, ижрочи жасадни сўқмоқдаги қон ҳалқоб бўлиб қолган жойга ётқизди-да, аранг қаддини ростлади. Назаримда, унинг худди шу ҳаракати юрак-бағримни ўртаб юборди, чунки туриши билан мен: «Қотил! Қотилни ушланглар!» дея фарёд кўтарганимча қоя томон югуриб кетдим.

Ҳаммаси бир нафасда рўй берди; дастлабки қоядан

ошиб ўтган пайтимда рўпарамда яна битта яйдоқ қоя намоён бўлди, қотил эса ҳали узоққа кетмаган экан. У темир тугмали қоп-қора чакмон кийган норғул киши бўлиб, қўлида қувури узун ов милтиги бор эди.

— Буёққа келинглар! — деб қичқирдим.— Ана ў!

Қотил шоша-пиша орқасига қарадио қоча бошлади. У бир сонияда қайнинзорга кириб, кўздан ғойиб бўлди. Бир оздан кейин ўрмоннинг юқори қисмида қораси кўринди; унинг маймундай эпчиллик билан чўққига кўтарилаётгани кўриниб турарди; қотил қоя ортига ўтиб кетдию уни бошқа кўрмадим.

Бу вақт ичида мен ҳам бир жойда тўхтаб турмадим, албатта. Хийла баландликка кўтарилдим, лекин пастан чақириб қолиши: «Тўхта!» дейишди. Шу пайт қайнинзорнинг юқори чеккасига етиб боргандим; орқамга ўғирилган маҳалда ўрмоннинг очиқ жойи баралла кўз ўнгимда намоён бўлди.

Хизматкор билан суд ижроиси сўқмоқ устида туришарди: бақириб-чақиришганча қўлларини силкитишарди ва мени орқага қайтишга ундашарди. Уларнинг чап томонида, тўқайнинг этак қисмида пилтамилтиқларни олдинга ўқталган кўйи аскарлар бирин-кетин қояга ўрмалаб чиқишарди.

— Нима учун орқамга қайтишим керак? — деб қичқирдим жаҳлим чиқиб.— Ундан кўра, ўзларинг буёққа чиқинглар!

— Анави болани ким қўлга тушиrsa, ўн фунт мукофот! — деб чинқирди хизматкор,— У қотилнинг ҳамтовори. Бизни гапга солиб, чалғитиб туриш учун атайлаб буёққа жўнатилган.

Шу сўзларни эшитишм биланоқ (у аскарларга қараб қичқираётган бўлса ҳам, сўзларини аниқ-тиниқ эшитдим) қўрққанимдан юрагим товонимга тушиб кетди. Агар ҳаётинг хавф остида қолса, нажот йўли топилиши мумкин: бирйўла ҳаётдан маҳрум бўлсангу номингга ҳам доғ тушса, додингни бирор тингламайди. Қолаверса, ҳеч кутилмаган пайтда маломатга қолдим, бутунлай эсанкираб, эс-ҳушимни йўқотиб қўйдим: гўё қуёш чараплаб турган осмонда момақалдироқ гулдурагандай бўлди.

Аскарлар занжир мисоли олға силжий бошлашди, баъзилари йўлимни тўсиб чиқиш учун югурниб кетишиди, бошқалари эса пилтамилтиқларини елкаларидан туширишиб, нишонга олишди: мен жойимда қилт этмасдан туравердим. Шу пайт ёнгинамдан:

— Дараҳт орқасига ўтиб, ўзингни буёққа ташла! —  
деган товуш эшилди.

Нима қилаётганимни англамасдан дараҳт орқасига  
ўтиб, пастга сидирилиб тушганимни биламан: бирдан  
пилтамилтиқ ўzlари қайнин шохлари орасидан шув-шув  
этib ўтиб кетди.

Икки қадамча нарида, қўлида қармоқ тутган Алан  
дараҳт орқасида яшириниб турарди. У мен билан салом-  
лашмади (ҳозир мулозамат қилиб ўтирадиган пайт  
эмасди): «Орқамдан югур!» деб қўйди, холос. У ғадир-  
бутир тепаликлар бўйлаб Баллахулиш томон чопиб  
кетди, мен худди қўзичноқдай унга эргашдим.

Биз қайнинзор оралаб югуриб борардик: баъзан  
тумшуғимиз ерга теккудек энгашганимизча қоялар  
устидаги дўнгликлардан ошиб ўтардик, баъзан тўрт  
оёқлаб эмаклаб арчагуллар орасига кириб кетардик.  
Орқа-олдимизга қарамай югурадик, юрагим кўкрак  
қафасимни ёриб чиқиб кетадиган алфозда дукурлар,  
умуман, юрагим ёрилиб кетиши ҳам ҳеч гап эмасди:  
ҳатто бошимни қашлашга фурсат йўқ эди, бир-икки  
офиз гапирай десам, ўпкам оғзимга тиқилиб сўзлай  
олмасдим. Алан ҳар сафар қаддини ростлаб, орқасига  
назар ташлаётганда кўзларимни пирпиратганимча унга  
қараб қўярдиму бунга жавобан олисдан, албатта ғазаб-  
ланган аскарларнинг сўкинишлари эшиларди.

Тахминан чорак соат вақт ўтгач, Алан арчагуллар  
устига ётиб елкаси оша менга қаради.

— Энди ҳазил тугади,— деди чуқур нафас оларкан.—  
Агар яшашни истасанг, мен нима қилсан сен ҳам  
шуни тақрорлагин.

Кейин аввалгидан ҳам минг карра эҳтиёткор бўлиб,  
боя келган йўлимиздан зудлик билан нишабликка  
туша бошладик, фақат сал юқорироқ томондан юрдик.  
Ниҳоят, Аланни дастлаб кўрган жойимга етганимиз-  
дан сўнг, у Литтер соҳилидаги тўқайда битта қайнин  
остига таппа ўзини ташлади юзини қирққулоқларга  
буркаганча ҳарсиллаб нафас ола бошлади.

Менинг қовурғаларим мажақланиб кетганга ўхшар,  
кўз олдим жимиirlар, оғзимдан гўё оташ пуркардим,  
чанқоқдан юрагим ёниб кетаман дерди, хуллас, мен  
ҳам тап этиб унинг ёнига йиқилдим.

## Үн саккизинчи боб

### ТҮҚАЙДАГИ СУҲБАТ

Биринчи бўлиб Алан ўзига келди: ўрнидан турди-да, қайинзор ёқасига бориб, олисларни кўздан кечирди, сўнгра ортига қайтиб, жойига ўтирди.

— Уф, исиб кетдик-ку, Дэвид,— деди.

Мен жавоб бермадим, ҳатто бошимни ҳам кўтармадим. Кўз ўнгимда қотиллик рўй берди: қувноқ, истараси иссиққина паҳлавон бирпасда жонсиз жасадга айланди-қолди: ҳамон унга ачинардим, лекин чинакамига кўйинмасдим. Алан жонидан ҳам баттар ёмон кўрадиган одам ўлдирилди, Аланнинг ўзи эса шу ерда, тўқайдаги яшириниб ётибди, аскарларга тутқич бермади. Тепкини унинг бармоқлари босдими ёки буйруқ ундан чиқдими фарқи йўқ. Фаҳмлашимча, бу ёввойи ўлкадаги ягона қонли жиноятга бевосита алоқадор бўлиб, бу ҳол кишини даҳшатга соларди: юзига қарашга ҳам юрагим бетламасди: қўёш аёвсиз қиздираётган тўқайдаги одамхўр билан ёнма-ён ётгандан кўра, ўша қарғиш теккан оролда яккамоховга ўхшаб ёмғирга бўкиб юрганим, очликдан ўлиб кетганим яхши эди.

— Нима бало, ҳеч нафасингни ростлаб ололмаяпсан? — деб мурожаат этди.

— Йўқ,— дедим, юзимни қирқулоқлар орасига яширганимча.— Йўқ, аллақачон нафасимни ростлаб олганман, гапиришим мумкин. Биз энди ажралишимиз лозим. Алан, мен сизни ёмон кўриб қолдим: юриш-туришларингиз ғалати кўриняпти, худодан қўрқмас экансиз: қисқаси, биз энди ажралишимиз керак.

— Дэвид, ҳеч қандай сабабсиз, бекордан-бекорга ажрашиб кетолмасак қерак,— деди Алан жиддий оҳангда.— Агар номимга доғ бўлиб тушадиган бирор нарса маълум бўлса, эски дўстлигимиз ҳурмати ростини айтишинг лозим: шунаقا-шунаقا деб, агар таниш-билишларим ёқмай қолган бўлса, мен сендан ўпкалашим лозим: бу ахир ҳақорат-ку.

— Алан, бу гапларнинг нима кераги бор? — дедим.— Жуда яхши биласизки, сўқмоқда анави Кемпбелл қонига коришиб ётибди.

У бир оз сўкут сақлаб турди-да, сўнг тилга кирди:

— Бир киши ва олижаноб миллат ҳақидаги чўпчакни эшитмаганмисан?

Мен уни насиҳатомуз эртак айтмоқчи шекилли, деб ўйладим.

— Эшишмаганман, эшишишни ҳам истамайман,— дедим.

— Ижозат берсангиз, мистер Бэлфур, барibir айтиб бераман,— деди Алан.— Кунлардан бир куни битта одам денгиз ўртасидаги қояга итқитиб ташланибди: ўчакишгандек ўша жой олижаноб миллатнинг севимли маскани экан: улар Ирландияга кетаётган чоқларида доимо қоя устида ҳордик чиқаришарди. Ўша қоянинг номи Скерривор бўлиб, у кемамиз ҳалокатга учраган жойдан унчалик олис эмас. Шундай қилиб, бечора одам: «Эҳ, ўлимим олдидан ўз боламни бир марта кўрсам эдим, дунёдан беармон кетардим!» дея дод солиб йиғлай бошлабди. Унинг юрак-бағри эзилаётгани, олижаноб миллат қиролининг қулоғига етиб борибди ва раҳмдил қирол ер остидаги хазинани қўриқлайдиган бадбашара, серсоқол митти кишига фармон берибди: «Учиб бориб болакайни қопчиққа солиб келинглар ва анави шўрпешона ухлаётган пайтда ёнига ётқизиб қўйинглар!» Одам ўйқудан ўйғонса, ёнгинасида қопчиқ турганмиш, қопчиқнинг ичиде эса бир нарса қимирлармиш. Аксига олгандек, у ўзининг соясидан ҳам чўчийдиган жаноблар тоифасидан экан: хуллас, тағин бирор кор-ҳол рўй бермасин деб, қопчиқнинг оғзини очишдан аввал эҳтиёт шарт, ханжарини қопчиққа бир тиқиб олибди: кейин қопчиқни мундай очиб қараса, болакай ўлиб ётганмиш... Назаримда, мистер Бэлфур, сиз ўша одамга қариндошга ўхшайсиз.

— Демак, бу ишда сизнинг қўлингиз йўқми? — деб шартта ўрнимдан туриб кетдим.

— Авваламбор, мистер Бэлфур, эски дўстлигимиз хурмати, бирорни асфаласоғилинга жўнатмоқчи бўлган ёвуз ниятли киши қармоқни елкасига ташлаб олиб саир этиб юрмайди, қилич ёки милтиқ кўтариб юради. Қолаверса, қабиладошларини маломатга қолдирмаслик учун бундай ишни она юртидан олисроқ жойда амалга оширади,— деди Алан.

— Ҳа, бу гап тўғри!

— Энди,— деб давом этди Алан ханжарини қинидан суғуриб, кейин уни тантанавор кўксига босди,— мен мана шу муқаддас тиғ хурмати қасам ичиб айтаманки, тушимда ҳам, ҳушимда ҳам мутлақо қотилликка алоқадор эмасман!

— Худога шукр! — деб хитоб қилдим ва унга қўлимни узатдим.

Алан қўлимга қайрилиб ҳам қарамади.

— Муни қара-я, битта Кемпбеллнинг иши шунчалик мухим экан-да! — деди.— Дафъатан камёб ҳодисага ўхшамайди-ку!

— Ҳадеб мени айблайвериш ҳам унчалик тўғри эмас-да! — дедим.— Кемада нималар деганингизни бир эслаб кўринг, ахир! Ҳартугул, худога шукрки, васваса билан қилмиш ўртасида жуда катта тафовут бор. Ҳар ким ҳам васвасанинг комига тушиб қолавермайди, лекин Алан, совуқонлик билан битта инсонни жонидан жудо қилиш ҳар кимнинг қўлидан келавермайди!..— Нафасим бўғилиб, сўзлашдан тўхтаб қолдим.— Мабодо ~~хабарингиз~~ йўқми, бу ишни ким қилдийкин-а? — деб ~~шишиб~~ қўйдим бирпасдан, кейин.— Ўша давангирдай ~~сигитни~~ (қоп-қора чакмонли) танимайсизми?

— Чакмоннинг ранги қора эканига кафолат беролмайман,— деб жавоб берди Алан муғамбирлик қилиб.— Назаримда, чакмон кўк тусли эди.

— Кўк бўладими, қора бўладими — бунинг аҳамияти йўқ, лекин сиз ўша одамни танидингизми?

— Вижданан айтсан, қасам ичолмайман,— деди Алан.— Шубҳасиз, у ёнимдан ўтиб кетди: ҳамма бало шундаки, биласанми, худди ўша дамда бошмоғимнинг боғичини боғлаётган эдим.

— Ундей бўлса, балки уни танимасдим, деб қасам ичарсиз-а? — дедим жаҳлим чиқиб. Бир томондан, унинг важ-карсонидан кулгим қистарди.

— Бундай ҳам қилолмайман,— деб жавоб берди у.— Эҳ, Дэвид, биласанми, хотирамнинг мазаси йўқ: ҳамма нарсани эсимдан чиқариб қўявераман.

— Лекин мен баъзи нарсаларни аниқ кўрдим,— дедим.— Сиз жўрттага ўзингиз билан мени уларга яққол кўрсатдингиз, аскарларни чалғитиш учун шундай қилдингиз.

— Бўлиши мумкин,— деб фикримга қўшилди Алан.— Менинг ўрнимда бошқа бир инсофли инсон бўлганида ҳам шундай қиласарди. Бу ерда бизнинг ҳеч қандай айбимиз йўқ.

— Ҳа, биздан бекорга шубҳаланишялти: ваҳоланки, баҳоналарни қалаштириб ташлашимиз мумкин! — дедим қизишиб.— Ҳақ одам айбдорга нисбатан қандайдир устунликка эга бўлади!

— Дэвид, ҳақ одам ўзига тақалаётган айбни судда рад этиш имкониятига эга: ўйлайманки, ўқ узган давангир учун чангалзордан бошқа паноҳ йўқ. Агар сен

ўз қўлингни булғамаган бўлсанг, демак қўллари унчалик тоза бўлмаган одамлар ҳақида кўпроқ ғамхўрлик қилишинг лозим. Шундагина олижаноб христиан бўласан. Негаки, агарда ҳаммаси тескари бўлганда борми, айтайлик, ўша афт-башарасига тузуккина назар солишга ҳам улгурмаган давангир бизнинг ўрнимизда, биз унинг ўрнида бўлсак (ахир шундай бўлиши ҳам мумкин эди-да!) яъни у аскарларни чалғитганида, ниҳоятда миннатдор бўлардик!

Мана шунақа, мунозара бошланиб қолса, Алан икки оёғини битта этикка тиқиб тураверади. Аммо у соддадиллик билан вайсар, ҳақлигига ростдан ҳам ишонарди, зиммасидаги бурчни адо этиш учун ўз ҳаётини қурбон этишга ҳам рози бўларди. Мен миқ этмасдим. Беихтиёр мистер Хендерлендинг сўзларини эсладим: «Биз ана шу ёввойи тоғликлардан ўрнақ олсак савоб бўлар эди». Нима ҳам дердим, ўзимга яраша сабоқ олдим. Аланнинг ғурӯр ва бурч ҳақидаги тасаввурлари телба-тескари эди: ўшалар учун ўйламай-нетмай ўзини ўтга-чўққа ураверди.

— Алан, олижаноб христиан хусусида сизчалик тасаввурга эгаман деёлмайман-у, аммо сўзларингизда шундоқ ҳам олижаноблик сезилиб турибди,— дедим.— Шунинг учун яна бир бор сизга қўлимни узатаман.

У иккала қўлини менга ўзатди ва агар барча таъна-дашномларингни эшитганимдан кейин ҳам ярашётган бўлсам, билгинки, каминани сеҳрлаб қўйибсан, деб тўнғиллади. Сўнг қиёфаси тундлашди: фурсатни қўлдан бой бермай, зудлик билан жуфтакни ростлашимиз даркор: ҳозир Эпиннинг тит-питини чиқариб ташлашади. Йўлда дуч келган ҳар бир кимсани сўроққа тутишади: мен шундоқ ҳам қочоқман, сен бўлсанг, истайсанми-истамайсанми, қотилликка алоқадорсан, деди у.

— Во-о! — деб пишқириб юбордим атайлаб жаҳлини чиқариш учун.— Мен ватанимнинг одил судидан қўрқмайман.

— Ватан сеники бўлса кошкийди! Худди бу ерда — Стюартлар юртида кимдир сени суд қиласигандек гапирасан-а!

— Қаерда суд қилишларининг унчалик аҳамияти йўқ, ҳаммаёқ Шотландия-ку! — дедим.

— Дўстим, баъзан сенга қараб туриб тушунолмай қоламан,— деди Алан.— Ахир сен Кембелл ўлдирилганини ҳисобга олгин-да. Демак, Инверэрида — Кембеллар инида суд бўлади, ўн беш бош Кембелл эса

қасамёд қилган ҳакамлар қаторида ўтиради, судья ўриндиғига эса Кембелларнинг Кембелли — герцог ўлигини ташлаб олади. Дэвид, боя одил суд, дедингми? Тоғ сўқмоғида ҳали Гленур қай йўсинда ўлимга маҳкум этилган бўлса, одил суд ҳам худди ўшандек тартибда иш кўради.

Ростини айтсам, бу гаплар каминани унчалик қаноатлантирумади, агарда Алан ҳақ бўлганда, мен бўнга тўла-тўкис қаноат ҳосил қиласдим: ўйлашимча, ў баъзан кўпиртириб юборарди: масалан, суд маслаҳатчилирдан фақат ўн биттаси Кембеллар эди, холос. Тўғри, бошқа тўрттаси ҳам сўзсиз герцогга бўйсунарди. Умуман, сиртдан муҳим бўлиб кўринадиган бу нарсалар деярли аҳамиятсиз эди. Шунга қарамай, герцог Аргалский масаласида Алан билан роса талашиб-тортишдим: «Ахир у ақли расо акобир, ҳалол одам, бекорга виг эмас-ку!» дедим.

— Буни қара-я! — деди Алан мийиғида кулиб.— Унинг виг экани тўғри, бунга ҳеч ким шубҳаланмайди, лекин у ўз қабиласининг баҳодир ўлбошчиси эканини ҳам эсдан чиқармаслик лозим. Қабиладошлари нима дейишади: Кембеллни отиб ўлдиришса-ю, олий суд раиси қабилаларининг ўлбошчиси бўлишига қарамасдан, бирор дорга осилмаса? Мен бир неча марта иқрор бўлганманки, текисликда яшайдиган аҳоли негадир яхши-ёмонни ажратадим.

Ўзимни тутолмасдан, ҳаҳолаб юбордим: Алан ҳам менга қўшилишиб қаҳқаҳа отаётганини кўриб ҳайрон бўлдим.

— Йўқ, йўқ, Дэвид,— деди.— Ҳозир тоғда турибмиз, агар мен: «Жуфтакни ростлаш керак», десам, сира ҳам пайсалга солиб ўтирганин: орқа-олдингга қарамай қочавер! Биламан, тоғу тошларда, ўрмонда асал сақланмайди, очдан ўлиш ҳеч гап эмас, аммо қизил мундирлилар ўқига учсанг ёки қамоққа тушиб қолсанг, ундан ҳам баттар бўлади.

Ундан, энди қаёққа қараб қочамиз, деб сўрадим. «Жануб томонга», деди. Ростини айтганда, тезроқ уйга қайтиб бориб, амаким билан ҳисоб-китобни ўрнига қўйишни жуда ҳам истардим. Шунинг учун Алан билан бирга йўлга тушишдан воз кечадим. Бундан ташқари, одилона суд бўлиши ҳақида хомтама бўлмоқлик аҳмоққа хос ҳусусият эди: Аланнынг сўзлари шубҳага ўрин қолдирмасди. Ҳадиксираб қолдим: Алан ҳақ бўлса, мени соғ қўйишмайди. Агар қай йўсинда ўлишни

истайсан, деб сўрасалар, ҳеч қандай имконим қолмаган тақдирдагина, дорга оса қолинглар, деб жавоб берардим. Бир пайтлар дайди аттордан мўъжаз китобча сотиб олгандим: унда манзума ва манзумага ишланган расмлар чоп этилганди: жирканч қурилмани (дорни) илк бора ўшанда кўрганман — кўз ўнгимда мудҳиш манзара намоён бўлдию одил судга бўлган ишончимга раҳна тушди.

— Алан, энди бўлар иш бўлди,— дедим.— Сиз билан кетаман.

— Олдиндан айтиб қўяй, бу сенга ўйинчоқ эмас,— деди Алан.— Доимо оч-наҳор юрасан, на партӯшак, на кўрпа бор. Какликлар билан ўрин талашиб ётасан, овчидан ҳурккан буғудай ҳаёт кечирасан: қўлдан қуролингни қўймай ухлайсан. Ҳа, оғайнни, хавф-хатардан фориғ бўлгунча бир неча чақирим мобайнида машақатга дош бериш лозим. Олдиндан ҳаммасини ўргатиб қўяман, чунки мен бунаقا ҳаётнинг ипидан-игнаси гача биламан. Яна қандай йўл бор, деб сўрайдиган бўлсанг: очиги, бошка ҳеч қандай йўл йўқ. Ё орқамдан овлоқ сўқмоқлар бўйлаб кетасан, ёки дор остига равона бўласан.

— Битта йўлни танлаш қийин эмас,— дедим ва шартномамизни қўл сиқишиб мустаҳкамладик.

— Ана энди қизил мундирлиларга бир кўз ташлаб қўяйлик-чи! — Алан мени ўрмоннинг шимолий-шарқ чеккасига етаклаб борди.

Дарахтлар ортидан қарашимиз билан кўз ўнгимиизда кўрфазга тик тушган улкан қоя намоён бўлди. Атрофда ҳарсанг тошлар ястаниб ётар, яккам-дуккам арчагуллару эгри-буғри қайнин ниҳоллар бор эди. Ҳув, олисда — Баллахулиш томондаги ёнбағирда дам юқорига, дам пастга, гоҳ тепаликка, гоҳ жарликка қараб ўрлаётган миттигина қизил иблислар тобора камайиб борарди. Бақир-чақирлар тиниб қолган, демак, аскарлар ҳолдан тойган бўлсалар ажаб эмас, лекин улар ҳамон бизнинг изимииздан келишарди, ҳойнаҳой, қочоқларга етиб олишга ишончлари комил шекилли.

Алан мийигида кулимсираган кўйи уларни кузатиб турди.

— Ана холос,— деди у.— Чув тушиб қолганликларини англаб етгунларига қадар йигитларнинг тинкаси қуриб кетади! Бундан чиқдики, Дэвид, тағин бирпас нафасимизни ростлаб олишимиз мумкин: ўтириб тамадди қиламиз, сувдонимдан бир-икки қултум сув ичамиз. Кейин Охарн томон йўл оламиз, қариндошим Жеймс

Гленнинг хонадонига ташриф буюрамизу уст-бошларимни, қуролимни ва йўл ҳаржига пул-мул оламиз-да, ҳайё-ҳыйт деб, бошимиз оқкан томонга қараб кетамиз.

Биз майсалар устига ўтириб овқатландик, сув ичдик: кимсасиз, ёввойи, азим тоғлар ортига ботаётган қүёш кўриниб турарди: дўстим билан ана шу ўлкада сарсари кезмоғим лозим. Ўтган кунлар мобайнида кўрган-кечиргандаримиз ҳақида қисман довонда ўтирган чоғимизда, қисман Охарнга кетаётган пайтимизда бир-биримизга гапириб бердик: Аланнинг саргузаштидан энг муҳим, диққатга сазовор ўринларини қуида баён этмоқчиман.

Шундай қилиб, мени итқитиб ташлаган тўлқин орқага қайтар-қайтмас у борт тўсиғи ёнига югурни боради-да, аланг-жаланг қилиб мени қидира бошлайди: гирдобда жонҳолатда қўлларимни шалоп-шулуп қилаётганимни ҳам ва сўнгги дамда лангарга ёпишиб олганимни ҳам элас-элас кўриб қолади. Худди шу нарса кўнглида умид уйғотади, омон-эсон қуруқликка чиқиб олишимга ишонади ва қаерга борса, ўзидан кейин албатта бирор нишона қолдириб кетишга аҳд қилади; мен эса оқибатда Эпин ерига чиқиб олдим.

Охири кемадаги қайиқни сувга туширишиб икки-уч киши унга ўтириб олишга ҳам улгуради: худди шу чоқда олдингисидан ҳам улканроқ тўлқин ёпирилиб келади ю кемани қоя устидан юлқиб олади: агар кема харсанг қиррасига санчилиб қолмагандা, сувга ғарқ бўлиб кетарди. Кема қояга тумшуғи билан урилади ю қуйруқ қисми сувга ботиб кетади. Қуйруқ қисми ҳавода муаллақ қолади ю тумшуғи денгизга санчилади ва олдинги томондаги туйнукдан кема ичкарисига бир тегирмон сув шариллаб кира бошлайди.

Сўнгра шунаقا бир ҳодиса рўй берадики, гапираётуб Аланнинг ҳам ранги бўзариб кетди. Умумий хонада иккита оғир ярадор каравотда ётган экан, туйнукдан сув отилиб кираётганини кўриб улар кемамиз чўкиб кетибди, деб ўйлашади ва дод-фарёд кўтара бошлашади, палубада турган денгизчилар зудлик билан қайиқка сакраб тушадилару эшкакларни босиб олишади. Бироқ улар икки юз қулоч узоқлашмасданоқ яна баҳайбат тўлқин бостириб келади ю кемани қояга қапишиб турган жойидан тортиб олади ва кема елканларини пуфакдек шишириб қувлашмачоқ ўйнаётгандек қайиқ ортидан шитоб билан йўлга тушади, аммо аста сувга чўқаверади: гўёки сув остида қандайдир кўзга кўринмас қудратли

Қўл уни сув қаърига тортаётгандек чуқурроқ ботади ва ниҳоят чўкиб, Дайсетнинг «Васият» кемаси устида ҳайбатли тўлқинлар бирлашиб кетади.

Қайиқ то қирғоққа етгунча эшкакчилар лом-мим дейишмайди, ярадорларнинг ўлим олдидаги дод-фарёди ҳамманинг тил-жағига кишан солиб қўйган эди. Аммо қуруқликка етай деганда Хозисон бирдан сергак тортади ва Алани ушланглар, деб фармон беради. Афтидан, фармон денгизчиларга унчалик ёқмайди, улар нима қилишларини билмасдан бир жойда депсиниб тураверадилар: Хозисон эса қутуриб кетади: «Алан энди ёлғиз, унинг пули жуда кўп, мана шу ювуксизнинг қасофати туфайли кема ғарқ бўлди, оға-иниларимиз ҳалокатга учради: ҳаммаси учун бирйўла қасос оладиган ва катта бойликни қўлга киритадиган фурсат келди!» деб бўкиради. Улар етти киши эди, боз устига, Алан суюнишга яқин атрофда бирорта харсанг ҳам кўринмасди: денгизчилар аста-секин тарқалишиб, уни қуршай бошлайдилар.

— Худди шу пайт ҳалиги сарғимтирир паканавой бор эди-ку... хаҳ, оти нимайди-я, хуллас, ўша олдинга чиқди,— деб ҳикоясини давом эттириди Алан.

— Унинг исми Риак,— дедим.

— Ҳа, ҳа, Риак! Сира ишонгим келмайди, ўша менинг ёнимни олди; денгизчилардан, жазодан қўрқмайсизларми, деб сўрадим. Кейин: «Ундай бўлса, мен мана шу тоғлик билан елкама-елка туриб сизларга қарши курашаман, жин урсин!» деди. Биласанми, ўша сариқ попушак унчалик ёмон одам эмас экан,— деди Алан.— Ҳали виждонини йўқотмаган экан.

— У менга ҳам баҳоли қудрат яхши мӯомала қиласарди,— дедим.

— Аланга ҳам ёмонлик қилмади,— деди оғайним.— Қолаверса, у табиатан каминага ўхшар экан! Биласанми, Дэвид, кема ҳалокати ва анави баҳтиқароларнинг дод-фарёди унинг юрак-бағрини куйдириб юборди. Ўйлашимча, ҳамма жумбоқ мана шу ерда бўлса керак.

— Эҳтимол,— дедим,— Дастлаб, пулга у ҳам бошқалардан кам кўз олайтиргмаган эди. Хозисонга нима бўлди?

— Менимча, жини қўзиб қолди. Лекин паканавой менга: «Қоч!» дедиую жуфтакни ростладим. Фақат соҳилда уларнинг тўдалашиб турганини кўриб қолдим, холос. Назаримда, ҳар хил дунёқараашлар тўқнашиб қолганди.

— Яъни, буни қандай тушунса бўлади?

— Муштлашув бошланди,— деб тушунтириди Алан.— Кўз ўнгимда биттаси қопга ўхшаб гурс этиб йиқилди. Афсуски, томоша қилиб ўтиришга вақтим йўқ эди. Хабаринг бўлса, Малл оролининг нариги томонида Кембеллар қабиласи яшайди; бизнинг қариндошлари мизга эса Кембеллар жамоати муносиб эмас. Акс ҳолда, ҳеч қаёққа қочиб ўтирмасадим, сени ўзим излаб топардим ва паканавойга ҳам ёрдам берардим, албатта (қизиқки, Алан зўр бериб мистер Риакнинг бўйи пастилигини таъкидларди-ю, лекин ўзининг ундан салгина баланд эканини мутлақо эътиборга олмасди). Шундай қилиб, оёғимга зўр бердим,— деб давом этди Алан.— Йўлда учраган одамга, ҳув анави соҳилда ҳалокатга йўлиққан кема ётиди, деб эълон қилавердим. Оғайнчалиш, буни эшитиб улар менга қиё ҳам боқишмасди! Э-э, бир-бирини қувиб, қирғоқ томонга югуришганини бир кўрсанг эди! Бориб кўришсаки, бекорга ҳалпиллашган экан, майли, Кембеллар қавмига бунаقا «мұсобақа» зиён қилмайди. Менимча, худойим ўша қабилани мазахлаш учун атайлаб кемани синдириб, ўтин қилиб ўтирмадию бутунича чўктириб юборди. Фақат бу ҳол сенга зарар етказди, холос. Агар соҳилга лоақал пайраҳа оқиб чиққанини кўрганларидаям, бутун қирғоқни элакдан ўтказишардию сени топиб олишарди.

## Ўн тўққизинчи боб

### ҚЎРҚУВ МАСКАНИ

Биз олға интилаётган пайтимизда кеч кириб қолди. Қундузи осмонни увада мисоли титилиб кетган, булут қоплаганди, оқшом чўккандан сўнг эса қора булут босиб келдию ёз фасли бўлишига қарамасдан атроф зимзиё бўлиб қолди. Тоғнинг ғадир-будир нишаблиги бўйлаб кетиб бораардик; Алан олдинда туртиммай илгарилар, мен унинг йўлдан адашмаётганига ҳайрон қолардим.

Ниҳоят, кечки соат ўн яримларда пастиликка туша бошладик: пойимизда водий ястаниб ётар, гулхан жоласи кўзга ташланарди. Хонадон эшиклари очилиб ёпилганда ўчоқдаги олов ёки шам шуъласи кўринниб қолар, уй атрофида, қўрғон ҳовлисида эса бошлари

узра машъала кўтариб олишган беш-олти киши елиб-югуришарди.

— Нима бало, Жеймс ақлдан озиб қолмадимикан, ишқилиб? — деди Алан.— Агар ҳозир аскарлар бўлса унинг ҳолига маймунлар йиғларди. Менимча, у йўлга пистирма қўйган бўлса керак; биз келган йўлни Жеймс жуда яхши билади, лекин аскарлар зинҳор-базинҳор тополмайди.

Шундан кейин Алан уч марта шартли ҳуштак чалди: дастлабки ҳуштак товуши янграши билан барча олов атрофидагилар қотиб қолгандек бўлди, гўё машъалачиларни қўрқув ерга михлаб қўйгандек эди; ҳуштак учинчи бор чалингандা яна ғимир-ғимир бошланди. Биз шу тариқа қўрғон аҳолисини тинчлантиридик-да, нишабликдан тушдик ва дарвоза олдида (қўрғон бадавлат деҳқонларнинг хўжалигини эслатарди) эллик ёшлар атрофидаги қўркамгина, новча киши йўлимизга пешвоз чиқдию гэллар тилида Аланга бир нималар деди.

— Жеймс Стюарт, шотланд тилида гапиришингни илтимос қиласман,— деди Алан.— Чунки битта меҳмон бошлаб келяпман, у бизнинг тилимизни тушумрайди.— У қўлтиғимдан олди-да, қўшимча қилди:— Манави йигитчани назарда тутяпман; ёш мулкдор, пастликда яшайди, мулкдор, менимча унинг ер-мулкини эсламаганимиз маъқул, акс ҳолда эгасининг мазаси қочиб қолиши мумкин.

Жеймс Глен мен томон ўгирилди-да, қойиллатиб таъзим бажо келтирди ва дарҳол Аланга мурожаат этди:

— Бай-бай-бай, кўргиликни қара-я! — деб хитоб қилди.— Энди бошимизга кулфат ёғилади!— У бармоқларининг бўйинларини қисирлатди.

— Дийдиё қилаверма! — деди Алан.— Бир ёмоннинг бир яхиси бўлади. Худога шукр, Колин Рой адои тамом бўлди!

— Шундайку-я, лекин худо ҳаққи, уни тирилтирган одамнинг бошидан тилла сочардим! Ёв қочса, ботир кўпаяди, дейдилар. Бироқ энди бўлар иш бўлди, бўёғи синди. Сенингча, ким жазоланади? Қотиллик Эпинда рўй берди, демак Эпин жавобгар бўлиши лозим. Алан, ўзинг ўйлаб кўргин ахир, мен аёлманд кишиман.

Суҳбат мобайнинда хизматкорларни томоша қилиб турдим: баъзилар томга нарвон қўйишдию пичан ғарами ичидан милтиқ, қилич каби қурол-яроқларни чиқа-

риб олишди; бошқалар эса буларни қаёқларгадир ташиб кетиши; водий ичкарисидан эшитилаётган дастали сүқаларнинг товушидан билдимки, улар қурол-яроқи ер остига кўмишарди. Ҳар ким жонини жабборга бериб ишларди-ю, лекин ҳеч қандай тартибиа риоя этишмасди: гоҳ иккি киши битта қуролга ёпишарди, гоҳида боши узра машъал кўтариб юрганлар бир-бири билан тўқнашиб кетарди. Алан билан гаплашаётган Жеймс баъзан сухбатни бўларди-да, баланд товушда қандайдир кўрсатмалар берарди, аммо буйруқлар кўнгилдагидек бажарилмасди. Машъала ёритиб турган кишиларнинг қиёфаларидан ғала-ғовур уларни хйла эсанкиратиб қўйганини сезиш мумкин эди; бирор товушни кўтариб гапирмасди, лекин пичир-пичирлар ҳам ташвишли, қаҳрли эшитиларди.

Шу пайт оқсоҷ уйдан тугунчами, бўғчами кўтариб чиқдио унга кўзи тушган Алан бирпасда каловланиб қолди (уша ҳолатни эсласам, ҳанузгача кулгим қистайди).

— Анави қизнинг қўлидаги нарса нима? — деб сўради тараддулданиб.

— Алан, уйни тартибиа соляпмиз,— деб жавоб берди Жеймс бир оз қўрқув, айни чоқда хушомадгўйлик оҳангига.— Энди Эпинни бошдан охиригача титиб ташлашади; ғамимизни еб қўймасак, арзимаган нарсага ҳам тирғалишлари ҳеч гап эмас. Тушунасан-ку, милтиқ билан қиличларни торф конига кўмиб қўймасак бўлмайди; анави қизнинг қўлидаги тугунчада фарангича кийим-кечакларинг бор. Менимча, уни ҳам кўмиб қўйсак ёмон бўлмасди.

— Фарангича кийимларим ҳам ер остига кўмиладими?— деб бақириб юборди Алан.— Асло ҳожати йўқ!— Оқсоҷ қўлидан тугунчани юлқиб олди-да, кийимларини алмаштириб чиқиш учун омбор сари йўл олди.

Мен унинг қариндоши билан ёлғиз қолдим. Жеймс мулозамат кўрсатиб каминани ошхонага бошлаб кирди, столга ўтқазди, ўзи ҳам ёнимдан жой олди ва ҳар хил кулгили воқеаларни гапириб бериб, зериктирмай ўтириди. Бироқ кўп ўтмасдан ташвишга тушиб қолди. Мени ҳам унутиб тирноқларини ғажий бошлади; гоҳ ҳузурида меҳмон борлиги эсига тушиб қолардию зўраки жилмайиб қўярди ва бир-икки оғиз сўз қотар, сўнгра бутун вужудини яна қўрқув эгалларди. Рафиқаси ўчоқ рўпарасида ўтирганча, юзини кафтлари билан тўсиб йиғлар, катта ўғли чўкка тушиб полда ётган қоғоз уюмларини титкилар, баъзи бирларини танлаб,

уни ўчоққа ташлар, куйиб кул бўлгунча кузатиб туради; йиғлайвериб қовоқлари шишиб кетган оқсоҳ ўзини қаёққа қўйишни билмасди ва бурчакка бориб оҳистагина пиқ-пиқ йиғларди; дам-бадам эшикдан бирров мўралардию энди нима қиласиз, деб сўрарди.

Охири Жеймснинг тоқати тоқ бўлди, жойида ўтиромай қолди ва беодобчилик қилаётгани учун ўзр сўради-да, мендан хонани айланиб юришга рұксат сўради.

— Сэр, билиб турибман, сариқ чақага ҳам қиммат сұхбатдошман,— деди у.— Барибир хаёлимга ўша баҳтсиз ҳодисадан бошқа ҳеч нарса келмаяпти; шунинг оқибатида қанчадан-қанча бегуноҳ кишиларнинг бошига бало ёғилади, ахир!

Бир оздан сўнг ўғли бошқа қофозларни ёқаётганини пайқаб қолдию сабр косаси тошди: Жеймснинг аҳволига назар ташлаш ҳам азоб эди. У йигитчанинг юзига бир-икки марта тарсаки тортиб юборди.

— Хе-е онангни... тентак! — деб қичқирди у.— Нима, отангни дорга осдирмоқчимисан? — Хонада меҳмон ўтирганини ҳам унутдию хуморидан чиққунча ўғлини гэл тилида роса сўқди. Йигитча миқ этмасди, лекин «дер» сўзи эшитилиши биланоқ хонадон соҳибаси юзини қўллари остига яшириб ҳўнграб юборди.

Бундай ҳолатни кўриш, бундай гапларни эшитиш бегона одамга ниҳоятда оғир эди; Алан қайтиб келганда ўзимда йўқ хурсанд бўлиб кетдим, ўзининг фарангича кийим-бошида олифта кўринарди, аммо инсоф билан айтганда, кийимини башанг деб бўлмасди; ғижимланиб, тўзиб кетган эди-да! Кейин менга навбат келди: хўжайниннинг ўғилларидан биттаси каминани ошхонадан ташқарига бошлаб чиқиб, кийимларимни алмаштириб олишимни сўради (аслида, аллақачон шундай қилишим лозим эди); менга тоғликлар қиядиган буғу терисидан тикилган бир жуфт бошмоқ берди; дастлаб, бундай оёқ кийимида юриш хийла ноқулайдек туюлди, лекин бир оз юриб кўрганимдан сўнг амин бўлдимки, бу жуда зўр пояфзал экан.

Ошхонага қайтиб кирсам, назаримда, Алан ўз режасини айтиб улгурган эди; ҳархолда, сукут аломатида сездимки, бирга йўлга тушамиз, аллақачон сафар тадориги кўрилганди. Бизга қиличу иккитадан тўппонча беришди. Қиличбозликка уқувим йўқлигини яшириб ўтирамадим. Қўшимча тарзда анча-мунча ўқ, бир чипта халтада сули ёрмаси, темир лаганча, сувдонни тўлдириб

ажойиб фарангি майидан қўйиб беришди. Хуллас, йўлга чиқишига тап-тайёр эдик. Тўғри, пул унчалик мўл топилмади. Чўнтағимда икки тангага яқин пул қолган эди; Аланнинг тилла тўла камари эса бошқа бир чопардан бериб юборилганди, Ардшилнинг ишончли вакилида бор-йўғи ўн етти пенс қолганди, холос. Маълум бўлишича, Жеймс ижарадорларнинг ҳар хил юмушлари туфайли Эдинбургга тез-тез қатнаб тураркан ва кўпгина чиқимдор бўлиб қайтар экан: шунинг учун амал-тақал қилиб зўрға уч шиллингу беш ярим пенс тўплаб берди. Боз устига, пулининг кўпгина қисми мис чақалардан иборат эди.

— Етмайди,— деди Алан.

— Сен шу яқин атрофдаги ишончли жойда яшириниб ётишинг лозим,— деди Жеймс.— Кейин хабар қиласан. Алан, гапим малол келмасин-у, лекин шошилишинг керак. Қандайдир икки-уч танга учун имирсилаб ўтиранг бўлмайди, ғанимат фурсатни бой беришинг мумкин. Агар шу ерда эканингни сезиб қолишса худо кўрсатмасин-у, лекин юрагим сезяпти-да, бирпастда тинтув бошланади ва ҳамма айбни сенга ағдаришади. Мабодо қўлга тушсанг, мени ҳам соғ қўйишмайди; ахир биз яқин қариндошмиз, бу ерларда меҳмон бўлган пайтингда яшириб қўярдим. Агар мени қўлга олишса...— У тилини тишладиую ранги оқариб кетди ва тирноғини ғажий бошлади.— Агар мени қўлга олишса, бизникиларга жуда оғир бўлади,— деб гапини якунлади.

— Эпиннинг қора кунлари бошланади,— деди Алан.

— Буни ўйлашнинг ўзи даҳшат! — деди Жеймс.— Бай-бай-бай, Алан, биз хотинларга ўхшаб валақлашиб ўтирибмиз-а! — У кафти билан деворга уриб қўйганида бутун уй зириллаб кетди.

— Тўғри-да, нима бўлти? — деди Алан.— Мана, пастликда яшайдиган дўстим ҳам шу ҳақда гапирган эди.— У мен томонга ишора қилди.— Афсуски, унинг гапларига қулоқ солмаган эканман.

— Биласанми, Алан, мабодо мени қамоқقا олишса, унда пул керак бўлади,— деди Жеймс босиқ оғангда. — Ўшанда нималар деганимнию сен нималар деганингни эслаб қолишади ва иш иккаламиз учун ҳам чаппасига кетади, фаҳмлаяпсанми? Фаҳмлаётган бўлсанг, яхшилаб ўйлаб кўр, ўз қўлим билан асосий белгиларинг хусусида изоҳат тайёrlашга, бошинг эвазига мукофот ваъда қилишга мажбур бўлажагимни наҳот тушунмаётган бўлсанг? Ҳа, ҳа, қочиб қаёққа ҳам борардим!

Қадрдон дўстга қўл кўтариш осон эмас, лекин ўша даҳшатли баҳтсизлик учун жавоб берадиган бўлсан, дўсти азиз, ўзимни ҳимоя қилишга мажбур бўламан. Тушундингми?

У бу сўзларни илтижо оҳангиди, Аланнинг мундири ёқасидан маҳкам ушлаб олган кўйи ирод этди.

— Ҳа,— деди Алан.— Ҳаммасини тушунаман.

— Алан, бу ерлардан тезроқ жўна... Ҳа, ҳа, Шотландияга қоч... Ўзинг қоч, танишингни ҳам эргаштириб қоч. Чунки жанубий ўлкалардан келган танишингнинг асосий белгилари хусусида ҳужжат тайёрлаш ҳам зиммамга тушади. Алан, ахир буни тушунасан, тўғрими? Тушунаман, дегин ахир!

Менга шундай туюлдими ёки ҳақиқатан ҳам Аланнинг ғазаби жўшиб кетдими?

— Жеймс, ахир бунинг қандай алоқаси бор? — деди ялинчоқ оҳангиди, бошини орқасига ташлаб.— Ахир уни бўёққа мен бошлаб келдим-ку! Мени сотқинга чиқариб қўйдингми!

— Шошма, Алан, ўзинг ўйлаб кўр! — деб хитоб қилди Жеймс.— Ҳақиқатнинг кўзига тик қара! Унинг асосий белгилари борасида барибир ҳужжат тузилади; буни Манго Кембелл жон-жон деб ёзиб беради. Ҳуш, ўша қофозни мен ёзиб берсам нима бўлти? Қолаверса, оиласи бор, ахир, Алан.— Иккаласи бирпас жим қолишди.— Алан, судни Кембеллар бичиб-тўқишиади,— деб яқунлади.

— Худога шукрки, жилла қурса, дўстимнинг исмини бирор билмайди,— деди Алан ўйчан.

— Билолмайди ҳам, Алан! Ишонмасанг, калламни олишинг мумкин!— деб бақирди Жеймс. У гўё менинг исмимни биладигандай, энди ўз манфаатига қарши гапираётгандек эди.— Лекин унинг қандай кийимда эканини, ташки кўринишини, ёшини ва бошқа белгиларини айтмасдан иложим йўқ. Ёки бошқа йўли борми?

— Сенга қараб туриб, ёқамни ушлаяпман,— деди Алан ғазабини яширмасдан.— Нима бало, бу йигитчани ўзинг ҳадя этган совға-саломларга буркаган ҳолда ҳароб этмоқчимисан? Дастрлаб, кийим-кечак бердинг, энди сотмоқчимисан?

— Нималар деялсан ахир, Алан! — деди Жеймс.— Йўқ, йўқ, мен устидан ечиб ташлаган кийимларни назарда тутдим-ку... Мангонинг кўзи тушган уст-бошини айтаман-да.

Менимча, бу кишининг иродаси синган, кўзига

кўринган ҳар қандай хас-хашакка осилишга ҳам тайёр туради; афтидан, доимо тергов жараёни хаёлидан нари кетмас, душманларининг қонталаш қиёфалию дор кўз ўнгида яққол намоён бўларди.

— Хўш, жаноб, нима дейсан? — деб Алан каминага мурожаат этди.— Ор-номусим сенинг ҳимоячингдир; агар рози бўлмасанг, ҳеч нарса рўй бермайди, зиммамдаги бурчимни адо этаман.

— Нима ҳам дердим,— деб жавоб бердим.— Сизлар нима ҳақда мунозара қилаётганларинг менга қоронғи. Агар оқилона фикр юритадиган бўлсак, фақат ўқ узган одамнигина шу тарзда айблаш лозим. Ўзингиз айтәётган ҳужжатларни, майли, тайёрлаб беринг; айборни қўлга туширсин, лекин ҳалол, айбсиз одамларга халақит беришмасин-да.

Алан билан Жеймс Глен гапларимни эшитиб даҳшатга тушишди, бири қўйиб-бири олиб бақира бошлишди; тилингни тийсанг бўларди, дейиши; ахир бу кўз кўриб, қулоқ эшитмайдиган иш бўлади-ку, Камеронлар нима деб ўйлашади (шундай қилиб, тахминим тасдиқланди: маморлик Камеронлардан бири қотил эди), нега тушунмайсан ахир, ўша давангирни тутиб олишлари мумкин-ку?..

— Кўриниб турибдики, бу гаплар хаёлингга ҳам келмаган экан! — дейиши кейин жўр бўлишиб. Улар шу қадар қизғин, жиддий оҳангда гапиришардики, бирдан ҳафсалам пир бўлди ва мунозара қилиб ўтириш бефойда эканини англаб қолдим.

— Бўпти, бўпти! — деб қўл силтадим.— Менинг устимдан, Аланнинг устидан ва агарда лозим бўлса, қирол Георгнинг устидан ҳам ҳужжат тайёрлайверинг! Учаламиз ҳам беайбмиз: янглишмасам, фақат шу нарса керак шекилли? Сэр, нима бўлганда ҳам мен Аланнинг дўстиман: агар унинг қариндош-уругларига ёрдам бериш лозим бўлса, ҳеч қандай хавф-хатардан қўрқмайман,— дедим Жеймсга юзланиб, у ҳовуридан тушгандан кейин.

Яҳшиликча розилик билдириб қўя қолганим тузук, деб ўйладим. Афтидан, Аланнинг ичини мушук таталаяпти; қолаверса, остона ҳатлаб ташқарига чиқишим билан барибир ўша лаънати ҳужжат тайёрланади: мендан сўраб ўтиришмайди. Аммо ноҳақ бўлиб чиқдим: чунки сўзимни тутгатар-тутгатмас миссис Стюарт ўриндиқдан сапчиб турдии кўзларида ёш, югуриб ёнимизга келди ва дастлаб мени, сўнгра Алани қучоғига

босди; оиласига нисбатан меҳрибонлик қилаётганимиз учун миннатдорлик изҳор этди, дуо қилди.

— Алан, сен ҳақингда гапириб ўтирмаиман, чунки шундай қилиш муқаддас бурчинг эди,— деди аёл.— Лекин мана бу йигитчанинг йўриғи бошқа: у бизни кига келдию бошимизга кулфат тушганини кўрди; қарасаки, ҳокими мутлақ бўлмиш оиласиз бошлиғи тилёғламалик қиялти, тавбасига таяниб турибди. Ҳа, ўғлим, сизнинг йўриғингиз бошқа. Афсуски, исми шарифингизни билмаиман, аммо юзингизни кўриб турибман; токи тирик эканман, қиёфангизни асло унутмаиман, ҳақингизга дуо қиламан.

У шундай деб мени ўпиб-ўпиб қўйди-ю, яна юм-юм йиғлай бошлади. Нима қиларимни билмай саросимага тушиб қолдим.

— Оббо, етар энди,— деди Алан қўпол қилиб.  
— Июль ойида тун шу қадар қисқа бўлади; қандай ўтиб кетганини ҳам билмай қоласан; эртага Эспинда шунақанги тўс-тўполон кўтариладики, асти қўяверасиз; ҳаммаёқни отлиқ аскарлар босиб кетади, «круахан»-лар<sup>1</sup> қулоқни қоматга келтиради, қизил мундирлилар оёқларини қўлларига олишиб югуришади, хуллас, биз тезроқ түёғимизни шиқиллатишмиз даркор.

Биз хайрлашиб шарқий йўналишга қараб йўлга тушдик: гоҳ тепаликка кўтарилар, гоҳ пастга тушардик. Атроф нимқоронғи, сокин тун ҳукмрон эди.

## Йигирманчи боб

### СИРЛИ СЎҚМОҚ БЎЙЛАБ

#### ҚОЯЛАР

Дам йўрғалаб юрардик, дам ўпкамизни қўлтиқлаб югурадик; тонг яқинлашгани сари илдамроқ қадам ташлар эдик. Дафъатан бу жойлар кимсасиздек туюларди, аммо тепаликлар орасидаги хилватгоҳларда пасқам кулбалар тиқилиб ётарди; йигирмага яқин ана шундай уй-жойларни ортда қолдирдик. Бундай фақирона уйларга яқинлашган пайтимиз ҳар гал Алан мени бир четда қолдирарди-да, ўзи бориб деворларни

<sup>1</sup> «Круахан» — Кемпбелларнинг жанговар чақириғи (муаллиф изоҳи).

билан дераза орқали икки-уч оғиз гаплашарди. Тоғликларда ҳар бир янгилик шу тарзда тарқатилади: бу бениҳоя муқаддас бурч ҳисобланардики, ҳатто ўлимдан қочиб бораётган Алан ҳам уни адо этишни мажбурият деб биларди, айни чоқда бу ҳол бошқалар томонидан ҳам бекаму-кўст ижро этиларди; шунинг учун ҳам биз безовта қилган кулбаларнинг кўпчилигига қотиллик ҳақидаги хабар аллақачон етиб келган эди. Дарвоқе, хийла олис масофадан бўлса ҳам бегона тилдаги узуқ-юлуқ сўзлар оҳангида одамларнинг янгиликдан ҳайратланиш ўрнига кўпроқ ваҳимага тушиб қолишларини пайқардим.

Жадал ҳаракат қилган бўлсак-да, ўзимиз истаган пайтгача панароқ жойга етиб бора олмадик: икки томони пурвиқор қоялардан иборат жарлик тубида юрган чоғимизда тонг отди; пойимизда ҳайқириб, кўпиклашиб соё оқарди. Тоғлар яйдоқ, на кўм-кўк майса, на бирон бир дараҳт кўринарди. Қирол Вильгельм замонида қирғинбарот жанг бўлган Гленкоу водийси шу ерлар эмасмикан, деб ўйлай бошладим. Сафар тафсилотлари масаласига келсак, тумтароқ тасаввурга эга бўлдим, холос: қаердадир тўғрига қараб юрдик, бошқа жойда қандайдир тўсиқни айланиб ўтдик; атрофни яхшилаб кўздан кечиришга фурсат йўқ эди. Қолаверса, асосан кечаси йўл босдик. Баъзи жойларнинг номларини сўрардим-у, гэлча бу номлар бирпасда эсимдан чиқиб кетарди.

Шундай қилиб, хосиятсиз жарликка етган пайтимизда тонг отди. Алан қошларини чимириди.

— Бу жой биз учун хийла ноқулай,— деди.— Боз устига, шу атрофга қоровул қўйилган бўлса ҳам керак.

Сойни иккига ажратиб турган қоя олдига етганимизда у чаққонроқ ҳаракат қила бошлади. Сув оқими торгина ўзандан шу қадар ҳайқириб ўтардики, беихтиёр тиззаларимга титроқ кирди; дара устини сув тўзони булат мисоли қоплаб олган. Алан ўнгу сўлига қарамасдан, тўппа-тўғри сув ўртасида турган тош устига сакраб ўтиб олди; тош кичкина бўлиб, нариги томонига юмалаб кетиш ҳеч гап эмасди. Мен ҳам чамалаб ўтирмасдан, унинг қасидан ўзимни отдим: Алан мени ушлаб қолди.

Шу таріқа кўпик сачрайвериб сип-силлиқ бўлиб қолган тош устида икковимиз ёнма-ён туриб қолдик;

нариги қирғоққа сакрайлик десак, теварагимиздан сув шовуллаб ўтарди. Бундан юрагим орқага тортиб кетдию қўрқанимдан кафтларим билан кўзларимни тўсиб олдим. Алан елкамдан ушлаб силтай бошлади; унинг лаблари қимираётганини кўриб турардим, холос. Аммо нима деяётгани сувнинг шовуллаши ва саросимага тушиб қолганим туфайли қулоғимга кирмасди; бирдан Аланнинг юзи қизариб кетганини, депсинаётганини илғаб қолдим. Демак, ғазаби қўзибди. Айни пайтда шиддаткор оқимга кўзим тушдию яна юрагим ёрилгудек бўлиб кўзларимни чирт юмиб олдим: юзимга сув заррачалари уриларди. Шу тобда Алан сувдоннинг оғзини лабларимга маҳкам босди-да, зўрлаб менга коњъяк ичирди; тўрт-беш қултум «оби замзам» ичимга кириши билан томирларимда қон гупуриб кетди. Кейин у қўлларини оғзига карнай қилганча қулоғимга: «Хоҳласанг — ғарқ бўлиб кетгин, хоҳласанг — дорга осилгин!» деб қичқирди. Сўнгра терс бурилдию бор кучи билан ўзаннинг нариги томонига сакради ва омон-эсон соҳилга ўтиб олди.

Тош устида ёлғиз қолдим. Коњъяк таъсир этиб, қулоқларим шанғиллай бошлади. Дўстимнинг жасорати хаёлимдан нари кетмасди; агар ҳозир зудлик билан сакрамасам, кейин ҳеч қачон таваккал қилишга журъатим етмаслигига ишончим комил эди. Одатда, аччиғим чиқиб турганда ҳеч нарсадан тап тортмасдим: шу тобда юрагим дов бермаётганига қарамасдан сал энгашиб шаҳд билан олдинга ташландим. Ўйлаганимдек, қўлим аранг қояга етдию сирпаниб кетди, жонҳолатда яна қояга ёпишдим, лекин тағин қўлларим сидирилиб кетди: мени гирдоб ўз қаърига торта бошлади; шу пайт Алан сочимдан чангллаб олди, сўнг ёқамдан маҳкам тутди-да, қирғоққа тортиб чиқарди.

У лом-мим демасдан жонининг борича қочишга тушди, мен ҳам ноилож ўрнимдан тура солиб ортидан югурдим. Илгари тезда чарчаб қолардим, ҳозир эса лат еганман; боз устига, қўрқувдан сўнг ҳамон ўзимни ўнглаб ололмагандим ва кайфим ҳам тарқамаган эди. Туртиниб-суртиниб югура бошладиму биқинимда санчиқ пайдо бўлди. Паст-баланд қоялар оралаб бораётган Алан пурвиқор қоя остида тўхтаганида бирдан қувониб кетдим.

Рўпарамиздаги улкан чўқини «қоя» деб ўйлаганим, аслида, чўққилари бир-бирига бирлашиб кетган қўшалоқ қоя экан; баландлиги йигирма футча келарди, бир

қарашда устига чиқиб бўлмайдигандай туюларди. Ҳартугул, Аланнинг тўртта қўли бор, дейиш мумкин эди. Шунга қарамасдан, у қояга тирмашиб чиқмоқчи бўлган чоқда икки марта эплолмади: учинчи галги уринишида елкамга чиқди-да, бор кучи билан сильтандию юқорига осилиб қолди; ўмровим синиб кетган бўлса керак, деб ўйладим. Ҳуллас, у типирчилай-типирчилай қоя тепасига чиқиб олди ва ҳарм камарининг бир учини менга узатди; камарга осилдиму баҳтимга қояда иккита чуқурча борлигини кўриб қолдим ва ўшанга оёғимни тирадим-да, бир амаллаб юқорига чиқдим. Фақат шундан кейингина нима учун буёқча чиққанимизни англадим; эгизак қояларнинг бир-бирига туташган қисмида коса мисоли чуқурлик мавжуд эди ва унинг ичига уч, ҳатто тўрт киши ётиб олса ҳам пастдан кўринмасди.

Ўтган вақт мобайнода Алан бирор оғиз ҳам гапирмади: жазавага тушганини сездирмасдан, босиқлик билан ҳаракат қиласди; фалокатнинг оёқ остида турганлиги аён эди. Ҳатто омон-эсон қоя устига чиқиб олганимиздан кейин ҳам қовоғидан қор ёғарди, нимагадир хавотирланарди, миқ этмасди. У ёнбошлаб теварак атрофга назар солди. Аллақачон тонг ёришиб кетган эди; даранинг қоядор деворлари яққол кўриниб турарди; харсанг тошлар қалашиб ётган жарликда ўзини ҳар ёнга уриб, кўпикланиб сой оқарди. Бирор жойда ўчоқдан ўрлаётган тутун ҳам, тирик жон ҳам кўзга ташланмасди, фақат ўлаксахўр бургутларнинг ёқимсиз товушлари қулоқча чалиниб қоларди, холос.

Шундан кейингина Аланнинг лабларида ханда пайдо бўлди.

— Ҳарҳолда, энди ҳаётдан умидимизни узмасак бўлади,— деб минғирлади. Сўнг менга муғамбирона нигоҳ ташлаб қўшимча қилди: — Сен бўлсанг, оғайни, сакрашни билмас экансан.— Назаримда, юзим қизариб кетди шекилли, дарҳол гапини давом эттириди: — Ўҳ-хў! Умуман олганда, сендан бундан ортиғини талаб қилиб бўлмайди. Одам қўрқаётган пайтида ортига чекинмадими — бас, демак у синовдан муваффақиятли ўтибди. Бунинг устига, анави сувга қараган чоғимда ҳатто менинг ҳам бошим айланиб кетди. Сен эса кечирарли.

Лекин ўзим қовун туширдим.

— Нима учун? — деб сўрадим.

— Нима учун бўларди, ўтган кеча сўтаклигим билиниб қолди,— деди у. — Биринчидан, Эпинда — ўз юртимда

Синалмаган йўлдан кетдим, оқибатда кундуз куни қорамиз Қўринмаслиги лозим бўлган жойга келиб қолдик; мана энди ҳавфли, беҳаловат жойда ҳурпайиб ётибмиз. Иккинчидан, тоғма-тоғ қочиб юришнинг ҳавосини олган мендай одам сув олмай йўлга чиққанимга нима дейсан? Энди шу жазирамада то кечгача бир қултум сув ичмасдан «шабадалаб» ётаверасан. Ёнимизда фақат конъяк бор, холос. Эҳтимол, шунга ҳам ота гўри қозихонами, деб ўйлаётган бўлсанг керак; лекин, Дэвид, ҳали қоронги тушмасданоқ бошқача дийдиё қила бошлийсан.

Унинг кўз олдида паст кетгим келмади ва агар сувдонни бўшатиб берса, тезда қоядан тушиб, сойдан сув олиб келишга тайёр эканимни айтдим.

— Обизамзамни увол қилишдан нима фойда бор? — деб эътироz билдири Алан.— Боягина қўнъяк асқотдику, агар шу нарса бўлмагандага ҳозир ҳам ўша тошнинг устида ку-кулаб ўтираверардинг. Бундан ташқари, жуда зийрак йигитсан-ку, ҳойнаҳой, эътибор берган бўлсанг керак: Алан Брек Стюарт худди бировга ўчакишгандек шаҳдам қадамлар ташлаб сайд этди.

— Сизми?! — деб хитоб қилдим.— Ахир бамисоли оёғи куйган товуқдай зир югурдингиз-ку!

— Ростдан-а? Унда билганки, вақт ниҳоятда тифиз бўлган экан. Валақлашганимиз етар, энди бир оз ухла, ҳозирча мен пойлоқчилик қилиб турман.

Ялинтириб ўтирмадим. Чўққи оралиғи юпқагина зах тупроқ билан қопланган бўлиб, худди ўша жойларда қирққулоқлар кўкарған эди — астагина майса устига ёнбошладим; кўзим илинаётганда ҳам бургутлар товуши тинмаганди.

Кимдир аямасдан каминани турткилай бошлаган пайтда, чамаси, соат эрталабки тўққизлар бўлган эди; Алан кафти билан оғзимни маҳкам беркитиб турганини сезиб қолдим.

— Секинроқ-эй! — деб шивирлади.— Хуррак отмагин-да!

— Мумкин эмасми? — деб сўрадим, унинг ховотирли, тунд қиёфасига ҳайрат аралаш тикилар эканман.

У тошлоқ четига борди-да, эҳтиёткорлик билан пастга қаради ва мени ҳам астагина имлаб ёнига чорлади.

Кўёш тиккага келиб қолган, иссиқ забтига ола бошлаганди. Кўз ўнгимизда водий ястаниб ётарди. Оқим бўйлаб тахминан яrim чақиримча юқори томон юрилса, нақ қизил мундирлиларнинг лашкаргоҳи устидан чиқиларди; ўртада ловуллаб гулхан ёнарди, кимдир эплаб-сеплаб

овқат пиширади. Сал наридаги чўққи устида, деярли бизнинг рўпарамизда соқчи турарди; милтиғи учидаги найза қуёш нурида ялт-юлт товланарди. Сой соҳилига баъзи жойларда зичроқ, бошқа жойларда сийракроқ тарзда соқчилар териб ташланганди; бирори ҳув анави чўққида ғўдайиб турса, бошқалари жарликда нари боришиб-бери келишарди. Водийнинг ичкарисида, қоялар хийла пастлашган жойларда соқчилар занжирни отлиқларга уланиб кетганди, уларнинг уёқ-буёқса бориб-келишаётганини бемалол кўриб турардик. Сойнинг қўйи қисмини пиёда аскарлар қўриқлашарди; дарвоҷе, икки оқим бирлашиб, ўзан хийла кенгайиб кетган жойда соқчилар яккамдуккам бўлиб, фақат саёзроқ кечувни ёйилмани назорат қилишарди, холос.

Уларга бир қур назар солдиму дарҳол ўзимни панага тортдим. Бу жойлар субҳидам чогида ҳувиллаб ётган кимсасиз водий эканига сира ҳам ишониб бўлмасди; ҳозир ҳаммаёқ қурол-яроқлар жилвасидану аскарлар кийимидан лолақизғалдоққа ўхшаб қолган эди.

— Дэвид, айнан мана шу нарсадан чўчиган эдим; ўйлаганимдек, улар сой бўйига аскарларни тўкиб ташлашибди,— деди Алан.— Икки соатдан бери чумолидай ўрмалаб келишяпти. Оҳ, дўстим, аммо уйқуни қойиллатар экансан! Келиб-келиб топган жойимизни қара-я! Агар нишабликка кўтарилиб дурбиндан қарашса, бизни бемалол кўришади; мабодо кечгача водийда ўтираверишса, бир иложини қилиб қутулиб кетсанк ажаб эмас. Сойнинг қўйи қисмида соқчилар унчалик қалин эмас. Оқшом чўксин-чи, кейин омадимизни синааб қўрамиз: насиб этса бирпасда нариги томонга ўтиб кетамиз.

— Ҳозир нима қиласиз? — деб сўрадим.

— Ҳозирча шу ерда жизғанак бўлиб ётаверамиз,— деди у.

Аслини олганда, мана шу «жизғанак» сўзи тонг отгандан бери биз тортган азоб-уқубат тимсолига ўхшарди. Тўғриси, қоянинг яланғоч гумбазида тунука товада қовурилаётган қатлама каби қапишиб ётардик; қуёш аёвсиз олов пуркар, харсанг ниҳоятда қизиб кетган эди, зўрға дош берардик; қирққулоқ қоплаган энсизгина жойда эса фақат бир киши жон сақлаши мумкин, холос. Худди тириклиайн гуханда куйдирилган улуғ эътиқод соҳиби сингари навбатма-навбат қизиб турган қоя устига ёнбошлардик; хаёлимни ажабтовур мулоҳаза чулғаб олган эди; шу ўлкада бир неча кун мобайнida икки бора шафқатсиз синовга дучор бўлдим — дастлаб, оролда

совуқда музлаб қолишимга бир баҳя қолган бўлса, энди жазирамада терлаб-пишиб ўтирибман. Жуда ғалати-а?

Бир қултум ҳам сувимиз йўқ эди. Бундай пайтда конъяқдан ёмонроқ бирор нарса бўлмаса керак; лекин барибир уни тупроққа кўмиб оз-моз совутардик-да, сўнг кўкракларимизу чаккаларимизни ҳўллаб олардик ва хийла енгил тортардик.

Аскарлар кун бўйи водий тубида куймаланишиб юришиди; гоҳ коровуллар алмаштириларди, гоҳида соқчилар гала-гала бўлишиб қояларни айланиб чиқишарди. Теваракда қоялар шу қадар кўп эдики, улар орасидан одам боласини излаб топгандан кўра, пичан ғарамидан иғнани қидириб топиш осонроқ эди; албатта, бу самарасиз иш бўлгани учун ҳам аскарлар унчалик жонларини койитишимасди. Баъзан улар арчагуллар тўпига наиза санчиб кўришганида аъзойи баданимдан совуқ тер чиқиб кетарди. Сўнгра негадир аскарлар бизнинг қоямиз поида ўёқдан-буёққа бориб кела бошладилару нафасимиз ичимизга тушиб кетди.

Мана шу жойда илк марта ҳақиқий инглизча нутқни эшитдим: битта хизматчи йўл-йўлакай қоямизни қуёш нури тушаётган томонидан шаппатиладиу сўкинганича дарҳол қўлини тортиб олди. «Куйдирман дейди-я!» деб тўнғиллади. Аскарнинг шевасидан ҳайратландим: у ширасиз якранг товушда сўзларди, боз устига, инглиз баъзи товушларни «ютиб» юборарди. Илгари Рансом қай йўсинда гапирганини эшитган эдим, аммо кичик денгизчи қочиримларни ҳар хил қаланғи-қасанғилардан ўрганиб олган эди ва умуман, сўзларни атайлаб бузиб талаффуз этарди. Менимча, Рансом ўйинқароқлик қилиб телба-тескари жумла тузарди. Мана энди кап-катта одам ҳам худди ўшандай йўсинда сўзлаётгани ажабланарли эди; ростини айтсам, инглизча сўзларга бари бир кўнишка ҳосил килолмадим; ҳатто грамматикасини ҳам рисоладагидек ўргана олмадим шекилли, зийрак ўқувчи ушбу хотираларимдан анча-мунча қусур топиши мумкин.

Кун бениҳоя имиллаб ўтар, соат сайин аҳволимиз оғирлашарди, «дод»деб юборай дердик; қуёш аёвсиз олов пуркагани сайин харсанг тобора қизиб борарди. Барча машаққатларга чидашга тўғри келди: бош айланар, кўнгил айнир, худди шамоллаб қолгандек бўғинлар лўқ-лўқ санчирди. Ичимда шотландча диний қўшиқдаги икки мисрани тез-тез такрорлардим:

Кечалари оймомо йиқолмайди,  
Кундузлари офтоб урмайди...

Дарҳақиқат, ўша куни бизга парвардигори оламнинг раҳми келдими, ишқилиб, офтоб урмади.

Ниҳоят, кундузги соат иккиларда тоқатимиз тугади, энди фақат азоб-уқубатларга бардош бериб қолмасдан, айни пайтда нафс балосини ҳам енгмоғимиз даркор эди. Қуёш ғарбга томон оғди, шарққа — аскарларга кўринмайдиган томонга қоямизнинг калтагина сояси тушди.

— Бир бошга — бир ўлим, одам икки марта ўлмайди! — деди Алан ва чуқурча четига борди-да, салқин томондан ерга сидирилиб тушди.

Мен ҳам дарҳол унинг орқасидан пастга сирғалиб тушдиму бирдан узаласига чўзилиб қолдим; офтобда ётавериб мадорим қуриб қолган эди, оёқда туролмасдим. Худди аъзойи баданимиз уриб ташланганга ўхшаб ерда икки соатча ҳолсизланиб ётдик; агар бирорта аскар бу томонларда саир этишни ихтиёр этиб қолса, бизга дуч келиб қолиши турган гап эди. Бироқ бирорта жонзот қадам босмади, ҳаммаси нариги томондан ўтишарди; қоя ҳозир ҳам бизга қалқон бўлиб турарди.

Аста-секин қувват тўпладик; бу пайтда аскарлар сойга яқинроқ томон силжишганди. Алан, энди бўлар иш бўлди, қани, йўлга тушмаймизми, деб таклиф этди. Мен фақат бир нарсадан қўрқардим: нима бўлса бўлар-у, яна қояга қайтиб чиқмасак бас; шундай қилиб, дарҳол йўлга ҳозирландик, бирин-кетин қояларнинг панасига ўтавердик; сояжойларда ерга қапишгудек бўлиб эмаклардик, бошқа ердан эса юрагимизни ҳовучлаб югуриб-елиб ўтиб олар эдик.

Афтидан, сойнинг қуёйи қисмини тинтув қилиб чиқкан аскарлар иссиқдан лоҳас бўлишиб, ўзларини ўтга уришни исташмасди; соқчилар постда ҳам мудраб туришарди, фақат соҳилни қўриқлашарди, холос. Биз бўлсан ҳамон ер бағирлаб улардан узоқлашар ва жарликнинг қуёйи томонига қочиб борарадик. Тўғри, бунақа уқубатли машғулотни тушимда ҳам кўрмаган эдим. Қўлларда, оёқларда, елкаларда юзлаб кўз бўлиши лозим эди, акс ҳолда ҳар томонга сочиб ташланган соқчилар қоялар орасида ёки ўнқирчўнқирларда шарпамизни сезиб қолишлари ҳеч гап эмасди. Очиқ майдонларда эпчилликнинг ўзи камлик қиласди, айни пайтда топқирлик ҳам тақозо этилади: атрофдаги ҳар бир тепаликнинг, ҳар қандай пана жойнинг хавфсизлигига; оёқ қўяётган ҳар бир тошнинг мустаҳкамлигига ишончинг комил бўлмоғи даркор бўлиб қолганига қарамай қилт этган шабада эсмас, кичик тошча юмалаб кетса

ҳам сокинликда худди тўппонча отилгандек акс садо берар, тепаликлару қоялар ларзага келарди.

Секин силжишимизга қарамай қуёш ботгунча хийла масофани босиб ўтдик. Таассуфки, соқчилар ҳамон кўринадиган жойларда тентирағ юришарди. Бирдан йўлимизда шундай нарсага дуч келдикки, ҳаш-паш дегунча кўнглимиздаги ғулғула тарқалиб кетди; бу тезоқар, чуқур анҳор бўлиб, қуйироқда тоғдан тушаётган жилға билан қўшилиб кетарди. Уни кўрган заҳотимиз таппа-таппа ерга ётдик-да, бошимизни сувга тиқиб чанқоғимизни қондиришга киришдик. Танамизни яиратиб юборган шифобахш оқим эпкиними ёки сувнинг мўл-кўллигидан хушбаҳтиклими, хуллас, қайси бири кўпроқ ҳузур берганини аниқ айтольмайман.

Кирғоқлар қуршовида қанча вақт кўкрагимизни захга босиб ётганимизни билмаймиз: қанча сув ичмайлик чанқоғимиз қонмасди, кўкракларимизга сув сепиб, билакларимиз муздай бўлиб қолгунча қўлларимизни оқимга тутиб туравердик. Ниҳоят, худди онадан қайта туғилгандек, ун солиган халтачани олдик-да, тунука лаганчада атала ҳозирлашга киришдик. Бу бор-йўғи сули унининг совуқ сув билан қоришмаси бўлиб, оч қоринга аччик саримсоқдай гап эди. Гулхан ёқишининг иложи бўлмагандан кейин ўрмону қоялар бағрида яшириниб юрган кишиларнинг бирдан-бир нажот воситаси — бу аталадир.

Фира-шира қоронғи туша бошлиши билан яна йўлга отландик: дастлаб эҳтиёткорлик билан қадам тащлаган бўлсак ҳам, тез орада қаддимизни ростлаб жадал ҳаракат қила бошладик. Илонизи сўқмоқ бўйлаб борардик, сиртмоқ каби айланма йўллардан, жарлик ёқасидан ўтдик. Уфқда қора булат пайдо бўлди, зим-зиё тун чўкди. Мен унчалик чарчамаган бўлсан-да, аммо юрагимни ҳовучлаб қадам ташлардим; жарликка учиб кетиш ҳеч гапмасди, қаёққа кетаётганимизни хаёлимга ҳам келтиролмасдим.

Мана, ой кўринди, биз бўлсак ҳамон илгарилаб борардик; ой алламаҳалгача булат ортида яшириниб турди-ю, бирдан жамолини кўрсатганида, қоп-қора тоғнинг ўркач-ўркач қоялари ёғдуга бурканди; ҳув пастликдаги денгиз кўрфази ойдинда товлана бошлади. Ўша манзарага кўзим тушган заҳоти ҳайратланиб жойимда таққа тўхтаб қолдим: Ниҳоятда юксакликка чиқиб кетган эканмиз, гўё булат устида юргандек бўлардик (менда худди шундай таассурут қолди); Алан эса тўғри йўлдан кетаётганимизни текширишга киришди. Айтидан, у мамнун эди: ҳарҳолда, унинг ҳисоб-китобларига қараганда, энди товушимишни

дushman эшитмасди, шунинг учун түннинг қолган пайтида ўзини овутиш мақсадида ҳар хил мақомда ҳуштак чалиб юрди: унинг ҳуштагидан гоҳ жанговар куй, гоҳ шўх-шодон, ғамгин, рақсбоп оҳанглар тараалардики, беихтиёр қадамларимиз ҳам илдамлашиб кетарди. Гўё жанубдаги юртимнинг нафаси димоғимга урилгандай бўларди ва уйимни — тинч-тотув ҳаётни қўмсағ қолардим, саргузаштлар жонимга текканини ҳис этардим; атроғимизни қуршаб турган ҳувиллаган қудратли, қорамтири тоғлар бағрида Аланнинг ҳуштаги кишида ғалати туйғулар уйғотарди.

### Иигирма биринчи боб

#### СИРЛИ СЎҚМОҚ БЎЙЛАБ

##### Коринак жарлиги

Июль ойи бошларида тун қисқа бўлади, лекин биз манзилга етиб борган пайтда ҳали тонг отмаган эди: атроғда пурвиқор қоялар ястаниб ётар, ўртадан жилға оқиб ўтар, ён томондаги қоя остида мўъжазгина ғор бор экан. Сийрак қайнизор сал ўтмай ўз ўрнини қарағайзорга бўшатиб берарди. Жилғада балиқ сероб эди; дараҳтзор говкантарлар макони экан, қияликда чонғулдоқлару каккулар тинмасдан сайрарди. Этак томонда жилға бир оз димланиб, кўрфаз ҳосил қилиб ўтадиган жой Эпин чегараси бўлиб, нариги тарафдан Мамор ерлари бошланарди. Юқоридан бу манзара кишига ажиб кўринарди; тиззаларимни қучоқлаб ўтирганимча пастликдан кўзимни узмасдим, мириқиб томоша қилардим.

Тоғдаги тордара — Коринак жарлиги деб аталарди; у хийла баландликда ва денгизга яқин жойлашгани учун устини тез-тез булат қоплаган турарди. Бу ажойиб маскандада беш кун яшириниб ётган бўлсак-да, лекин вақтнинг қандай ўтиб кетганини билмай қолдик.

Ғор ичидаги ости изга супургигулларни тўшаб, устимизга эса Аланнинг плашини ёпиниб ётардик. Осмонни булат қоплаган пайтларда даранинг бурилишидаги шаршарага яқинроқ жойда гулхан ёқардик-да, сули унидан бўтқа пиширадик, саёзроқ кечувдан тутиб келтирилган майдачуйда балиқларни кабоб қилардик, баҳонада исиниб ҳам олардик. Айтмоқчи, балиқ ови асосий эрмагимиз, мұхим

юмушимиз эди: халтачадаги унимизни қора кунларга асраб қўйиб, ярим яланғоч ҳолда кун бўйи жилғани пай-паслаб қўл билан балиқ ушлашнинг гашти ўзгача. Айниқса, ким кўпроқ балиқ тутиш бўйича мусобақа ўйнашнинг завқига нима етсин! Биз ушлаган энг катта балиқ чорак фунт тош босарди; оловга тоблаб пиширилган балиқдан ҳам хушбўй, хуштаъм (оз-моз шўртакроқ қилинса борми!) таом бўлмаса керак.

Қўлимиз бўшади дегунча Алан мени қиличбозликка ўргатарди; қилични маҳкамроқ ушлай олмасам, фифони фалакка чиқиб кетарди. Албатта, у беназир қиличбоз эди, бунга ҳеч қандай шубҳа йўқ. Аммо бунчалик кўйиб-пишишга балиқ овлаш мусобақасида у кўпинча мендан ортда қолишга сабаб бўларди. Машғулот пайтида сал нарсага ҳам жаҳли чиқиб кетиб, ўзини тутолмас, бўралаб шунақаям сўкардики, хижолатдан қизариб кетардим; боз устига, сира ҳам аямасдан қиличбозлик қиласарди, доимо унинг қорнимга тиф санчишидан хавотирланардим. У мени тирқиратиб қувламоқчи бўлар, лекин камина сабот билан барча ҳужумларга бардош берардим, машғулотлардан керакли сабоқ олардим; комил ишонч билан ўзимни ҳимоя қилишни ўрганардим, одатда, шунинг ўзи етарли бўларди. Устозим хатти-ҳаракатларимдан мутлақо қониқмаса ҳам, аммо ўзимдан унчалик норози эмасдим.

Айни чоқда, асосий ташвишимиз эсимиздан чиқмасди, нимаики бўлса, хавф-хатардан омон-эсон ўтиб олиш йўлларини қидирардик.

— Қизил мундирлilar бизни Коринак жарлигидан излаш лозимлигини англаб етгунларича кўп вақт ўтади,— деди Алан дастлабки куни эрталаб.— Энди Жеймсга хабар беришимиз даркор: марҳамат қилиб, пул топиб берсинг.

— Қандай қилиб хабар берамиз? — дедим.— Бу ерда ёлғизмиз, бошқа жойга кўчиб ўтиш ҳозирча хаёлимизга ҳам келгани йўқ. Агар сиз сеҳр-жоду йўли билан чопар-қушчани чорлаб, ўшанинг қанотига хабарнома боғлаб учирив юборсангиз бўлар-у, лекин бунга ҳам ишонмайман.

— Шунақами? — деди Алан.— Дэвид, каллани ишлатиш керак.

У аста-секин сўна бошлаган гулханга тикилган кўйи ўйга толди; кейин иккита пайраҳани қўлига олдию уларни кўшув аломати сингари бир-бирининг устига мингаштириб боғлади ва тўрт учини қорайтириб куйдирди. Охири иккиланиб менга нигоҳ ташлаб қўйди.

— Анави тугмачани вақтинча бериб турмайсанми? —

деб сўради Алан.— Аслида, совға қайтариб олинмайди, аммо яна битта тугмамни кесиб олишга кўзим қўймаяпти.

Унга тугмачани узатдим; тугмачани қўшув аломати маҳкамланган плашининг этагига қадаб қўйди ва ўша жойга қайнин, қарағай шохчасини ҳам боғлади-да, ўз ишидан мамнун бўлиб менга қаради.

— Мана шунаقا,— деди.— Коринакдан унча олис бўлмаган жойда Колиснейкон деган қишлоқ бор. У ерда менинг дўстларим кўп; баъзилари га ҳаётимни ҳам ишониб топширишим мумкин. Дэвид, биласанми, боши, миз учун мукофот белгилашади; Жеймснинг шахсан ўзи мукофот тайинлади. Кемпбеллар ҳам қўл қовуштириб ўтиришмайди, Стюартларни ер билан яксон қилиш учун бор будларини аяшмайди. Агар шундай бўлмаганда ҳеч иккиланмасдан ўз оёғим билан Колиснейконга ташриф буюрардим ва истиҳола қилиб ўтирмай ҳаётимни арzonгаров қўлқоп мисоли ўша одамлар ихтиёрига топшириардим.

— Ҳозир-чи?

— Ҳозир уларнинг кўзига кўринмаганим маъқул,— деди Алан.— Ичиқора одамлар ҳамма жойдан топилади; даҳшатлиси шундаки, иродасиз кишилар ҳам учраб турди. Шунинг учун қоронғи тушиши билан бир иложини қилиб ўша масканга бораман-да, мана бу ўзим ясаган матоҳимни эпинлик нисфикор<sup>1</sup> қадрдоним Жон Брек Макколунинг деразасидан ошириб ташлаб келаман.

— Жуда соз,— дедим.— Лекин бу матоҳ нима эканини англай олармикан?

— Ҳм-м, афсус, у зийрак эмас,— деб бош чайқаб қўйди у.— Қўлларимни кўксимга қўйиб айтишим мумкини, фаҳм-фаросатсиз! Мен шартли равишда қўйидагиларни рамзий маънода акс эттиргандим: қўшув аломати — оташ тусли хочни эслатади, яъни бу бизнинг қабиламиз нишонасидир. Албатта, бутун қабилани оёққа турғизиш шарт эмас, у ана шу маънони англамоғи лозим; чунки таниқлик белгиси унинг деразасида турибди, лекин оғзаки ҳеч қандай буйруқ берилмаган. Шунинг учун ўзича ўйлади: «Қабилани оёққа турғазиш керак эмас, аммо бир гап борга ўхшайди». Кейин тугмачамга кўзи тушиб қолади. Аниқроғи, бу меники

<sup>1</sup> Нисфикор — бой заминдордан сўқимга боқиш учун мол-қўй оладиган ижарадор шудай ном билан юритилади; фойда эса ўртада — хўжайин билан теппа-тeng баҳам кўрилади (*Муаллиф изоҳи*).

эмас, Дүнкан Стюартники. Иннакейин яна ўйлайди: «Дүнканнинг ўғли ўрмонда яшириниб юрибди, мен унга керак бўлиб қолибман».

— Эҳтимол,— дедим.— Майли, шунаقا бўлди, дейлик. Лекин бу ердан Фортгача ўрмоннинг поёни йўқ-ку!

— Тўғри,— деди Алан.— Бундан ташқари, Жон Брек қайин ва қарагай шохчасини ҳам кўриб қолади ё агар ақл-ҳуши жойида бўлса (мен бунга ишонаман, албатта): «Алан қайину қарагайлар ўсиб ётган ўрмонда яшириниб юрибди», деб ўйлайди. Ўзича: «Улкамизда бундай ўрмонлар саноқли, бир-икки марта ўёқдан-буёқ-ка юрилса — бас, топилади», дейди. Қарабсанки, бизнинг ҳузуримизга — Коринакка қадам ранжида қиласди. Дэвид, агар у келмаса, менга деса изи қуриб кетсин; демак, сариқ чақага қиммат экан!

— Ха, дўстим, пухта ўйланган режа тузисиз!— дедим заҳарханда аралаш.— Эҳтимол, унга бир-икки оғиз хат ёзиб қўя қолган маъқулдир-а?

— Шос қўрғонининг соҳиб қирони, мистер Бэлфур, бошингиз тиллоларга баробар! — деди Алан мәсҳараомуз оҳангда.— Тўғри, менга қолса, хат ёзиб қўя қолганим дуруст эди, аммо Жон Брек қандай ўқийди? Бунинг учун икки-уч йил мактабга қатнаб, савод чиқариши лозим; унгача тоқатимиз тоқ бўлса керак.

Ўша кечаси у оташ тусли хочини нисфикор деразасидан ташлаб келди. Алан хийла ташвишли қиёфада қайти: қишлоқ итлари ташланиб қолишибди, одамлар кўчаларга югуриб чиқишибди, ҳатто осмонга қаратиб пилтамилтиқлардан ўқ ҳам узишибди; устига устак, кимнингдир дарвозасидан аскар мўралагандай бўлибди. Шунинг учун эртаси куни ўрмон чеккасига бориб писиб ётдик; агар Жон Брек ташриф буюрса, унга йўл кўрсатиб қўямиз, мабодо қизил мундирлилар пайдо бўлишса, зудлик билан жуфтакни ростлаб қоламиз, деб келишиб олдик.

Чошгоҳ маҳали қуёш мўл-кўл олов пуркаётган яйдоқ қоя бўйлаб битта одам келаётганини кўриб қолдик: у қўлини пешонасига «айвон» қилганча биз томонга синчков назар ташларди. Алан унга қараган заҳоти йўловчи бир оз йўналишини ўзгартириб, биз томонга бир неча қадам қўйди. Алан яна ҳуштак чалгач, йўловчи ёнгинамизда пайдо бўлди.

Бу пахмоқ сочли, серсоқол, қирқ ёшлар атрофидаги бадбашара киши бўлиб, юзи чечакдан ўйдим-чуқур, эсипасга ўхшарди, баджаҳллиги яққол кўриниб турарди.

У инглиз тилида зўрға гапиради: Алан менинг олдимда унга бир оғиз ҳам гэл тилида сўзлашга йўл қўймади, беодобчиллик бўлади, деди. Эҳтимол, йўқлаб келган киши бегона тилда сўзлашаётгани учун ўзини ноқулай ҳис этётгандир; менимча, у жон-дилдан ёрдам беришни асло истамасди, учрашувга фақат қўрққанидан келгани шундоқ қўриниб турарди.

Алан Жеймсга етказилиши лозим бўлган гапни оғзаки айтмоқчи бўлди-ю, аммо нисфикор қулоқ солишини ҳам истамади. «Мен эсимдан чиқариб қўяди», деди чийиллаган товушда. Яъни, айтадиган гапингни ё ёзиб бергин, ёки қўлимни ювиб қўлтиғимга артаману кетавераман, демоқчи бўларди.

Энди Алан эсанкираб қолса керак, деб ўйлагандим, ахир бундай овлоқ жойда қалам-қофозни қаёқдан топсин. Бироқ Алан ўёқ-буёққа зир-зир югурди-да, ўрмонга кириб каптарнинг патини топиб чиқди, учини ўткирлади ва халтачасидан озгина порох олиб, уни чашма сувига аралаштирди: сиёҳга ўхшаш суюқлик тайёр бўлди; сўнгра фарангича кийими ёқасидан ҳарбий унвонини билдирадиган ёрлиқнинг бир бўлaginiни йиртиб олдию (шу кийими-нинг чўнтағида туморини асрарди, дордан фақат шу туморгина сақлаб қолади, деб ўйларди) чўнқайиб ўтирган кўйи қуйидаги жумлаларни қоралади:

«Меҳрибон қариндошим!

Илтифотингни дариф тутмагин: ушбу номани элтган кишидан оз-моз пул бериб юборгин; қаерга етказишини унинг ўзи билади.

Сени севгувчи амакиваччанг

A. С.»

Номани нисфикорга топширди: чопар ваъдани қуюқ-қина қилди-да, шоша-пиша тоғ этакларига қараб йўл олди.

Икки кунгача дараги бўлмади; учинчи куни соат бешларда ўрмон ичкарисидан ҳуштак товуши эшитилиб қолди; Алан унга жавоб қайтардию кўп ўтмай жилға ёқасида нисфикор пайдо бўлди ва бизнинг қаерда эканимизни билолмай атрофга аланг-жаланг назар ташлади. У аввалги сафаргидай одамови кўринмасди: афтидан, ниҳоятда қалтис топшириқни кўнгилдагидек адо этгани учун ўзида йўқ хурсанд эди.

Ундан маҳаллий янгиликларни билиб олдик: маълум бўлишича, бутун ўлкада қизил мундирлilar ғиж-ғиж бўлиб ётган эмиш; худонинг берган куни кимнингдир

уийдан қурол топишаётганмиш, камбағалларнинг бошига яна кулфат ёғиладиган кўринади; Жеймс Глен билан мулозимларни Форт Фильямга олиб кетишибди ва зин-донга ташлашибди; улар қотилликда айбланаётган эмиш. Ҳамма томонга, марҳумни Алан Брек отиб ўлдирган, деган мишмиш тарқатишибди; иккаламизни қўлга тушириш ҳақида фармон эълон қилинибди, юз фунт миқдорида мукофот белгиланибди.

Шундай қилиб, ишлар расво эди; нисфикор миссис Стюартдан келтирган нома ҳам бениҳоя ғуссадор экан. Жеймснинг хотини Аландан душман қўлига таслим бўлмасликни ўтиниб сўрарди, агар аскарлар ушлаб олишса борми, у ҳам, Жеймс ҳам хароб бўлишади. Бирорвлардан қарз олиб, ўзида қолган-қутганини йиғиштириб шу пулни юборибди; илоим, пул, камлик қилмасин! Ниҳоят, хатга қўшимча тарзда бизнинг асосий белгиларимиз қайд этилган қофозни ҳам жўнатибди.

Фоятда қизиқиб қофозни кўздан кечирдик; ростини айтганда, кўнглимиизга ғулғула тушди, киши худди шундай туйғу билан кўзгуга ёки душман милтифининг қувурига қарайди: ўзини аниқ нишонга олаётганига ишонч ҳосил қиласди. Алан тўғрисида қўйидагилар таъкидланган эди: «Бўйи паст, юзи чўтири, ниҳоятда ҳаракатчан, ўттиз беш ёшларда ёки шу ёшлар атрофидаги киши, пат қадалган шляпа кийиб юради, эгнида оҳори тўкилган зар уқали фарангича чакмони бор: кўкимтири мовутдан тикилган, тугмалари кумуш; камзули қизғиш тусли, иштони тиззасидан келади, дағал жун матодан тикилган». Мен ҳақимда эса: «Баланд бўйли, бақувват, ўн саккиз ёшларда, хийла эски, кўкиш тусли чакмон кийиб олган, бошида шарти кетиб, парти қолган тоғликлар қалпоғи бор, камзули кўлда тўқилган, кўкимтири иштони тиззасидан келади, пайпоғи йўқ, шаҳарликлар киядиган бошмоғи бор, бурни ингичка, паст текисликда яшайдиган одамларга ўхшаб гапиради, соқоли ҳали чиқмаган» деган белгилар қайд этилган эди.

Алан уст-бошини яхшилаб эслаб қолганлари ва миридан-сиригача батағсил тасвирлаганлари учун мамнун бўлди, фақат «оҳори тўкилган» деган сўзни ўқигач, бир оз тумтайброқ зар уқасига кўз қирини ташлаб қўйди. Мен эсам, агар ўша лаънати уйдирмага ишонадиган бўлсан, демак жулдуровоқи кийимда эканман. Уст-бошимни вақти-соатида алмаштириб олганим боис хурсанд бўлдим.

— Алан, кийимларингизни алмаштириб олишингиз лозим,— дедим.

— Сафсата, ўлсам ҳам алмаштиrmайман! — деди Алан.— Агар Фарангистонга қайтиб борсам, қалпоқда жуда чиройли кўрингсан керак!

Бу сўзларни эшитганимдан сўнг кўнглимда ғаройиб фикр туғилди: хоинона кийим-бошли Аландан ажралиб кетсан, қўлга тушишдан заррача ҳам қўрқиб ўтирмасдим — хоҳлаган томонимга боравераман, яшириниб ётишга ҳожат қолмасди. Айтайлик, ёлғиз кетаётган чоғимда ҳам ушлаб олишсаям ҳеч қандай жиноят белгиларини топиша олмайди; худо кўрсатмасин-у, бироқ қотилликда айбланаётган киши билан биргаликда қўлга тушсан борми, иш жиддий тус олиб кетиши турган гап. Аланга раҳмим келгани учун бу ҳақда гапириб ўтирмадим, аммо кўнглимнинг бир четида ғубор қолди.

Ўзимча хомаки режа тузиб бўлган пайтимда нисфиқор қўйнидан яшил ҳамён чиқарди; ичида тўртта тилла танга ва яна бир танга атрофида майда пул бор экан. Ростини айтсан, чўнтағимда салкам беш танга бор эди. Алан беш танга билан Фарангистонга етиб олиши даркор; мен эсам чораккам икки танга билан бор-йўғи Күнисферрига етиб борсан бас, вассалом. Шундай қилиб, агар тўғри мўлоҳаза юритиб кўрсак, Аландан ажралсан нафақат ўз йўлимда тинчгина кетардим, балки чўнтағимга ҳам фойда бўларди.

Афсуски, ҳалол ўртоғим бунақа гапларни хаёлига ҳам келтирмасди. У менинг таянчим, ёрдамчим, ҳимоячим эканига чин дилдан ишонарди. Ҳўш, дардимни ичимга ютмасдан, ўзимча ёруғ жаҳонга лаънатлар ўқимасдан, тақдиримга тан бермасдан бошқа на иложим бор эди?

— Озроқ экан-у, бир эвни қиласман,— деди Алан ҳамённи чўнтағига солар экан.— Жон Брек, энди тугмачами қайтириб берсанг-да, биз манави жентельмен билан йўлга тушсак!

Барча тоғликлар сингари ҳамёнини олдига осиб олган нисфиқор (у денгизчилар иштонини кийиб олганди ва умуман, кийимлари пасттекиқликларда яшайдиган кишиларницидан унчалик фарқ қилмасди) бирпас ўёқ-буёғини пайпаслади-да, шубҳали тарзда кўзларини пирпирата бошлади, сўнг тилга кирди.

— Ўйлайдики, у йўқотилган.— Чамаси, у: «Ўйлашимча, тугмани йўқотиб қўйибман шекилли», демоқчи бўлди.

— Бу қанақаси? — деб ўшқирди Алан.— Сен ҳали отамдан қолган тугмачамни йўқотиб қўйдингми? Ундей бўлса, гапимни эшитиб қўй: сен умрингда бундан ҳам оғирроқ гуноҳга ботмагансан, тушундингми?!

Шундан кейин Алан кафтларини тиззаларига тираган кўйи мийигида кулдию нисфикорга тикилди; унинг кўзларида савдойиларга хос учқун чақнарди, бу ҳол яхшиликтан нишона эмасди, албатта.

Нисфикор инсофли кишилар тоифасидан эдими ёки дастлаб, бизни лақиллатмоқчи бўлиб, овлоқ гўшада икки кишига қарши ёлғиз ўзи эканлигидан дарҳол эс-хушини йиғиб олиб аҳдидан қайтдими, ишқилиб, кўп ўтмай тугмача бирдан топилди ва уни Аланга берди.

— Нима ҳам дердим, бу Макколларнинг ор-номуси белгиси,— деди Алан.— Тугмачани қайтариб бераман ва ундан воз кечишга рози бўлганинг учун миннатдорлик билдираман. Бу ҳол садоқатли дўстим эканингни яна бир марта исботлади.— Шундан сўнг у нисфикор билан ниҳоятда самимий хайрлашди.— Менга жуда катта яхшилик қилдинг,— деди Алан.— Ҳатто бошинг кетиши мумкин эканлигидан ҳам қўрқиб ўтирадинг; энди ҳар қандай одамга сени диёнатли инсон деб търифлайман.

Ниҳоят, нисфикор йўлига равона бўлди; Алан иккамиз ҳам лаш-лушларимизни бир бўғчага тугдик-да, сирли сўқмоқ бўйлаб манзил томон равона бўлдик.

## Йигирма иккинчи боб

### СИРЛИ СЎҚМОҚ БЎЙЛАБ

#### АРЧАГУЛЛИ ТАШЛАНДИҚ МАКОН

Етти соат мобайнинда машиқватли йўлни босиб ўтдик ва эрта тонгда тоғ тизмалари этакларига етиб бордик. Олдимизда ғадир-будур ясси текислик ястаниб ётарди; энди ана шу довонни босиб ўтишимиз лозим эди. Эндинга чиқсан қўёш манглайимизга наиза санчарди; тутун сингари юпқа булат торф конлари устини қоплаб олганди; Аланнинг гапларига қараганда, буёқча йигирмата отлиқлар эскадрони бостириб келган тақдирда ҳам уларни пайқамай қолишимиз мумкин эди. Шунинг учун туман кўтарилишини пойлаб ўтирдик; қияликдаги дарата тушдик-да, атала тайёрладик, кенгашиб олдик.

— Дэвид, бу жой бехосият,— деб гап бошлади Алан.— Қоронғи түшгунча биқиниб ўтираверамизми ёки таваккал қилиб йўлга отланамизми?

— Мен нима дейишим мумкин?— дедим.— Ўлардек чарчадим, лекин олдимизда турган масофани босиб

ўтганимиздан кейин дам оладиган бўлсак, яна шунча йўл юришим мумкин.

— Ҳамма гап шундаки, қалтис масофани босиб ўтсак, фақат ярим йўлни ортда қолдирган бўламиз, холос,— деди Алан.— Вазият қўйидагича: Эпин заминига қадам қўйсан, ҳароб бўлишимиз аниқ. Жануб эса бутунича Кемпбеллар тасарруфида, уёққа тумшуғимизни тиқмаганимиз маъқул. Шимол томон кетсак — бефойда: ахир сен Куинсферрига, мен бўлсам Фарангистонга боришимиз даркор. Тўғри, шарққа юришимиз мумкин.

— Шарқ бўлса шарқ-да! — дедим дадиллашиб. Ичимда эса бошқача ўйлардим: «Эҳ, дўстим, сен истаган томонга қараб кетсанг бўлмайдими; мен ҳам хоҳланган томонга кетардим — шунда иккаламизга ҳам яхши бўларди-ку».

— Ҳўп, лекин биласанми, шарқ томон ботқоқликдан иборат,— деди Алан.— Уёққа қадам қўйсанг — бас, кейин пешонангдан кўраверасан: тап-тақир, лоақал бир туп гиёҳ учрамайди, теп-текис, яширинаидиган жой йўқ. Агар бирорта тепаликка қизил мундирлилар тасодифан чиқиб қолишса борми, ўн чақирим олисликдан ҳам бизни кўриб қолишли мумкин; боз устига, улар отлиқ, бирпасда етиб олишади. Дэвид, расво жой, тўғрисини айтсам, кечасига қараганда бу ерда кундузи ўтириш хавфлироқ.

— Алан, энди менинг мuloҳазаларимни тингланг,— дедим.— Эпин биз учун ҳалокат демакдир; пулимиз ҳам, унимиз ҳам кўп эмас; улар қанчалик узоқ вақт қидиришса, тобора изимишга яқинлашиб келаверадилар; таваккал қилмасдан иложимиз йўқ, кафолот беришим мумкинки, мадорим қуриб, йиқилиб қолгунимча юравераман.

Аланнинг юзлари ёришиб кетди.

— Баъзан сен виглар сингари шу қадар қўрқоқ бўлиб, сафдошликка мутлақо ярамайсан; бошқа пайтларда эса бирдан жангарилигинг тутиб кетади ю худди туғишиган укамга ўхшаб қоласан,— деди.

Туман тарқалиб кетди. Кўз ўнгимизда денгиз мисоли ҳувиллаган ер намоён бўлди; фақат какликлару қизқушлар сайдарди, олисларда — шарқ томонда аста-секин кетаётган бүғулар тўдаси элас-элас кўриниб турарди. Ташландиқ ерда яккам-дуккам арчагул учраб қоларди; баъзи жойларда ўпқонлар, катта-катта ёриклар, торф қазиб олинган чуқурлар кўзга ташланарди; баъзан ҳаммаёқ қоп-қорайиб куйиб ётарди, бир ерда ҳатто

ёнғиндан жизғанаги чиқиб кетған қарағайларнинг таналари устма-уст қалашиб қолған эди. Дунёда бундан ҳам аянчлироқ манзара топилмаса керак, аммо қизил мундирлilarнинг қораси күринмасди; бизга мана шуниси муҳимроқ эди, албатта.

Шундай қилиб, шарқ йўналишига қараб машақатли, айланма йўлни босиб ўтишга киришдик. Атрофимизни тоғ тизмалари қуршаб олган бўлиб, ҳар дақиқада бизни кўриб қолишлари мумкин эди; шунинг учун чуқурликлардан юришга, чуқурликлар бошқа томонга бурилиб кетса, очиқ майдон бўйлаб энгашиб-эмаклаб кетишга мажбур бўлардик. Кўпинча худди буғуни пойлаган овчилардай бир арчагул тўпидан бошқасининг остига эмаклаб ўтгунимизча ярим соат вақтимиз кетарди. Кун баттар исиди, сувдондаги сувимиз бирпасда тугади; ярим йўлни эмаклаб тўрт букилиб, энгашиб ўтишга мажбурулгимизни билганимда бундай дўзах азобидаги сафарни бошламаган бўлардим.

Машақатли масофани босиб ўтганимиздан сўнг бир оз нафас ростлаб яна йўлга тушардик — шу тарзда эрталабки вақтни ўтказдик; пешин маҳали арчагуллар қалин ўсган жойда бирпас мизғиб олиш учун чўзилдик. Биринчи бўлиб Алан пойлоқчилик қилди: назаримда, эндиғина кўзимни юмишим биланоқ у биқинимга туртиб-туртиб уйғотди ва навбатчиликни менга топширди. Соатимиз йўқ эди; вақтни аниқ белгилаш учун Алан арчагул новдасини ерга суқиб қўйди: арчагуллар тўпининг сояси шарқ томондаги белгига етган чоғда уни уйғотишим лозим эди. Шу қадар ҳолдан тойган эдимки, бирданига ўн икки соат ухлашга жон-жон деб рози бўлардим; кўзларим ўз-ўзидан юмилиб, вужудим увадага ўхшаб илвираб турарди; иссиқ таъсирида арчагуллардан таралаётган ажиб тароват ҳам, ёввойи асалариларнинг ғўнғиллаши ҳам қулоғимга алла товуши мисоли эшитилардию ширақайф кишига ўхшаб ўтирган жойимда мункиб-мункиб кетаётганимни ўзим билмай қолардим.

Охирғи гал ростакамига ухлаб қолибман. Кўзимни очсан, қуёш уфққа оғаётганди, арчагул новдасига кўзим тушган заҳоти қичқириб юборишдан аранг ўзимни тийиб қолдим, хуллас, дўстимга панд берган эдим. Шармандалик ҳам шунчалик бўлар-да, қанийди шу тобда ер ёрилсаю кириб кетсан! Айни чоқда бошқа бир манзарада ўтакам ёрилаёзди: не тонгки, ғафлатда ётган пайтимизда отлиқлар отряди ботқоқликка тушиб олишган эди; улар ярим доира шаклида жанубий-шарқ томон-

дан устимизга бостириб келишарди; арчагуллар қалин ўсган жойларда бир неча марта орқаларига қайтишарди-да, қулай томондан айланаб ўтишарди.

Аланни үйфотдим: бошини кўтариши билан дастлаб отлиқларга, сўнгра арчагул новдасига — белига қаради, қўёшга кўз ташлаб қўйди ва қошларини чимирган кўйи хавотиру пўписа маъносидаги бир қур менга ҳам нигоҳини қадади; шу холос, мендан гина-кудурат қилиб ўтирамди.

— Энди нима қиласми? — деб сўрадим.

— Яшин-тополоқ ўйнашга тўғри келади, — деди Алан. — Хув анави тепаликни кўряпсанми? — У шимолий-шарқ томондаги ёлғиз қаққайиб турган тепаликка ишора қилди.

— Кўряпман.

— Ўша ёққа қараб юрамиз, — деди. — Унинг номи Бен Элдер; ёввойи, қатрон тоғ; ғадир-будур, ўйдим-чуқур жойлари жуда кўп. Агар эрталабгача ўша жойга етиб олсак — бас, марра бизники!

— Алан, ўёққа бориш учун аскарларнинг йўлини кесиб ўтишимиз лозим-ку! — деб хитоб қилдим.

— Бошқа иложимиз йўқ, — деди. — Агар оптимизга қайтиришиб, Эпинга киритиб олишса борми, иккаламиз ҳам асфаласофилинга кетамиз! Шунинг учун, дўстим Дэвид, зинҳор-базинҳор имиллама!

У чаққонлик билан эмаклаганча йўл бошлади. Бунинг устига, у доимо чуқурчалар бўйлаб жилпанглаб ҳаракат қилардики, узоқдан бизни кўриш амримаҳол эди. Майсалар таг-туғи билан куйиб кул бўлган эди ёки ёнғин бир ямлаб ўтиб кетганди: биз деярли бурнимизни ерга теккизиб юрганимиз учунми, тутун сингари майнин, димоқни ачиштирадиган кул юз-кўзларимизга уриларди. Сувимизни аллақачон ичиб тугатгандик; тўрт оёқлаб ютураётган пайтингда бирпасда чарчаб қоласан, мадоринг қурийди, вужудинг увада мисоли ҳилвирайди ва ўз оғирлигингни кўтаролмай қўлларинг синиб кетар даражага етади. Вақти-вақти билан қалироқ арчагуллар остида бирпас чўзилиб олардик, нафасимизни ростлардик; шоҳ-шаббалар орасидан отлиқларни кўздан кечирадик. Назаримда, улар изимизни топиша олмаган эди: ҳархолда, битта взвод, (аниқроғи, яримта взвод бўлса керак) икки чақиримга ёйилганча йўлида учраган арчагуллар тўпининг тити-питисини чиқариб, ҳамон илк йўналиши бўйича олға силжирди. Хайриятки, ўз вақтида уйғонибман, агар яна бир оз ғафлат босиб ётганимда

борми, ёвга чап бериб кетолмасдик: уларнинг олдига тўшиб қочишдан бўлак илож қолмасди. Ҳозир ҳам арзимаган тасодиф туфайли фош бўлиб қолишимиз эҳтимолдан холи эмасди; баъзан арчагуллар орасидан патир-путур этиб какликлар учганда жой-жойимизда тарашадек қотиб қолардик, ҳатто нафас олишга ҳам қўрқардик.

Аъзойи баданим сирқ-сирқ оғририди, ниҳоятда ҳолдан тойган эдим, ҳансираб-ҳансираб зўрга нафас олардим, қўлларим тилиниб кетган эди, қўзларимга чанг-тўзон тўлиб томоғим ғиппа бўғилганди, хуллас, ит азобида қийналганимдан кўра, жон-жон деб таслим бўлишга рози эдим! Фақат Аланнинг ҳаётига зомин бўлмаслик учун бутун иродамни йиғиб, олға силжирдим. Алан эса (дарвоҷе, унинг эмин-эркин ҳаракат қилишига плаши ҳалақит берарди) қизариб, кейин бўзара бошлади; ҳар нафас олганда ўпкаси ҳуштак чалиб юборарди ёки шир-шир этарди; бирпас дам олиш мақсадида тўхтаган пайтларимиз у ўз кузатишларини айтиш учун қулоғимга шивирларди, товуши худди қуршовга тусиб қолган йиртқичнинг хириллашига ўхшаб эшитиларди. Бироқ руҳан бардам, тетик, ҳаракатчан бу инсоннинг бардошига беихтиёр қойил қолардим.

Ниҳоят, оқшом чўка бошлаган чоғда бурғу товушини эшитиб тўхтадик-да, арчагуллар орасидан ортимизга мўраладик; взвод аскарлари бир жойга тўпланишарди. Бир оздан сўнг улар ўтин теришиб гулхан ёқишиди ва ташландиқ ернинг ўртасида тунаш учун жой ҳозирлашга киришдилар.

Шундан сўнг Аланга, ётиб, ухлаб олайлик, деб ялиниб-ёлвордим.

— Бу кеч ухлашни хаёлингга ҳам келтирма! — деди Алан.— Энди анави отлиқлар (тарракдай қотиб ётганингда пайдо бўлишган эди) ташландиқ майдон теварағидаги барча тепаликларни эгаллаб олишади; Эпиндан бирорта тирик жонзотни ташқарига чиқаришмайди; фақат қанотли қушларгина уларнинг устидан учиб ўтади, холос. Ҳозиргина душман чангалидан қутулдик, наҳотки ғалабамизни қўлдан бой берсак?! Йўқ, азизим, эрта тонгни Бен-Элдердаги ишончли жойда кутиб олишимиз лозим.

— Алан, иродамга ҳар қандай киши ҳавас қилса арзийди, лекин кучим қолмади. Озгина мадорим бўлганида индамай кетаверардим; истасангиз — қасам ичишим мумкин, иложим йўқ! — дедим.

— Начора, бўпти, сени елкамга миндириб оламан,—  
деди Алан.

Унинг юзига тикилдим, тағин устимдан кулаётган  
бўлмасин, деб ўйладим. Аланнинг қиёфаси жиддий  
эди. Дўстимнинг ҳолатини кўриб, ўзим уялиб кетдим.

— Жуда соз, қани бўлмасам, йўл бошланг!— де-  
дим.— Кетдик!

У менга илкис назар солиб гўё: «Отангга балли,  
Дэвид!» демоқчи бўлди ва ғайрат билан яна олға ил-  
тилди.

Хуфтонда салқин тушди. Атроф хийла зимиston  
эди. Осмон булуtsиз. Бу жойлар шимолий ўлка ҳисоб-  
ланганидан июль кечалари чироқсиз китоб ўқиш мумкин  
эди. Ҳартугул, қиши фаслининг ярим кечалари зимиston  
бўлса керак. Қалингина шудрингдан ташландиқ майдон  
худди ёмғир ёққандек сувга бўкли; дарҳол уйқум  
очилиб кетди. Нафасимизни ростлаш учун тўхтаган  
пайтимизда табиат аллақачон мени ўзига маҳлиё қилиб  
қўйган эди: кеча бениҳоя сўлим, ҳув нарида қир-адир-  
лар ястаниб ётарди, оптимизда лов-лов ёнаётган гул-  
хан майдоннинг оташга чулғанган юрагига ўхшарди.  
Нега энди ўзимни азоблаб, тупроққа беланиб, қурт  
мисоли билтанглаб юришим керак экан деган ўйдан  
ғазабим қўзиб кетди.

Баъзи китобларни ўқиб, уни ёзганлар умрида ҳеч  
чарчамаганмикан, деб ўйлайсан. Чарчақ қанақа бўлиши  
ни етказа билганларида ўқувчи эснаб ўтиrmасди. Ҳозир  
ўтмишим ҳам, келажагим ҳам мени мутлақо ташвиш-  
лантиrmасди; ҳатто бу дунёда Дэвид Бэлфур номли  
йигитча борлиги эсимдан чиқиб кетган эди; ўзим ҳақим-  
да ўйламасдим; ҳар қадам ташлаётганимда юрагимни  
ҳовучлаб турадим, ҳар қадамим охиргиси бўлса керак  
деб ўйлардим ва ана шу азоб-уқубатларнинг бевосита  
сабабчиси бўлмиш Аланни кўрарга кўзим, отарга ўқим  
йўқ эди. Алан ҳарбий соҳани танлаб янглишмаганди;  
қўмондонларнинг асосий вазифаси — бошқаларни олға  
бошлашдан, ҳеч кимни ортга чекинтиrmасликдан, биро-  
ларнинг иродасини синдиришдан иборат: ҳеч ким билан  
ҳисоблашмайдилар; ваҳоланки, бошқалар кетаётган жо-  
нида ўзини таппа ташлаши, лоқайдлик билан кўксини  
ўққа тутиб бериши мумкин. Мен ҳам тузуккина аскар  
бўлишим мумкин эди: йўл давомида, итоат этmasam  
осмон узилиб тушармиди, деб ўйладим-у, аммо токи  
куч-кувватим бор экан, ўлишга ҳар доим улгураман,  
ҳозир бўйсунишгә мажбурман, деб ўзимни ишонти-  
рардим.

Тонг ёришгандан сўнг даҳшатли хавф-хатар ортда қолган эди: қурт-қумурсқалардай ўрмаламай одам қаторида юришимиз мумкин эди. Худойим-эй, ҳозир бизни ошна-оғайниларимиз ҳам танимасди: қари-қартанглар мисоли буқчайиб, тетапоя болага ўхшаб маймоқланиб қолгандик, ранг-рўйимиз мурданикидек оқариб кетган эди! Иккаламиз ҳам миқ этмай, тилларимизни тишлаганимиз кўйи тўғрига тикилиб борардик: зўрбазўр қадам босардик; арчагуллар орасида эса какликлар чийиллашарди. Шарқ томон аста-секин ёришмоқда эди.

Аланга ҳам осон бўлмади. Албатта, унинг юзига синчиклаб назар соганимдан сўнг шундай хulosага келганим йўқ: ўзим аранг оёқда турардим, қайрилиб қарашга ҳам ҳолим қолмаган эди; лекин у ҳам чарчоқ туфайли гарангсиб, мен каби қаёққа қараб кетаётганимизни ҳам унутиб қўйган эди — акс ҳолда, кўрсичқонга ўхшаб пистирмага тушиб қолганимизни билмасмидик?!

Бу воқеа қўйидагича содир бўлди. Алан иккаламиз арчагуллар қоплаган тепаликка кўтариладик; у олдинда, мен икки қадамча орқароқда борардим: хўдди қўшалоқ дайди созандага ўхшардик; бирдан арчагуллар шатир-шутир этдию шоҳ-шаббалар орасидан қандайдир жулдирвоқи тўрт киши отилиб чиқди ва кўз очиб-юмгунимизча иккаламизни ҳам шартта тагларига босиб олишди-да, кекирдагимизга ханжар қадашди.

Менга қолса, бари бир эди: тортаётган азобларим ўзимга етиб ортарди, қийноқлар менга чумоли чақчанчалик ҳам таъсир этмасди; ҳатто бўйнимга қадалиб турган ханжардан ҳам қўрқмасдим; бир жойда қимиirlамай ётганимдан хурсанд эдим. Устимдан босиб турган жулдурвоқига қарадим: юзлари офтобда қорайган, кўзлари чақноқ, лекин мен парвойи палак эдим. Улар гэллар тилида Алан билан нималарнидир шивирлашиб гаплашишаётгани мени мутлақо қизиқтирмасди.

Кейин ханжарларини қинларига тиқиб қўйишди, бизни қуролсизлантирилар ва бир-биrimизга қаратишганча арчагуллар устига ўтқазиб қўйишди.

— Булар Клун Макферсоннинг пойлоқчилари экан,— деб мени Алан хабардор қилиб қўйди.— Омадимиз келди. Энди камина ташриф буюрганим хусусида йўлбошчиларига ахборот беришгунча уларнинг ихтиёрида бўламиз. Шу холос.

Вуриклар қабиласининг йўлбошчиси Клун Макферсон бундан олти йил мұқаддам рўй берган буюк қўз-

ғолоннинг раҳбарларидан бўлгани учун унинг боши эвазига жуда катта мукофот ваъда қилинганди; у аллақачон ашаддий якобинчиларнинг раҳнамолари қаторида Фарангистонга жўнаб кетган бўлса керак, деб юрардим. Аланнинг сўзларини эшитганимдан сўнг кўзларим ярқ этиб очилиб кетгандай бўлди.

— Шунақами ҳали,— деб минғирладим.— Демак, Клун ҳозиргacha шу ерда юрган экан-да?

— Бўлмасам-чи!— деб тасдиқлади Алан.— Аввалгидек ўз ер-мулкидан бир қадам ҳам силжигани йўқ; қабиласи едириб-ичиряпти. Ҳатто қирол Георг ҳам унга ҳавас қилса арзиди.

Яна бир нечта савол бермоқчи эдим, лекин Алан мени гапиргани қўймади.

— Негадир чарчабман шекилли,— деди.— Озгина мизғиб олсам ёмон бўлмасди.

У гапни қисқа қилдию юзини қалингина арчагуллар устига қўйди ва бирпасда ухлади-қолди.

Мен бундай оромбахш уйқуни фақат орзу қилишим мумкин эди. Ёз фаслида майсалар орасида чигирткалар чириллашини эшитганмисиз? Хуллас, кўзларимни юмишими биламан, бутун баданимда — қорнимда ҳам, белимда ҳам, энг даҳшатлиси, ҳатто бошимда ҳам чигирткалар чириллай бошларди. Дарров уйқум қочиб кетарди, у ёнбошимдан-бу ёнбошимга ағдарилардим, ўтириб кўрардим, яна ётиб олардим ва кўзни қамаштирадиган осмонга уйқусираф тикилардим, чакалакзорни кўздан кечирадим; беихтиёр Клуннинг ювуқсиз пойлоқчиларига нигоҳим тушиб қоларди: улар тепалик устида чордона қуришиб ўтирган кўйи гэллар тилида бир нималар тўғрисида ўзаро валақлашарди.

Кўнгилдагидек дам ололмадим, бу орада чопар изига қайтиб келди; Клун меҳмонларни мамнуният билан кутиб олади, деди у. Биз дарҳол ўрнимиздан туриб, йўлга отланишимиз лозим эди. Алан уйқудан юзи хийла тиниқиб, тетиклашиб уйғонди, қорни ниҳоятда оч эди; афтидан, чопар қуюқ зиёфат меҳмонларга мунтазир эканини эслатиб қўйди шекилли, Алан ташаккур айтди. Мен овқат тўғрисидаги гапни эшитсан — бас, дарров кўнглим айнирди. Илгари вужудим ўзимга оғирлик қиларди, зил-замбилдек туюларди, энди қушдай енгил бўлиб қолдим-у, барибир қадам ташлашга қийналардим. Гўё ўргимчак толаси сингари олдинга узалиб бораардим, оёғим остидаги замин булуутга ўхшарди, тоғлар пардек енгил бўлиб кўринарди, шабада мени

тоғ жилғаси каби олдига солиб ҳайдаб борарди, гоҳ уёққа, гоҳ буёққа элтиб уарарди. Назаримда, ночор, нотовон одамга ўхшардим, негадир йиғлагим келарди.

Алан менга назар солдию дархол хұмрайиб олди; сездимки, жаҳли чиқди. Ғайришуурый равишида, ёш болага ўхшаб титраб-қақшаётганим учун дилим хуфтон бўлди. Яна эсимда қолгани шуки, бирдан лабларимга ханда югурди ва ўзимни қанчалик зўрласам ҳам, оғзимнинг танобини тортиб қўя олмадим; боз устига, ҳозир куладиган пайт эмасди. Бироқ ажойиб дўстим фақат яхшилик қилишни истарди; бирпастдан кейин Клуннинг иккита югурдаги қўлтиғимдан олишди-да, оёғимни ерга теккизишмай (шундай туюлган эди, холос, аслида, улар мени бир маромда бошқариб кетишмоқда) судраб кетишди. Биз қинғир-қийшиқ, ғира-шира жарликлару хандақлар бўйлаб шафқатсиз Бен-Элдер тоғларининг юраги томон борардик.

## Йигирма үчинчи боб

### ҚҰНАЛҒА

Ниҳоят, сердараҳт ёнбағир пойига етиб бордик: ўлмас қоялар жар ёқасида турарди, қоялар устини дараҳт қоплаган эди.

— Буёққа юринглар,— деди кузатувчилардан биттаси ва тоққа кўтарила бошладик.

Дараҳтлар худди мачта арқонларига ўмғанларини тираб турган денгизчилар каби қояларга қапишиб ўsgан эди; танаси пиллапояларнинг кўндаланг поғоналарига ўхшарди — биз дараҳтларни ушлаб-ушлаб юқорига ўрлардик.

Ёнбағирлик тепаси шу қадар қалин ўрмонзор эдики, ҳатто тангадек жойга ҳам соя тушмасди; тепалик четида ғалати бошпана мавжуд бўлиб, ўлкада уни Ёпик Қазноқ деб аташарди. Дараҳтларнинг теварагига ўралган четанинг орасига ёғоч қозиқ қоқилганди; майдончага тупроқ сепилиб, ҳовли мисоли теп-текис қилинганди. Ўртадаги дараҳт бошпаннанинг устуни вазифасини бажаарди. Четанларнинг ташқарисидан кигиз қопланган эди. Бу иншоот сиртдан ўтовга ўхшарди: нишабликдаги чангалзор қўйнида жойлашган қўлбола

иморат баайни дўлана шохидаги ари уяси сингари жар ёқасида осилиб турарди.

Ичкарига олти киши зўрға сиғарди. Қоянинг бўртиқ жойига моҳирлик билан ўчоқ қурилган эди; кўкиш тутун қояга қапишган кўйи кўкка ўрларди ва пастликтан деярли кўзга ташланмасди.

Бу Клуннинг яширин масканларидан биттаси эди, холос. Унга қарашли ер-мулкнинг бошқа жойларида ҳам ғорлар, ертўлалар мавжуд бўлиб, пойлоқчиларнинг маълумотлари асосида аскарларнинг бостириб келаётганини ёки орқага қайтиб кетаётганини эътиборга олардиду ўзи лозим топган масканга кўчиб ўтарди. Бир жойда муқим яшамагани ва қабила аҳолисининг йўлбошчига садоқати туфайли Клун шу пайтгача душманга тутқич бермади; бошқалар ватанни тарк этиб жонини сақлаб қолди ёки қўлга тушириб қатл этилди; у ватанида яна беш йил истиқомат қилди, ниҳоят, қўмондон қатъиян талаб этгандан кейингина Фарангистонга жўнаб кетди. Кўп ўтмасдан ўша ерда вафот этди; ажаб ҳол — Бен-Элдердаги Қазноқ соғинчи унинг юрак-бағрини куйдирб юборган бўлса ажаб эмас.

Остонага қадам қўйган чоғда у қояга ёндош қурилган ўчоқ олдида овқат пишираётган хизматкорининг ҳатти-ҳаракатларини кузатиб ўтиради. Кийимлари одмигина эди, бошида тунлари кийиладиган тўқима қалпоқ бор эди; қулоқларигача бостириб олганди ва ғалвирак тошдан ясалган мундштукида тамаки чекарди. Шунга қарамай ўзини худди подшолардек тутарди; бизни кутиб олиш учун нечоғли улуғворлик билан ўрнидан қўзғалганини кўрган одам бунга дарҳол ишонч ҳосил қиласди.

— Э-э, мистер Стюарт! — деди у. — Сэр, хуш келибсиз! Сизни ва ҳозирча исми шарифини ўзим билмаган дўстингизни кўрганимдан бениҳоя мамнунман!

— Клун, аҳволингиз қалай? — деди Алан. — Сэр, умид қиласманки, аъло даражада бўлса керак. Сизни соғ-саломат кўриб турганимдан хурсандман! Танишиб қўйинг, бу йигит менинг дўстим — Шос қўргонининг эгаси бўлмиш мистер Дэвид Бэлфор.

Одатда, ёлғиз қолган пайтларимизда Алан менинг ер-мулкимни мазахлаб тилга оларди, аммо бегона одамлар ҳузурида унвонимни удаичи мисоли тантанавор оҳангда эълон қиласди.

— Жентельменлар, ичкарига киринглар, марҳамат! — деди Клун. — Қани, уйга марҳамат қилсинлар! Албатта, камина ҳозир саройда истиқомат қилаётганим йўқ;

кўриб турибсизларки, бошпанамиз харобгина, лекин бизнигига шаҳзода ҳам ташриф буюрганлар. Мистер Стюарт, кимни назарда туваётганимни пайқаган бўлсангиз керак-а?.. Кўришганимиз шарофатига томоқларимизни ҳўллаб оламиз; чўлоқ хизматкорим иссиқ овқатни пиширгач тушлик қиласиз ва жентельменлар каби қартада кучимизни синашиб кўрамиз. Бу ерда одамнинг юраги сиқилиб кетади,— деди у қадаҳларга конъяк қуяр экан.— Дўстларим билан кам учрашаман; бармоқларимни ўйнаб ўтиравераман, ўтган кунларни эслайман, ажойиб келажакни ўйлайман: назаримда, ёрқин келажак оstonамида турибди. Келинглар, сулоламиз тикланиши учун ичамиз!

Шундан сўнг қадаҳларимизни уриштиридик-да, бўшатдик. Ростини айтсам, қирол Георгга ҳеч қандай ёмонликни раво кўрмасдим, лекин у ҳозир даврамизда бўлганда борми, ўзи ҳам менга шерик бўларди. Спиртли ичимлик ошқозонимга тушгандан кейин дарров ўзимни енгил ҳис эта бошладим ва бир чеккада сухбатга қулоқ солиб ўтирдим; кўз олдимни юпқагина туман қоплаб, кўнглимдаги бедаво қўрқув, ғам-ғусса ғойиб бўлган эди.

Дарҳақиқат, бу жой ёввойилар маскани эди, хўжайинимиз ҳам жайдари одамга ўхшарди. Клун Макферсон кўпдан бери яшириниб юргани учунми, икир-чикирларга ўралашиб қолган қандайдир қари қизни эслатарди. Доимо бир жойда ўтиради, ўша ўриндиққа бошқа бирор кимсанинг ўтириши қатъиян тақиқланган эди; Қазноқдаги жамики буюмлар қўналға соҳибининг дидига мос равишда жойлаштирилган бўлиб, уларни қўзғатиш зинҳор-базинҳор мумкин эмасди; хилма-хил таомларни жуда яхши кўтарди, ҳатто биз билан кўришаётган маҳалда ҳам кўз қири билан тез-тез ўчақ томонга нигоҳ ташлаб кўярди: иссиқ овқатдан кўзини узмасди.

Англашимча, зим-зиё кечалари у хотини ва уч-тўртта яқин дўстлари билан учрашиб турарди, улар Клунни кўргани келишарди; ҳаётининг асосий қисмини ёлғизлиқда ва фақат ўзининг пойлоқчиларию Қазноқда ёнидан жилмайдиган хизматкори билан мулоқотда бўларди. Ҳар куни эрталаб унинг ҳузурига ташриф буюрган сартарош йўлбошчининг соқолини олаётган пайтда ўлкадаги барча янгиликларни айтиб берар, Клун жон қулоғи билан тингларди. Сартарошни саволларга кўмиб, икир-чикирларни ҳам сўраб-сuriштиришдан эринмасди, ёш бола мисоли ҳадеб тихирлик қилаверарди. Баъзи

бир жавобларни эшитиб юмалаб қолгунча хаҳолайверарди; сартарош аллақачон кетиб қолған бўлса ҳам у қорнини чанглаб қаҳқаҳа ураверарди. Афтидан, саволлари унчалик олди-қочди бўлмасди; ер-мулкидан маҳрум этилган барча шотланд заминдорлари каби (бу ҳақда парламентнинг қарори эълон қилинган эди) ҳаётдан узилиб қолган бўлса-да, қадимий расм-русларга кўра қабилада ҳамон қозилик вазифасини адо этарди. Одамлар ҳар хил мунозарали масалаларни ҳал этиш мақсадида ҳузурига келишарди; улар Олий суд ҳукми билан ҳисоблашмасликлари мумкин эди, аммо қочкин йўлбошчининг бир оғиз сўзидан кейин барча гина-кудуратларни эсларидан чиқаришардию итоаткорлик билан айтилган жаримани беришарди. Кўпинча ғазаби жўшиб ҳокими мутлақ подшо сингари ҳаммаёқнинг тўс-тўполонини чиқариб ташларди; бундай пайтларда хизматкорлар худди қаттиқўл оталари қаршисида тургандек елкаларини қисишиб, миқ этишмасди. У ичкарига кирган ҳар бир киши билан рисоладагидек саломлашар, сўнgra уларнинг иккаласи ҳам ҳарбий хизматчилар мисоли бармоқларини бош кийимлари остига теккизиб қўйишарди. Хулласи калом, тоғларда яшайдиган қабиланинг кундалик ҳаётини, турмуш тарзини бевосита кузатиш имкониятига эга бўлдим; сиртдан жиноий жавобгарликка тортилган қабила йўлбошчиси эди; ер-мулки тортиб олинганди; бутун ўлка бўйлаб ҳарбий қўшилмалар уни қидирарди, баъзан бошпанасига ниҳоятда яқинлашиб ҳам қолишарди; айни пайтда чўнтағида ҳемири бўлмаган жулдуурвоқи хизматкор (у ҳар куни калтак ерди, сўкиш эшитарди) сотқинлик қилиб, бирданига бойиб кетиши мумкин эди.

Дастлабки куни қовурдоқ тайёр бўлиши биланоқ Клун шахсан ўзи лимонни сиқиб (тўкин-сочин ҳаёт кечиради), овқат устига шарбатини томизди-да, бизни дастурхон атрофига таклиф этди.

— Худди шундай овқат билан (фақат лимон шарбати йўқ эди) худди шу қўналғада қирол жаноби олийларини меҳмон қилған эдим,— деди мезбон.— У пайтларда гўшт энг ноёб таом ҳисобланарди, зираворларни орзу қиласардик, холос. Умуман айтганда, қирқ олтинчи йили менинг ерларимда лимондан кўра отлиқ аскарлар кўпроқ эди.

Қовурдоқ мазали бўлган-бўлмаганини аниқ айттолмайман, унга кўзим тушган заҳоти кўнглим айниб, зўр-базўр уч-тўрт тишлам гўшт едим-да, қўлимни

артдим. Клун овқат чоғида шаҳзода Чарли<sup>1</sup>ни қандай зиёфат қилганини сўзлаб берди; сұхбатдошларининг қиёфаларини тасвирлади ва ўрнидан туриб, ким қаерда ўтирганини кўрсатиб берди. Айтишича, шаҳзода ниҳоятда ўқтам, эҳтиросли, батартиб қироллар сулоласининг муносиб ўринбосари эди, донишмандлик бобида фақат Сулаймон подшодан кейин турарди, холос. Бундан ташқари, билишимча, Қазноқда умргузаронлик қила бошлангандан бери ичкиликка ружу қўйибди. Ҳозирги мишишларга ишонадиган бўлсак, уни одамлар сафидан чиқариб ташлаган нуқсон нишоналари ўша пайтлардаёқ пайдо бўлган эди.

Овқатланиб бўлганимиздан кейин Клун ранги ўнгиб, сийқаси чиқиб кетган қартасини олиб чийлай бошлади: бундай исқириқ қартани пана-пасқам, жойлардагина қўлга ушлаш мумкин. Шунга қарамай, бизга қимор ўйнашни таклиф этдию кўзлари чақнай бошлади. Икрор бўлмоғим лозимки, азалдан қарта ўйинини номуносиб машғулотлардан бири деб билардим; отам раҳматлининг насиҳатлари бўйича, художўй киши, боз устига, агар у ҳалол йигит бўлса, ўз бойлигини ҳаром ишларга сарфламаслиги даркор, бироннинг молига кўз олайтириш ҳам инсофдан эмас, қимор эса айнан ҳаромхўрликнинг ёрқин намунасиdir. Тўғри, жиддий сабабларни рўкач қилиб ўтирмасдан, чарчаганимни баҳона қилиб қўя қолишим мумкин эди, аммо найранг ишлатиш қўлимдан келмасди. Шунинг учун ҳам қисқичбақадек қип-қизариб кетдим шекилли, бироқ сўзимдан адашмадим: ўзим яхши ўйнашни билмайман, биронларнинг ўйинига қозилик қилиб ўтириш эса каминага ярашмайди, дедим.

Клун қартани чийлашдан тўхтади-да:

— Бу нима деган гап? — деди.— Клун Макферсоннинг уйида вигларга ўхшаш оқбилақ қаёқдан бино бўлиб қолди?

— Мен мистер Бэлфур учун бошим билан жавоб беришга тайёрман,— деди Алан.— У ҳалол, виждонли йигит, қолаверса, сиздан илтимос қилардимки, бу гапларни ким айтаётганини ҳам ёдингизда тутсангиз ёмон бўлмасди. Мен ҳам қироллар авлодиданман,— дедио Алан шляпасини эпчиллик билан бир оз юқори

<sup>1</sup> Чарли (Карл Стюарт) — II Иакаованинг набираси, Шотландия тоҷ-тахтининг «навқирон даъвогари».

күтариб қўйди.— Шунинг учун мен ҳам, менинг дўстларим ҳам ҳар доим ўзларига муносиб инсонлар куршовида бўладилар. Жентельмен шунчаки чарчаган, уйқуси келяпти. Агар карта ўйнагиси келмаётган бўлса, бунинг бизга ҳеч қандай оғирлиги тушмайди. Сэр, мен ўзингиз танлаган ўйин бўйича куч синашмоққа тайёрман.

— Сэр, ўзингизга маълумки, бу фақирона кулбада ҳар қандай жентельмен ўз хоҳишига қараб иш қиласди. Агарда дўстингиз боши билан юришни ихтиёр этган бўлсалар, марҳамат қилсинлар! — деб жавоб берди Клун.— Мабодо ҳурматли дўстингизгами, сизгами ёки бошқа бироргами бу ернинг ҳавоси ёқмаётган бўлса, жон-жон деб ташқарини биргаликда сайр этиб келишга тайёрман.

Ана холос, иккита қадрдан дўст менинг айбим туфайли бир-бирини сўйиши камлик қилиб турган эди ўзиям!

— Сэр, Алан тўғри айтди, мен ростдан ҳам жуда толиқдим,— дедим.— Боз устига, эҳтимол, сизнинг ҳам ўғилларингиз бўлса керак; шунинг учун отамга берган ваъдамни, сир бўлса-да, юшкор этиб қўйишим мумкин.

— Йўқ-йўқ, керак эмас, гапирманг энди! — деди Клун ва қазноқ четидаги арчагуллар пичани тўшалган жойни кўрсатди.

Шунга қарамай, таъби тирриқ бўлгани яққол кўриниб турарди: тоҳ-тоҳ менга тўмтайиб қараб қўярди ва бир нималар деб пўнғилларди. Аслида, инжиқлигим ва гап-сўзларим эркин қўшдек ҳаёт кечирадиган тоғлиқ якобинчилар даврасига мос тушмасди, эриш туюларди.

Конъяк ичиб, буғу гўшти еб олганимдан сўнг негадир ўзимни хийла оғирлашиб қолгандек ҳис эта бошладим; арчагул пичанига бош қўйишим билан қандайдир мудроқ ҳолатга тушиб қолдим. Қазноқда яшаган кунлар давомида сира ҳам ўзимга келолмадим. Баъзан кўзларим ярқ этиб очилгандек бўлардию атрофимда нималар рўй берәётганини ғира-шира идрок этардим, баъзан эса ғўнғир-ғўнғир товушлару уйқудаги кишиларнинг хуррак отишлари қулоғимга чалинарди; деворда осиғлик турган жун рўмоллар гоҳида ерга тушиб кетарди, гоҳо ўчоқда ёнаётган гулхан шуъласи каби ёйилиб, бутун шифту деворларни қоплаб оларди. Назаримда, кўпинча ўзимдан-ўзим гапириб юборардим ёки бақирадим шекилли. Эсимда бор, бир неча марта менга жавоб қайтараётгандарини ҳайрат аралаш

илғаб қолдим; доимо қандайдир алғов-далғов туш кўрмасдим-у, аммо ич-ичимда нимадандир жирканардим: ўзим келиб қолган жой ҳам, ором олиб ётган ўрин ҳам, девордаги жун рўмоллару товушлар, ўчоқдаги гулхан ва ҳатто ўзим ҳам ўзимга ниҳоятда жирканч бўлиб кўринарди.

Сартарошни чақиришиби: у табиб экан; менга дори-дармон тавсия этишдан аввал гэл тилида бир нималарни тушунтириди, лекин мен бир оғиз сўзини ҳам тушунмадим; таржима қилиб беришларини сўрагани ҳам қурбим етмади — ҳолим шу даражада хароб эди. Шундоқ ҳам бетоб эканимни билардим, бошқа нарсалар эса мени мутлақо қизиқтирумасди.

Соғлигим ёмон бўлиб турган пайтлари атрофимда нималар бўлаётганининг унчалик фарқига бормасдим. Фақат бир нарсани аниқ биламанки, Клун билан Алан тинмасдан қарта ўйнашарди; дастлаб, Алан анча-мунча ютуқни қўлга киритган эди; ўрнимда ўтирган чоғларимда уларнинг шавққа тўлиб қимор ўйнаётгандарига гувоҳ бўлардим: стол устида бир уюм танга ялт-юлт этиб кўринарди — ҳартугул, юз танга бўлмаса-да, лекин олтмиш танга йиғилиб қолган эди. Тоғ тизмалари устидаги нишабликда, дараҳтларга суняниб турган омонат бошпанада бунчалик бойликни учратиш мўъжизадек туюларди. Ўшанда, Алан ўйламасдан иш қиласпти, ахир синалмаган отнинг сиртидан ўтмайдилар-ку, деган эдим ўзимча. Чунки зангори ҳамёнида беш фунт ҳам пули йўқ эди-да!

Назаримда, иккинчи куни омад ундан юз ўғирди. Одатдагидек, мени тушлик арафасида уйғотишиди ва овқатлантиришмоқчи бўлишди, лекин яна овқат ейишдан бош тортдим; сўнгра сартарош бериб кетган қандайдир аччик дорини ичиришди. Очиқ эшик тепасидан мен ётган жойга қуёш нури тушиб турарди ва бундан ўзимни хийла бесаранжом ҳис этардим. Клун стол атрофида ўтирган кўйи қартасини чийларди. Алан ёнимга келиб энгашди, юзларини деярли бурнимга тақади; иситмалаб, бутун вужудим лов-лов ёниб тургани туфайлими — билмадим-у, лекин юзлари ниҳоятда бесунақайдек кўринди.

У мендан қарз бериб туришимни сўради.

— Нима учун? — дедим.

— Шунчаки қарз олмоқчиман, холос.

— Аммо нима учун? — деб такроран сўрадим.—

Тушунмаяпман.

— Дэвид, сенга нима бўлди ахир! — деди Алан.—  
Наҳотки, пулингни мендан қизғансанг-а, қарз бермайсанми?

Эҳ, агар эс-ҳушим ўзимда бўлганда борми, албатта қизғанишим лозим экан! Бироқ бесўнақай қиёфадан тезроқ қутулишни истардим, холос. Шу тобда менга бошқа ҳеч нарса керак эмасди, пулларимни унга бердим.

Учинчи куни эрталаб (Қазноқда икки кеча тунаганимиздан сўнг) хийла енгил тортиб уйғондим; албатта, аъзойи баданим ҳилвираб турарди, мажолсиз эдим, лекин буюмлар одатдагидек катталика, табиий шаклда кўринарди. Энг қувонарлиси шундаки, иштаҳам очилиб кетган эди; бирорнинг ёрдамисиз ўрнимдан турдим ва нонушта қилиб бўлганимиздан сўнг Қазноқдан ташқарига чиқдим-да, ўрмон четига бориб ўтирдим. Рутубатли кун эди, майнингина изгирин эсарди; чошгоҳгача жунжикиб ўтирдим: ёнимдан Қазноқ томонга хизматкорлару айғоқчилар ўтишаётган пайтлардагина безовталаниб қўярдим — улар озиқ-овқат билан маълумотлар олиб келишарди. Ҳозир теварак-атроф сокин эди, айтиш мумкинки, Клун ошкора тарзда ҳумкронлик қиласарди.

Ичкарига қайтиб кирган чоғимда Алан иккаласи қартани бир четга ташлаб қўйишиб, хизматкорни сўроқ қилишаётган экан; қабила бошлиғи орқасига ўғирилдию гэл тилида мёнга нимадир деди.

— Сэр, гэл тилида гапиришни билмайман,— деб жавоб бердим.

Қарта туфайли орадан гап қочганидан бери мен нимаики десам, нимаики ишга қўл урсам — бас, Клуннинг жаҳли чиқиб кетаверарди.

— Ундай бўлса, азизим, ўзингиздан кўра, сизнинг исми шарифингиз фаросатлироқ экан — чунки бу олижаноб гэлча исмдир,— деб тўнғиллади у қаҳр аралаш.— Умуман, гап бунда ҳам эмас. Айғоқчимнинг шаҳодат беришича, жануб томондаги йўл бехавотир экан, лекин пиёда юришга қувватингиз етармикан?

Қарта ҳамон стол устида турарди, лекин тилла тангаларнинг изи ҳам қолмаган эди, фақат Қазноқ томонга суриб қўйилган бир уюм хат битилган қофозлар бор эди, холос. Қолаверса, Аланнинг қиёфаси эски маҳси мисоли жийилиб кетганди, у бир нимадан норозидек кўринарди; кўнглимга ғулғула тушиб қолди.

— Бутунлай соғайиб кетдим деёлмайман,— деб жавоб бердиму Аланга назар ташладим.— Оз-моз

пулимиз бор, йўл харажатларимизга етса керак; ўйлайманки, мушкулимиз осон бўлади.

Алан лабини тишлаган кўйи нигоҳини ерга қадади.

— Дэвид, бор пулимни ютқазиб қўйдим,— деди у ҳазин товушда.

— Менинг пулимни ҳам ютқаздингиизми? — деб сўрадим.

— Сенинг пулингни ҳам,— деди у зорланиб.— Нимага менга пул бердинг ахир! Мен қарта ўйнашга тушиб жетсам, эс-ҳушимни йўқотиб қўяман-ку!

— Бай-бай-бай! — деди Клун.— Буларнинг ҳаммаси бемаънилик: фақат шўхлик қилдик, холос. Ўз-ўзидан равшанки, пулларингни икки ҳисса қилиб қайтариб бераман; ҳазар қилмасаларинг кифоя. Агар уларни бермасам, нима деган одам бўламан! Аҳволларингни кўра-била туриб, оёқларингдан чалиб юборсам, жентельменлар каминадан ўпкалашмайдими, ахир! Бунаقا қилиш ярамайди-ку! — деб товушининг борича бақирди Клун қизариб-бўзарганча ва чўнтағидан тилла тангаларни чиқариб столга ташлай бошлади.

Алан миқ этмасди, у ҳамон ер сузиб ўтиради.

— Сэр, балки бир дақиқага ташқарига чиқиб келармиз-а? — дедим.

— Бажонидил,— деб жавоб берди Клун ва орқамдан эргашиб ташқарига йўл олди. Унинг қиёфаси тунд эди, зардаси қайнаб турарди.

— Авваламбор, сэр, ҳиммат кўрсатганингиз учун сиздан бағоят миннатдор эканимни айтиб қўйишим лозим,— дедим.

— Беҳуда сафсата! — деб қичқирди Клун.— Қандайдир «ҳиммат-пиммат»ни ўйлаб топганини қаранглар... Албатта, яхши иш бўлмади. Хўш, сизнингчча, камина нима қилиши лозим?! Ҳудди каталакдаги қўчкор мисоли Қазноқда қамалиб ётган бўлсам, ахён-аҳёнда йўқлаб келадиган дўстларим билан қарта ўйнаб кўнгилхушлик қилишдан бошка иложим йўқ-да! Агар улар ютқазиб қўйишига, гап бўлиши мумкин эмас...— У бирдан сўзида тутилиб қолди.

— Ана шунаقا! — дедим.— Агар улар ютқазиб қўйишига, пулларини қайтариб берасиз; агар ютиб олишса борми, сизнинг пулларингизни чўнтакларига солишадио индамай жуфтакни ростлашади! Боя айтдим, олижаноблигингиз учун яна бир бора таъзим бажо келтираман; сэр, ҳарҳолда, бундай аҳволга тушиб қолганимдан ниҳоятда азият чекяпман.

Қисқа муддатли сұкунат бошланды; Клун бир гап айтишга шайланды-ю, лекин лом-мим демади. Фақат борган сари юзлари лолақызғалдоққа үхшаб қизармоқда эди.

— Мен ҳали ёш боламан, шунинг учун сиздан маслаҳат сұрайпман,— дедім.— Панд-насиҳатингизни дарығ тутманг. Дүстім ҳалол үйнаб үз пулларини ютқазиб қўиди; дастлаб эса ғирромчилик қилмасдан пулнингизни ютиб олган эди. Мен пулнимизни қайтариб олишим мумкинми? Шундай қилсам яхши бўладими? Ўзингиз биласизки, ўёққа-буёққа ташласак бари бир фурурим заха ейди.

— Ҳа, мистер Бэлфур, менга ҳам оғир ботяпти,— деди Клун.— Сизнингча, гүё камбағал кишиларни шилиб олиш учун тузоқ қўйгандек бўлиб чиқяпман. Дўстларымнинг үз уйимда ҳақоратланишларига асло йўл қўймайман, ҳа! — У бирдан тутақиб кетди: — Ёки ҳақоратлатиб ҳам қўймайман, мана шунақа!

— Сэр, ана кўрдингизми, демак бекорга айтмаган эканман: қарта — батартиб инсонларга ярашмайдиган машғулот. Қолаверса, сиздан маслаҳат беришингизни кутяпман.

Кафолат беришим мумкинки, агар шу тобда Клун бирор кишини жинидан ҳам баттар ёмон кўраётган бўлса, ўша кимса — Дэвид Бэлфур — эди. У менга еб қўйгудек назар солди; ҳозир оғзидан ёмон сўз чиқиб кетиши ҳам мумкин эди. Бироқ у камининг ёшлигини ҳисобга олиб, ўзини тўхтатиб қолди шекилли. Эҳтимол, адолатпарварлик туйғуси ғолиб келгандир... Равшанки, ҳаммамиз учун ҳақоратомуз вазият вужудга келганди, айниқса, Клун ўзини камситилаётгандек ҳис этарди: аммо у бу ҳолатдан чиқиб олди.

— Мистер Бэлфур, жайдари одамнинг ғашини келтирадиган даражада сўзамолу сермулозамат экансиз, лекин юрагингизда ҳақиқий жентельмен руҳи барҳаёт. Энди сизга айтадиган чин сўзим шуки, бу пулларни олишингиз мумкин: ўз ўғлимга ҳам худди шундай маслаҳат берардим. Қани, қўлингизни узатинг — жонажон дўст бўлайлик!

# Йигирма тўртинчи боб

## СИРЛИ СЎҚМОҚ БЎЙЛАБ

### НИЗО

Қоронғи тушгандан кейин Алан иккимизни Лоҳ-Эрихт дарёсининг нариги томонига олиб ўтишди-да, шарқий қирғоқ бўйлаб Лоҳ-Ранноҳ ирмоғининг юқори қисмида жойлашган бошқа бир яширин маскан сари бошлаб кетишиди. Бизни Қазноқдаги хизматкорлардан биттаси кузатиб бораради. Бу азамат лаш-лушларимизни ҳамда Алланнинг плашини кўтариб олган эди ва худди устига пичан ғарами ортилган чайир от сингари ҳадиксираб битта-битта қадам босарди. Юқим озгина бўлса-да, лекин оёғимни судраб зўрға юрардим; агар биз ҳалол курашда кучимизни синаб кўрадиган бўлсак, бу йигитни мағлуб этишим аниқ эди.

Албатта, енгил юқ билан одимлаш мушкул эмас; бироқ қалбимни озодлик туйфуси ва сурур чулғаб олмаганда ўрнимдан қўзғалишга ҳам мадорим етмасди. Эндинга тўшақдан бош кўтариб, ночор аҳволда паҳлавонларча ҳаракат қилишга имконим бўлмаган ҳолда Шотландиянинг кимсасиз, овлоқ гўшаларидан ўтишга мажбур эдим, намгарчилик айниқса, жонга тегарди.

Анча вақтгача ўзаро гаплашмадик, гоҳ ёнма-ён, гоҳида тумтайганимизча кетма-кет юрардик: ғазабга тўлиб, лаб-лунжим осилиб бораради, кўч-куvvатимни асосан ич-этимни кемираётган ҳис-туйғуларимни жиловлашга сарфлардим; Алан ғазабнок ва изза бўлган қиёфада юрар, назаримда пулимни ютқазиб қўйганидан ўсал эди, бу ҳолни дўстона кайфиятда қабул қилмаганим учун ғазаби қўзиб кетганди. Ажralиб кетиш лозим деган қарорим хаёлимни тарқ этмай қўйди; бу фикр ёпишавергани сари ўзимдан нафратлана бошлардим. Ундан кўра, шартта ортимга ўгирилиб: «Энди ўзинг кетавер, менинг оёғимга қараб юраман десанг, ўзинг ҳам бир балога гирифтор бўлишинг мумкин», деб айтишим лозим эди. Шу тарзда олижаноб, сўзамол, ҳимматли инсон эканимни намоён этардим. Аслида, жондан азиз кўрадиган дўстингга: «Ниҳоятда хавфли вазиятда турибсан, мен унчалик ёмон аҳволда эмасман, сен билан дўстлашиш ортиқча даҳмазадан бошқа нарса эмас; бундан буёғига билганингни қилгин,

ҳар ким ўз аравасини ўзи тортсин», деб айтиш учун аблаҳ бўлишинг керак. Йўқ, бунақаси кетмайди: бундай гаплар ҳатто хаёлингдан ўтса — бас, юзларинг шолғомдай қизаради-ку!

Барибир Алан ёш болага ўхшарди: ёмон жойи шундаки, алдоқчи шумтакадай ҳаракат қилди. Деярли ҳушимдан кетиб ётган пайтимда алдаб-сулдаб пулимни олди нимаю ўғирлади нима — бунинг фарқи унчалик катта эмас; боз устига, унинг таъбири бўйича «тиланчилик қилиб пул сўраб олган» пасткаш ёнида, менинг пулим эвазига бир кунини ўтказиш илинжида, виждони қийналмасдан одим ташлаётганига ўласанми, куясанми! Албатта, боримни ўртада баҳам кўришга тайёрман: бироқ у ўз қилмишини айнан шундай бўлиши керак, деб баҳолатгани жаҳлимни чиқарарди.

Хуллас, мана шу нарсалар хаёлимдан нари кетмасди, лекин бу фикрларимни баён этсам ёки пул ҳақида сўз очсан, номардлик бўларди. Шунинг учун ғазабимни ичимга ютиб, миқ этмасдим; ҳатто ҳамроҳимга қарамасдим; унга зимидан кўз қиримни ташлаб қўярдим, холос.

Ниҳоят, Лоҳ-Эрихтнинг нариги қирғофида, бир текисдаги қамишзор ботқоқликдан ўтаётганимизда (юриш унчалик қийин эмасди) Аланнинг тоқати тоқ бўлди шекилли, тўппа-тўғри рўпарамга келиб тўхтади.

— Дэвид, арзимаган кўнгилсизлик учун дўстлар аразлашиб юришса ярашмайди,— деди.— Мен қилган ишимга афсусланяпман, етар энди! Агар кўнглингда гапларинг йиғилиб қолган бўлса, тортинмай айтавер.

— Менинг кўнглимдами? — дедим ғижиниб.— Ҳеч нарса йиғилиб қолгани йўқ.

У хафа бўлиб қолди, мен ичиқора ўзимча хурсанд эдим.

— Шошма, ахир гуноҳимни бўйнимга олдим-ку,— деди у титроқ товушда.

— Йўқса-чи, албатта гуноҳкорсиз-да,— дедим соvuқонлик билан. Гуноҳингизни бирор марта ҳам юзингизга солмаганим учун раҳмат айтсангиз арзиди.

— Бир марта ҳам юзимга солмадинг?! — деди Алан.— Лекин одамни пичноқсиз сўйдинг, буни жуда яхши биласан. Балки, ажрашиб кетармиз-а? Бир пайтлар шунаقا деган эдинг. Эҳтимол, ўша гапингни ҳозир ҳам такрорларсан? Дэвид, ўнгу сўл томонимиз ҳам тоғ, арчагуллар ҳам икки кишига етиб ортади; очигини айтсан, мен нокерак жойга тумшүғимни тиқиши ёмон кўраман.

Гүё бирор баданимга наштар санчгандек бўлди; назаримда, Алан зимдан хиёнат қилганимни пайқаб қолган эди.

— Алан Брек! — деб хитоб қилдиму қаҳр-ғазабимни тўкиб солмоқчи бўлдим: — Наҳотки оғир дамларда сизни ёлғиз ташлаб кетсан? Шундай дейишга қандай тилингиз борди? Шаънимга бундай гап айтишга ҳақингиз йўқ. Барча хатти-ҳаракатларим гапларингиз ёлғон эканини исботлаб турибди. Тўғри, ўшанда ташландиқ ерда ухлаб қолган эдим; лекин ўлардек чарчаганим туфайли шундай бўлди, бунинг учун ҳадеб пешонамга чертавериш инсофдан эмас...

— Ие, у гапларни хаёлимга келтирганим йўқ-ку! — деди Алан.

— ...Агар ўша ҳодисани ҳисобга олмасак, яна нима қилибманки, итдан ҳам баттар пастикашликка борсам? — дедим.— Ҳеч қачон дўстларимга панд бермаганман ва бундай ярамасликни сиздан бошлиш ниятим ҳам йўқ. Биргаликда жуда кўп нарсаларни бошимиздан кечирдик; эҳтимол, сиз эсингиздан чиқариб юборарсиз, лекин мен ўлсам ҳам эсимдан чиқармайман.

— Дэвид, фақат бир гапни айтиб қўймоқчиман,— деб сўзлай бошлади Алан хотиржамлик билан.— Сен ҳаётимни сақлаб қолгансан, сендан бир умрлик қарздорман; энди пулларимни ҳам қайтариб бердинг. Кўриб турибсанки, шундоқ ҳам зиммамда оғир юқ турибди — қарздорман; бекордан-бекорга юрак-бағримни эзвермагин-да.

Бундай сўзлар ҳар қандай одамнинг кўнглини эритиб юборади, албатта. Мен ҳам хийла таъсирандим. Аҳмоқона харҳаша қилаётганимни билардим; шунинг учун энди нафақат Аландан, айни пайтда ўзимдан ҳам нафратланардим; яна жазавам тутиб қолди.

— Мендан кўнглимдаги гапларни ошкора айтишимни илтимос қилдингиз-а? — дедим.— Начора, майли, айтаман. Боя ўзингиз икрор бўлиб, мени ноқулай аҳволга тушириб қўйдингиз: оқибатда ғурурим топталди, лекин сиздан ўпкалаганим йўқ, бу ҳақда ўзингиз гап очдингиз. Энди бўлса, ҳақорат қилганлари учун нега суюниб, ўйинга тушмаётганимга ҳайрон бўляпсиз! — дея бақирдим.— Индамасам, бирпасдан сўнг оёғингизга бош уришимни, миннатдорчиллик изҳор этишимни истаб қоласиз! Алан Брек, бошқалар тўғрисида ҳам озгина бош қотирсангиз бўларди! Агар ўзгаларни кўпроқ ўйлаганингизда ўзингиз ҳақингизда камроқ гапирган

бўлардингиз; сизни ҳурмат қиласиган одам барча хўрликларга миқ этмай чидаб бергани учун раҳмат айтиб, эски гапларни кавлаштирумасдингиз; унга қарши бошкўтармасдингиз. Ахир икрор бўлдингиз-ку, ҳамма машмаша сиз туфайли бошланди: шундоқ экан, нега ўртада низо чиқаряпсиз? Сал ўйлаб гапиринг-да!

— Яхши,— деди Алан.— Энди миқ этмайман.

Яна сукунат бошланди. Махфий бошпанага етиб бордик; овқатландик, уйқуга ётдик, лекин бир оғиз ҳам гаплашмадик.

Эртаси куни тонг қоронғисида кузатувчи бизни Лох-Раннохнинг нариги соҳилига ўтказиб қўйди ва қайси йўлдан кетсанг бехавотирроқ эканини тушунтириди. Унинг айтишига қараганда, дарҳол тоқقا кўтарилиб, учта водийни — Глен-Лайон, Глен-Локей, Глен-Докартни айланиб ўтиб, Киппеннинг ёнидан, Форт жилғалари бўйлаб паст текисликка тушиб олсак яхши бўлар экан. Алан йўл-йўриқлардан қониқмади, агар ўша йўлдан юрсан, унинг азалий душманлари бўлмиш гленорлик Кембеллар юртига бориб қолар эканмиз. Ундан кўра, шарқ томон йўл олганимиз маъқул экан: тез орада атоллик Стюартлар қарамоғидаги ерларга кириб борамиз; улар бошқа бир йўлбошчига итоат этсалар-да, лекин битта уруғдан тарқалишган, ота-боболари қариндош бўлишган; боз устига, манзилимиз ҳам яқин қолади. Лекин бизни кузатиб келаётган Клуннинг энг илғор айғоқчиси Аланнинг ҳар бир гапига асосли равишда эътиroz билдиради, ҳар бир музофотдаги аскарлар миқдорини айтарди ва ўз сўзларини (менинг фаҳмлашимча) биз фақат Кембеллар юртида бехавотир юришимиз мумкин эканлиги хусусидаги мулоҳаза билан якунларди.

Охир оқибатда Алан рози бўлди, аммо ич-ичида ғижиниб турганини асло яшириб ўтирмади.

— Шотландияда бундан ҳам баттар ўлкани топиб бўлмаса керак,— деб тўнғиллади.— Ҳеч нарса йўқ, фақат арчагуллар, кузғунлару Кембеллар бор, холос. Умуман, билишимча, анча тажрибали кишига ўхшайсиз; майли, айтганингизча бўла қолсин!

Айтилган сўз — отилган ўқ: ўша йўналиш бўйлаб ҳаракат қила бошладик. Уч кеча яйдоқ тоғларда тентираб, саркаш дарё бошланадиган жилғалар ёқалаб одимладик; тез-тез туман тушарди, изғирин тинмасди, шивалаб ёмғир ёғарди, йилт этиб қуёш кўринмасди. Кундузи намхуш арчагуллар устига юмалаб мизгиб

олардик, кечалари эса пурвиқор қояларга ўрмалаб чиқардик, палахса-палахса харсанглар устидан ўтардик. Баъзан йўлимиздан адашиб, қалин туманга дуч келиб қолардик ва туман кўтарилишини кутиб ўтиришга мажбур бўлардик. Гулхан ёқиши хәёлимизга ҳам келтирмасдик. Емишимиз аталаю бир парча муздек гўшт эди — Қазноқда халтамизни тўлдириб беришганди; худога шукрки, сув сероб; атрофда жилдираб ариқчалар оқарди.

Долғали замон эди. Рутубатли кунлар, ҳувиллаган овлоқ жойлар кўнглимиизга ғулғула соларди. Аъзойи баданим кўкариб кетганди, совуқдан тишларим тинмасдан такилларди; томогим худди оролда ёлғиз қолган пайтимдагидек лўқ-лўқ оғрий бошлади: биқиним тинмасдан санчарди; билч-билч лой жойга ётиб ором олаётган вақтимда ҳам ўнгимда кўрганларим — даҳшатли ҳодисалар сира хәёлимни тарқ этмасди: чақмоқ шуъласида Шос кўрғонининг минораси кўз ўнгимда намоён бўларди, денгизчилар Рансомни қўлларида қўтаришиб келишарди. Қўйруқдаги Бошқармада Шуан ўлим талвасасида типирчиларди, Колин Кемпбелл эса қалтираб эгнидан чакмонини ечмоққа уринарди. Ана шундай алоқ-чалоқ туш кўраётган пайтимда кимdir мени тутиб ўйғотардию оқшом маҳали балчиқда ўтирганимча совуқ аталани ичиб огардим, юзларимни совуқ ёмғир томчилари аёвсиз саваларди, ёқамдан муздек сув ичимга кирав, туман аста-секин устимизга бостириб келаверарди — худди қоп-қора деворга ўхшарди, баъзан шабада уни увададай титиб юборардию кўз ўнгимизда қандайдир қорамтири-кўкиш водий намоён бўларди; жилғалар пастга шарқираб оқиб ётарди. Теварак-атрофимизда сон-саноқсиз ирмоқлар жилдиради. Тинимсиз ёмғирдан сўнг тоғ чашмалари тўлиб-тошиб кетган, чуқурчалар кўлмак бўлиб қолганди, ирмоқлар худди сел келгандек лим-лим тўлиб, қирғоқларга тошиб оқарди. Ярим кечаси водий томонга шиддат билан тушаётган сувнинг гоҳ бўғиқ, гоҳо гулдурак, гоҳида ғазабнак товуши эшитиларди. Шундан кейингина Сув париси ҳақидаги эртакнинг ҳақиқий қудратини англаб етдим: нақл қилишларича, ёвуз арвоҳлар кечувларида йиғлаб ўтиришаркан ёки қизғин базм қилишаркан ва йўловчиларни алдаб-сулдаб сув қаърига тортиб кетаркан. Алан бундай нақлларга бутунлай бўлмаса-да, унча-мунча ишонар экан: у католикларга

ўхшаб чўқинаётганига кўзим тушган чоғда эсхонам чиқиб кетишига бир баҳя қоларди.

Ўқубатли сафар мобайнида Алан иккаламиз бегона-сираб юрдик; деярли гаплашмадик. Аслини олганда, суробим тўғриланиб қолган эди; шұ сабабли ўзимни қисман оқлашим мумкин. Боз устига, табиатан мен кек сақлайдиган одамман: хафа қилган кишини анча пайтгача асло кечирмасдим: ҳозир ҳам йўлдо-шимдан, ҳам ўзимдан ўпкаладим. Дастлабки икки кун давомида у кўп гапирмади-ю, чамаси, ёрдам қўлини чўзишга ҳар доим тайёр эди ва тез орада гина-кудуратни унтишишмдан (бу ҳолни яққол кўриб турардим) умидвор бўларди. Бу вақт мобайнида мен сукут сақлаб ёрдамларини қўполлик билан рад этардим, гоҳида қандайдир тошга ёки бутага қарагандек унга беписанд, назар ташлаб қўярдим.

Иккинчи кечаси, аниқроғи, учинчи кун тонгида шип-шийдам нишабликка етиб борди; одатдагидек, дар-ҳол нафасимизни ростлаб, тамадди қилиб, уйқуга ётишимиз мумкин эмасди. Панароқ жойга етгунимизча атроф хийла ёришиб қолди; ҳамон ёмғир ёғарди; булутлар анча баландликка кўтарилиб кетган эди. Алан юзимга қарадио бетоқатланиб хўмрайиб олди.

— Тугунчангни менга бера қол, ўзим кўтариб ола-ман,— деди, Лоҳ-Ранноҳда айғоқчи билан хайрлашга-нимиздан сўнг ўнинчи марта мурожаат этиб.

— Раҳмат, бир иложини қиларман,— деб жавоб бердим.

Алан тувақиб кетди.

— Ўзингдан кўр энди, ўлсам ҳам ёрдам бер-майман,— деди у.— Дэвид, мен бардошли одамлар тоифасидан эмасман.

— Ҳа-я, энди бўлар иш бўлди,— дедим ўн ёшлардаги болакайдек ўжарлик билан.

Алан бир оғиз ҳам гапирмади, лекин турқи-атворига қараб туриб, нима демоқчи эканини билиб олиш мумкин эди. У Қазноқдаги гуноҳини бутунлай оқлаб олганди: шляпасини чапдастлик билан манглайидан сал юқорироқ кўтариб қўйди-да, қаддини ғоз тутганча шахдам одимлай бошлади; ҳуштак чалиб бораарди, гоҳида кўз қири билан менга назар ташларди, лабла-ридан эса заҳарханда аримасди.

Учинчи кечада Бэлкиддернинг ғарбий чеккасидан ўтишимиз лозим эди. Ҳаво очилиб кетди; аёз тушиб қолди, бадан жунжикарди, шимол томондан эсаётган

шамол булатларни ҳар тарафга сочиб юборди, юлдузлар ёрқинроқ чақнай бошлади. Ирмоқлар ҳамон тўлиб-тошиб оқмоқда эди, сувнинг хунук шовуллаши эшитилиб турарди, лекин, амин бўлдимки, Алан энди Сув парисини бутунлай ёдидан чиқариб юборганди: кайфияти аъло эди. Мен учун об-ҳаво жуда кеч ўзгарди: ботқоқда шу қадар узоқ вақт юмалаб ётдимки, ҳатто эгнимдаги уст-бошларим ҳам, Таврот таъбири билан айтганда, «менга қабоҳатдек туюларди»; ўлар ҳолатда чарчадим, баданимда бутун жойим қолмаганди, вужудим сирқирағ оғирди, этим увишар, изғирин суяқ-суюгимдан ўтиб кетарди, изғирин увиллашидан қулоқларим батанг битиб қолган эди. Мана шунаقا оғир аҳволда турган пайтимда йўлдошимнинг заҳарханда кулгиларига ҳам чидашим керак эди. Энди унинг тили бийрон бўлиб қолди; баҳона топилиши билан дарров мени майна қила бошларди. Икки гапининг бирида «вигвачча» деб улуғларди.

— Ана, кўрғасанми, кўлмакнинг суви қуриб қолибди; қани, вигвачча кўзларини чирт юмиб, сакраб юборсин-лар-чи! — дерди у.— Ахир сен осмонга сапчишга устаси фарангсан-ку! — Ҳамма гаплари таҳқирловчи пиchinгла-ру аччик кесатиқлардан иборат бўларди.

Қайтар дунё, деб шуни айтсалар керак-да! Айбимга икрор бўлишга ҳам тоқатим йўқ эди; бу кетишда узоққа бора олмаслигимни билиб турардим: тез орада сулайиб қоламану эгасиз қўй ёки дайди тулки сингари тоғу тошларда жон бераман, суякларим йиртқич ҳайвонники сингари оқариб ётаверади. Назаримда, алаҳсирай бошладим; эҳтимол, шунинг учунми охиратим кўрқинч туш каби кўз ўнгимда яққол гавдаланаарди; ана шу овлоқ жойларда чириб кетсам керак, деб ўйлардим ва сўнгги дамларда устимда ёввойи бургутлар ўлакса ҳидини сезиб гир-гир айланишади, деган фикр сира хаёлимни тарқ этмасди. Ана, иннайкейин Алан афсусланади, қарзини уза олмаганига минг-минг пушаймонлар ейди, аммо мен аллақачон ўлиб кетган бўламан: хотирам унга ҳеч қачон тинчлик бермайди, деб ўзим-ча хаёл сурардим. Савдоига, аламзада болага ўхшардим, эски гина-кудуратларимни жўрттага янгилардим. Ундан кўра, тиз чўкиб худодан мадад сўраганим афзал эди, албатта. Алан ҳар гал пичинг қилган пайтда хаёлимда қўлимни ювиб, қўлтиғимга артиб қўярдим. «Сенми, шошмай тур-чи! — деб ўйлардим.— Шунақаям зўр жавоб ҳозирлаб қўяманки, додингни худога

ҳам айтольмай қоласан: ўзимни тап этказиб ерга ташлайману ўлиб қоламан; ундан сўнг жиртта-жиртта сакрашингни томоша қиласман! Қасос олиш шунаقا бўлади, оғайнни! Ичиқоралик, бераҳмлик қилганинг учун афсус-надоматлар чекасан!»

Борган сари аҳволим оғирлашарди. Бир сафар ҳатто йиқилиб тушдим, оёқларим чалишиб кетди; Алан бирпасда тараддувланиб қолди. Сапчиб ўрнимдан турдиму шахдам қадам ташлаб яна йўлга тушдим: кўп ўтмай ўша ҳодиса унинг ёдидан кўтарилиди. Баъзан тандирда ўтирган одамдек аъзойи баданим ёнарди, баъзан эса совуқдан тишларим такилларди. Биқинимдаги санчиққа тоқат қилиб бўлмасди. Ниҳоят бундан ортиқ бир қадам ҳам юра олмаслигимни пайқаб қолдим ва бирдан кўнглимда ҳаммасини Аланга тўкиб солиш истаги пайдо бўлди: ғазабимни сочиб юбораману бирпасда ҳаёт билан ҳисоб-китобни бирёқлик қиласман. Айни шу тобда у «вигвачча» деб чақирди. Мен тўхтадим.

— Мистер Сюарт, ёшиңгиз жиҳатдан мендан каттасиз, шундоқ экан, қандай муомала қилишни билишингиз лозим,— дедим, товушим худди таранг тортилган тор мисоли титрарди.— Наҳотки сиёсий эътиқодимни юзимга солиб, шу йўсинда кўзларимни ўйиб олмоқчи бўлсангиз? Бундан бошқа бамаънироқ эрмак топилмадими? Кишиларнинг дунёқараши бир-бирига зид бўлган ҳолларда йигит одам ўзини муносиб равишда тутиши керак; ҳадеб қийшанглайверса, уят бўлади. Акс ҳолда, ишончингиз комил бўлсинки, сизни тузлаб қўйишим мүмкин, кейин ўтиргани жой тополмай қоласиз!

Алан рўпарамда шляпасини чаккасига дол қўйганча серрайиб турарди, қўллари чўнтакларида, бошини бир томонга қийшайтириб олган эди. Юлдузлар шуъласида афт-башарасини яққол кўриб турардим; мийигида куларди. Гапларимни тугатишим биланоқ якобинчилар қўшиғи куйини ҳуштакда чала бошлади. Бу қўшиқ Престонпанс остоналарида яксон қилинган генерал Коупни мазахлаб яратилган эди.

Эй, Жонни Коуп, ҳалиям оёқларинг юряптими?  
Ҳалиям сенинг ноғораларинг чалинглатими?

Тўсатдан ўша жанг пайтида Алан қирол томонида туриб уришганини эслаб қолдим.

— Мистер Стюарт, нима учун айнан мана шу

қўшиқни танладингиз-а? — дедим.— Мабодо сиз ҳам улар томонидан, ҳам булар томонидан енгилганингизни эслатиб қўймоқчи эмасмисиз, ишқилиб?

Алан бирдан ҳуштак чалишни бас қилди.

— Дэвид! — деб хитоб этди.

— Бундай хурмача қилиқларга чек қўйиш лозим,— дедим.— Шу тобдан эътиборан менинг қиролим, ажойиб дўсларим — Кемпбеллар ҳақида илтифот билан гапиришга ўргатиб қўйишим мумкин.

— Мен Стюартман...— деб сўз бошлади Алан.

— Ҳа, биламан,— деб чўрт кесдим.— Фамилиянгиз ҳам қиролона. Бироқ, эсингизда бўлсинки, камина ана шу тоғларда ўша фамилияни кўтариб юрган бирталай кишиларни учратдим, энди фақат бир гап айтишим мумкин: агар улар ювениб олишса, бениҳоя савоб бўларди.

— Бу ҳақорат-ку? — деди Алан товушини пастилатиб.

— Агар шундай бўлса, афсус қиласман,— дедим. Лекин ҳали гапимни тугатганим йўқ; агар ҳазилни кўтара олмасангиз, чин гапни эшитиб юрагингиз ёрилиб кетса ажаб эмас. Жанг майдонида катталардан енгилгансиз, ўчингизни ёш боладан оляпсизми?! Сизни Кемпбеллар дўппослашган, виглар ҳам дўппослашган, сиз бўлсангиз орқа-олдингизга қарамасдан қочишини билгансиз, холос. Улар ҳақида сал илтифот билан гапирсангиз бўларди.

Алан худди қоқкан қозиқдай қотиб қолди; плашинг этаклари шамолда ҳиллирарди.

— Афсус,— деди ниҳоят.— Лекин баъзи бир гапларни асло унутиб бўлмайди.

— Сиздан ҳеч ким унутишни илтимос қилаётгани йўқ,— дедим.— Ижозат берсангиз, яккама-якка олишувга тайёрман!

— Яккама-якка олишувгами? — деб тақроран сўради.

— Ҳа, ҳа, яккама-якка олишаман! Мен маҳмадона, мақтанчоқ эмасман. Ҳушёр бўлинг, жаноб! Тағин бикинингиздан дарча очиб қўймайин! — Шартта қиличимни қинидан суғурдиму Аланнынг ўзи менга ўргатганидай жанговар ҳолатга кирдим.

— Дэвид! — деб қичқириб юборди у каловланган кўйи иягини тутамлаб.— Худо ҳаққи! — деди-да, қиличини қинидан суғурди. Аммо қиличим билан бир марта ҳамла қилишга ҳам улгурмасимдан, у қиличини отиб юбордию ерга узала тушиб ётиб олди.— Йўқ, йўқ! — деди қайта-қайта.— Йўқ, бундай қилолмайман...

Ана шу манзарани кўрганимдан сўнг бирдан ғазабим

сўнди-қолди; фақат кўнглимда қандайдир оғриқ, афсус-надомату бўшлиқ қолди, холос. Ўзимдан ҳам норози эдим. Агар айтган сўзларимни қайтариб ололганимда борми, бунинг эвазига ҳеч нарсамни аямасдим. Бироқ, айтилган сўзни қайтариб бўлардими?! Дарҳол Аланнынг меҳрибонлигини, довюраклигини, мени қўллаб-қувватлашини, далдаларини, атрофимда парвона бўлиб, оғир дамларда ёлғиз ташлаб қўймаганини эсладим; кейин уни ҳақоратлаганим ёдимга тушдию фидокор дўстимдан бир умрга ажралганимни тушундим. Аҳволим янада ёмонлашди, биқиним гўё бирор пичоқ суқиб олаётгандек лўқ-лўқ оғрирди. Мана ҳозир ҳушимни йўқотаману йиқилиб қоламан, деб ўйладим.

Тўсатдан кўзларим ярқ этиб очилиб кетди: бояги сўзларимни минг марта тавба-тазарру қилганимда ҳам юва олмайман; бундай дилсиёҳликни гап-сўзлар билан кўнгилдан аритиб бўлмайди. Ҳа, энди ўзимни оқлаб ўтирганимдан фойда йўқ эди, лекин бир оғиз ёрдам сўраб илтижо этсам — бас, Алан сўзимни ерда қолдирмасди. Мен ғуруримни енгиб:

— Алан! — дедим.— Ёрдам беринг! Бўлмаса, ҳозир ўлиб қоламан.

У сапчиб ўрнидан турди-да, менга синчиклаб назар ташлади.

— Рост гапирияпман,— дедим.— Тамом бўлдим. Оҳ, панароқ жойга элтиб қўйинг — осонроқ жон берай.

Тилёғламалик қилиб ўтиришга ҳожат йўқ эди, ялинчоқ товушимга ҳар қандай бағритош киши эриб кетарди.

— Юра оласанми? — деб сўради Алан.

— Йўқ,— дедим.— Ўзим юролмайман. Чамамда, бир соатдан бери оёқларим чалишиб кетяпти; биқиним лов-лов ёнепти, худди қизиб турган темирни босишаётгандек; нафас олишга ҳолим қолмади. Алан, агар мен ўлиб қолсам, рози бўласизми? Ҳатто жаҳлим чиқиб турган пайтларда ҳам сизни ичимда яхши кўрадим.

— Жим бўл, керак эмас! — деб қичқириб юборди Алан.— Бир оғиз ҳам гапирма! Дэвид, жонажон дўстим, ўзинг биласан-ку...— У ҳўнграб юбормаслик учун нафасини ютди.— Кел, сени опичлаб оламан, мана бундай! — деб давом этди.— Энди бўйнимдан маҳкам ушла. Жин урсин, бошпанани қаердан топамиз? Шошма, ахир Бэлкиддерга етиб келдик-ку; бу ерда уйлар сероб. Дўстларим ҳам шу ерда истиқомат қиласдилар. Дэви, шундай юрсам сенга озор етмайдими?

— Йўқ, омон-эсон етиб борсак керак.— Унинг қўлини маҳкамроқ ушлаб олдим.

У хўнграб юборишдан араңг ўзини тийиб қолди.

— Биласанми, Дэви, мен ярамас одамман, вассалом! Фаҳм-фаросат, меҳр-оқибат нима эканини ҳам билмайман. Бўлмасам, сен ҳали суюги қотмаган ёш бола эканингни, мен билан теппа-тенг йўл юра олмаслигингни эсимдан чиқариб қўярмидим! Дэви, мени кечиргин энди.

— Оғайни, бу ҳақда гаплашмайлик! — дедим.— Иккаламиз ҳам ёмон одам эмасмиз, хўпми! Қадрдоним Алан, бир-бирилизни шундайлигимизча яхши кўришимиз лозим! Вой, биқиним! Тоқат қилиб бўлмаяпти-куй Наҳотки, яқин ўртада бирорта бошпана йўқ?

— Албатта бошпана топиб бераман, Дэвид,— деди Алан ишонч билан.— Ҳозир ирмоқнинг қуий оқими бўйлаб юрамизу бирорта уйга дуч келамиз. Менга қара, азизим, балки сени опичлаб олганим маъқулдир-а?

— Алан, жигарим, ахир мен сиздан бир бош новчаман-куй!

— Ҳечқиси йўқ! — деб хитоб қилди Алан.— Кўпиги билан бир қарич новчасан, холос. Албатта, мени худойим бўйдан сал-пал қисиб қўйган — кўриниб турибди, лекин...— Бирдан овози чиқмай қолди ва бир оздан сўнг давом этди: — Умуман, ўйлаб кўрсам, сен ҳақсан. Ростдан ҳам, мендан бир бош новчасан; ҳатто бир тирсак новча бўлсанг-да ажаб эмас!

Яна ўртада жанжал чиқмаслиги учун Алан шоша-пиша сўзидан қайтарди: бундай чоғда беихтиёр кулгим қистарди. Агар биқиним лўқ-лўқ санчиб турмаганда, қаҳқаҳа уриб юборишдан ҳам тоймасдим, албатта. Бироқ, кулиб юборсам... айни пайтда кўзёшларимни ҳам тиёлмай қолардим.

— Алан! — деб мурожаат этдим.— Менга нима учун бунчалар меҳрибонсиз? Нега бундай кўрнамак болага дуч келиб қолдингиз?

— Ростини айтсам, ўзим ҳам билмайман,— деди Алан.— Илгари низо чиқаришга ўч бўлмаганинг учун яхши кўрардим; мана энди янада ёқимтой кўриняпсан!

## Йигирма бешинчи боб

### БЭЛКИДДЕРДА

Алан йўлиниизда дастлаб учраган уй эшигини тақиллатди; Шотландиянинг тоғли вилоятларида, айниқса, Бэлкиддер ёнбағрида бундай хатти-ҳаракат бегона кишиларга қимматга тушиши мумкин эди. Бу ерда қандайдир бирорта кучли қабила ҳукмронлик қилмасди; таназзулга юз тутган жамоаларнинг қолдиқлари, Кемпбеллар зулмидан қочиб, Форт ва Тей дарёларининг ирмоқлари бўйларига кўчиб келган (урӯғио қабиласининг тайини йўқ) одамлар, хуллас, майда-чуйда тўдалар ер-мұлжаларини бир-бирларидан тортиб оларди. Стюартлар билан Макларенлар ҳам шу ерларда истикомат қилишарди, улар ўртасидаги тафовут унчалик катта эмасди; чунки жанги жадал пайтида Макларенлар ҳам Аланларнинг йўлбошчиси туғи остида бирлашарди ва Эпин қабиласига сингишиб кетардилар. Бундан ташқари, кўхна, қонун йўли билан таъқиб этилган, ном-нишонсиз, қасоскор Макгрегорлар қабиласининг кўплаб аъзолари ҳам мана шу ерларда яшарди. Улар азал-азалдан отнинг қашқасидек маълум ва машҳур эди; Шотландиядаги бирорта душман томон ҳам, гўруҳбозлар ҳам бу қабилага ишонмасди. Қабила йўлбошчиси — макгрегорлик Макгрегор ҳозир муҳожир эди; Бэлкиддердаги Макгрегорларнинг бевосита етакчиси бўлмиш Жеймс Мор (Роб Ройнинг тўнғич ўғли) Эдинбург қўрғонидаги зиндонда суд бўлишини кутиб ётарди; улар тоғликлар билан ҳам, пасттекислик аҳолиси билан ҳам, Грэмлар билан ҳам, Макларенлар билан ҳам, Стюартлар билан ҳам ит-мушук эди; ўз-ўзидан равшанки, ҳатто йўл-йўлакай тасодифан танишиб қолган жўрасини хафа қилган киши-да шахсий душманим деб биладиган Алан ўша дилозор кимсалар билан тўқнашиб қолишни асло истамади.

Бизнинг омадимиз бор экан: бу уй Макларенлар оиласига қарашли эди; Аланни қучоқ очиб кутиб олишди. У фақат Стюартлар авлодидан бўлгани учунгина иззат-ҳурматга сазовар эмасди, албатта; айни пайтда бу ерларда Алан ҳақида жуда кўп афсоналар тўқилган эди. Мени дарҳол ўринга ётқизишди-да, табибни чақириб келишди; у аҳволим ниҳоятда ёмон эканини аниқлади. Билмадим, ҳақиқатан ҳам моҳир шифокор эдими ёки ўзим қали навқирон ва кучли бўлганим

туфайлими, ишқилиб, бир ҳафта түшакда ётдим, холос. Ой охирларида бутунлай соғайиб кетдим; энди йўлга отланишим мумкин эди.

Аланга қанчалик ялиниб-ёлворсам ҳам, мени ёлғиз ташлаб кетишга асло рози бўлмади; ростини айтганда, унинг бу ерда қолиши бемаънилик эди. Бизнинг сиримиздан хабардор дўстларимиз ҳам ўша фикрни тақорладилар, аммо барибир унга гап таъсир қилмасди. Кундуз кунлари у ёнбағирликдаги ўрмонда — битта улкан дарахтнинг томирлари орасидаги хандақ ичида яшириниб ётарди, кечалари ҳаммаёқ тинчидан қолган маҳалларда мени кўргани келарди. Қувончим ичимга сиғмай кетарди, хонадон соҳибаси миссис Макларен азиз меҳмонни қаёққа ўтқазишин билмай қоларди; Дункан Ду эса (уй эгасининг исми шарифи шунақа эди) мусиқа шайдоси бўлиб, унинг бир жуфт сибизғаси бор эди; шунинг учун то мен соғайиб, дармонга киргунимча хонадонда ҳақиқий байрамона кайфият ҳукм сурди, кўпинча эрта тонгга қадар ўйнаб-кулиб ўтирадик.

Аскарлар бизни безовта қилишмасди: фақат бир куни (деразадан ташқарини кузатиб ётардим) пастликтан бир нечта отлиқлар билан пиёда аскарлар гуруҳи қаёққадир ўтиб кетишди, холос. Энг ажабланарлиси шунда эдики, маҳаллий ҳукумат вакилларидан бирортаси ҳам қаёқдан келиб, қаёққа кетаётганимни сўраб-сuriштири мади, бемор ётган хонага бош суқиб қарамади; долғали замонда тоғу тошларда тентираб юрсам, кишиларда кўпроқ шубҳа ўйғотардим, лекин бу ерда ҳеч ким шахсим билан қизиқмасди. Йўлга тушгунимга қадар Бэлкиддерда ва қўни-қўшнилар орасида мен ҳақимда эшитмаган одам қолмади ҳисоб; бу даврда хонадонга жуда кўп кишилар ташриф буюришди — тоғликларнинг расм-русмига кўра, янгилик албатта бехабар кимсаларга етказиларди. Боз устига, бизни қўлга тушириш хусусидаги қарор ҳам эълон қилинган эди. Шундай эълонномадан бирини каравотимнинг оёқ томонига — деворга ёпиштириб қўйишган эди ва ўзимнинг ташқи кўринишим борасидаги ёқимсиз изоҳотни қайта-қайта ўқишим мумкин эди. Эълоннома охирида бошим учун тикилган мукофот ҳам эслатиб ўтилганди. Шубҳасизки, Алан билан келганимни кўрган кишилар каминанинг ким эканини аниқ билишарди; бу сирдан унчалик воқиф бўлмаган кимсалар эса ўзларича тахмин қилишарди, холос. Ҳартугул, кийим-бошимни алмаштириб олган бўлсам-да, ўз қиёфамни,

ёшимни ўзгартиришга қодир эмасдим; нотинч замонда пастекисликда яшайдиган ўн саккиз яшар йигитча бу овлоқ ўлкага кўнгилхушлик қилиш учунгина келмаганини аҳмоқ ҳам биларди; қолаверса, воқеа-ҳодисаларни шунчаки таққослаб кўрган киши қарорда ким тўғрисида гап кетаётганини илғаб олиши мушкул эмасди. Нима бўлганда ҳам, каминани бирор бозовта қилмади. Бошқа ўлкаларда инсон икки-учта ишонган дўстига сирини айтади юзини юмиб очгунча сир фош бўлиб қолганини ўзи ҳам сезмай қолади; тоғлик қабилалар орасида эса битта сирни бутун музофот аҳли билади, аммо юз йил ўтгунча ҳам бирор оғзидан гулламайди.

Кунлар қандай ўтганини билмай қолдим. Бу пайт мобайнинда менда катта таассурот қолдирган битта ҳодиса ҳақида алоҳида тўхталиб ўтишим лозим: афсонавий Роб Ройнинг ўғилларидан бири бўлмиш Робин Ойг атайлаб каминани зиёрат қилгани келиб, бемор кўнглини бағоят шод этди. Кечасию кундузи бу зотни қидиришарди; у Бэлфрондан балоғатга етмаган қизалоқни ўғирлашда айбланаарди; гувоҳлик беришларича, зўрлик йўли билан ўша ожизани хотин қилиб олибди: ўзи худди отасининг чорбоғида юргандек Бэлкиддерда бемалол сайр этаверарди. У қўш ҳайдоётган Жеймс Макларенни отиб ўлдирган эдию ўшандан бери ўзаро уруш-жанжаллар тинмасди. Лекин унинг уйи худди дайди савдогарлар тунаидиган карvonсаройга ўхшарди; ашаддий душманларига ҳам бошпана бераверарди.

Дункан бу кишининг ким эканини қулоғимга шипшилдию хавотирланиб бир-биримиз билан кўз уришириб олдик. Гап шунда эдики, ҳар дақиқада Алан келиб қолиб, ўртада жанжал кўтарилиши эҳтимолдан узоқ эмасди; тўғри, Аланни огоҳлантириб қўйишимиз, қандайдир имо-ишоралар қилишимиз мумкин эди, аммо хавф-хатардан қочиб юрган инсон бизнинг саъй-ҳаракатимиздан албатта шубҳаланиб қоларди.

Хонага Макгрегор кириб келди. У ўзини ниҳоятда сипо тутарди, одамларга юқоридан назар ташларди: миссис Макларен қаршисида шляпасини ечди-ю, аммо Дункан билан гаплаша бошлаган чоқда яна шляпасини кийиб олди; гўёки шундай қилиғи билан ўзининг ким эканини писанда қилмоқчи бўларди. У мен ётган жойга келиб таъзим бажо келтирди.

— Сэр, эшлишимга қараганда, номингиз Бэлфур экан,— деди у.

— Исли шарифим Дэвид Бэлфур,— дедим.— Сэр, хизматингизга тайёрман.

— Сэр, ўзим ҳам исли шарифимни айтишим лозим эди,— деди Робин.— Негадир кейинги пайтларда шаънимга ҳар хил бўхтонлар ёғиляпти. Шунинг учун фақат Жеймс Мор Драммонднинг туғиштан укаси эканимни эслатиб қўйсам кифоя қилмасмикан-а? Ҳарҳолда, Макгрегор ҳақида эшитган бўлсангиз керак, тўғрими?

— Эшитганман, сэр,— дедим андак саросима арашаш.— Бундан ташқари, отахонингиз Макгрегор-Кемпбеллни ҳам биламан.— Ўрнимдан бир оз қаддимни кўтардим-да, унга таъзим қилдим; агар отаси қароқчи бўлгани учун мақтамоқчи бўлса, ўпкасини босиб қўймоқчи эдим.

Менга жавобан у ҳам таъзим бажо келтирди.

— Сэр, энди гапнинг индаллосига ўтмоқчиман,— деб давом этди.— Қирқ бешинчи йили акам грекорларнинг бир қисмини уюштириб, олтига ротага бош бўлиб, ҳақ иш учун курашга отланди; улар орасида битта шикастанафс ҳам бор эди, у қабиламиз сафида борарди, акамга доимо кўз-қулоқ бўлиб юради; Престонпанс осто наларидаги жангларда акамнинг оёғи синадио адашингиз бўлмиш олижаноб инсон уни жанг майдонидан кўтариб чиқади. Ўша зот бейтлик Бэлфурнинг акаси эди; агар олижаноб жентельменга узоқ-яқин қариндош бўлсангиз — айтинг, мен ва менинг одамларим ҳар қандай хизматингизга тайёрмиз.

Рости ни айтсам, ота-боболаримни қандайдир кўпрак итчалик ҳам билмасдим; тўғри, амаким машҳур қариндошларим ҳақида эринмасдан гапириб берарди, аммо у айтган зотлар орасида бейтлик Бэлфур деган кимса йўқ эди. Шунинг учун қизариб-бўзариб, ундан киши ҳақида ҳеч нарса билмаслигимни тан олишга мажбур бўлдим.

Робин бемаврид безовта қилгани учун узук-юлук узр сўради-да, хайр-маъзурни ҳам насия қилиб эшик томон йўл олди; осто нага етган чоғда Дунканга ғазаб билан луқма ташлаганини эшитиб қолдим: «Безот экан, ҳатто ўз отасини ҳам танимайди-я!» Бу сўзлар қулоғимга чалинганидан сўнг ниҳоятда жаҳлим чиқди, ўз ёғимга ўзим қовурилдим — ҳаммасига ўзим айбдор эдим. Бир томондан кулгим қистарди: қонуний ҳукумат аёвсиз таъқиб қилаётган бу одам (уч йил муқаддам сиртдан осиб ўлдиришга ҳукм этилган эди) таниш-билишларига алоқадор барча икир-чикирларни биларди.

Туйқусдан у осто нада Алан билан юзма-юз келиб

қолди; иккаласи ҳам орқага чекиндию бир-бирига синчков назар ташладилар — худди бегона итлардек бир-биirlарини ғажиб юборишга ҳам шай эдилар. Бўйлари паст бўлса-да, кеккайиб туришгани учун одатдагидан хийла новчароқ кўринишарди. Ёнларида қиличи осиғлик эди ва қоринларини ичларига тортишиб, бир зумда қилич дастасини ушлаб олишга тайёр туришарди.

— Агар кўзларим панд бермаётган бўлса, ўзлари мистер Стюарт бўладилар,— деди Робин.

— Ҳақиқатан ҳам шундай бўлса, ўзлари мистер Макгрегор бўладилар шекилли,— деб жавоб берди Алан.— Бундай исми шариф ҳеч кимни уялтирумаса керак.

— Сэр, юртимиизга ташриф буюрганингизни билмаган эдим,— деди Робин.

— Мен эсам, шу чоққача дўстларим Макларенлар ютида юрган бўлсам керак, деб ўйлаган эдим,— деди Алан.

— Ҳозирча бу мужмал масала,— деб жавоб қайтарди Робин Ойг.— Мунозарали масала. Қолаверса, эшишишимга қараганда, сиз ҳар қандай мунозарали масалаларни қилич ёрдамида ҳал этишга уста экансиз-да?

— Мистер Макгрегор, мабодо туғма гаранг эмасмисиз, ишқилиб? Акс ҳолда, бошқа гапларни ҳам эшиштан бўлардингиз,— деб суҳбатдошининг ғашига тегмоқчи бўлди Алан.— Эпинда мендан бошқа ҳам қилич ушлашни биладиган инсонлар бор. Масалан, қариндошим, йўлбошчим Ардшил бир неча йил муқаддам айнан адашингиз бўлган жентельмен билан жиддий равиша гаплашиб олишган эди, лекин охирги сўзни Макгрегор айтганини негадир эслолмаяпман.

— Сэр, менинг отахонимни назарда тутмаяпсизми? — деб сўради Робин.

— Эҳтимол,— деди Алан.— Ўша жентельмен ҳам ўз исмининг ортига «Кемпбелл» деган сўзни шатакка олишга ор қилмасди.

— Унда отам кеккайиб қолган эди,— деб эътиroz билдириди Робин.— Ўша яkkама-якка олишув адолатли бўлмаган эди: кучлар teng эмасди. Сэр, биз бир-биrimизга муносиб рақиб бўлсак керак.

— Мен ҳам худди шундай фикрдаман,— деди Алан.

Каравотдан оёқларимни осилтириб ўтириб олдим. Дункан эса боядан бери бу ўришкоқ хўроздар теварагида парвона бўларди-ю, аммо можарога аралашишга сира ҳам қулай фурсат тополмасди. Бироқ охирги сўзлардан

маълум бўлдики, энди бирпас ҳам иккиланиб туриш ярамасди: Дункан ҳаяжонланганидан хийла ранги оқарган кўйи уларнинг ўртасига ғов бўлиб туриб олди.

— Жентельменлар, мен бутунлай бошқача фикрдаман,— деди.— Кўряпсизларми, ҳув анави ерда сибизғаларим турибди: сизлар эса, жентельменлар, таниқли созанда ҳисобланасизлар. Кўпдан буён иккалангиздан қайси бирингиз моҳир чолғучи эканингиз ҳақида мунозара қилинади. Ҳозир эса азалий мунозарага чек қўйиладиган фурсат келди!

— Сэр, биласизми,— деб гап бошлади Алан нигоҳини Робиндан узмай; айни пайтда рақиби ҳам ундан кўзини узмай тикилиб турарди,— янгишмасам, ўзим ҳам шунаقا мишишларни эшитган эдим, чамамда. Айтишларича, эрмак учун мусиқа билан шуғулланар экансиз-а? Бирор марта сибизға чалганмисиз?

— Сибизға чалиш баҳсида ҳар қандай Макриммонинг белини синдириб ташлайман! — деб хитоб қилди Робин.

— Ўҳ-ӯ, дадил экансиз-ку! — деб қўйди Алан.

— Тўғри, дадил гапираман, доимо тўғри сўзлайман,— деб жавоб берди Робин.— Ҳатто душманимга ҳам яхши муносабатда бўламан.

— Буни текшириб кўриш осон,— деди Алан.

Дункан Ду энг қимматли бойлиги бўлмиш бир жуфт сибизғасини олди ва меҳмонлар олдига турли-туман ноз-неъматларни тўкиб ташлади: дастурхонда пишган қўй сонлари, бир шиша ичимлик (бу эски вискини кўпиртириб — Атолча усуlda тайёрланган ўткир арақ эди), қаймок, сузгичдан ўтказилган хушбўй асал (бу ҳам қатъий тартиб бўйича тайёрланадиган тансиқ таом ҳисобланарди) пайдо бўлди.

Рақиблар ҳамон бир-бирининг ёқасига ёпишадиган ал-фозда эдилар; шунга қарамай, итоаткорона равишда боодоблик билан тезак ёнаётган ўчиқнинг икки томонига ўтиридилар. Макларен уларни зўр бериб қўй гўштидан олишга ундан бошлади; ичимликни кўкларга кўтариб мақтади, айтишича, хотини Атолдан келин бўлиб тушган экан ва бундай ичимликни тайёрлаш бўйича ўлкада донг таратганмиш. Бироқ Робин ичимликдан парҳез қиласкан; чунки ичса нафаси қисар экан.

— Сэр, маёна, ўн соатдан бери камина тўз ҳам тотганим йўқ; бу ҳол бутун Шотландияда тайёрланадиган спиртли ичимликлардан баттар нафасни қисишини ҳисобга олиб қўйишингизни илтимос қиласкан,— деди Алан.

— Мистер Стюарт, ўзимга бериладиган ҳар қандай имтиёздан юз ўгирмайман,— деб эътиroz билдири Ro-bin.— Еб-ичаверинг; мен эсам сиздан ўрнак оламан.

Ҳар ким бир парчадан сон гўштини еди-да, миссис Макларен соғлиги учун бир стакандан арақ ичишиди, сизу бизлардан сўнг, ниҳоят, Робин сибизғани қўлига олди-да, эпчилик билан қандайдир тарона чала бошлади.

— Ҳм-м, билар экансиз,— деди Алан ва рақибидан сибизғани олиб дастлаб ўша таронани худди аввалгилик эпчилик билан чалиб берди, сўнгра сибизға имконияти даражасида жузъий ўзгаришлар ясади; янгроқ рақс кўйини ижро эта бошлади.

Робиннинг ўйини маъқул бўлди, лекин Аланнинг маҳорати каминани ҳайратда қолдирди.

— Мистер Стюарт, унчалик ёмон эмас,— деб эътиroz этди рақиб.— Бироқ янгроқ кўйингиз мазмунан саёзроқ экан.

— Нима?! — деб қичқириб юборди Алан. Унинг юзи қизарип кетди.— Ёлғон гапирияпсиз!

— Демак, чолғучи сифатида ўзингизни мағлубиятга учраганингизни тан оляпсиз,— деди Робин.— Назаримда, сибизғани қиличга алмаштиришни сабрсизлик билан кутяпсиз, шундайми?

— Топиб айтдингиз, мистер Макгрегор,— деб жавоб берди Алан.— Шунинг учун ҳозирча (маънодор оҳангда оҳиста сўзларди) боя айтган сўзимни қайтариб оламан. Дункандан қаттиқ илтимос қилардимки, у бизга холис баҳо берса!

— Бас, бирордан илтимос қилишнинг сира ҳам кераги йўқ,— деди Робин.— Бэлкиддердаги бирорта Макларен ҳам ўзингиздан аълороқ ҳукм чиқара олмайди. Чунки Стюарт эканингиз эътиборга олинса, ниҳоятда ноқобил сибизға чолғувчиси эканингиз кундай равshan бўлади-қолади. Сибизғани узатиб юборинг!

Алан илтимосни бажо келтирди; шундан сўнг Робин Алан ижро этган шўхчан куйларни бирин-кетин такрорлай бошлади; маълум бўлишича, у ҳаммасини тўла-тўқис эслаб қолган экан.

— Ҳа, мусиқа илмидан боҳабар экансиз,— деб тўн-ғиллади Алан асабийлашиб.

— Мана энди, Мистер Стюарт, ўзингиз баҳо берингчи! — деди Робин ва бениҳоя уйғун бир куйни моҳирона ижро этди: унга хилма-хил жилолар самимият бахш этди, ўжар хаёлларига эрк бериб юборди, хуллас, ўйноқи куй чалди.

Мен эсам, мусиқани тинглаб беихтиёр ёқамни ушладим. Алан қошларини чимириб ўтиради; юзлари лов-лов ёнарди, бармоқларини оғзига тиқиб, тирноқларини кемира бошлади; афтидан, ўзини ҳақоратлангандек ҳис этарди.

— Бас қилинг! — деб қичқирди.— Кўриниб турибди, соз чалишга уста экансиз! — У шаҳд билан ўрнидан турмоқчи бўлди.

Лекин Робин тинчлик сақлашни сўраб қўлини кўтардию бирдан шотландча халқ куйини ижро эта бошлади. Куй дилларни ўртаб юборарди; бундан ташқари, бу эпинлик Стюартлар азалдан тилдан қўймай айтиб юрадиган миллий қўшиқнинг куйи бўлиб, Алан учун ниҳоятда қадрдан эди. Оҳанг янграши билан дўстимнинг юзлари ёришиб кетди; куй авж пардаларга чиққани сайин жойида жимгина ўтира олмай қолди; чолғувчи мусиқани поёнига етказгунча Аланнынг қиёфа-сида гина-кудуратдан асар ҳам қолмади — у мусиқага мафтун бўлиб қолган эди.

— Робин Ойг, беназир сибизғачи экансиз! — деди.— Сиз билан мусобақалашишга қодир эмасман. Худо ҳаққи, рўмолингизнинг толасида ҳам бебаҳо истеъодд мүжассамдир! Тўла ишончим комил бўлмаса-да, лекин совуқ пўлат мунозарамизни бошқачароқ ҳал этиши мумкин эди, деб ўйлайман. Қойилмақом сибизға чаладиган инсонни қиймалаб ташлашга қўл бормайди!

Шундай қилиб, рақиблар ярашдилар; тун бўйи ичимлик сувдай оқиб келиб турди, сибизға ҳам қўлдан-қўлга ўтаверди. Робин йўлга отланиш ғамини еяётган чоғда тонг ёришган эди; учаламиз ҳам ширақайф эдик.

## Йигирма олтинчи боб

### ОЗОДЛИК

#### Биз Фортдан ўтмоқчимиз

Маълумингизким, салкам бир ой бетоб бўлиб ётдим ва ниҳоят, дармонга кирдим: айтишларига қараганда, бемалол сафарга отланишим мумкин экан. Айни пишиқчилик, далаларда бу йилги иссиқ обу ҳавода мўл-кўл ҳосил етиштирилганди. Пулимиз жуда кам қолганди, шунинг учун тезроқ ҳаракат қилиб Ранкилер ҳузурига етиб бормасак ёки биз борган чоғда у ёрдам беришга

қодир бўлмаса борми, оқибатда оч-наҳор қолишимиз тайин эди. Боз устига, Аланнинг ҳисоб-китобларига кўра, изимиздан таъқиб этиб келаётган аскарлар ҳам энди хийла ҳовурларидан тушиб қолишган бўлса ажаб эмасди: Форт соҳиллари, ҳатто Стерлинг-бриж — дарёдаги асосий кўприк ҳам номигагина қўриқланарди, холос.

— Ҳарбий ҳолат пайтида сира кутилмаган жойларда пайдо бўлиб қолсанг, ютасан! — деди Алан.— Форт — бошимизга битган бало. «Тоғликларга Фортдан кейин йўллар доимо очиқ туради», деган мақолни эшитганимисан? Агар ирмоқларни айланиб ўтиб, Киппен текисликларига ёки Бэлфронга қадам қўйсак, қўлга тушишимиз турган гап. Чунки ҳаммаси шуни кутиб ўтиришибди. Мабодо йўлни тиккасига кесиб чиқсак-чи? Қиличимни қўлимга олиб қасам ичаманки, эски Стерлинг-брижга омон-эсон ўтиб кетамиз.

Шундай қилиб, йигирма биринчи августга ўтар кечаси Стратирда яшайдиган Дункеннинг қариндошиникига — ўша ерлик Маклареннинг уйига етиб бордик: кун бўйи ухлаб, оқшом ҷоғи яна йўлга отландик ва эрталабга қадар ҳеч қийналмасдан кетавердик. Йигирма иккинчи август куни Юм-Варск нишаблигидаги тўқайдга қўёш ботишини кутиб ётдик: шу яқин атрофда буғу подаси ўтлаб юрарди; офтобшувоқда ўн соат мобайнода маза қилиб ухладик — бунчалик ҳузур-ҳаловатга сира ҳам дуч келмаганман! Кечаси Аллан-Уотер дарёси томон йўл олдик ва қуян оқим бўйлаб одимладик. Туяўркач адир устига чиққанимиздан сўнг, пойимизда ястаниб ётган Стерлинг соҳиллари кўз ўнгимиизда намоён бўлди: худди тухумқўймоққа ўхшарди; тепаликда шаҳар-кўрғон жойлашган, ой нурида илонизи Форт ўзани яққол кўриниб турарди.

— Хўй-уш,— деди Алан.— Билмадим, сенга қандай туюлади-ю, лекин биз юртингга қадам қўйдик — тунги соат бирлардаёқ тоғлик ўлка чегарасини кесиб ўтдик; энди мана шу эгри-буғри дарёдан нариги соҳилга чиқиб олсак — бас, шляпамизни осмонга ирғитиб хурсанд бўлишимиз мумкин.

Аллан-Уотернинг Фортга қуяилишига яқин жойда қумлоқ оролча бор экан: устини қариқиз, отқулоқ каби ўт-ўланлар қоплаган эди; агар одам ётиб олса, кўринмасди. Шу жойда нафасимизни ростлаб олиш учун тўхтадик: Стерлинг кўрғони барадла кўриниб турарди — ўша томондан дўмбиралар садоси эшитилмоқда эди; қандайдир ҳарбий қисм жангчилари сафга тизилишарди,

чамаси. Соҳилнинг бир томонида кун бўйи деҳқонлар тинмай майса ўришди; чалғио ўроқларнинг тошга урилган товуши ва узук-юлуқ гаплар эшитилиб турди. Биз миқ этмасдан чўзилиб ётишимиз лозим эди. Иссиққина оролчада кўм-кўк майсаларга бош қўйиб, мизғиб олсак ҳам бўларди; озиқ-овқатимиз етарли, муҳими — озодликка чиқишимизга озгина қолганди.

Ўроқчилар ишларини тугатишган пайтда оқшом чўка бошлади; соҳилга тушдик-да, пана жойлардан юриб, дала бўйлаб кўприкка яқинлашавердик. Стерлинг-бриж кўприги қўрғон жойлашган тепаликдан бошланарди: улуғвор, кўхна, торгина-ю, лекин панжара тўсиқ ёнида минораси ҳам бор эди. Тарихда ном қолдирган жойларга тўймасдан қараганим ўз-ўзидан тушунарли бўлса керак, албатта. Қолаверса, Алан иккаламиз учун кўприк — нажот дарвозаси эди. Кўзлаган манзилмизга етиб борган ҷофимизда ҳали ой чиқмаганди; қўрғон деворлари бўйида, ҳар-ҳар ерда гулхан ёқилганди, пастлиқда — шаҳар хонадонлари деразаларидан шуъла кўринарди, бироқ атрофда сокинлик ҳукмрон эди; ҳозирча кўприкка соқчи ҳам қўйилмаганди.

Мен олға интилдим, лекин Алан ҳамон эҳтиёткорликни унумтаган эди.

— Бир қарашда тинч, сув сепгандек кўриняпти,— деди.— Эҳтиёт шарт ҳув аваби кўтарма ортига яшириниб турайлик-чи, нима бўлар экан!

Чорак соат атрофида гоҳ шивирлашиб, гоҳ лом-мим демасдан ётдик, аммо бирорта тирик жон товуши қулоғимизга чалинмади, фақат тўлқинлар кўприк тирговучларига шалоплаб уриларди, холос. Ана, ёнимиздан инқиллаб-синқиллаб, ҳассасини тўқиллатган кўйи битта кампир ўта бошлади; у салгина нарида нафасини ростлаш учун тўхтадио манзили олислигидан, кам қувватлигидан товушини чиқариб нолиди, кейин оқсоқланганча кўприкка кўтарилаверди. Кампиршо бир тутамгина бўлиб қолган эди; шунинг учун тез орада унинг қорасини ҳам илғамай қолдик; ҳали ой чиқмаганди; қулоғимизга сўниб бораётган қадам товушларию ҳассанинг тўқиллаши элас-элас чалинарди, холос. Баъзан бўғиқ йўтал товуши ҳам эшитилиб қоларди.

— Тамом, нариги соҳилга ўтиб олди,— деб шивирладим.

— Йўқ,— деди Алан.— Қадам товушининг акс садоси эшитиляпти, демак ҳамон кўприкдан тушган эмас. Шу пайт туйқус кимдир бақирди:

— Ким келяпти?

Пилтамилтиқ қўндоғи тошга урилганини аниқ эшилтидик. Назаримда, постда турган аскарнинг кўзи илиниб қолган эди, лекин туйқусдан уйғониб кетди; агар сал илгарироқ баҳтимизни синаб кўрганимизда борми, омад қулиб боқарди, энди қулай фурсат бой берилди.

— Ундей усул бизга ярамайди,— деб шивирлади Алан.— Йў-ўқ, Дэвид.

Шундан сўнг бир оғиз ҳам гапирмасдан эмаклаган кўйи дала бўйлаб орқа томонга кетди; бирпасдан кейин оёққа қалқди — энди бизни кўприкдан кўриб бўлмасди; шарқ томонга йўл олдик. У нима учун бундай қилаётганига сира ҳам ақлим бовар қилмасди; қолаверса, шу даражада чарчаган эдимки, бирор нарсани ўйлашга ҳам ҳолим қолмаган эди. Айтайлик, бор-йўғи уч дақиқа аввал ҳам мистер Ранкилер эшигини қандай тақиллашибни хаёлан тасаввур этардим (худди ўз меросини талаб этадиган манзума қаҳрамони каби); энди эса илгаригидек қувғинга учраб, уй-жойсиз, бегона соҳилда тентираб юрардим.

— Хўш? — деб сўрадим.

— Мана сенга «хўш», — деди Алан.— Энди нима қиласмиш? Улар мен ўйлаганчалик нодон эмас эканлар. Йўқ, Дэви, Фортни ҳозирча забт этмадик: лаънатининг суви қуриб, ўрнидан ўт-ўлан ўсиб чиқсин!

— Нима учун шарқ томон бораётirmиз? — деб сўрадим.

— Шунчаки омадимни синаб кўрмоқчиман-да! — деди Алан.— Дарёдан ўтиб олиш насиб этмадими, энди кўрамиз — балки, кўрфазда бирор нарса ўйлаб топармиз.

— Дарёда кечув бор эди, кўрфазда эса унаقا жой умуман бўлмайди.

— Йўғ-э, кечув ҳам, кўприк ҳам ҳув анави ерда бор-ку, — деб эътиroz билдириди Алан.— Бироқ, нима фойдаси бор, ахир атрофида қоровуллар тўлиб ётишибди?!

— Ҳеч бўлмаса, дарёдан сузиб ўтиш мумкин-ку, — дедим.

— Агар уддасидан чиқа олсак, нега сузиб ўтмаслигимиз лозим экан?! — деди норози оҳангда Алан.— Аммо бу иш қўлимиздан келмасмикан, деб хавотирланаман. Ўзим ҳақимда гапирадиган бўлсам, тошга ўхшаб бирпасда чўкиб кетаман, вассалом!

— Алан, сиз билан мунозара қилмоқчи эмасман, аммо бекордан-бекорга ўзимизни ўтдан-чўққа уряпмиз,

холос,— дедим.— Дарёдан ўтиш шунчалик қийин бўлса, ўз-ўзидан равшанки, денгиздан ўтиш янада мушкулроқдир.

— Бироқ, янгишмаётган бўлсам, дунёда қайиқ деган матоҳ ҳам бор,— деди Алан.

— Бундан ташқари, дунёда пул деган зорманда ҳам бўлади-да! — дедим.— Мабодо униси ҳам, буниси ҳам бўлмаса, уларни кимдир ўйлаб топганидан не фойда!

— Шунақами? — деди Алан.

— Ҳа, шунақа,— дедим.

— Дэвид, зийраклик бобида сендан мушук афзал экан, ишончинг ҳам сариқ чақага қиммат. Агар калламни ишлатсан борми, албатта бирор нарсани ўйлаб топаман; қайиқни бутунлай беришга кўнишмаса, вақтингчалик сўраб оламан; ўғирламайман-у, аммо шундай қиласманки, охири ўз қўллари билан топшириб юберишади.

— Бўлмасам-чи! — дедим пишқириб.— Кейин эса, айтайлик, кўпприкдан омон-эсон ўтиб оламиз, ҳеч ким миқ этмайди, аммо қайиқни нариги соҳилда қолдириб кетсан, кимдир сузиг ўтгани маълум бўладими, демак зудлик билан бутун ўлкани пайҳон қилишадими?..

— Менга қара! — деб ўдағайлари Алан.— Агар қайиқни қўлга киритсан, уни қайтариб олиб кетадиган қайиқчини ҳам ёллайман, билдингми?! Бўлди, ҳадеб бемаъни гапларинг билан бошимни қотираверма; мен чизган чизикдан чиқмасанг — бас, Алан ғамингни ейди.

Шундай қилиб, тун бўйи дарёнинг шимолий соҳили бўйлаб йўл юрдик; Охилл қоялари ортда қолди, Аллоа, Клакманан, Кулроссларни айланиб ўтдик-да, Лаймкилнс қишлоғи устидан чиқдик: эрталабки соат ўнлар, оч бўрига ўҳшардик, ўлардек чарчаган эдик. Бу қишлоқ кўрфазнинг нариги ёқасида — Куинсферри шаҳрининг рўпарасидаги соҳилда жойлашган эди. Ҳар икки қирғоқдаги ва атрофдаги қишлоқ уйларининг мўриларидан кўкка тутун ўрларди. Далаларда ўрим-йигим мавсуми бошланган эди, икки кема лангар ташлаб турарди, кўрфазда сузиг юрган икки қайиқдан бири тобора қирғоққа яқинлашса, бошқаси дениз бўйлаб кетмоқда эди. Одамларнинг ўй-жойларига, кўм-кўк, ўзлаштирилган қир-адирларига ғайратли дала заҳматкашларига, зилол сувларга тикилиб тўймасдим.

Мистер Ранкилернинг уйи ҳамон жанубий соҳилда турарди, мен эсам шимолий қирғоқда ғарибона аҳволда юрардим: уст-бошларим фақиргина эди, чўнтағимда арзимас уч шиллинг пулим бор; боз устига, каминани қўлга туширган кишига мукофот бериларди, ягона

ҳамроҳимни қонун сиртдан ўлим жазосига ҳукм этган эди...

— Эҳ, Алан, ўйласам юрагим орзиқиб кетади-я! — дедим.— Ҳув, анави жойда кўнглим тусаган нарса муҳайё; ўёққа қушлар учиб бориши мумкин, қайиқлар ҳам ўша томонга сузиб кетяпти, хуллас, хоҳлаган жонзотга йўл очиқ, фақат битта мен боролмайман! Оҳ, юрагим ёрилиб кетмаётганига ҳайронман!

Лаймкилнсда қаҳвахонага кирдик, у бошқа уйлардан эшик тегасидаги белгиси билан ажралиб турарди, мулойимгина хизматкор қиздан пишлоқ билан нон харид қилдик. Озуқамизни бўғчага туғиб олдик-да, қишлоқ четидаги — беш юз қадам наридаги ўрмончага кириб кетдик; ўша ерда бирпас нафасимизни ростлаб, тамадди қилиб олишни маъқул кўрдик. Йўл-йўлакай нариги соҳилга нигоҳ ташладиму секингина уф тортиб қўйдим; Алан, назаримда, теран ўйга толган эди. Ярим йўлга етганимизда таққа тўхтади.

— Бизга озиқ-овқат сотган қизга синчиклаб разм солдингми? — деб сўради, бўғчага шаппатилаган кўйи.

— Бўлмасам-чи! — деб жавоб бердим.— Яхши қиз экан.

— Сенга ёқдими? — деб хитоб қилди.— Э-э, дўстим Дэвид, ана шуни ажойиб янгилик деса бўлади!

— Худойим-эй, нима учун ахир? — деб сўрадим.— Бундан нима фойда?

— Биласанми, энди қайиқ топишими мумкин, деб умид қиласман,— деди Алан. Унинг кўзларида учқун — таниш шайтонлик нишонаси порларди.

— Бунинг акси бўлса ҳам ажабланмайман,— дедим.

— Бу сенинг фикринг,— деди Алан.— Мен эсам, Дэвид, ўша қизгина сени севиб қолишини асло истамайман; майли, сал-пал раҳми келсин, лекин рўпарасида шолғомдек қизариш шарт эмас. Қани, куёвни бир қур кўздан кечириб қўйайин-чи! — У каминани синчиклаб томоша қила бошлади.— Ҳа, яна бир оз ранг-рўйингни оқартиранг ёмон бўлмасди, аммо, умумани олганда, пичоққа илинадиган кўринасан: маймоқ чолгами-ей, чорбоғдаги қўғирчоқ қоравулгами-ей қуйиб қўйгандек ўхшайсан. Орқангга қайт-да, қаҳвахонага қайтиб бориб, қайиқ ундириб кел, юргур!

Мийигимда кулганимча унинг изидан орқамга бурилдим.

— Дэвид Бэлфур, ўзингга яраша хушчақчақ йигитсан, шубҳасизки, бунақа ишлар сен учун шұнчаки эрмак,

холос. Бошинг тиллодан, сени яхши кўраман (албатта, ўзинг ҳам мени азалдан яхши кўрасан); шунинг учун марҳаматингни дариф тутмай ҳангомага жиддий мұноса-батда бўлгин. Биласан, севги — ўйин эмас, аммо жазман-ларнинг йўриғи бошқа. Тўғри, мен битта ҳазилнамо машғулотни «саҳналаштирмоқчиман», аммо коса остида нимкоса бор — шунга ҳушёр бўлгин: хато қилсанг борми, оқибатда биродаринг дорга осилиши ҳеч гап эмас. Хул-лас, марҳаматингни аямай, сўзларимни қулоғингга қўрго-шиндай қўйиб олгин-да, вазиятга қараб ҳаракат қиласвер.

— Бўпти, сиз айтганчалик бўла қолсин,— дедим.

Қишлоқ четига етган чоғимизда Алан, мени қўлтиқлаб олгин, деди: бутун оғирлигимни унга ташласам, дафъатан қараган одам, бечора-ей, адойи тамом бўлибди-ку, деб ўйлаши лозим эди. У қаҳвахона эшигини бир тепиб очдию остонаядан мени деярли судраб ичкарига қадам босди. Афтидан, хизматкор қиз тезда ортимизга қайтиб келганимизни кўриши биланоқ (айнан шундай бўлишини кутган эдик) тараффудланиб қолди: Алан ҳеч қандай гап-сўзсиз мени етаклаган кўйи бир бурчакдаги стулга элтиб ўтқазди ва бир стакан арақ беришларини сўради: арақни қултум-қултум ичирди-да, сўнг энага мисоли нону пишлоқни майдо-майдо бўлакларга бўлиб едира бошлади; буларнинг ҳаммасини ғамбода қиёфада, зий-раклик ва ниҳоятда ғамхўрлик билан амалга оширдики, бу ҳол ҳар қандай синчков терговчини ҳам доғда қолдириши турган гап эди. Шубҳасизки, хизматкор қиз ҳам таъсирчан манзарага бефарқ қарай олмади: бечораваш, сўлғин юзли, ҳолдан тойган йигитчаю унга оталарча меҳрибонлик қилаётган садоқатли дўст тимсоли «саҳналаштирилган» эди. Қиз ёнимизга келди-да, нариги столга қўлларини тираган кўйи бизга тикилиб қолди.

— Унга нима бўлди? — деб сўради у юрак ютиб.

Мени ҳайрону лол қолдириб, Алан бирдан ўшқира бошлади:

— Нима бўларди?! — деди.— Йигитча иягининг тукларидан ҳам кўпроқ,— юзлаб чақирим яёв йўл босди; боз устига, иссиқ тўшак нима эканини ҳам унугиб юборди — жиққа ҳўл арчагулларга юмалаб ухлади. Сиз бўлсангиз, «нима бўлди?» деб сўрайсиз-а! Нима бўлса бўлди-да! Яна «нима бўлди?» эмиш...— Ўзича нималардир тўнғиллаганча мени овқатлантираверди.

— Ниҳоятда ёш экан, олис йўлга ярамайди-да, узуликиб қолади,— деди хизматкор қиз.

— Ёш ҳам гапми, ҳали она сути оғзидан кетмаганку! — деди Алан бошини кўтармасдан.

— Уни отга миндириб юриш керак эди,— деб қўшиб қўйди қиз.

— Отни қаердан оламан? — деб бақириб юборди Алан ва бошини кўтарди-да, қизга ғазаб билан тикилди.— Сенингча, ўғирлик қилишим керак эдими?

Бундай қўпол муомаладан сўнг қиз шартта орқасига бурилиб, кетиб қолса керак, деб ўйлаган эдим. Дарҳақиқат, у маълум вақтгача лом-мим демади. Лекин дўстим нима қилаётганини жуда яхши биларди; турмуш уринишларида хийла содда кўринса ҳам, ҳийла-найранглар ўйлаб топиш борасида шайтонга дарс берарди.

— Кўриниб турибдики, олижаноб инсонларга ўхшайсизлар,— деди хизматкор қиз.

— Хўш, нима бўпти? — деди Алан бир оз мулойимлашиб (менимча, ғайрииҳтиёрий равишда шундай қилди); назаримда, қиз ниҳоятда самимий сўзларди.— Олижаноблик бироннинг қорнини тўйдирганини, ҳамёнини қаппайтирганини ҳеч эшитганмисан?

Қиз ҳам гўё меросдан маҳрум этилган хоним каби чукур уф тортиб қўйди ва:

— Ҳа-я,— деди.— Гапларингиз мутлақо тўғри!

Мен ролдан чиқмай, миқ этмай ўтирадим: бир томондан — уялардим, бошқа томондан — кулгим қистарди; охири тоқатим тоқ бўлди ва Аланга, энди ўзингизни уринтирамай қўя қолинг, аҳволим тузук, дедим. Сўзларим бўғзимда тиқилиб қолгандай бўлди; ёлғон гапиришни жинимдан баттар ёмон кўрардим, шундай бўлса-да, гапга аралашувим Аланга қўл келди; чунки хизматкор каминанинг хирқироқ товушимни эшитдию буни бетобликка йўйди.

— Наҳотки, бирорта ҳам' қариндоши бўлмаса? — деб сўради қиз йиғлагудек бўлиб.

— Борликка бор-у, лекин уларнинг ҳузурига қандай қилиб етиб олсин, ахир! — деб қичқирди Алан.— Бой-бадавлат қариндоши бор; у ҳам юмшоқ ўринда ухлаши, лаззатли таомлар истеъмол қилиши, энг зўр табиблар хизматидан фойдаланиши мумкин, аммо ҳозирча лой кечиб юришга, дайди ит мисоли арчагулларга юмалаб ётишга мажбур.

— Нима учун бундай қиляпти? — деб сўради қиз.

— Азизам, сирни фош этишга ҳақим йўқ,— деди Алан.— Истайсанми, жавоб ўрнига ҳуштакда битта куй чалиб бераман?!  
—

У стол устига энгашдию лабини қизнинг қулоғига тақаганча «Дунёда шаҳзода Чарлидан кўра қадрлироқ кимса йўқ» қўшиғининг бошланиш қисмини ҳаяжонланиб, оҳиста чалди.

— Шунақами ҳали! — деди қиз ва елкаси оша эшикка нигоҳ ташлаб қўйди.

— Йўқса-чи,— деб тасдиқлади Алан.

— Ўзи жуда ҳам ёш-ку! — деди қиз хўрсиниб.

— Бунинг учун...— Алан панжалари билан бўйини «сўйиб» кўрсатди,— ёшни суриштириб ўтиришмайди.

— Ўҳ-хў, увол бўлиб кетади-ку! — деб юборди қиз юзлари қип-қизариди.

— Агар бир иложини топиб уларнинг чангалидан қутулиб кетмасак борми, барибир ўша мудҳиш ҳодиса рўй беради,— деди Алан.

Шундан кейин қизгина шартта орқасига бурилдию юргурганича ташқарига чиқиб кетди ва биз ёлғиз қолдик: ҳамма иш хамирдан қил сүғургандек силлиққина кетаётганидан Алан мамнун эди, мен бўлсанм ўзимни худди ёш. боладай эрмак қилишаётгани ва якобинчи деб атрофимда гиргиттон бўлишаётгани учун ич-ичимдан оғринардим.

— Алан, тоқатим тоқ бўлди! — дедим зардам қайнаб.

— Тоқатинг тоқ бўлса ҳам чидайсан энди, Дэви,— деб эътиroz билдириди Алан.— Агар ҳозир ўйинни бузиб юборсанг, ўз жонингнй сақлаб қолишинг мумкин, бироқ Алан Брек бошидан жудо бўлади.

Бу гапда жон бор эди. Иложисиз қолганимга чидамай инグラб юбордим-у, аммо оҳ-воҳим ҳам Аланга қўл келди; чунки товушимни худди шу тобда чўчқа гўштидан тайёрланган овқат билан бир шиша кучли арақ кўтариб келиб қолган хизматкор қиз баралла эшишиб қолди.

— Вой, бечора-ей! — деб юборди у ва овқатни олдимизга қўйиб, меҳрибонлик билан елкаларимни силади. Кейин, ҳеч тортина масдан овқатланишимизни, биздан пул олмаслигини айтди; чунки қаҳвахона шахсий мулки экан, аниқроғи, отасига қарашли бўлиб, бугун у Питтенкриифга жўнаб кетибди.

Албатта, уни ялинтириб ўтирмадик; қуруқ нон билан пишлок кавшагандан кўра, иссиқ овқат тановул қилган минг марта афзал эди; колбасага кўзимиз тушган заҳоти иштаҳамиз очилиб кетди; лунжларимизни шиширганимизча овқатлана бошладик. Қиз эса ҳамон аввалги ҳолатда қўллари билан нариги столга суюниб туради; шоша-пиша овқатланаётганимизни томоша қиласади ва

пешонасини тириштирган кўйи бир нималарни ўйларди ва айни пайтда фартугининг боғичини бармоқларига ўраш билан машғул эди.

— Янглишмасам, тилингиз бир қарич экан,— деди ниҳоят, Аланга мурожаат этиб.

— Лекин ким билан гаплашиш мумкин-у, ким билан мумкин эмаслигини биламан,— деб эътиroz билдириди Алан.

— Сизларни ҳеч қачон сотмайман, кўнглингиз тўқ бўлсин,— деди қиз.

— Албатта, пасткашлар тоифасидан эмассан,— деди Алан.— Сенга бир гап айтаман: бизга ёрдам беришинг лозим.

— Нима деяпсиз, ахир! — қиз бош чайқади.— Бу иш қўлимдан келмайди.

— Агар қўлингдан келса-чи? — деб ўсмоқчилаб сўради Алан.

Қиз лом-мим демади.

— Яхши қиз, гапимга қулоқ сол: биз қишлоқларингга яқинлашаётган пайтимизда Файфда — юрtingда қайиқлар турганини кўрдим. Ўз кўзим билан иккитасини аниқ кўрдим, аслида ундан ҳам кўп бўлса керак. Қисқаси кечаси Лотианга ўтиб олишимиз учун қайиқ топилса ва келишилган жойга уни келтирадиган эшкакчи тилига маҳкам инсон бўлса, оғзидан гуллаб қўймаса, икки кишининг ҳёти завол топмайди: акс ҳолда, мен хавф-хатарга йўлиқаман, у бошидан ажралади. Агар қайиқ топилмаса, демак чўнтағимиздаги уч шиллинг билан кўчада қоламиш: кейин қаёқча борамиз, нима қиламиз? Гапимга ишонавер, бўйнимизга сиртмоқ солинишини кутишдан бошқа иложимиз қолмайди. Азизам, наҳотки бу ердан иккала қўлимизни бурнимизга тиқиб чиқиб кетсан? Ахир иссиқ кўрпага ўраниб ётганча қувурларга, томларга тиқирлаб ёмғир томчилаетган осойишта дамларда виждонинг қийналмасдан ўй суришни истарсан-ку?! Тўкин дастурхон атрофида ўтирган пайтингда, ўчоқда лов-лов ёнаётган гулханга термилганингча овқатлана бошласанг, томоғингдан луқма ўтармикан, тиқилиб қолмайсанми? Манави бечора эса ўша пайтда иситмалаб, очликдан бармоғини сўриб ўтиrsa ёки аллақандай ботқоқликда музлаб қолса нима бўлади? У соппа-соғ бўладими, хаста бўладими, фақат олға интилишга мажбур; рамақижон бўлиб турса-да, аммо барибир, ёмғиру қорни писанд этмай олис манзил сари интилаверади; у совуқ тошларга бош қўйганча жон берәётган сўнгги дамларда тепасида

бирорта ҳам жигаргўшаси бўлмайди: тепасида фақат мен билан худо бўлади, холос.

Аланнинг оташин сўзлари қизни шошириб қўйди; бизга ёрдам беришни жуда истарди-ю, ёвуз ниятли кишиларга ҳамтовоқ бўлиб қолишдан қўрқарди, чамаси. Шунинг учун оз бўлса-да, ҳақиқатни айтиб, қизнинг дилидаги гумонни тарқатиб юбормоқчи бўлдим.

— Феррилик Ранкилер ҳақида бирор гап эшитганмисиз? — деб сўрадим.

— Қозилик билан шуғулланадиган Ранкилер ҳақидаами? — деди қиз.— Бўлмасам-чи, эшитганман!

— Эшитган бўлсангиз, мен ўша кишининг ҳузурига кетяпман,— дедим.— Ўзингиз ўйлаб кўринг, бадкирдор кишига ўхшайманми? Сизга бошқа муҳим гапларни айтиб қўйишим мумкин: англашилмөвчилик туфайли, тақдир тақозоси билан шу тобда ҳаётим қил устида турган бўлса ҳам, лекин бутун Шотландияда қирол Георгга мендан кўра содикроқ инсон топилмайди.

Шундан сўнг қизнинг юзлари бирдан ёришиб кетди, аммо Алан қовоқ-тумшуғини осилтириб олди.

— Энди бундан ортиқ илтимосларнинг ҳожати йўқ,— деди қиз.— Мистер Ранкилер — таниқли зот.

У тезроқ овқатланишга ундаdi; зудлик билан қишлоқ ташқарисига чиқиб, соҳилдаги чакалакзорга яширинишимиз лозим экан.

— Мендан кўнглингиз тўқ бўлсин,— деди қиз.— Сизларни нариги соҳилга ўтказиб қўйиш учун бирор чора ўйлаб топаман.

Энди вақтни зое кетказмаслик лозим эди: пинҳоний ниятимиз тўла-тўқис амалга ошди — бир-биrimiznинг қўлимизни сиқиб қўйдик ва колбасани ҳам пок-покиза туширдик-да, Лаймкилнсдаги ўша чакалакзор томон йўл олдик. У жойда бир тўп дараҳтлар пала-партиш ўсиб ётарди: йигирма тупча дўланаю бута, ора-орада эса шумтол ниҳолчалари қаққайиб турарди, хуллас, дараҳтлар сийрак бўлиб, йўловчилар ҳам, соҳилдан шу томонга қараган кишилар ҳам бизни бемалол кўриши эҳтимолдан холи эмасди. Бироқ оқшом чўкишини мана шу жойда кутиб ўтиришимиз даркор эди: ҳаво илиққина; кўнглимиз равшан — тез орада барча азоб-уқубатлардан кутуламиз. Энди келажакда қиласиган ишларимизни бағуржаси маслаҳатлашиб олсак кифоя эди.

Кун бўйи диққатга сазовор битъа ҳодиса рўй берди: яшириниб ўтирган чакалакзор томонга қандайдир дайди сибизғачи ташриф буюрди; афтидан, ароқхўрга ўхшар-

ди — бурни қип-қизил, чўнтағида бир шиша ароғи ҳам бор эди; у кела солиб дунёдаги жамики одам зотидан нолий бошлади; Олий суднинг лорд-раиси унга етарли даражада эътибор бермабди, Инкеркитинг шерифи эса ҳуда-бехуда безовта қиласверар экан. Ўз-ўзидан равшанки, у бизга шубҳаланиб қарай бошлади: кап-катта икки эркак куппа-кундузи чакалакзорда бекордан-бекорга биқиниб ётишарди. Атрофимизда парвона бўлиб юрган пайтда биз ўзимизни хўдди игнанинг устида ўтиргандек ҳис этдик, ҳар хил саволлари билан жонимизни ҳалқумимизга келтирди; даф бўлгандан сўнг эса тезроқ бу жойларни тарқ этишга шошилдик; чунки ароқхўр гуллаб қўйиши ҳеч гап эмасди.

Кун кеч бўлди, сокин оқшом чўкди; кулбаларда, қишлоқда гулхан ёқилди, кейин бирин-кетин сўнди; фақат ярим кечага яқин — нима қилишимизни билмай, бўларимиз бўлиб турган пайтда эшкак қулоғининг ғий-қиллаши эшитила бошлади. Ташқарига нигоҳ ташладик ва биз томонга келаётган қайиқни кўриб қолдик: таажжубки, қаҳвахона соҳибаси бўлмиш ўша қизнинг ўзи эшкак эшмоқда эди. У сиримизни ҳатто куёвига ҳам (куёви борлигини аниқ билмайман, албатта) ишониб айтмаган эди. У отасининг ухлашини кутиб ўтирган шекилли: кейин деразадан ошиб тушгану қўшнисининг қайиғига ўтириб, бизга ёрдам беришга ошиқкан эди.

Қандай қилиб миннатдорлик билдиришни билмасдим; дарвоқе, биз унга қизғин ташаккур айтганимиздан сўнг ўзини йўқотиб қўйди; вақтимизни зое кетказмасдан тезроқ йўлга отланишимизни илтимос қилди; асосли равишда таъкидлашича, иложи борича тинчлик сақлашимиз ва тезроқ ҳаракат қилишимиз лозим эди. Кўз очиб-юмгунимизча қиз бизни Лотианск соҳилига туширди-да, Корриден яқинида хайр-хўшлашиб, яна Лаймкилнс томон сузиб кетди — биз бўлсак миннатдорлик изҳор этиш учун бир оғиз ҳам сўз айттолмасдан қолавердик.

Қиз кўзимизга кўринмай кетгандан кейин ҳам тилимиз калимага келмади; ростини айтганда, бундай олижаноблик учун ҳар қандай сўз ғариб туюларди; Алан эса бошини чайқаган кўйи соҳилда узоқ вақт туриб қолди.

— Яхши қиз экан,— деди ниҳоят.— Дэвид, у қиз эмас, фаришта экан!

Чамамда, орадан бир соатча вақт ўтгач, кўрфаздаги ғорга кириб олганимиздан кейин, энди мудрай бошлаган чоғимда Алан яна ўша қизни кўкларга кўтариб мақташга киришди. Нима ҳам дердим; у ниҳоятда содда экан.

Унга ёлғон гапирганимдан пушаймон қилардим: гўллиги-дан фойдаландик — бошимизда чарх ураётган хавф-хатарга уни ҳам шерик қилдик. Афсус, минг афсус!

## Иигирма еттинчи боб

### РАНКИЛЕР ҲУЗУРИДА

Шартлашганимизга кўра, эртаси куни қош қорайгунча Алан кўча-кўйда айланиб юриши лозим эди; қуёш ботиши билан Ньюхоллс атрофидағи йўл четида яшириниб ётади ва мен ҳуштак чалмагунимча ўрнидан жилмайди. Шартли белги сифатида «Донғи кетган Эрли хонадони» қўшиғим кўйини таклиф этдим, лекин у кўнмади: чунки бу қўшиқни жуда кўпчилик ёддан билади, далада қўш ҳайдайдётган бирорта деҳқон ҳам ўзича хиргойи қилиб қолиши ҳеч гап эмас, деди. Сўнгра, тоғликларнинг битта қўшиғининг нақорат қисмини ўргатиб қўйди; ўша тарона ҳамон ёдимда турибди, ўйлайманки, ўлгунимча унутмасам керак. Ўша оҳанг эсимга тушган заҳоти хаёлим узоқларга кетади: охирги куни тақдирим ҳал бўлиши даркор эди. Алан ғор бурчагида ҳуштак чалиб, бармоқлари билан ерни чERTIB ўтиради; юzlари тобора ёришмоқда эди; аста-секин тонг отарди.

Куинсферринг катта кўчасида шахдам қадам ташлаб кетаётган пайтимда ҳали қуёш чиқмаган эди. Шаҳар хийла пухта қурилганди: уйлар жуда мустаҳкам — тошдан барпо этилганди, томлари шиферланган бўлиб, айвонлари Пиблидаги уйларникига нисбатан одмироқ қўринарди; қолаверса, кўчаларга ҳам унчалик зеб берилмаган эди-ю, аммо умумий манзара олдида жулдуровчи уст-бошларим ниҳоятда ғарип түюларди.

Тонг отди. Мўрилардан тутун ўрлай бошлади, деразалар очилди, кўчада одамлар пайдо бўлди; менинг ташвишим, тушкун кайфиятим янада ортди. Ногаҳон барча орзу-умидларим бениҳоя омонат эканини сезиб қолдим: қўлимда ҳақ-ҳуқуқларимни ҳимоя қилишга ярайдиган ишончли далил йўқ эди; ҳатто ўзим — бу ўзим эканимни ҳам исботлай олмасдим. Арзимас тасодиф туфайли ҳаммаси совун кўпиги мисоли ёрилиб кетиши мумкин эди, кейин барча орзуларим хомхаёл бўлиб чиқиши ҳеч гап эмасди. Хуллас, ҳозирги ҳолатим ҳавас қилишга арзимасди. Ишлар ўйлаганимдек осон кўчган тақдирда ҳам, даъволарим асосли экани исботланиши

учун маълум вақт ўтиши лозим эди, аммо ўша вақтга қандай қилиб эришардим, ахир?! Чўнтағимда бор-йўғи уч шиллинг пулим бўлса; боз устига, қонун томонидан сиртдан олий жазога ҳукм этилган ҳамроҳимни яширинча йўл орқали хорижий мамлакатга ўтказиб юбориш жоиз-ку, жин урсин?! Худо кўрсатмасин-у, ишлар чап-пасига кетса борми, иккаламиз ҳам дорга осилишимиз ҳеч гап эмас. Катта кўчада ўёқ-буёқка юра бошладим; ўтган-кетган йўловчилар менга мийғида кулишганча қараб қўйишарди ёки бир-бирларини нуқишиб, ўзаро бир нималар ҳақида шивир-шивир қилишарди, баъзан деразалардан ҳам каминага ўқрайиб нигоҳ ташлашарди. Қисқаси, ташвишим янада кўпайди: қозини бир гапга ишонтириш ўлимдан қийинлиги аниқ, айни пайтда унинг ҳузурига кириб олиш ҳам осон эмасди.

Шў тобда ўлимга рози эдим-ку, аммо олифта шаҳарликларнинг бирортаси билан гаплашишга журъатим етмасди; жулдуровқи, кир-чир уст-бошларим билан уларга яқин йўлагани уялардим; бирордан мистер Ранкилердек ўлуғ зотнинг хонадони қаерда эканини сўрасам-у, башарамга тикилиб турганча тиржайиб, лом-мим демасдан кетаверса-да ажаб эмасди. Шундай қилиб, кўчада тентираб юравердим; кўчанинг у бошидан-бу бошига бўзчининг мокисидай бориб-келавердим, бандаргоҳда ҳам хийла вақт сандирақлаб юрдим; кўкрагим ачишиб оғирди, руҳим чўкиб, ҳаммасига қўл силтаб жўнаб кетгим келарди. Бу орада расмана тонг отди; янглишмасам, соат ўнга яқинлашди, мақсадсиз изғийвериш жонимга тегдию кўрфазнинг қарама-қарши томонидаги данғиллама иморат рўпарасига борган чофимда шунчаки бир нафас тўхтадим; дераза ойналари топ-тоза, токчаларда гултуваклар қаторлашиб туарди, деворлари янгигина оқланган, оstonада хонадоннинг този ити талтайган кўйи мудраб ётарди. Ростини айтсан, ҳатто ана шу тилсиз маҳлуққа ҳавасим келди. Бирдан эшик очилдию қадди-қомати келишган, қип-қизил юзли, истараси иссиқ, упа сепилган ясама соч ва кўзойнак тақсан киши оstonада пайдо бўлди. Ташки кўринишим расвороқ бўлгани туфайли кўпчилик ёнимдан юзини тескари буриб ўтиб кетишарди; бу зот эса, аксинча, каминага синчиклаб разм солди (кейинчалик иқрор бўлишича, бечораҳол турқ-атворимни кўриб ҳайратланган экан) ва дарҳол ёнимга келди-да, бу ерда нима қилиб турганимни сўради.

Куинсферрига муҳим иш юзасидан келганимни айтдим ва бир оз дадиллашиб, ундан мистер Ранкилернинг

үйларига қайси йўлдан бориш мумкин, деб сўрадим.

— Ҳм-м,— деди у киши оғзини очмай.— Ҳозиргина ўша зотнинг уйидан чиқдим. Ғалати тасодифни қарангки, камина худди сиз сўраётган киши бўлади.

— Сэр, ундан бўлса, марҳаматингизни дариф тутманг; ижозат берсангиз, бир-икки оғиз гап айтмоқчиман,— дедим.

— Мен номингизни билмайман-ку,— деб эътиroz билдириди у.— Қолаверса, сизни биринчи марта кўриб турибман.

— Номим — Дэвид Бэлфур,— деб ўзимни таништирдим.

— Дэвид Бэлфур?! — деб ҳайрат аралаш такроран сўради.— Мистер Дэвид Бэлфур, биз томонларга қандай келиб қолдингиз? — деб қўшиб қўйди, юзларимга нигоҳини қадаганча.

— Сэр, жуда олис жойлардан келдим,— дедим.— Ўйлашимча, холироқ жойда батафсил сўзлаб берсам ёмон бўлмасди.

У лабларини тишлаганча бир зум ўйга толди: тоx менга, тоx тош йўлга назар солди.

— Ҳа-я,— деди.— Албатта, шундай қилсак яхши бўларди.

Мени ичкарига таклиф этди-да, ўзи уйга қайтиб кирди; чошгоҳгача банд бўламан, ёнимга ҳеч ким кирмасин, деб қичқирди кимгадир, аммо уй ичидан одам кўринмади. Китоблару қофозларга лиқ тўла торгина чанг босган хонага кирдик. Ўрнашиб ўтириб олгач, мени ҳам ўтиришга таклиф қилди ва кир-чир уст-бўшимга қўзи тушиб, тъби тирикланганини яшира олмади; топ-тоза стулга ачиниб қараб қўйди.

— Шундай қилиб, ишингиз бўлса, иложининг борича лўндароқ гапиришингизни илтимос қиласман,— Nec dermino bellum. Troianum orditab ovo.<sup>1</sup> Нима демоқчи эканимни англадингизми? — деб сўради хавотирланиб.

— Сэр, албатта Горацийнинг маслаҳатига амал қиласман,— деб жавоб бердим кулимсираб.— Дарҳол сизни in medias res<sup>2</sup> билан таништираман.

Ранкилер мамнун қиёфада бош ирғаб қўйди; аслида, менинг билимимни синаб кўриш мақсадида гапига лотин-

<sup>1</sup> «Троя уруши ҳақидаги ҳикоя тухумдан бошлангани йўқ эди» (Горацийдан).

<sup>2</sup> «Асл муддао» (лотинча).

ча сўзларни аралаштирган эди. Мамнун эканини кўриб кўнглим кўтарилиган бўлса-да, сўз бошлашим биланоқ қоним қайнаб кетди.

— Конун бўйича Шос қўрғонининг меросхўри бўлиш им лозим.

Ваколатли вакил қутидан қозиликка доир дафтарини чиқардию олдига олиб очиб қўйди.

— Хўш, нима бўпти? — деди.

Кўнглимдаги гапни айтганимдан сўнг бирдан тилдан қолдим.

— Мистер Бэлфур, гапиринг, гапирангиз-чи! — деди қози.— Бир гапни бошлагандан кейин охирига етказиш керак-да! Қаерда туғилгансиз?

— Эссеңдинда туғилганман, сэр,— дедим.— Бир минг етти юзу ўттиз учинчи йилнинг ўн иккинчи март куни.

У сўзларимни дафтаридаги ёзувлар билан таққослаб кўрарди; аммо нима учун бундай қилаётганини тушунмасдим, албатта.

— Ота-онангиз ким? — деб сўради.

— Отам Александр Бэлфур, Эссеңдин мактабининг муаллими эди, дедим.— Онам Грейс Питэрроу; янгишмасам, Энгусдан келин бўлиб тушган эди.

— Ёнингизда шахсингизни тасдиқлайдиган бирорта ҳужжат борми? — деб сўради мистер Ранкилер.

— Ёнимда йўқ, сэр,— дедим.— Лекин руҳониймиз мистер Кембелл талаб қилган заҳотингиз керакли ҳужжатларни беради. Ўша мистер Кембелл кафолат бериши мумкин. Агар фақат шу хусусда бўлса, ўйлашимча, амаким ҳам ким эканимни айтишдан бош тортмаса керак.

— Мабодо мистер Эбенезер Бэлфурни назарда тутмаяпсизми? — деб сўради қози.

— Айнан ўша кишини назарда тутяпман,— дедим.

— Сиз у билан учрашганмисиз?

— У мени ўзи хонадонида кутиб олган эди,— деб жавоб бердим.

— Мистер Хозисон деган кимса билан ҳам учрашмаганмисиз? — деб сўради мистер Ранкилер.

— Баҳтга қарши, сэр, у билан ҳам учрашганман,— дедим.— Ахир ўша одамнинг марҳамати туфайли (амакимнинг нияти ҳам шундай эди) мана шу шаҳарга кириб келишимга икки қадам қолганда ўғирлаб кетилдим, зўрлаб денгиз сафарига жўнатилдим, кема ҳалокатига дуч келдим ва бошимдан минглаб кулфатларни кечирдим; энди эса қаршингизда жулдуровқи қиёфасида турибман.

— Кема ҳалокатига дуч келганингизни эслатиб ўтдингиз,— деди Ранкилер.— Ўша ҳодиса қаерда рўй берган эди?

— Малл оролининг жанубий чегаралари яқинида,— дедим.— Тўлқин мени Иррейд деган оролга итқитиб ташлади.

— Э-э, жуғрофияни мендан кўра яхшироқ билар экансиз,— деди у мийифида кулганча.— Нима ҳам дердим, ростини айтсам, бу гапларингиз бошқа манбалардан олинган маълумотларга айнан мос келяпти. Сизни ўғирлаб кетишибди-а? Қайси маънода сўзладингиз?

— Сэр, бўлган гапни айтдим,— дедим.— Уйингизга келаётган пайтимда алдаб-сулдаб мени савдо кемаси бортига чиқаришдио бошимга нима бало билан туширишиб, хушимдан кетказиб қўйишди ва’ кеманинг остки қисмига улоқтириб юбориши; ўз-ўзидан равшанки, мен очиқ денгизда ўзимга келдим. Мустамлакачиларга қўл сифатида сотиб юборишмоқчи эди, бироқ худойимнинг раҳми келди шекилли, қутулиб қолдим.

— Кема йигирма еттинчи июнь куни ҳалокатга учраган эди,— деди Ранкилер дафтарга кўз югуртириб.— Бугун эса йигирма тўртинчи август. Мистер Бэлфур, ҳазилакам вақт ўтмабди — салкам икки ой ўтибди. Бу вақт мобайнинда дўстларингиз бўларича бўлишгандир, ҳойнаҳой. Назаримда, ўтган муддат ҳақида тўла-тўқис маълумотга эга бўлмагунимча барибир кўнглим тўлмайди.

— Сэр, тўғрисини айтсам, осонликча кўнглингизни тўқ қилиб қўйишим мумкин,— дедим.— Ҳикоямни бошлашдан аввал, хайриҳоҳ инсон билан сұхбатлашаётганимга ишонч ҳосил қилсан, хурсанд бўлардим.

— Нотўғри тасаввур худди шу йўсинда ҳосил бўлади-да,— деб эътиroz билдириди қози.— Гапларингизни охиригача эшитмасам, қатъий бир қарорга келолмайман. Токи қўлимда етарли даражада асосим йўқ экан, ўзимни сизга дўстман, деб айтолмайман. Сизнинг ёшингиздаги йигитчалар ишонувчан бўлишади. Биласизми, мистер Бэлфур, ғалати мақолимиз бор: ёмон одам ёмонликдан кўрқади.

— Сэр, эсингизда бўлсинки, ишонувчанлигим оқибатида бир марта панд еганман,— дедим.— Билишимча, мени қул қилиб сотиб юбормоқчи бўлган киши сизга ҳам хизматларингиз учун ҳақ тўлайди.

Бу вақт мобайнинда аста-секин мистер Ранкилер билан қандай гаплашмоқ керак эканини ўрганиб олдим: оёғим

заминда мустаҳкам турганини ҳис этганимдан сўнг, ўзимга нисбатан ишончим ҳам ортди. Мийиғимда кулганимча ҳамла қилганимдан кейин у баралла хахолаб юборди.

— Бай-бай-бай, салгина ошириб юбордингиз-ку! — деди.— Fui, non sum.<sup>1</sup> Ростдан ҳам, бир пайтлар амакингизнинг ишончли вакили бўлганман, айни чоқда сиз (*imberis juvenis custode pemoto*) ғарбда тараллабедод қилиб юрган кезларда кўп сувлар оқиб кетди; агар қулогингиз қизимаган бўлса, мени бу ерда ғийбат қилишмабди-да, деб ўйламанг тағин. Сизлар денгизда баҳтсизликка учраган куни мистер Кембелл идорамга ташриф буюрди-да, нима қилиб бўлса ҳам сизнинг улушингизни унга олиб беришимни талаб этди. Бу дунёда сиз бор эканингизни хаёлимга келтирмаган эдим; амакингизни эса яқиндан билардим, шунинг учун қўлимдаги маълумотларга қараганд (бу ҳақда кейинроқ тўхталаман), ҳар қандай оғир натижа рўй бериши мумкин эди. Мистер Эбенезер эса сиз билан учрашганини тан олди; гувоҳлик беришича, гўёки у сизга анча миқдорга пул берган эмиш (албатта, унинг сўзларига ишониб бўлмасди) ва сиз таҳсил кўриш учун Оврупога жўнаб кетибсиз — бу гапга қисман ишониш мумкин эди. Бу ҳақда нима учун йигитча мистер Кембеллга ҳеч нарса демасдан кетди, деган саволга у: «Ўтмишга боғлиқ барча ришталарни узиб ташламоқчи эди», деб жавоб берди. Ҳозир қаерда эканингизни сўрасам, аниқ билмайман-у, ҳарҳолда Лейденда бўлса керак, деб мужмал жавоб қайтарди. Сухбатимизнинг қисқача мазмуни шулардан иборат. Унинг гапларига ҳеч ким ишонмаса керак,— деб сўзида давом этди мистер Ранкилер кулимираб.— Баъзи бир гумонларим амакингизнинг фифонини фалакка чиқариб юборди ва охири ковушимни тўғрилаб кўйди. Шундай қилиб, боши берк кўчага кириб қолдик; тахминларимиз қанчалик оқилона бўлса-да, лекин уларни мутлақо исботлаб бўлмасди. Худди ўша пайтда гўё осмондан тушгандек дарға Ҳозисон янгилик топиб келди: гўё сиз чўкиб кетган эмишсиз; шундан сўнг калаванинг уни топилди — ишлар хамирдан қил сурғандек силлиқ кўчди; фақат мистер Кембеллнинг юрак-бағри ўртаниб кетди, менинг ҳамёним зарар

<sup>1</sup> «Бўлганман, фақат илгари» (лот).

<sup>2</sup> «Мўйлови сабза урмаган бошвоқсиз йигитча» (лот).

Кўрди ва амакингиз номига яна битта доғ тушди; шундоқ ҳам номи балчиққа қоришиб ётибди. Хулласи калом, мистер Бэлфур, воқеалар мундарижаси билан деярли танишдингиз ва энди менга қай даражада ишонишингиз мумкин эканини билсангиз керак,—деб сўзларини якунлади.

Гапнинг индаллосини айтганда, у бўлиб ўтган воқеаларни лўндагина қилиб таъсирлаб берди, мен эсам «шираси»ни ўзимга олиб, «тўппаси»ни қофозга туширяпман, холос; қолаверса, сұхбатдошим нутқига лотинча иборалар билан жило беришни хуш кўрарди; сўзлаётган пайтида қараашларидан, саъй-ҳаракатларидан эзгулик аломатлари балқиб турардик, беихтиёр орамиздаги бегоналиқ пардаси кўтарилиб, юрагим эриб кетди. Шубҳа гумонлар унинг кўнглини тарк этгани кўриниб турарди, менинг кимлигимга тўла-тўкис ишонч ҳосил қилган эди, демак дастлабки довондан ўтиб олгандим.

— Сэр, бошимдан кечирган воқеаларни оқизмай-томизмай айтиб берадиган бўлсам, дўстимнинг ҳаётини гаровга тикишим лозим,— дедим.— Унга тегишли сирасорни дилда сақлашга ваъда беришингизни илтимос қиласман. Мен ўзим учун қандайдир кафолат сўраётганим йўқ, чунки муносабатингизни юзингиздан билиб турибман.

У ниҳоятда жиддий қиёфада менга ваъда берди.

— Фақат бир нарсани таъкидлаб қўймоқчиман: гапсўзларингиз кишини ҳушёр тортириб қўйди; агар ҳикоянгизда қонунга хилоф ишлар хусусида гап кетса, камина қонун хизматкори эканимни эътиборга олишингизни, ўшандай ўринларга батафсил тўхталиб ўтирмаслигингизни сўрайман,— деди.

Ўз тарихимни ҳикоя қилишга киришганим заҳоти кўзойнагини пешонасига суриб қўйди-да, кўзларини юмган кўйи тинглай бошлади; шунинг учун, назаримда, ухлаб қолгандек туюларди. Бироқ уйқуни хаёлига ҳам келтирмасди. Кейинчалик амин бўлдимки, ҳар бир сўзимнинг оҳорини тўкмасдан эслаб қоларди; хотираси кучлилигига қойил қолдим. Ҳатто қулоққа ғалати эшитиладиган, гайритабиий гэлча исмлар тасодифан атиги бир бора айтилган бўлса-да, аммо у барибир унутмасди; орадан кўп йиллар ўтгандан сўнг ўша исмларнинг бирортаси ҳақида менга савол берарди. Ниҳоят, Алан Брекнинг исми шарифини тўлиқ айтганимдан кейин ўртамиизда қизғин мунозара бўлиб ўтди. Равшанки, Эпиндаги қотилликдан ва қотилни тутган одамга ваъда

қилинган мукофотдан сўнг Аланнинг исми бутун Шотландияга машҳур бўлиб кетган эди; унинг номи оғзимдан чиқиши биланоқ қози ўтирган жойида бир қимиirlадиу кўзларини очди.

— Мистер Бэлфур, агар ўрнингизда мен бўлганимда, ортиқча исмларни тилга олмаган бўлардим,— деди.— Аммо бир гапни бошлагандан кейин уни охиригача етказиш лозим. Балки ундаи эмасдир,— деб ўтироz билдириди мистер Ранкилер.— Эҳтимол, ўзингиз ҳам сезган бўлсангиз керак, қулоғим вазминроқ, шунинг учун баъзи бир сўзларни тўғри ўшиганимга кафолат беролмайман. Ижозат берсангиз, бундан кейин дўстингизни «мистер Томсон» деб атаемиз; чунки ортиқча гап-сўзлардан ҳеч қандай наф бўлмайди. Мабодо яна-тағин бирорта тоғликлар номини (тирик ёки абадий уйқуга кетган бўлишидан қатъий назар) тилга олиш лозим бўлса, сизнинг ўрнингизда мен айнан шундай қиласдим.

У мен айтган исмни аниқ-равшан ўшиганим эди ва энди қотиллик ҳақида гапира бошлашимни сезиб қолганди. Умуман, агар истаса ўзини гарангликка солиши мумкин — ихтиёри ўзида; мен «Томсон» тоғликларга унчалик ярашмайдиган исм эканини шунчаки эслатдиму мийифимда кулиб қўйдим ва таклифига рози бўлдим. Шундай қилиб, ҳикоямнинг охиригача Алан «мистер Томсон» бўлиб қолди; энг қизиғи шундаки, ҳийла-найранг дўстимга ҳам маъқул бўларди, албатта. Келишувимизга биноан Жеймс Стюарт «мистер Томсоннинг қариндоши» деб аталди; Колин Кемпбеллни «мистер Глен»га алмаштиридик; Клунга навбат етганда уни тоғликларнинг йўлбошчиси «мистер Жемсон» деб атадим. Буларнинг ҳаммаси оқ ип билан бичиб-чатилган эди, мен нима учун қози бундай ўйинга ишқивоз эканига ҳайрон бўлардим; аслини олганда, бу ўша давр руҳига ҳамоҳанг бўлиб, мамлакатда икки гурӯҳ ўртасида қақшатгич кураш кетаётган бир замонда тирикчиликдан бошқа ғами бўлмаган беозор инсон зинҳор-базинҳор бир тарафнинг ёнини олишни истамасди; имкон туғилган жойда ўз улушкини қўлдан бой бермасликка интиларди: айни чоғда сих ҳам, кабоб ҳам куймайдиган тарзда ҳарақат қиласди.

— Ана холос,— деди қози ҳикоямни тугатганимдан сўнг.— Худди насрый асарга ўхшайди-я, ўзига хос «Жангнома» экан. Олим бўлганингиздан сўнг барча гапларингизни лотин тилига таржима қилиб қўйинг; лозим топсангиз, инглиз тилида қофозга тушириб

• қўйсангиз ҳам бўлади, лекин лотин тилининг имкониятлари каттароқ, деб ўйлайман. Анчагина сарсон бўлибсиз. Жаҳонгашталик чоғингизда оғе regio in ferris<sup>1</sup>, (сийқа гапираётган бўлсам, маъзур кўрасиз) Шотландиянинг сиз бормаган музофоти қолмабди ҳисоб! Бунинг устига, бемаъни аҳволга тушиб қолган бўлсангиз ҳам, лекин тан бериш лозимки, ўзингизни йўқотиб қўймабсиз. Назаримда, мистер Томсон бинойидек жентельмен экан; фақат андак қасоскор шекилли. Шундай бўлса-да, агар у (барча ижобий хислатлари билан биргаликда) Шимолий дengiz қаърига чўкиб кетганда ниҳоятда хурсанд бўлардим ва ўзимни анча баҳтиёр ҳис этардим; чунки бу одам, мистер Дэвид, доимо бирорта жанжални кавлаштириб топаверади. Шубҳасизки, унга садоқат кўрсатиб мутлақо тўғри қиляпсиз, ахир у ҳам дўстига содиқ эди-да. Айтиш мумкинки, муносиб ҳамроҳ бўлибди, шунингдек, paribus curis vnsitigia figit<sup>2</sup>, менимча, икковларинг ҳам бекорга дорга осилиш ҳақида ўйламагансизлар, ахир. Нима ҳам дердим, омадларинг юришибди — қаро кунлар ортда қолибди. Ўйлайманки, яқин орада (қонуншунос сифатида эмас, одамгарчилик юзасидан шундай деяпман) барча азобуқубатлардан фориғ бўласизлар.

У саргузаштларим хусусида сафсата сотарди-ю, лекин мендан меҳр тўла, беғараз нигоҳини узмасди; ўзим зўрға қувончимни яшириб ўтирадим. Маълумки, қонунпонунга итоат этмайдиган, кимсалар орасида бир қанча вақт ўралашиб юрдим, тоғларда — очик ҳавода тунларни бедор ўтказдим; мана энди расмана бошпанада ўтирадим, топ-тоза хона кўзимга мўъжизадек кўринарди. Айниқса, мовут чакмон кийган бамаъни зот билан суҳбатлашиб ўтиришнинг гашти ўзгача эди! Шу пайт нигоҳим эгнимдаги жулдур кийимларга тушиб қолдию яна ўзимни ноқулай ҳис эта бошладим. Қози менга кўзи тушган заҳоти кўнглимдан нималар кечаетганини дарҳол англади ва ўрнидан турди-да, мистер Бэлфур билан бирга нонушта қиласиз; иккала-мизга дастурхон тузаб қўйинглар, деб қичқирди. Сўнгра, юқори қаватдаги ётоқхонага эргаштириб чиқди. Қўлимга сув тўла кўза, совун, тароқ тутди; ўғлига

<sup>1</sup> «Ер юзининг бирор жойи» (лот.).

<sup>2</sup> «Бир хилдаги иш билан қолдирибсиз» (лот.).

аталган кийимларни кўрпа устига ёйиб ташлади. Кейин ўзимни тартиби олишим учун холи қолдирди: лотинча лутф қилдию хонани тарк этди.

### Иигирма саккизинчи боб

## МЕРОСИМНИ АЖРАТИБ ОЛГАНИ ОТЛАНДИМ

Ўзимга имкон борича оро бердим; кўзгуга қараб жулдуурвоқи йигитча ўтмишда қолиб кетганига ва унинг ўрнида яна Дэвид Бэлфур ҳаётга қайтганига ишонч ҳосил қилсанг, қалбинг беихтиёр қувончга тўлар экан. Лекин барибир бу ўзгариш кўнглимда унчалик ўтиришмасди, айниқса, бироннинг кийими елкамдан зил-замбил тошдек босиб тургандек туюларди. Ясан-тусанимни поёнига етказганимдан сўнг, оstonада мистер Ранкилер қарши олди ва ташки кўринишими олқишилди-да, тағин ишхонасига эргаштириб кетди.

— Мистер Дэвид, марҳамат, ўтиринг,— деди.— Ана энди сал-пал асл ҳолатингизга қайтдингиз. Қани, кўрайлики, балки баъзи бир янгиликларни билиб олишингизга ёрдам берарман. Назаримда, отангиз билан амакингизнинг муносабатлари қанақа бўлганини ўзингизча тахмин қилаётганга ўхшайсиз-а? Ҳа, бу жуда ҳам ғаройиб ҳодиса. Ростини айтсам, уни айнан сизга тушунтириб беришга мажбур бўлганимдан хижолат чекяпман. Чунки бунинг асосий сабаби — муҳаббат можаросига бориб тақалади.— Қози ҳақиқатан ҳам ўнғайсиз аҳволга тушиб қолди.

— Тўғриси, амакимнинг туриш-турмушига бундай изоҳ сира ҳам мос тушмайди,— дедим.

— Бироқ, мистер Дэвид, у бир умр қари чол бўлмаган,— деб эътиroz билдириди қози.— Бундан ташқари, ёшлигидан бошлаб ярамасликни касб қилиб олмаган эди десам, яна ҳайрон бўлсангиз керак. У ниҳоятда довюрак, олижаноб йигит эди; асов от устида жавлон уриб юрган кезларда одамлар оstonага ёпирилиб келишарди. Уни ўз кўзларим билан кузатганиман: сизга чин дилдан айтишим мумкинки, унчалик кўркам йигит бўлмаганим учунми, ишқилиб, ҳасад қилардим ва ўша пайтларда ҳеч иккиласланмай: «*Odi te gui bellus es, Sabelle!*», дейишим мумкин эди.

<sup>1</sup>«Ҳой, ўқтам йигит, сени кўтарга кўзим йўқ!» (лот.)

— Бу қандайдир тушга ўхшайди,— дедим.

— Ҳа, ҳа,— деди мистер Ранкилер.— Йиллар ёшликтан мана шундай қасос олади. Қолаверса, у фавқулодда, умидли шахс бўлиб етишиши ҳам мумкин эди. Етти юзу ўн бешинчи йили уйидан қочиб кетади. Қўзғолончиларга қўшилиб кетмоқчи бўлади. Бошқа бирор эмас, айнан амакингиз уларнинг орқасидан қувиб етади ва аллақандай жарликда излаган одамларини топадио бутун ўлкани бошига кўтариб, multum gementem<sup>1</sup> ота юртини тарқ этади. Айни чоқда, majora canamus<sup>2</sup> оға-инилар худди ўчакишгандай битта қизга ошиқ бўлиб қолишади. Мистер Эбенезер жамоатнинг эркатоий эди, иззатталаб бўлиб қолганди; айтиш мумкинки, қизнинг қалбини забт этишга ишончи комил эди, лекин янгишганини англайди ўздан ошиб кетади. Ўз ёғига ўзи қовурилиб юрганини бутун ўлка биларди; гоҳ юраги хасталаниб кўрпа-тўшак қилиб ётиб қоларди, бефаросат оила аъзолари эса бошига тўпланиб олишарди; гоҳида қаҳвахонама-қаҳвахона тентираб юраверарди, бурнидан чиққунча арақ ичарди ва дуч келган одамга дилидаги дардини тўкиб соларди. Мистер Дэвид, отангиз яхши инсон бўлиб, лекин ҳиҳоятда иродаси бўш эди; ўткинчи оҳ-воҳларга чидаёлмасдан ажойиб кунларнинг бирида жигаргўшасини деб, қиздан воз кечади. Аммо қиз хийла оқила экан (кўриниб турибди, ақл-фаросат сизга айнан онангиздан мерос қолган): ўзининг худди копток мисоли қўлдан-қўлга ирғитилишини асло истамайди. Икки оға-ини унинг оёғига бош уриб ялиниб-ёлворишади; қиз унисини ҳам, бунисини ҳам кўчага ҳайдаб чиқаради.

Ўзимга ҳам бу бемаъни воқеадек туюла бошлади; унутмаслик лозимки, унга отам аралашиб қолганди.

— Сэр, ростини айтсам, ҳикоя қилаётган воқеадан фожианинг ҳиди келяпти,— дедим.

— Йўғ-э, тақсир, йўғ-э! — деб эътиroz билдириди қози.— Чунки фожиа рўй бериши учун арзигулик баҳона топилиши даркор; ал қасосул минал ҳак, деб бекорга айтишмайди! Бу ерда эса битта асов эшак ҳамма нарсани остин-устун этиб юборди: ҳамма эркалатавериб, талтайтириб қўйганди; энди жиловлаб олиб, обдан савалаш лозим эди, вассалом — шундан бошқа «малҳам» кор қилмасди. Аммо отангиз айрича

<sup>1</sup> «Алам билан хўрсинаётган» (лот.).

<sup>2</sup> «Энди ашуланинг давомини айтамиз» (лот.).

фикрда эди; бирин-кетин ён бераверди, амакингиз бўлса борган сайин худбин эҳтиросларига эрк бераверди ва охир оқибатда улар ўртасида ғалати шартнома тузилди; ўшанинг аччиқ мевасини кейинги пайтларда татиб кўрдингиз. Оға-иниларнинг биттасига — суюкли ёр, бошқасига — қўрғон насиб этди. Мистер Дэвид, биласизки, олиҳимматлик ва меҳр-шафқат ҳақида кўп гапирилади; ўйлайманки, агар одамлар маслаҳат олиш учун тез-тез қозига мурожаат этиб туришса, ҳамма ишни қонун бўйича амалга оширишса борми, мана шунаقا чигал ҳаёттий муаммолар ҳам кўнгилдагидек ҳал этилган бўларди. Умуман олганда, отангизнинг ҳайбаракалла саъй-ҳаракатлари аслида адолатсиз эди; оқибатда адолатсизлик болалаб кетишига замин ҳозирланди. Отонангиз умрларининг охирларигача қашшоқликда яшадилар, сизни рисоладагидек тарбиялай олмадилар; айни чоқда Шос қўрғонининг ижарадорлари қандай ҳаёт кечиргандарини бир кўрсангиз эди! Айни чоқда мистер Эбенезер (бундан камина заррача ҳам ташвишланмасада) қандай кўргулика дуч келганини айтмайсизми!

— Энг ҳайратланарли жойи шундаки, одамзод таниб бўлмайдиган даражада ўзгариб кетиши мумкин экан,— дедим.

— Бу ҳақда бир ёқлама ҳукм чиқариб бўлмайди,— деди мистер Ранкилер.— Менимча, бу табиий ҳолдир. Муносиб иш қилдим, дейиши учун унинг ҳеч қандай асоси йўқ эди. Ҳамма гаплардан хабардор кишилар ўндан безиб кетишли; бехабар кишилар эса оға-иниларнинг биттаси изсиз йўқолганини, бошқаси қўрғонга яккаҳоким бўлиб қолганини кўришдию қотиллик рўй бергани хусусида миш-миш тарқатишли: натижада амакингиз моховга ўхшаб ҳалқдан ажралиб қолди. Бундай битимдан сўнг фақат бойликка эга бўлди, холос. Равшанки, бойликка ҳирс қўйди. У ёшлик чоғларида ҳам худбин эди, кексайган пайтида ҳам худбинлик уни тарқ этмади. Олий ҳис-туйғулари, устомонлиги тубан мақсадга йўналтирилганини эса ўз кўзингиз билан кўрдингиз.

— Сэр, бундай мураккаб вазиятда нима қилишим лозим? — деб сўрадим.

— Шубҳасизки, қўрғон сизники,— деб жавоб берди қози.— Амакингиз хужожат-пужожат тўғрилаб ўтирганидан қатъий назар — барибир меросхўр бўлиб қолаверасиз. Аммо амакингиз шунаقا одамки, «оқ»ни «қора» дейишдан ҳам тоймайди; назаримда, у сизнинг сиз экан

НИНГИЗНИ инкор этишга уриниб кўрса керак. Суддаги даъволар доимо қимматга тушади, оилавий даъвои жанжаллар эса тилларда достон бўлиб кетади. Бундан ташқари, мистер Томсон билан бирғаликдаги саёҳатингизга доир зигирдек ҳақиқат фош этилса, хонавайрон бўламиз. Ўз-ўзидан равшанки, агар сизнинг ўғирлаб кетилганингизни исботлай олсак борми, бу асосий қуролимиз бўлади. Лекин уни исботлаш жуда мушкул вазифа; шунинг учун ўша воқеа эслатилган чоғда амакингизга нисбатан яхши муносабатда бўлишни кўзлаб ҳаракат қилишни маслаҳат бераман; ҳатто ўнга умрининг охиригача Шос қўргонида истиқомат қилишга ижозат бермоқ даркор: йигирма беш йил мобайнида ўша ерда илдиз отди, ҳозирча барча имтиёздан баҳраманд бўлаверсин.

Ён беришга тайёр эканимни ва табиийки, оилавий майда-чўйда гапларни овоза қилмасликдан манфаатдорлигимни изҳор қилдим. Айни пайтда хаёлимға бир фикр келиб қолди: кейинги ҳатти-ҳаракатларимизга ана шуни асос қилиб олдик.

— Демак, муҳими — менинг ўғирланишумда амаким бош айбдор эканини бўйнига қўйишими? — деб сўрадим.

— Албатта,— деди мистер Ранкилер.— Лекин буни суд залида амалга оширган маъқул. Мистер Дэвид, ўйлаб кўринг: «Васият» кемасида хизмат қилган бирорта денгизчини излаб топишимиз мүмкин; аммо денгизчи гувоҳлик бера бошлагандан сўнг унинг кўргазмаларини чеклаб қўйишга қодир бўлмай қоламиз ва кимдир албатта сизнинг дўстингиз бўлмиш мистер Томсон ҳақида бирор оғиз сўз айтиб юборади. Бу эса (агар сиздан эшитган гапларимга ишонадиган бўлсам) унчалик кўнгилли эмас.

— Сэр, биласизми, баъзи бир нарсаларни ўйлаб кўйдим,— дедим.

Ўз ниятимни изҳор этдим.

— Ҳа, тузук. Лекин, англашимча, ўша Томсон билан учрашмоғим даркор шекилли? — деди у гапимни якунлаганимдан сўнг.

— Ўлашимча, шундай қилмасак бўлмайди, сэр,— дедим.

— Фалокат оёқ остида, деб шуни айтсалар керак-а! — деб хитоб қилди пешонасини ишқалаган кўйи.— Эҳ, кўргилик экан-да! Йўқ, мистер Дэвид, бу режани амалда тадбиқ этиб бўлмайди. Дўстингиз тўғрисида

ҳеч қандай ёмон гап айтмоқчи эмасман, мистер Томсон ножүя иш қилганини ҳам билмайман; агар билганимда (мистер Дэвид, бу томонини ҳам ҳисобга олиб қўйинг) борми, уни тутиб бериш — менинг бурчим-ку! Энди инсоф билан айтинг-чи, биз учрашсак, бундан нима фойда? Мабодо, унинг бошқа гуноҳлари ҳам бўлса-чи? Мабодо сизга ҳаммасини айтмаган бўлса-чи? Мабодо асл номи Томсон бўлмаса-чи! — деб қичқирди қози, маънодор кўз қисиб қўйган кўйи.— Бу тоифадагилар юрган йўлида ўзига янги ном топаверади; ҳатто баъзи бир дўланаларнинг мевасидан ҳам уларнинг номлари кўпроқ бўлади.

— Сэр, ўзингизга ҳавола,— дедим.

Шунга қарамасдан, мен айтган фикр хаёlinи банд этиб олгани яққол кўриниб турарди; чунки тушликка таклиф этишган чоғда — миссис Ранкилер хонимнинг тиниқ кўзлари унга қадалиб турган маҳалда ҳам хаёллари паришон эди, нималарнидир ўйларди. Хонадон соҳибаси бизни ёлғиз қолдириб кетиши биланоқ (стол устига бир шиша май қўйилган эди) у мен амалга оширмоқни кўзлаган режанинг икир-чикирларини эзмаланиб суриштира бошлади: дўстим мистер Томсон билан қачон, қаерда учрашишни келишиб олганмиз; Томсон деганларининг бемаъни инсон эканлигига ишониш мүмкинми; агарда кекса тулки амакинг тузоққа илинса, фалон-пистон шартларга кўнасанми каби саволлар кетма-кет равишда мистер Ранкилер оғзидан учиб чиқиб, каминанинг қулоғига қадалаверди. Айни пайтда маза қилиб май ичиб ўтиради. Барча саволларга жавоб қайтарганимдан сўнг, афтидан, қаноат ҳосил қилди шекилли, янада теран ўйга толди; ҳатто гулгун май ҳам эсидан чиқиб кетди. Кейин қоғозу қалам олди-да, бир нималарни ёзишга киришди; ҳар бир сўзни салмоқлаб кўрарди гўё. Хатни тугатгач, қўнгироқчани чалдию оstonада мирза пайдо бўлди.

— Торренс, кечгача мана бу хатни чиройли қилиб кўчириб қўйинг-да, ишни тугатганингиздан сўнг шляпангизни кийиб, бизни — манави жентельмен иккаламизни бир жойга кузатиб боришга тайёр бўлиб туринг; гувоҳ сифатида фойдангиз тегиб қолиши мумкин,— деди қози.

— Сэр, ниҳоят, таваккал қилишга қарор қилдингизми? — деб сўрадим мирза эшикни ёпиб хонадан чиқиши билан.

— Кўриб турибсиз-ку,— деди мистер Ранкилер, яна

ўз қадаҳига қулт-қулт этказиб май қуяр экан.— Энди ишни бир четга қўйиб турдилек. Торренсга кўзим тушган маҳалда эсимга битта воқеа келиб қолди: бундан бир неча йил муқаддам биз ана шу шўртумшук лапашанг билан Эдинбургнинг энг катта майдонида учрашишга келишиб олган эдик. Кейин ҳар ким ўз юмуши билан овора бўлиб кетди; соат тўртга қадар Торренс бир стакан арақ ичиб олишга ҳам улгурнибди, охири у хўжайнини ҳам танимай қолди; мен эсам кўзойнагимни уйда унтиб қолдирибман — худо ҳақи, шапқўрлигим туфайли хизматкоримни танимаган эдим ўшанда! — Қози товушни баралла қўйиб хахолаб юборди.

Одоб юзасидан мен ҳам жилмайиб, ҳақиқатан ҳам, ғалати ҳодиса рўй берган экан, деб қўйдим. Ҳайратланарли жойи шундаки, мистер Ранкилер кун бўйи ўша ҳангомани янги ва янги тафсилотлари билан қайта-қайта айтаверди, товушининг борича хахолайверди; унинг бундай аҳмоқона ҳаракатларидан охири ноқулай аҳволга тушиб қолдим, кўзларимни қаёққа яширишини билмасдим.

Алан билан учрашишга келишган вақтимиз яқинлашган пайтда қозининг уйидан ташқарига чиқдик: мистер Ранкилер мени қўлтиқлаб олди, орқамиздан эса чўнтағига хатни бўклаб солиб олган, қўлига саватча ушлаган Торренс келарди. Шаҳар бўйлаб одимлаётган чофимизда қози ҳар қадамда гоҳ ўнг томонига, гоҳо сўл томонига қараб бош иргиб қўярди; йўловчилар дам-бадам шахсий ёки расмий ишлари юзасидан савол беришарди, бир дақиқа тўхташини илтимос қилишарди; мистер Ранкилерни ўлкада ҳамма ҳурмат қилиши шундоқ ҳам кўриниб турарди. Ниҳоят, уйдан хийла узоқлашиб кетдик: бандаргоҳ ёқалаб —«Дўлана» меҳмонхонаси томон, паром тўхтайдиган жойга қараб (айнан мана шу ерда менинг бошимга кулфат тушган эди) борардик. Бу жойларга бефарқ нигоҳ ташлай олмасдим: ўша пайтда ёнимда йўқлиги беихтиёр эсимга тушиб қоларди; Рансом ўша абллаҳлар қўлида жон берди ва оғир қисматдан осонроқ қутулиб кетди; Шуаннинг ҳозир қаерда эканини тасаввур этишнинг ўзи кишини даҳшатга солиб қўярди; кемада сўнгги сафарга отланган баҳтиқаро кимсалар денгиз қаърида ётишарди. Ўша исқоти кемадан ҳам, ёвуз денгизчилардан ҳам омадлироқ эканман; оғир синовлардан, даҳшатли хавф-хатарлардан омон-эсон ўтиб олдим. Дафъатан хурсанд бўлишим, шукр қилишим

лозимдек туюларди; бироқ бу жойга кўзим тушган пайтда ўтган-кетгандарнинг ёдини эслаб ич-ичимдан эзилишим ва ўтмишдаги қўрқинчли ҳодисалар шарпаси дилимни хуфтон қилиши турган гап эди...

Ўз хаёлларим оғушида борардим. Туйқусдан мистер Ранкилер чўнтакларига шапатилаган кўйи қичқириб, хаҳолай бошлади.

— Йўқ, бунга сиз ҳам қойил қоласиз! — деб хитоб қилди.— Кун бўйи жаврайвериб, қулоқ-миянгизни едим, лекин барибир кўзойнагимни уйда эсимдан чиқариб қолдирибман — мана буни эрмак деса бўлади!

Албатта, мен лабимни тишладим; кун бўйи анави «зарбулмасал» бекорга такрорланмаганини пайқадим ва атайлаб кўзойнак уйда қолдирилганини билиб турардим: ўзини жўрттага Аланнинг ёрдамини менсимаётгандек кўрсатмоқчи бўлади; иш чаппасига кетса, жиноятчнинг юзига тикилиб туриб гувоҳлик бериш даҳмазасидан қутулиб қолишини истарди. Ҳа, у устамонлик қилган эди: хўш, агар ишимиз ёмон томонга айланиб кетганда, Ранкилер қасам ичиб дўстимни танимаслигини айтармиди? Мени бадном қиладиган кўрсатма беришга ким мажбур қила оларди? Шундайликка шундай-ку, у алла маҳалгача ўзининг хотираси суст эканини унутиб қўйди, чамаси; шаҳар бўйлаб бораётган пайтимизда йўл-йўлакай гаплашган кўплаб одамларни номма-ном танир экан... Ҳуллас, кўзойнаксиз ҳам унчалик ёмон кўрмаслигига заррача ҳам шубҳаланмасдим.

«Дўлана» меҳмонхонаси ёнидан (остонада хўжайин трубка чекиб ўтиради; уни бир кўришдаёқ танидим ва сира ҳам кексаймаганидан ҳайратландим) ўтишимиз биланоқ мистер Ранкилер сафимиздаги тартибни ўзгартирди; ўзи Торренс билан орқада юра бошлади, мени эса худди чопар сингари олдинга ўтказиб юборди. Тепаликка кўтарилавердим, дам-бадам гэлча қўшиқ куйини ҳуштак билан чалиб қўярдим ва ниҳоят, бунга жавобан ҳуштак чалинганини эшитдиму қувониб кетдим: бута ортидан Алан қаддини ростлади. Якка ўзи шу атрофда яшириниб юргани учун, Дандас яқинидаги фақирона пивохонада чала-чулпа овқатлангани туфайли ўзини хийла олдириб қўйган эди. Ҳартугул, уст-бошимга кўзи тушган заҳоти яшнаб кетди; ишларимиз чакки эмаслигини айтганимдан сўнг (албатта, ҳал қилувчи жараёнидан у ҳам четда қолмасди) эса бутунлай ўзгарди-қолди.

— Мақтовга лойик фикр,— деб маъқуллади.— Тўғри-

сини айтиб қўя қоламан, бу ролга Алан Брекдан мұносиб одамни барибир тополмасдиларинг. Айни пайтда алоҳида фаҳм-фаросат талаб этилади; сир эмаски, ҳар ким бундай фазилатга эга бўлавермайди. Дарвоҷе, сезиб турибманки, қози мени ўз кўзи билан кўришга жуда ҳам иштиёқманд, учрашувни сабрсизлик билан кутяпти.

Мистер Ранкилерни чақирдим, унга қараб қўлимни силкитдим; ёлғиз ўзи ёнимизга яқинлашди ва уни дўстим мистер Томсонга таништирдим.

— Бағоят хурсандман, мистер Томсон,— деди.— Бахтга қарши, кўзойнагимни унутиб қолдирибман; мана, дўстимиз мистер Дэвид ҳам айтиши мумкин (у елкамга қоқиб қўйди), кўзойнагим бўлмаса, шапкўр бўлиб қоламан. Шунинг учун агар эртага сизни учратиб қолсаму ёнингиздан индамасдан ўтиб кетсан, сира ҳам ажабланманг.

Аслида, Аланга таскин бериш учун шу гапларни айтди, аммо тоғлиқ йигитнинг иззат-нафсини қитиқлашга арзимас баҳона кифоя қиласарди.

— Сэр, раҳмингиз келсин, бу нима деган гап бўлди! — деди у жиддий оҳангда.— Ягона мақсадимиз — мистер Бэлфур ҳақиқатни топиши лозим; ўйлашимча, бизни боғлаб турадиган шундан бошқа ҳеч қандай умумий манфаатимиз йўқ. Шундай бўлса-да, узрингизни қабул қиласман; у айни пайтда айтилди.

— Мистер Томсон, менинг шундан бошқа ниятим ҳам йўқ! — деди Ранкилер зардали тарзда.— Хўш, энди ана шу корхонада иккаламиз асосий хизматкор эканмиз шекилли, шундоқ бўлгач, менимча, барча нозик масалаларни маслаҳатлашиб олмоғимиз даркор. Келинг, яхшиси, қўлтиғингиздан ушлаб олайн, акс ҳолда йўлни ғира-шира кўрояман, холос; қоронғи тушиб қолганга ўхшайди, боз устига, кўзойнагим ҳам уйда қолибди... Сиз эса, мистер Дэвид, вақтингизни бекор кетказмасдан шакаргуфтотор Торренс билан суҳбатлашиб туринг. Фақат ижозат берсангиз, бир гапни эслатиб қўйсам, сиз билан дўстингиз мистер... ҳм-м... Томсоннинг саргузашлари ҳақида унга батағсил гапириб ўтиришнинг ҳеч қандай ҳожати йўқ.

Улар ўзаро қизғин суҳбат бошлашди олдинда йўлга тушишди, Торренс иккаламиз срқада шошилмасдан юра бошладик.

Рўпарамиздан Шос қўргони кўринган чоқда оқшом чўккан эди. Соат ўн марта занг урди; осмонда ой кўринмасди, ҳаво илиққина; жанубий-ғарбдан, эсаётган

майин шабода япроқларни шитирлатарди; қадам товушларимиз деярли эштилмасди; қўрғонга яқин бордик, лекин бу томонда чироқнинг йилт этган шуъласи ҳам кўринмасди. Афтидан, амаким аллақачон ўринга кириб ётиб олганди; бизга эса айнан шу нарса керак эди. Кўзланган манзилга эллик қадамча қолганда охирги марта шивирлашиб маслаҳатлашиб олдик; сўнгра Торренс, қози ва мен эҳтиёткорлик билан қўрғоннинг ёнгинасига бордик-да, бурчакка яшириндик; Алан эса намойишкорона тарзда остонаяга яқинлашдию эшикни муштлаб-муштлаб тақиллатишга киришди.

### Иигирма тўққизинчи боб

#### МУРОДИМГА ЕТДИМ

Алан анча вақтгача эшикни дўмбира мисоли гумбирлатиб чалаверди; товуш қўрғон деворларига тегиб акс садо берарди ва атрофга тараларди. Ниҳоят, дераза лўқидони оҳиста туширилди; сездимки, амаким кузатув маррасидан жой олган эди. Фира-шира кўройдинда у фақат остонаяда турган Алани илғаси мумкин, холос. Учта гувоҳ эса қоронгиликда кўринмасди; одам ўз уйида хавотирланиб ўтиргани кишининг кулгисини қистатарди. Дастребки дамларда чақирилмаган меҳмонни зимдан кузатиб турди, сўнгра иккиланиброқ гап бошлади — гўё панд еб қолишини кўнгли сезиб қолган эди.

— Ким у? — деди.— Яхши кишилар кечалари дайдиб юришмайди, бемаҳал қичқирадиган хўroz билан гапни чўзиб ўтирмайман. Нима керак? Айтиб қўяй, қўлимдан пилтамилтиғим бор.

— Мистер Бэлфур сиз эмасми? — деб сўради Алан ва орқасига бир-икки қадам чекинди-да, қоп-қоронғи деразага нигоҳини қадади.— Пилтамилтиқни эҳтиёт бўлиб ушлаб туринг; жуда ишончсиз дастмоя — ўзидан-ўзи отилиб кетиши ҳеч гап эмас.

— Нима керак, деяпман?! Ким бўласиз? — деди амаким тишлигини ғиyrлатиб.

— Мен ўз номимни айтиб, бутун ўлкага айюҳаннос солишига орзуманд эмасман,— деди Алан.— Лекин менга нима кераклиги — бошқа масала; у мендан кўра ҳам кўпроқ сизга тегишли. Ижозат берсангиз, уни куйга солиб, иннайкейин сизга етказишим мумкин.

— Қанақа иш ўзи? — деб сўради амаким.

— Дэвид,— деди астагина Алан.

— Нима? Нима бўпти? — деб сўради амаким бутунлай бошқача товушда.

— Хўш, номини тўлиқ айтаверайми? — деди Алан. Сукунат чўкди.

— Шошманғ-чи, ҳозир уйга киритаман, — деди амаким ишончсиз товушда.

— Киритмасангиз ҳам бўлмайди-да,— деди Алан.— Лекин ичкарига кираманми — аввал шуни сўранг-да. Очиғини айтсам, биз сиз билан ана шу жойда — остонаяда гаплашиб қўя қоламиз: мана шу ерда гаплашамиз ёки умуман гаплашмаймиз, тушундингизми? Биласизми, мен ўжарман; асли наслимни суриштириб келсак, қоним хийла тоза бўлиб чиқади.

Ишнинг бу даражада чаппасига қетиши Эбенезерни довдиратиб қўйди; бир қанча вақтгача эсанкираб турдию сўнгра:

— Начора, шундай қилиш лозим бўлса, шундай қиламиз-да,— деди ва деразани ёпди.

Аммо пиллапоядан пастга тушгунча анча-мунча вақт ўтиб кетди, эшикнинг ҳамма қулфларини очгунча хийла овора бўлди: чамаси ҳар бир поғонага қадам босаётганда, ҳар бир занжирни тушираётганда ичиди ўзини койирди, қўрқувдан дир-дир титрарди. Нихоят, лўқидоннинг ғийқ этган товуши эшитилди: амаким ниҳоятда эҳтиёткорлик билан остона ҳатлаб ташқарига чиқди ва (Аланни бир неча қадам нарига кетганини кўргач) пиллапоянинг юқори поғонасига ўтириб олди; қўлида пилтамилтиғи отишга шай бўлиб турарди.

— Хушёр бўлинг! — деди.— Пилтамилтиқ ўқланган, агар жойингиздан бир қадам жилсангиз — асфаласофилинга кетдим, деяверинг.

— Сени қара-ю! — деди Алан.— Мулозамат ҳам сал эви билан-да.

— Нима бўпти,— деди амаким,— вазият қалтис, демак эҳтиёт бўлиб туришим лозим. Хўш, энди келишиб олдик, қани гапиринг — муддао нима?

— Хўп, майли,— деди Алан.— Сиз фаросатли инсонсиз; чунончи, тоғли ўлкада туғилганимни аллақачон пайқаган бўлсангиз керак, албатта. Номимнинг бу ишга алоқаси йўқ, фақат менинг юртим Малл оролига яқин эканини айтиб қўймоқчиман, холос. Ўйлайманки, орол ҳақида эшитган бўлсангиз керак. Тасодифни қарангки, худди ўша жойда битта кема ҳалоқағга учради; эртаси куни қариндошим қумлоқ соҳилда синик

ёғочларни териб юрса бирдан сувга чўкиб ётган битта йигитчага дуч келиб қолибди. У ўсмирнинг оёғини кўтариб, ичига тўлиб қолган сувни чиқариб ташлабди, кейин шерикларини ёрдамга чақирибди. Хуллас, кўплашиб йигитчани эски қўргонга олиб кетишибди; ҳозир ўша ерда хасталаниб ётибди. Лекин қариндошларим уни боқишига қийналишяпти. Улар — кўчманчилар; бошқалар каби қонунга итоат этиб, бир жойда муқим ўтиришавермайди; аниқлашича, йигитча бой-бадавлат хонадон арзандаси экан; мистер Белфур, у туғишган амакиваччангиз бўлар эмиш; шунинг учун мени ўша хусусида гаплашиб келгани жўнатишди. Аввал-бошдан огоҳлантириб қўймоқчиманки, агар келиша олмасак, бундан кейин уни тирик кўришингиз душвор. Негаки, қариндошларим унчалик ўзига тўқ кишилар эмас,— деб шунчаки қўшиб қўйди Алан охирги сўзларини.

Амаким томоқ қириб қўйди.

— Қайғуришга ҳам арзимайдиган мусибат рўй бериди,— деди.— У азалдан сариқ чақага қиммат пандавақи эди. Хўш, нима учун мен уни қутқариб олишим лозим экан?

— Э-э, ҳа, нимага ишора қилаётганингизни билиб турибман,— деди Алан.— Уни арzon-гаров нарҳда сотиб олиш мақсадида жўрттага ўзингизни бепарво қилиб кўрсатмоқчи бўляпсиз.

— Асло ундей эмас, бор ҳақиқатни айтяпман,— деди амаким.— Йигитчанинг тақдиди мени мутлақо қизиқтирмайди, уни қутқариб олиш учун пул тўла майман; истасаларинг, йигитчани сўйиб, ёғидан совун қилинглар.

— Жин урсин, сэр, қондошлиқ — ҳазил гап эмас! — деб қичқирди Алан.— Ҳеч жаҳонда аканинг ўғлидан ҳам воз кечиш мумкинми, бу ахир иснод-ку! Уялинг-э! Агар шу гапингиздан қайтмасангиз, бутун ўлкага гап тарқатиб юборамиз: ўйлайманки, кейин ўзингизга қийин бўлади.

— Менга ҳозир ҳам осон бўлаётгани йўқ,— деди Эбенезер.— Қолаверса, одамларга бу гапларни исботлаб бўлмайди-ку? Албатта ҳеч ким бу ҳақда миқ этмайди. Дўсти азиз, бекорга сафсата сотиб ўтирибмиз.

— Ундей бўлса, демак Дэвиднинг ўзи гапириб беради,— деди Алан.

— Қандай қилиб? — деб сўради амаким хавотирланиб.

— Ўз оғзи билан гапириб беради, вассалом,— деди Алан.— Сир эмаски, қариндошларим тутқун

эвазига мүмай пул ишлаб олишдан умидини узгунларига қадар жиянчангизни ушлаб ўтиришади; умидлари пучга чиққач эса кетига бир тепиб ҳайдаб юборишади: тўрт томонинг қибла, дейишади.

— Йўқ, бундай қилиш ярамайди,— деди амаким.— Бу оқилона иш эмас.

— Шундай бўлишини билардим,— деди Алан.

— Қаердан билардингиз? — деб сўради Эбенезер.

— Нега билмас эканман ахир, мистер Бэлфур? — деди Алан.— Эшитишимга қарагандা, иш тескари томонга айланиб кетиши мумкин: Дэвидни асраб қолиш учун пул тўлайсиз ва ҳузурингизга чақириб оласиз ёки асосли сабабларга кўра, унинг келишини асло истамайсиз: биз уни озодликка қўйиб юбормаслигимиз учун ҳақимизни берасиз. Кўриниб турибдики, биринчи йўлни танламоқчи эмассиз; хўп, майли, демак иккинчи йўлдан кетамиз — бундан қариндошларим хафа бўлишмайди, албатта. Чунки қабиламиз бир киши ҳисобига кўпаяди...

— Негадир мақсадингизни унчалик англай олмаяпман,— деди амаким.

— Ростданми? — деди Алан.— Маълумотингиз учун, мен асилзодаман; қирол ҳам бизнинг уруғимиздан; қандайдир дайди савдогар эмасман, сизнинг оstonангизда итга ўхшаб ётиб олмайман. Ҳозироқ менга бирорта жўяли жавоб берасиз ёки тумшуғингизни ёриб ташлайман; Гленко қоялари ҳаққи, қасам ичаман!

— Эй биродар, сал паст тушинг! — деб ўкириб юборди амаким, зўрға ўрнидан турар экан.— Нима бало, пашша чақиб олдими? Мен оддий одамман, рақс муаллими эмасман, ҳар доим жўяли гапираман. Оғзингиздан боди кириб, шоди чиқяпти; ҳатто гапларингизни эшитиш ҳам уят. Жағимни ёриб ташлар эмиш, гапини қаранглар-а! — деб тўнғиллади.— Қўлимдаги пилтамилтиқни кўрмаяпсанми?

— Путурдан кетган қўлингиздаги милтиқ Аланнынг қиличи қаршисида нима бўлибди? — деб жавоб берди дўстим.— Булар гўё мудроқ босген шиллиққўрту тезучар қалдирғочга ўхшайди-ку! Қиличим кўксингизнинг титиғини чиқариб юборган чоғда ҳатто тепкини босишга ҳам улгурмай қоласиз!

— Ҳа, майли, лекин бирор мунозара қилаётгани йўқ-ку, ахир?! — деди амаким.— Майли, сиз айтганча бўла қолсин, мутлақо эътиroz билдиrmайман. Фақат ўзингизга нима кераклигини айтсангиз — бас, бирпасда келишиб оламиз.

— Сэр, бир нарсанни истайман, холос,— деди Алан.— Яъни, тилёғламалик қилмасинлар. Қисқаси, лўнда қилиб айтганда: йигитчани ўлдириш керакми ёки тутқунликда сақлайликоми?

— Ўҳ, сени қара-ю, бу жуда оғир гуноҳ-ку! — деди Эбенезер саросимага тушиб.— Гуноҳи азим-ку! Ҳатто айтишга ҳам тил айланмайди-я!

— Ўлдирилсинми ёки тирик қолсинми? — деб саволини тақорорлади Алан.

— Тирик қолсин, тирик! — деди амаким зорланиб.— Шафқат қилинг, ҳеч қандай қон тўкилмасин!

— Начора, ўзингиз биласиз,— деди Алан.— Лекин бу жуда қамматга тушади.

— Қимматга тушади?! — деб қичқириб юборди Эбенезер.— Наҳотки, қўлингизни қонга булғашдан ҳазар қилмасангиз?

— Вой-бў! — деб хитоб қилди Алан.— Бари бир эмасми, ҳар икки ҳолат ҳам жиноят-ку! Лекин ўлдириб қўя қолсак, ишимиз осон кўчарди. Ўсмирни ушлаб ўтиришнинг турган-битгани дардисарликдан иборат.

— Бари бир тирик қолишини афзал кўрардим,— деди Эбенезер.— Умримда ҳаром ишларга қўл урмаганман; қандайдир тоғдан тушган ёввойи одамнинг кўнглини олиш учун қинғирлик қилишни истамайман.

— Қаранглар-а, виждонли одам экан-ку...— деди Алан мазахлаб.

— Мен эътиқоди мустаҳкам инсонман,— деди Эбенезер соддадиллик билан.— Шунинг учун жазога лойиқ бўлсам, майли, жазоланайин. Боз устига, Ҷингизда бўлсин, ўша ўсмир — туғишган акамнинг ўғли бўлади,— деб қўшиб қўйди.

— Ҳм-м, ана холос,— деди Алан.— Ундей бўлса, нарх-навони келишиб олсак. Аниқ қийматни айтиш хийла мушкул; авваламбор, баъзи бир аҳамиятсиз ўринларга ойдинлик киритиш керак. Масалан, Хозисонга бай пули сифатига қанча берганингизни билиб олсан ёмон бўлмасди.

— Хозисонгами? — деб бақириб юборди амаким ҳайратга тушиб.— Нима учун пул берган эканман?

— Дэвидни ўғирлаб кетиш учун-да! — деди Алан.

— Ёлғон, қип-қизил ёлғон! — деб ҳайқирди амаким.— Уни ҳеч ким ўғирлагани йўқ. Уялмай-нетмай сизни алдашибди. Ўғирлаган эмиш! Ҳеч қачон бундай бўлмаган!

— Агар ўғирлаб кетишмаган бўлса, бунинг бизу сизга ҳеч қандай алоқаси йўқ,— деди Алан.— Ҳатто Ҳозисонга ҳам алоқадор эмас; агар сўзлари рост бўлса, албатта.

— Буни қандай тушунмоқ лозим? — деб қичқириди Эбенезер.— Демак, Ҳозисон ҳаммасини гапириб бериди-да?

— Бўлмасам-чи, нима деб ўйловдинг, қари тўнка!— деб қичқириб юборди Алан.— Бундай гапларни яна кимдан эшитишим мумкин? Ҳозисон иккаламиз аслида битта одаммиз; у албатта ўз улушимни беради. Энди амин бўлгандирсизки, ёлғон гапиришдан сизга заррача ҳам фойда бўлмайди... Ҳа, ростини айтиб қўя қолай: ўша денгиз шунқорига сирларингизни очиб, аҳмоқона иш қилгансиз. Бироқ сўнгги пушаймондан наф йўқ: ҳар ким экканини ўради. Гап бошқа ёқда: сиз унга қанча бергансиз?

— Ўзи айтмадими? — деб сўради амаким.

— Бу билан ишингиз бўлмасин,— деб жавоб берди Алан.

— Хўп, ҳаммаларинг бир гўр-ку,— деди амаким.— У нималар деб сайраган бўлса ҳам, ҳаммаси қип-қизил ёлғон; ҳақиқат эса, худо шоҳид, мана бундай: унга йигирма фунт тўлаганман. Ростини айтсан, бундан ташқари, ўсмирин Каролинада сотиб юборгандан сўнг пулнинг мъълум қисмини беришим лозим эди. Лекин асло чўнтағимдан кетмасди, тушунарлимни?

— Мистер Томсон, ташаккур сизга! Шунинг ўзи кифоя,— деди қози бурчакдан чиқар экан.— Хайрли кеч, мистер Бэлфур! — деди ёлғондакам мулозамат билан.

— Хайрли кеч, Эбенезер амаки! — дёдим.

— Мистер Бэлфур, об-ҳавонинг ажойиблигини қаранг-а! — деб қўшиб қўйди ўз навбатида Торренс.

Амаким миқ этмади; зинапоя устида лом-мим демасдан тураверди: тилдан қолгандек кўзларини лўқ қилганча тикилиб қолди. Алан унинг қўлидаги пилтамилиқни тортиб олди; қози эса, қўлтиғидан олдию остона ҳатлаб ичкарига ўтди ва ошхона томон бошлади (уларнинг ортидан биз ҳам эргашдик); ўчоқ ёнидаги стулга ўтқазди: ўчиб қолаёзган оловдан илиққина тафт юзимизга урилди.

Дастлаб, ҳаммамиз тик турганча унга тантанали назар ташладик; ишимиз муваффақиятли яқунланганидан мамнун эдик. Айни пайтда шармандаи шармисор

**бўлган рақибимизга ич-ичимида ачинардик, албатта.**

— Етар, мистер Эбенезер, қўйинг энди,— деди қози.— Ноумид бўлманг, сизни хору зор қилиб қўймаймиз. Чин сўзим — шу, ишонаверинг. Ҳозир эса, марҳамат қилиб, сандиқнинг калитини берсангизу Торренс отангиздан қолган винодан бир шиша олса ва ана шу тантанани муносиб нишонласак! — Кейин орқасига ўгирилди-да, қўлимдан тутди ва:— Мистер Дэвид, ҳаётингизда рўй берган ажойиб ўзгариш билан қизғин табриклийман! Менимча, сиз шунга лойиқсиз,— деди. Сўнgra жиддий қиёфада Аланга юзланиб:— Мистер Томсон, ижозат берсангиз, сизга ҳам чин дилдан миннатдорчилик изҳор этсам!— деди.— Ўз ролингизни моҳирона ижро этдингиз. Аммо бари бир унчалик тушунмадим: исмингиз Жеймсми ёки Карлми? Агар ундан бўлмаса, демак Георгсиз-а?

— Сэр, нима учун мен ана шу уч номдан биттаси билан аталашим лозим, ахир?!— деди Алан жангарилиги тутиб. Афтидан, хафа бўлиб қолганга ўхшарди.

— Йўғ-э, сэр, ўзингиз қироллар авлодидан бўламан, деб эслатиб ўтганингиз учун шундай деяпман, холос,— деб жавоб берди Ранкилер беғараз оҳангда.— Ҳартугул, шу пайтгача қирол Томсон деган зот довруғини эшиганим йўқ; ўладимки, сиз чўқинтириш маросимида берилган исмни назарда тутган бўлсангиз керак, ҳойнаҳой.

Нозик жойга зарба берилган эди: очиғини айтсам, бу гап Аланга оғир ботди. У бир оғиз ҳам гапирмасдан, ошхона бурчагига борди-да, хўмрайганча ўтириб олди; қачонки унинг қўлини қисиб қўйганимдан ва тантанали кунларимда хизматлари бекиёс эканини таъкидлаб, миннатдорчилик изҳор этганимдан кейингина у лабининг чети билан маъюс жилмайди: даврамизга қўшилишга рози бўлди.

Бу пайтда ўчоқقا гулдиратиб гулхан ёқилган эди; шиша тиқини очилиб, саватчадан олинган сархил емишлар стол устига териб қўйилди; Торренс, Алан ва мен мириқиб овқатлана бошладик, қози эса шартнома тузиш учун амаким билан нариги хонага кириб кетишди. Улар эшикни зичлаб ёпишганча бир соатча кенгаш ўтказдилар; охири бир тўхтамга келишди: сўнgra амаким билан мен ҳужжат остига имзо чекдик. Шартномага биноан, ўртада воситачилик қилгани учун амаким Ранкилерга ҳақ тўлаши; менга эса ҳар йили

Шос қўрғонидан келадиган даромаднинг учдан икки қисмини бериши керак эди.

Шундай қилиб, эртаклардагидек ялангоёқ дайдигитича ўз ер-мулкига эга бўлди; ўша кечаси ошхонадаги сандик устига бадавлат киши мисоли, асилзода зотнинг меросхўри каби талтайиб чўзилдим. Алан, Торренс ва Ранкилерлар ўзларининг қаттиқ ўринларида тинмасдан хуррак отишарди. Мен эсам, неча кунлардан бери оч-наҳор, балчиққа ботиб ёки тошларга бош қўйиб ётиб юрган бўлсам-да, уйқу нималигини деярли унтиб қўйганимга қарамай, боз устига, келажагимни ўйлаб даҳшат ичра яшаган бўлсам ҳам, кутилмаган ўзгаришлар қаршисида эсанкираб қолдим; бирданига улкан баҳт-саодатга эришганимни сира тасаввуримга сиғдиролмасдим; шунинг учун тонг отгунча шифтга термилиб, ўйноқлаётган шуъларни томоша қилиб, келгуси ҳаётимни ўйлаб ётдим.

## Ўттизинчи боб

### Хайрлашув

Мана, энди бошпанам бор. Бироқ Аланни ўйласам виждоним қийналарди; ундан жуда катта қарздор эдим. Юрагимнинг туб-тубида ғам-андуҳ оғир тошдек чўкиб ётарди: яъни, Жеймс Глен ноҳақ равишда қотилликда айбланаарди. Эрталабки соат олтиларда — Ранкилер иккаламиз Шос қўрғонига атрофини саир этиб юрган пайтимизда кўнглимдаги дардларни унга тўкиб солдим. Кўз ўнгимизда бир вақтлар ота-боболаримга қарашли бўлган бепоён далалар, ўрмонлар яшнаб турарди. Ҳозир буларнинг хўжайини камина эди. Хийла серташвиш мавзуда сухбатлашаётган бўлсак-да, олис-олисларга зўр қониқиш билан, қувониб нигоҳ ташлардим; ғурурим ичимга сиғмасди, юрагим гурс-гурс уради.

Дўстим қаршисида бурчли эканимни қози сўзсиз тан олди. Қандай қилиб бўлса ҳам унинг Шотландиядан чиқиб кетишига ёрдам беришим лозим эди; аммо Жеймснинг тақдиди масаласига у бошқача нуқтаи назардан қаради.

— Мистер Томсон — бошқа масала,— деди.— Мистер Томсоннинг қариндоши эса — бутунлай бошқа

масала. Икир-чикирлардан батафсил хабардор эмасман, лекин билишимча, бу ишни шахсан акобир жанобларининг аралашувисиз ҳал этиб бўлмайди (ижозат этсангиз, биз у зоти олийни Г. А.<sup>1</sup> деб атай қоламиз). Тахминларга қараганда, у киши айбланувчи тўғрисида муайян бир тўхтамга келган кўринадилар. Г. А. шубҳасизки, олижаноб мулкдор ҳисобланади. Аммо барибир, мистер Дэвид, худобезорлардан кўркиш лозим. Агар ўртага тушиб ноҳақ қон тўқилишига тўсқинлик қилмоқчи бўлсангиз-да, доимо бир нарсани ёддан чиқарманг; сиздан гувоҳ сифатида қутулишнинг ишончли воситаси бор: ўзингизни ҳам судланувчилар курсисига ўтқазиб қўйишади, вассалом. У ерда мистер Томсон қариндошининг бошига тушадиган кулфатга шерик бўласиз. Мен айбдор эмасман-ку, деб эътиroz билдиришингиз мумкин, аммо у ҳам айбсиз-ку?! Ўзаро низоларни тоғлик қасамхўр маслаҳатчи-судьялар ажрим қилишса, устига устак, судья лавозимида яна битта бадбашара тоғлик ўтиrsa, бундай суд билан дорнинг ораси бир қадам бўлиб қолади.

Ростини айтсам, ана шунаقا исботу далилларни ўзим ҳам билганимдан эътиroz қилиб ўтирамадим. Аммо соддадиллик билан ёрдам беришини илтимос қиласвердим.

— Сэр, унда дор остига боришдан бошқа иложим йўқ экан-да? — дедим.

— Азиз болажоним, худо хайрингизни берсин, Боринг, билганингизни қиласверинг! — хитоб қилди Ранкилер.— Аслида, сизни тўғри бўлса-да, шармандали йўлга бошлаётган ўзим аҳмоқман! Айтган сўзларимни қайтариб оламан, мени кечирасиз! Боринг, ўз бурчингизни адо этаверинг: лозим бўлса, ҳалол инсон сифатида дорга осилиб ўлаверинг! Ҳаётда дорга осилиб ўлишдан ҳам ёмонроқ ишлар учраши мумкин-ку, ахир.

— Үндай ишлар жуда оз, сэр,— дедим кулимсираб.

— Афсуски, маъзур тутасиз, сэр! — деб қичқириб юборди Ранкилер.— Үндай ишлар жуда сероб. Масалан, узоққа бориб ўтирмайлик: амакингиз одоб юзасидан бошини сиртмоққа тутиб бериб, дорда осилиб ётганда борми, энг камида йигирма марта фойда қиласарди!

Шундай деб у қўрғонга қайтди (ҳамон ҳовуридан

<sup>1</sup>Герцог Аргайлский (муаллиф ўзохи).

түшмаган эди: кўриниб турардики, ўжарлигим унга қимматга тушганди) ва менга атаб иккита хат ёзди; уларни нима қилишим керак эканини тушунтириди.

— Мана бу — Британия зиғиркорлик қарз-ҳавола жамиятидаги банкчиларимга ишончнома: улардан сизнинг номингизга кирим-чиқим ҳисоби очишларини илтимос қилдим,— деди.— Мистер Томсон барча йўл-йўриқларни ўргатади; у киши бу жойларни жуда яхши билади. Сиз қарз ёрдамида дўстингизнинг хорижий мамлакатга чиқиб кетишини таъминлайсиз. Умид қила-мәнки, ўз пулингизни сал ўйлаброқ сарфлайсиз, аммо мистер Томсон каби дўстларим бўлганда, пулинг юзига қараб ўтирасдан ишлатаверардим. Унинг қариндоши масаласига келсак, Бош прокурор ҳузурига борсангиз ўзингиз учун ҳам яхши бўларди; ҳаммасини бир бошдан сўзлаб беринг ва гувоҳликка ўтажагингизни ҳам айтинг: у сизнинг таклифингизни қабул қилиш-қилмаслиги — бутунлай бошқа гап; бу Г. Ага боғлиқ муаммодир. Сизни Бош прокурорга таништириб қўйишлари учун олим адашингиз бўлмиш пилриглик Бэлфур номига хат ёзиб беряпман; у зотни жуда ҳурмат қиласман. Агар сизни отдошингиз таништирса, мақсадга мувофиқ бўларди: Пилриг соҳиби ҳуқуқшунослар ўртасида катта обрўйга эга, у Бош прокурор Грантнинг ҳам ишончини қозонган. Агар ўрнингизда мен бўлганимда, ортиқча тафсилотлар билан унинг бошини қотириб ўтирасдим. Биласизми, менимча, мистер Томсон номини эслатиб ўтиришнинг ҳеч қандай ҳожати йўқ. Мистер Бэлфурдан ўрнак олишга ҳаракат қилсангиз кам бўлмайсиз; у тақлид қилишга арзидиган муносиб инсон. Бош прокурор билан муомала қилаётган чоғингизда тилингизга ниҳоятда эҳтиёт бўлинг. Мистер Дэвид, барча ишларингизда худо сизга ёр бўлсин!

Сўнгра у ҳаммамиз билан хайрлашди-да, Торренс ҳамроҳлигида паром қатнайдиган кечув томон йўл олди. Ўз навбатида Алан иккаламиз ҳам Эдинбург шаҳри сари отландик. Биз майсалар ўсиб ётган сўқмоқдан юрдик; тош устунлару чала-ярим қоровулхона ёнидан ўтдик: аждодларимдан қолган маконни йўл-йўлакай томоша қилиб кетдик. Қўрғон ниҳоятда улуғвор эди, лекин одам яшамайдиган вайрона каби ҳувиллаб ётарди, совуқ кўринарди; фақат юқоридаги деразадан ҳудди уясида ўёқдан-буёққа югуриб юрган қуённинг қулоғидай битта қалпоқ дам-бадам кўриниб қоларди. Ҳа, мени бу ерда қучоқ очиб кутиб олишмади, ёмон кўз билан қар-

шиладилар; аммо кетаётган пайтимда ортимдан пинҳона кузатиб қолиши, шунисига ҳам шукр!

Алан икковимиз имиллаб қадам ташлардик; гаплашгимиз ҳам, илдамроқ юргимиз ҳам келмасди. Бир нарса хусусида хаёл сурардик; айрилиқ онлари яқинлашмоқда эди, ўтган кунлар хотираси елкамиздан оғир юқ каби эзib турарди. Албатта, биз қиласидан ишларимиз борасида гаплашиб олган эдик; Алан унча олис бўлмаган жойларда — гоҳ у ерда-гоҳ бошқа ерда яшириниб юриши лозим эди. Лекин ҳар куни бир марта келишилган паккага келиши шарт эди; ўзим ёки учинчи одам воситасида у билан алоқа боғлаб туришим керак. Айни замонда эпинлик Стюартлардан чиққан бирорта қози билан боғланишим даркор эди; чунки унга бемалол ишонса бўларди: топшириқ шундан иборатки, муносиброқ бирорта кема топиш ва Алан унга омон-эсон чиқиб олиши учун шароит яратиб бериш керак эди. Бу масалаларни муҳокама этганимиздан сўнг, маълум бўлдики, тилимизга гўё тушов тушганди: тўғри, Аланни «мистер Томсон» деб мазахлардим, Алан эса янги уст-бошларимдан, ер-мулкимдан куларди, аммо ҳозир куладиган аҳволда эмаслигимизни билиб олиш унчалик қийин эмасди, балки ийлагимиз келарди.

Яқин йўлдан юрдик; Корсторфинский довонидан ошиб ўтишга қарор қилдик: Нафас Ростла деган жойга етган пайтимиз, пастликда ястаниб ётган Корсторфинский ботқоғига ва ундан-да нарида — тепаликда қўр тўкиб турган шаҳарга нигоҳ ташладик. Иккаламиз ҳам бирдан тўхтаб қолганимизга сабаб — худди шу ерда йўлимиз ажралиши лозим эди; буни ҳар биримиз жуда яхши билардик. Дўстим боя келишиб олган шартларни менга қайтатдан эслатиб қўйди: қозини қаердан топиш мумкин; уни — Аланни куннинг қайси палласида учратамиз: белгиланган вақтда албатта ўша паккага келиб туради; учрашувга юборилган бегона киши қандай имо-ишора қилиши лозим ва ҳоказо. Сўнгра оч-наҳор қолмаслиги учун чўнтагимдаги ҳамма пулимни Аланга бердим (менда Ранкилердан олганим икки танга бор эди, холос). Охири Эдинбургга термилганимизча бир неча дақиқа сукут сақладик.

— Хўп, майли, хайр! — деди Алан ва менга чап қўлинни узатди.

— Хайр! — дедиму қўлинни маҳкам қисиб қўйдим ва нишабликдан пастга қараб туша бошладим.

Биз бир-биримизга қарамасликка ҳаракат қиласадик; у үзоқлашиб кетгунча ортимга ўгирилиб боқмадим. Лекин шаҳарга кетаётib ўзимни шунчалар бечораҳол, ёлғиз ҳис этдимки, йўл четига ўтириб олиб ёш боладай ерга юмалаб-юмалаб йиғлагим келди.

Уэсткирк ва Грассмаркетни ортда қолдириб, пойтахт кўчасига чиққан пайтимда вақт тушликка яқинлашиб қолган эди. Ўн-ўн беш қаватли баланд иморатлар; торгина, қуббали дарвозалар, поёнсиз гавжум йўлкалар; дўйонларнинг пештахталарига ёйиб қўйилган мол-маттаҳлар; ғала-ғовуру югур-югур, димоқни ёрадиган сассиқ ҳидлару башанг кийимлар, кўплаб ажойиботлару майдадчидалар мени дафъатан эсанкиратиб қўйди. Бир жойга етганимда оғзим очилиб, лаллайи-иб қолган эканманми — билмадим, эс-хушимни йиғиштириб мундоқ қарасам, кўчани тўлдириб кетаётган оломон оқими номаълум томонга сурини кетаётибди-ю, мен эсам фақат Нафас Ростла тепалигида турган чоғимиздаги Алланнинг қиёфасини эслайман, холос. Албатта, тез орада янгиликлар кишини ҳайратга солиши турган гап. Бироқ ҳозир ичимга чироқ ёқса ёримасди, негадир дилим хуфтон эди: назаримда, қандайдир ишни кўнгилдагидек бажармаганга ўхшардим.

Тақдир тақозоси билан оломон оқими мени нақ Британия зиғиркорлик қарз-ҳавола жамиятининг осто-насиға элтиб ташлади.